





ضلع سرگودھا

(جغرافیہ، تاریخ، ثقافت، ادب)

محمد حیات

D:\Logo
+Pnj\Instit
Logo.tif
not

پنجاب انسٹیٹیوٹ آف لینگویج، آرٹ اینڈ کلچر، لاہور

ایس کتاب دے سارے حق ادارے کول نیں۔

کتاب: ضلع سرگودھا.....جغرافیہ، تاریخ، ثقافت، ادب

مصنف: محمد حیات

چھپائی آہر: ڈاکٹر صفرا صدف

ٹائٹل: فیضان امجد

ڈیزائن: محمد عاصم چودھری

کمپوزنگ: رضوان الحسن

پہلی وار: جون 2013ء

تعداد: 200

چھاپا خانہ: جاوید ریاض پرنٹرز، لاہور

مُل: 900 روپے

(Trinjan\Lo
rj\govt-log
not
found

Trinjan\Lo
+Pnj\Instil
Logo.tif
not

Punjab Institute of Language, Art & Culture

Punjabi Complex, 1-Gaddafi Stadium, Ferozpur Road, Lahore.

Ph: +92-42-99232165-70 Fax: +92-42-99231766

E-mail: pilacpk@gmail.com Website: http://pilac.punjab.gov.pk

انتساب

اسلامی پرائمری سکول

جھاوڑیاں

دے استاد عبدالرسولؒ تے حیدر شاہ صاحبانؒ

دے ناں

جہناں مینوں لکھنا پڑھنا سکھا کے

اس قابل بنایا

عزیزی احمد ریاض الہدیٰ

دے ناں

جس نے میرے اس کم وچ مدد کیتی۔

کچھ اپنے بارے

ناں:-	محمد حیات
جم پل:-	جھاؤریاں ضلع سرگودھا
جمن تاریخ:-	4 فروری 1934ء
تعلیم:-	ایم اے اردو، ایم اے فارسی، بی ایڈ
کم کار:-	ریٹائرڈ پرنسپل
لکھیاں کتاباں:-	تاریخ سعودی عرب، تاریخ ایران،
شُغل:-	تاریخ ملت اسلامیہ، تاریخ وسط ایشیا
	آثار قدیمہ دی کھوج

تیناں عالمی کانفرنساں وچ شرکت، سمرقند یونیورسٹی دی دعوت تے
ازبکستان دا دورہ۔ اس توں پہلاں ایران، عراق، کویت، سعودی
عرب، افغانستان تے تاجکستان دے ملک وی ویکھے اہن۔ مختلف
اخباراں تے رسالیاں وچ لکھدا رہندا آں۔

ویروا

باب نمبر 1

جغرافیہ

حدود اربعہ، آب و ہوا، نہراں، آبادی، آباد کاری، ذرائع آمد و رفت، منڈیاں، سڑکاں، پیداوار مال ڈنگر، دریا چنہاں تے اس دی وادی، بار دا علاقہ، دریا جہلم تے وادی، دریا جہلم، بارش، درجہ حرارت، ہنیریاں، بیماریاں، جانور تے پودے۔

ضلع دی بھن ٹرٹ:۔ ضلع دا انتظام، جرم دیاں قسماں، ڈسٹرکٹ بورڈ، محکمہ تعلیم تے محکمہ صحت، وڈے جاگیردار تے انعام دار۔

باب نمبر 2

حصہ تاریخ

تاریخی ماخذ، مذہبی عماراتاں، تاریخ بھیرہ، ویدک دور، برہمنی ادب، رزمیہ ادب، بدھ مت تے جین مت۔

باب نمبر 3

سلاطین دہلی دا زمانہ

التمش، خوارزم شاہ دا حملہ، مغلاں دا حملہ، یلدوز دا حملہ، ٹوانیاں دا قبول اسلام، ریاست اموانی، مغلاں دے بھیرے اُتے حملے، امیر تیمور دا بھیرے اُتے حملہ، سرگودھے دے آس پاس سیاسی تبدیلیاں، بلوچاں دا حملہ، مل خان دی حکمت عملی۔

باب نمبر 4

مغلاں دا زمانہ

بابرتوں پہلاں ضلع دی سیاسی حالت، بابر دا بھیرے اُتے حملہ، خوشابی وفد، ہمایوں تے بھیرہ، شیر شاہ تے بھیرہ، اکبر دا بھیرے آونا، بھیرہ تک جہانگیر دا دریائی سفر، شاہجہان تے رانی واہ بھیرہ، بھیرہ تے اورنگ زیب عالمگیر، نور دین بامزنی دا بھیرے اُتے حملہ، احمد شاہ ابدالی دے کچھے پنجاب دی حالت۔

باب نمبر 5

مقامی ٹوانہ حکومت

راجہ کرن توں میر عالی تائیں، ملک میر احمد خان، مٹھ ٹوانہ دی آبادی، اعواناں دا حملہ، ملک اللہ داد خان، حامد خان دے پُتراں دی بغاوت، شیر خان دی بغاوت۔

باب نمبر 6

مقامی قبائل دیاں لڑائیاں / ملک شیر خان ٹوانہ

پہاڑ خان دی اطاعت، نور پور دی آبادی، خراج توں انکار سیالاں نال لڑائی، نواب منکیرہ نال لڑائی، عالم شیر دا قتل، نادر شاہ دا حملہ، ملک خان تے ملک خان بیگ دی کشمکش، نصرت خان ہوت دی بغاوت، نواب منکیرہ دا حملہ، جاگیر دا انتظام سردار خوشاب نال جنگ، بھراواں دا جھگڑا تے سکھاں دی مدد جاگیر دے دھڑے۔

باب نمبر 7

سکھا شاہی دور، مسلمان جاگیراں دا خاتمہ

رنجیت سنگھ دی مداخلت، خان بیگ دی گرفتاری تے قتل، ملک خان دی سیاست، حافظ احمد خان دا حملہ، رنجیت سنگھ دا حکم، شاہ شجاع دی مٹھ ٹوانہ آمد، رنجیت سنگھ دا حملہ، ہری سنگھ دا مٹھ ٹوانہ اُتے حملہ، جھاوڑیاں نوں ٹوانہ ریاست، نواب احمد یار خان، نواب منکیرہ دی گڑ بڑ، حیات خان لوئی دا حملہ، ریاست منکیرہ دا خاتمہ، ساہیوال اُتے سکھاں دا حملہ۔

باب نمبر 8

گوراشاہی دور

نویں جاگیردار انگریز دا ویلا تے ٹوانے:- ملک فتح خان موتیانوالہ، جاگیر دی

بحالی، نونہال سنگھ دا مٹھ ٹوانہ دا دورہ، رنجیت سنگھ دی وفات، انقلاب، ڈیرہ اسماعیل خان دی گورنری، پشورا سنگھ دا قتل، فتح خان دا انگریزاں نال تعلق، مسئلہ کشمیر تے فتح خان، بنوں دی گورنری تے قتل، فتح خان دی سیرت تے کردار۔

جہان آباد دے ٹوانے:- جہان خان مبارز خان، ممتاز خان تے تحریک پاکستان۔

باب نمبر 9

کالہ سٹیٹ دے ٹوانے

ملک صاحب خان، مہراج سنگھ دا خاتمہ، جنگ رجوعہ، چناب نگر دی لڑائی، جنگ چاچڑاں، چیلیاں آلہ تے گجرات دیاں لڑائیاں، 1857ء دی جنگ آزادی، پنجاب دی حالت، صاحب خان دی پیشکش، اعزازات، خطابات، ٹوانہ لانسرز، آباد کاری، روٹی دی برآمد، وفات تے سیرت۔

باب نمبر 10

ملک عمر حیات ٹوانہ دی خدمات

جمن تے تربیت، املاک دا انتظام، لوک کھیڈاں دا شوقین، گھوڑے پالنے دا شوق، ڈنگراں نوں داغنے دا رواج، شملہ وفد وچ شرکت، عوامی خدمات، فوجی خدمات، پنجاب لیجیسلیٹو کونسل وچ نمایاں کارکردگی، قانون

انتقال اراضی، مرکزی مجلس قانون ساز دی رکنیت، نہرو رپورٹ دی مخالفت، سرکاری ملازمتاں وچ مسلماناں دا حصہ، ہندو راج نوں رد کرنا، روزنامے، سفر حج، وفات تے سیرت، ملک خضر حیات، وزارت عظمیٰ، استعفیٰ، سیاست توں کنارہ کشی۔

باب نمبر 11

نون خاندان

ملک فیروز خان نون، پاکستانی سیاست وچ نوناں دا حصہ، سیاسی رسہ کشی، ملک فیروز خان نون تے سرگودھا، گوادردے مسئلے داخل، وزارت عظمیٰ تے چھٹی، ریٹائرمنٹ توں کچھ مصروفیات، فیروز خان توں کچھ نون سیاست۔

سرگودھے دے پراچے

شیخ فضل الہی، فضل الحق، احسان الحق تے انوار الحق

باب نمبر 12

انگریز دی حکومت دا اجمالی خاکہ

انگریزاں دا اتھتے آؤنا تے ویجا، ڈپٹی کمشنر ضلع سرگودھا، کمشنر سرگودھا ڈویژن، ڈی، آئی، جی۔ برطانوی حکمران پنجاب دے انگریز گورنر، ضلع سرگودھا دیاں جاگیردار قوماں۔

باب نمبر 13

تحریک پاکستان تے سرگودھا

مسلم لیگ دا قیام، پہلا جلسہ، انتخابی دھڑے، الیکشن 1946ء، پاکستانی دور آزادی توں پچھے دا سیاسی حال، سرگودھا دے شاہیناں دے تاریخی کارنامے، تاریخ میلہ جشن سرگودھا، تاریخ ضلع کونسل سرگودھا۔

باب نمبر 14

مذہبی تے روحانی بزرگ

سید احمد شاہ المعروف میراں صاحب، حضرت خواجہ شمس العارفین سیالوی، حضرت خدا بخش المعروف جھلی شاہ۔
ماہرین فن:- حکیم مولوی شاہ محمد شیخوپوریہ۔

باب نمبر 15

سماجی تے سیاسی لوک

چودھری انور علی چیمہ

باب نمبر 16

تہذیب و ثقافت

ثقافت تے تاریخ، انسانی ترقی دی کہانی، مشینی دور دے اثرات، حملیاں دے

اثرات، ہندو مسلم تہذیب دے اثرات، توہم پرستی، بچہ جمن دیاں رسماں، گڑ
ونڈنا، مہارکھ، سُنٹناں، منگیوا، گڈھ، شادی دی تیاری، جج دی تیاری، جج تے
لوک فنکار۔

رسم و رواج:- مرنے دیاں رسماں، کوڑا وٹا، قُل، وداگی، برسی۔

باب نمبر 17

کھیڈاں

بچیاں دیاں کھیڈاں، بچیاں دیاں کھیڈاں، جواناں دیاں کھیڈاں، پڑکوڈی۔
بلدیاتی نظام دی تاریخ:- سرگودھے دیاں مشہور کھیڈاں، کوڈی، چیلی۔

باب نمبر 18

ضلع سرگودھا وچ زراعت

گھوڑی پال سکیم، پرائیویٹ نہراں، دیہاتی، وسیب، ککڑاں دی لڑائی، ڈیری
فارمنگ، ڈیری فارم واسطے ڈنگراں دا چناؤ۔

باب نمبر 19

لوک فنکار

استاد علی بخش، مینا کماری، نیلو، وصی شاہ، کوثر علی فیض ملک، عابدہ پروین، ہما
اکبر، عابد گوندل۔

مشہور کھڑکار:- میاں سلطان، ظہور خان، عابد خان، کشن سنگھ بیدی، مہندر امر ناتھ، سرندر امر ناتھ، لالہ امر ناتھ، شہزادہ قاسم سردار نصر اللہ، سردار عبداللہ، اللہ دتہ فوجی، قادر یار ٹوانہ، مس فاطمہ وغیرہ۔

باب نمبر 20

ضلع سرگودھا وچ پنجابی ادب

باب نمبر 21

اردو ادب - صحافت تے لوک گیت

سرگودھا تے ادب :- پنجابی زبان تے شاہپوری لہجہ، لوک گیت، لوک ناچ۔
پنجابی زبان دی شاعری دی صنف دوہڑہ، نامعلوم شعراء دے دوہڑے۔

باب نمبر 22

سرگودھا دا پنجابی شعری ادب :-

پہلا دور :- مغلاں تے سکھاں دے ویلے دے شعرا
دوجا دور :- انگریزاں دے ویلے دے شعرا
تریجا دور :- پاکستانی دور دے شعرا

ماخذ کتابیات

ایس کتاب بارے

سرگودھا تاریخ دے لحاظ نال پاکستان دے کسے علاقے توں گھٹ
نہیں۔ اس دی تاریخ اتنی ای پرانی اے جتنی پرانی پاکستان دی تے برصغیر دی
اے۔ سرزمین سرگودھا زمانہ قدیم توں ای بہوں اُچی تہذیب تے ثقافت دا
مرکز رہی اے۔ جس ویلے دنیا دے بہوں سارے ملک تہذیب تے ترقی دے
ناں توں واقف وی ناہن تے گمنامی وچ پے ہوئے آہن ایس ویلے اس سر
زمین تے وڈے وڈے بادشاہ حکومتاں کریندے پے آہن۔ سکندر یونانی دا
مقابلہ کرن والا راجہ پورس اسے علاقے دا بادشاہ آہ۔

امب شریف دا راجہ امبریک وی اسے علاقے دا راجہ پورس توں وی
ہزاراں سال پہلے ہويا اے۔ جس دریا جہلم دے کنارے تے دنیا دی پہلی
تاریخ دی کتاب ”رگ وید“ لکھی۔ رگ وید دی لکھائی دا زمانہ چار ہزار سال
قبل مسیح دسیا دیندا اے۔ اس راجہ دے شہر تے قلعے دے کھنڈر تے پانی دی
سپلائی دا کاریز سسٹم ہن تائیں چالو اے۔ لطف دی گل ایہہ اے کہ اس تے
موسم دا کدی وی اثر نہیں ہويا ہر موسم وچ ہکی رفتار نال چل رہیا اے تے
ایس دے آون دی جاہ دا حالے تائیں کسے نوں کوئی پتہ نہیں۔

اس سرزمین دے جغرافیے تے نظر پائیے تے پتہ لگدا اے ایہہ وڈا

وسدا علاقہ رہیا اے۔ دو دریا اس دی صدیاں توں خدمت کر رہے آہن۔ اج کل نہراں نے اس علاقے نوں سرسبز تے شاداب کر چھوڑیا اے۔

کڑانے دیاں پہاڑیاں دے متعلق ماہرین دا خیال اے کہ ایہہ ہمالیہ پہاڑ توں وی پرانیاں آہن۔ ماہرین نے اتھے جائزے لے کے دسیا کہ ایہناں دے اندر سونا چاندی لوہاتے ہور بہوں ساریاں قیمتی دھاتاں پائیاں ویندیاں آہن۔ بجائے اسدے کہ انہاں تے کم کیتا ویندا۔ سٹون کرشراں نے ایہناں نوں بھن تروڑ کے تباہ کر دتا اے۔ ایہناں دے اگے قدیم آریں دے آون دے آثار کٹھے ہوئے آہن۔ اوہ وی تقریباً مک گئے آہن۔ جتھوں تائیں ساڈی ثقافت دا تعلق اے۔ اوہ وی کسے علاقے توں گھٹ نہیں۔ بلکہ ودھ ای اے۔ اتھے ہر قسم دے فنکار ہر زمانے وچ رہے۔ جہناں ساڈی ثقافت نوں پروان چڑھایا۔ اتھے مختلف وقفاں وچ مختلف قوماں دے آون نال تے ایہناں دے میل ملاپ نال دی ساڈی ثقافت دی مثال ہک رنگ برنگے گلدستے ہار ہو گئی اے۔ جس وچ ون سونے پھل کھڑے ہوئے آہن۔

ایہہ ساڈی بدقسمتی ہوئی کہ پرانے زمانے دے تاریخی علمی تے ادبی آثار اپنی قدامت تے انقلاب زمانہ دے ہتھوں تباہ برباد ہو گئے۔ ہُن ساڈی ساری دی ساری معلومات غیر ملکی لوکاں دیاں لکھیاں ہویاں کتاباں تک محدود آہن۔ اس سرزمین نے اپنی تاریخ دے شروع توں ای ہزاراں انقلابات ویکھے۔ اتھے تہذیبیاں بندیاں تے مٹدیاں ویکھیاں گئیاں۔ سکندر یونانی دے حملے، منگولاں دی لٹ مار، تیمور دی مار دھاڑ، وقتی طور تے ایہتھوں دیاں لوکاں

نوں محکوم تاں بنا لیا پر آزادی دی روح جیہڑی ایتھوں دیاں لوکاں وچ ازل
توں موجود اے۔ فنا نہ ہوسکی۔ بلکہ کندن بن کے ابھری۔

ساڈی پنجابی بولی دا ایتھے ہک اپنا لہجہ اے جس نوں شاہ پوری لہجہ
آکھیا ویندا اے۔ اس لہجے نوں اپنا کے قدیم شعرا فخر محسوس کردے رہے۔ پیلو،
حافظ برخوردار تے نجات ساڈی اس بولی دا مان آہن۔ اج تائیں انہاں دا
ثانی پیدا نہیں ہويا۔ پنجابی حافظ برخوردار دا ایہہ احسان وی کدی نہیں بھل
سکدے کیوں جے اس نے پنجاب دی زبان نوں پنجابی داناں دتا۔ اس توں
پہلاں ایہہ زبان ہندی، جگمی ہندی وغیرہ آکھواندی آہی۔

فوجی لحاظ نال وی سرگودھا دنیا وچ مشہور اے۔ فضائی جنگ وچ ایم
ایم عالم عالمی ریکارڈ قائم کیتا۔ تحریک پاکستان دا جس حد تائیں تعلق اے۔ اس
وچ ساڈے ہک وڈے پڑھے لکھے بزرگ استاد ڈاکٹر عمر حیات ملک داناں ہر
ہک دی زبان تے اے۔ انہاں بطور پرنسپل اسلامیہ کالج ریلوے روڈ لاہور
اپنے طالب علماں دے ذریعے قائد اعظم دا پیغام پورے ملک وچ اپڑایا تے
آپ وی قید ہو کے آزادی دا سورج جیل وچ ای ویکھیا۔

ساڈے اس علاقے دی تاریخ بھیرہ دے آس پاس ای پھردی
اے۔ کیوں جے اس ویلے ایہا ای ہک شہر آہ جیہڑا پشاور توں کچھ سب توں
پہلا حملہ آوراں دا نشانہ بندا آہ۔ اسے واسطے سارے وڈے بادشاہ ایتھے
آوندے رہے۔ سرگودھا تے بھلوال دا اج توں سو سال پہلے ناں نشان ای نہ
ایتھے جنگل آہ جس نوں بار آدھے آہن۔

آکھن نوں تاں اس کتاب دا تعلق خاص کر سرگودھا نال اے پر اس دے وچ پڑھن والیاں نوں ہُن دے ضلع خوشاب، بھکر، جھنگ، میانوالی، بنوں، لکی مروت، ڈیرا اسماعیل خان تے پشاور تک دے اس زمانے دے حالات ملمسن۔ کیونکہ اس زمانے وچ مقامی سرداراںہاں علاقیاں تائیں چڑھتل کریندے رہے۔ اُمید اے انہاں علاقیاں دے لوک وی اس توں فائدہ حاصل کریسن۔

اپنے علاقے دی تاریخ لکھنا میری اپنی وی خواہش آہی۔ لیکن نویں کم واسطے مواد اکٹھا کرنا ریٹائر ہوون توں کچھ بہوں اوکھا کم اے۔ شہر بہ شہر پھر کے اس نوں اکٹھا کرنا اس توں وی اوکھا اے۔ اس کم وچ پون نال پتہ لگا کہ مراٹی وڈی کم دی قوم آہی۔ ساڈی بے قدری دی وجہ نال اوہ اس علاقے دی تاریخ نال ای لے کے اللہ نوں پیارے ہو گئے تے انہاں دی اولاد نے ہور کم بھد لے اہن۔

میں اپنی طاقت دے مطابق ایہہ کوشش کیتی اے کہ جیہڑا کجھ ہتھ اوند اے اس نوں اکٹھا کر لیا ونجے تے جیہڑا رہ گیا اوہ اون آ لے محققین اُتے چھوڑ دتا اے کہ اس نوں اگانہہ ودھاوون دا سلسلہ جاری رکھسن۔ تاکہ آون آلیاں نسلاں اپنے بزرگاں دے کارنامے پڑھ کے فخر کر سکن۔

میں اس کتاب دی تیاری دے سلسلے وچ بہوں سارے بیلیاں شاگرداں دا تعاون حاصل رہیا۔ جس واسطے میں انہاں ساریاں دا ڈھڈول شکر یہ ادا کریندا آں خاص کر ڈاکٹر سیف الرحمن ڈار ڈاکٹر محمد سلیم جنہاں آ کے ساڈے ضلع دے آثار ویکھ کے انہاں نوں ہڑپہ تے موجوداڑو توں وی قدیم دسیا اے۔ جتھوں تائیں اس کتاب دے لکھن تے چھین دا تعلق اے۔ اوہ ہک

وڈی لمی کہانی اے۔ پنجابی ادبی بورڈ دے جناب آصف خان صاحب نے اس دا مینوں 1996ء وچ آہر دتا۔ جد ایہہ مکمل ہوئی تے اوہ اللہ نوں پیارے ہو گئے۔ اس توں کچھ ایہہ مسودہ رلدا رہیا۔ آخر کار ادارے نے چھاپن توں اپنی مالی مشکلات دے سببوں انکار کر دتا۔ اللہ دا کرنا ایہہ ہويا جے میں ہک اشتہار پنجاب انسٹیٹیوٹ آف لینگویج آرٹ اینڈ کلچر لاہور دی طرفوں ویکھیا کہ کسے کول کوئی پنجابی زبان وچ لکھیا ہويا مسودہ ہووے تے اوہ رابطہ کرے اسی چھاپ دیاں گے۔ اللہ دا ناں لے کے مسودہ چا کے جناب ڈاکٹر شائستہ نزہت ہوراں کول آیا تے انہاں حامی بھر لئی تے انج کر کے تسلی ہوئی۔ مینوں انج لگا جے شاید ایہہ ادارہ ای میرے واسطے بنیا اے۔ میری دلوں دعا اے کہ ایہہ ادارہ پنجابی زبان دی ترقی واسطے اس نوں اوہ مقام دین وچ کامیاب ہووے جیہڑا ہُن تاں اس نوں نہیں ملیا۔ آخر وچ جناب ملک محمد اشرف صاحب نے ایس دی اہمیت تے میری پیرانہ سالی نوں مد نظر رکھ دیاں ہونیاں مینوں تسلی دیتی کہ انشاء اللہ چھپ جا سی۔ میں ایس گل تے منکھ را سی جے کئی مہربان ایس کتاب دے چھپن دے انتظار وچ اللہ نوں پیارے ہو گئے کیوں جے کوئی 17 سالوں دا زمانہ کوئی گھٹ نہیں ہوندا۔ ایہہ وی اللہ دا شکر اے کہ میری ایہہ محنت سرے چڑھی۔

محمد حیات

جوہریاں، ضلع سرگودھا

تعارف

شیخ محمد حیات صاحب ضلع خوشاب تے سرگودھا دی جانی پہچانی شخصیت نیں۔ اوہناں نوں تاریخ تے آثار قدیمہ دی بھرویں جانکاری حاصل اے۔ اک عرصہ پڑھن پڑھان دا شغل کردے رہے۔ اوہناں نوں ایہہ وی اعزاز حاصل اے کہ اوہناں حال ای وچ پاکستان دی نمائندگی کردیاں ہوئیاں ازبکستان دا دورہ کیتا۔ ایس موقعہ تے اوہناں نے پنجاب دے پکھی واساں اُتے اک پیپر پڑھیا جدھی اوہوں دے لوکاں تے شریک سکالراں بڑی تعریف کیتی۔

شیخ صاحب بڑے ملنسار تے ہنس مکھ بندے نیں۔ اوہناں نوں ادب تے صحافت نال بڑا ڈاڈھا پیار اے۔ اوہ سرگودھا تے خوشاب دی چلدی پھردی تاریخ نیں۔ اوہ گلاں گلاں وچ ملن والیاں نوں اپنے علاقے دی رہتل بہت تے رسماں رواجوں دے بارے دسدے رہندے نیں۔

”تاریخ ضلع سرگودھا“ پنجابی زبان وچ ایس علاقے دی تاریخ اُتے پہلی کتاب اے۔ ضلع سرگودھا تے ایس دیاں تحصیلاں بھلوال، شاہ پور، سلانوالی، سرگودھا، کوٹ مومن تے ساہیوال دا ساڈے ملک دی ترقی وچ بڑا اہم رول اے۔ ایس کتاب وچ پروفیسر صاحب ہوراں ضلع سرگودھے دے

بارے ہر طرحاں دی جانکاری دتی تے دین دی کوشش کیتی اے۔ پر ایہہ بندے دی کوشش اے۔ پر خیر کلمے بندے نیں۔ پورے سرگودھے دے بارے جو کچھ لکھیا اے شائد کافی سارے بندے وی مل کے نہ لکھ سکدے۔ لہذا اوہناں دے کم دی ہر بندے نوں تعریف کرنی پئے گی۔ سانوں کتاب پڑھ کے ای سرگودھے دی تاریخ ایتھوں دے رسماں رواجاں، شادی ویاہ، مرن جیون، کھید تماشے، پھل، فصلوں، بولی، لکھاریاں، صحافیاں تے سیاستداناں بارے بڑے چنگے طریقے نال جانکاری مل جاندی اے۔ لکھن دا انداز وی بڑا سادہ تے دل کچھواں اے۔ جہدی جی وی تعریف کیتی جائے گھٹ اے۔ ایس کم اُتے اسیں اوہناں نوں دلوں مبارکباد دینے آں تے اُمید کرنے آں جے اوہ باقی ضلعیاں بارے وی ایسے طرحاں دیاں کتاباں لکھ کے پنجابی ادب نوں ہور تحفے دین گے۔


پروفیسر محمد حیات دی اک خواہش میں وی جانناواں تے اوہ ایہہ اے کہ اوہ اپنے ضلع دی مٹی دی مٹی ہوئی تہذیب نوں آن والیاں نسلاں واسطے کسے اک تھاں تے عجائب گھر دی شکل وچ اکٹھا کرنا چاہندے نیں۔ ساڈے ساریاں دی کوشش ہوئی چاہیدی اے کہ اسیں اس نیک کم وچ اوہناں دا ساتھ دیے۔ اوہ اج کل ہفت روزہ نوائے جوہر وچ اک لڑی وار کالم لکھ رہے نیں۔ جیہدیاں 3 سوتوں ودھ قسطاں ہو گئیاں نیں۔ اوہناں قسطاں نوں اکٹھا کر کے وی اک ہور کتاب چھاپی جاسکدی اے۔ محمد حیات ہوراں دی عمر ایس ویلے 70 سالوں توں اُتے اے پر اوہناں دا جذبہ 21 سالوں دے جواناں طرحاں

جوان اے تے خدا تعالیٰ اوہناں نوں بری نظرتوں بچائے تے اوہناں نوں ہور
توفیق دے کہ اوہ لوکاں نوں اوہناں دی تاریخ تے تہذیب دے بارے
جانکاری دیندے رہن۔

ڈاکٹر محمد صالح طاہر

07-11-2012





جغرافیہ ضلع سرگودھا

حدود اربعہ

ضلع سرگودھا تقریباً 72 درجے طول بلد سے 32 درجے عرض بلد سے واقع ہے۔ اس دے سجے پاسے دریا جہلم پیا و ہندا اے تے اس دے کجھے پاسے دریا چنھاں دیاں رونقاں ہین۔ ایہہ دویں دریا اگانہہ ونج کے تریموں دے مقام تے مل کے اکٹھے نواں سفر شروع کر دیندے نیں۔ ایہناں دوہاں دریاواں دے ناں وقت دے نال نال بدلدے رہے نیں۔ بہوں تاں یونانیاں آ کے بدلے پرانج کل پرانے ناں ای چالو نیں۔ ایہناں دوہاں دریاواں دے وچکار لے علاقے نوں دوآبہ جی یا چنبہ آکھیا ویندا اے۔

سرگودھے دے اُبھر دے آ لے پاسے نواں ضلع منڈی بہاؤ الدین پر بہت آ لے پاسے دریاواں پار جہلم دا ضلع اے۔ لہندے آ لے پاسے ضلع خوشاب اے۔ تے ڈکھن آ لے پاسے ضلع جھنگ پیا و سدا اے، ضلع سرگودھا دا

کل رقبہ 1456173 ایکڑ ایس ویلے اس دیاں چھ تحصیلاں آہن جہناں دے
ناں ایہہ نیں۔

1:- تحصیل سرگودھا رقبہ 385645 ایکڑ

2:- تحصیل شاہ پور رقبہ 203553 ایکڑ

3:- تحصیل بھلووال رقبہ 525657 ایکڑ

4:- تحصیل سلانوالی رقبہ 150187 ایکڑ

5:- تحصیل ساہیوال رقبہ 193131 ایکڑ

6:- کوٹ مومن

7:- بھیرہ

ایہناں ستاں تحصیلاں وچ 161 یونین کونسلوں ہن۔

آب و ہوا

اس ضلع دی آب و ہوا گرم خشک اے۔ اُنہالے وچ بہوں گرمی
ہوندی اے تے سیالے وچ پہلاں تے کافی ٹھنڈ ہوندی آہی تے کمر وی
پوندے آہن۔ پر ہن ہولی ہولی سیالا گھٹدا ویندا اے۔ کیوں جے ایہہ ساری
دنیا وچ تبدیلیاں ہو رہیاں نیں۔ بارشوں وی ہن کسے موسم دیاں محتاج نہیں
رہیاں۔ ساؤنے دیاں جھڑیاں وی ہن اوہ نہیں رہیاں ایہناں ساریاں گلاں
دے باوجود ساڈے ضلع وچ پنج موسم ہوندے نیں۔

1:- سیالا، 2:- انہالا، 3:- برسات، 4:- بہار (میلیاں تے خوشیاں دا موسم)

5:- پت جھڑ (خزاں)

دو دریاواں دے وچکار ہون دے سبب انہالے کانگاں وی آوندیاں
نیں کدھیاں آلیاں دا وسیب اوکھا ہو ویندا اے۔ نہراں نال دو فائدے ہوئے
ہک زمیاں آباد ہو گئیاں تے دو جاگور نمٹ نوں کنک تے گھوڑے ملن لگ
پئے تے پیداوار اتنی ہو گئی جے بھٹی چنن واسطے بندے نہن لبھدے۔ چک نمبر
40 جنوبی نوں فیصل آباد دے بازاراں ہار یونین جیک دی شکل وچ وسایا آباد
کاری واسطے زمین لین کان شرطیں سخت رکھیاں گئیاں۔ اکثر آباد کار پنجاب
دے وچکاروں سب توں چنگی واہی نیجی کرن والیاں وچوں چنے گئے۔ افسر آباد
کاری زمی لین آلیاں نوں لین وچ کھلار کے ایہناں دے ہتھاں دیاں تلیاں
ویدھے جے اوہ گراڑیاں ہوندیاں تے ایہناں نوں اس دے اہل سمجھیا ویندا
جے گولیاں تلیاں ہوندیاں تے ایہہ سمجھیا ویندا کہ ایہہ کم کوس اے اس نوں زمی
نہیں دینی چاہیدی۔ انج کرن نال جٹ دا ہتھ ترکھا پتہ لگ ویندا۔ زیادہ زمی
رکھن آ لے دی درخواست وی رد کردتی ویندی۔ اس سارے کم واسطے موقع تے
پٹواری منشی تے نمبردار دی تصدیق کرن واسطے افسر آباد کاری دے نال
ہوندے۔ عام لوکاں نوں ہک مربع زمی دتی گئی اس دے نال نال کئی لوکاں
نوں پنج مربعیاں توں لے کے ویہہ 20 مربعیاں تک دی زمی دتی گئی خیال
ایہہ کیتا گیا کہ وڈا زمیندار نویں تجربے تے روپیہ خرچ کر سکدا اے نکا ایہہ
نہیں کر سکدا۔ جے وڈے دا تجربہ کامیاب ہو ونجے تاں نکلے اپنے آپ شروع
کر دیندے نیں۔ ایہہ آباد کار سیالکوٹ، ہوشیار پور، لدھیانہ وغیرہ توں بلائے

گئے۔ تے ایہناں نوں دو یا چار روپے مربع دے حساب نال زمی دتی گئی تے
شہراں واسطے زمی مفت تقسیم ہوئی۔ ایہناں زمیناں دی آبادی دی وجہ توں ایہہ
سارا علاقہ ایشیا وچ کنک دا گھراکھواؤن لگ پیا۔

سر میلکم ہیلی ایٹھوں دے افسر آبادی بنائے گئے۔ آخر اوہ ترقی کر
کے پنجاب دے گورنر بنے تے لارڈ ہیلی آف شاہ پور ہوئے۔ اوہ نویں آباد
کاراں نوں جنگل صاف کرن دی ترغیب دین کان روز کوہاڑا لے کے دو
درخت روز کپ دیندے آہن۔ اتھے شروع وچ رہنا وڈا اوکھا آہا۔ پینے دا
پانی چھڑتوں وکھرا ہور کدائیں نہ ملدا۔ جد آبادی خوشحال ہو گئی تاں انگریزاں
پنجابیاں واسطے چار کروڑ دا سونا منگوا یا تاکہ لوک گھنے بنوا سکے 1890ء وچ
جنگل کپین لگ پئے تے فصلاں نہری پانی نال جٹاں نوں خوشحال کرن لگ
پئیاں۔ نہیں تاں استوں پہلاں بار دے لوک ساری حیاتی اجڑاں دے دُده
تے گوشت تے گزار دیندے آہن یا جد وناں تے پیلاں لگدیاں تے کھوکھ
کھاندے یا دُده نال رلا کے کھاندے آہن۔

آب پاشی

نہراں توں پہلاں مہینہ زمیناں توں پیواؤنے دا قدرتی ذریعہ آہ۔ اس
توں کچھ کدھیاں اُتے کھوہاں دا رواج ہو یا تے وت نہراں دی وجہ نال کھوہاں
دی وی لوڑ نہ رہی۔ نہر لوڑ جہلم توں پہلے اتھے جاگیرداراں دے چہارمی نالے
ہوندے آہن جہناں دا غریب جٹاں نوں وڈا نقصان ہوندا آہ۔ اس واسطے

سرکار نے 1905ء توں لے کے 1910ء تائیں شاہپور برانچ چالو کرن دا ترلا کیتا پر ایہناں وڈے لوکاں سرکار نوں مجبور کر کے کٹھی ہوئی نہر چلن نہ دتی 1914ء وچ وت گورنر پنجاب نے مرکزی حکومت نوں اس نوں چالو کرن کان لکھیا پر پہلی وڈی لام دی وجہ کر کے کم وت کھلو گیا۔ آخر پاکستان بن توں پچھے اس نوں چالو کرن دا سہرا میاں محمد ممتاز دولتانے دے حصے وچ آیا تے اس نے نویں سرے توں تیار کروا کے 19 اپریل 1954ء نوں اس دا افتتاح کیتا تے میاں صاحب افتتاح کرن سیدل بنگلہ جھاؤریاں دے نیڑے تشریف لے آئے ایہناں ساریاں چہارمی نہراں نوں اس نال ملا دتا گیا تے لوکاں سکھ دا ساہ لیا۔ لوئر جہلم دا پانی اس علاقے وچ نہیں آوندا۔

کلینڈر

ساڈے اس علاقے وچ جد تائیں کراڑ (ہندو) رہے تے ایہناں کلینڈر بکرمی اکھویندا آہا۔ ہُن ایہناں دے وین تے اس دی اہمیت گھٹ گئی اے پر حالی تائیں دیہاتاں وچ اسے دا رواج اے۔ اج کل ایسدا ایہہ سن 2069ء اے اس دے مقابلے انگریزی کلینڈر اج کل پڑھے لکھے لوکاں وچ چالو اے۔ تے عیسوی دا سن 2012ء اے۔ مسلماناں دا کلینڈر اسلامی کلینڈر آکھیا ویندا اے ایہہ سن ہجری توں شروع ہوندا اے ہُن 1433ھ اے۔ ایہناں ساریاں دے بارہاں بارہاں مہینے ہوندے نیں۔ مہینیاں دے ناں ایہہ نیں۔

دلیسی مہینے:- چیترا، وساکھ، جیٹھ، ہاڑ، ساون، بدھرو، اسو، کتیس، مکھڑ، پوہ، مانہہ، پھلکن۔

انگریزی مہینے:- جنوری، فروری، مارچ، اپریل، مئی، جون، جولائی، اگست، ستمبر، اکتوبر، نومبر، دسمبر۔

اسلامی مہینے:- محرم، صفر، ربیع الاول، ربیع الثانی، جمادی الاول، جمادی الثانی، رجب، شعبان، رمضان، شوال، ذی قعدہ، ذوالحجہ۔

ذرائع آمد و رفت

اونے وینے کان کئی ذریعے آہن پرانے زمانے وچ تاں صرف جانوراں دے نال ای سواری کر کے سفر کیتا ویندا اہا۔ وت داندائ آلی گڈ آئی۔ اس توں پچھے ٹانگے آئے۔ ایہناں پچھے سائیکل لاریاں تے بساں آئیاں وت ریل گڈی تے جہاز آ گئے۔ اج کل کوسٹر، ہائی ایس، ہائی لیکس آ گئیاں آہن۔ سڑکاں وی ایہناں دے کان وڈیاں ودھیا بن گئیاں ہن۔ اج کل تقریباً ہر وڈے قصبے وچوں لاہور، فیصل آباد، اسلام آباد سدھیاں گڈیاں ویندیاں آہن۔ نالے گڈیاں ایئر کنڈیشن وی ہو گئیاں آہن۔ سیالے گرم تے انہالے ٹھنڈیاں، مزے ای مزے، وچے ٹی وی، ٹیپ ریکارڈ دے گاؤن مفت تے سیٹاں وی ودھیا فوم آلی گدیاں والیاں۔ جس تے بہہ کے اٹھن توں دل نہ کرے۔ تے گڈیاں وی 75 سواریاں آلیاں۔

منڈیاں

چار منڈیاں آہن۔ 1:- سرگودھا، 2:- سلا نوالی، 3:- بھلووال، 4:- پھلروان

سرٹکاں

سرگودھے توں ہر پاسے سرٹکاں ویندیاں نیں۔ وڈیاں وڈیاں سرٹکاں ایہہ نیں۔ پہلاں ساریاں بساں ہندوواں دیاں آہن خان عنایت اللہ تے مسلم بس دے ناں نال بس چالو کیتی ہن تک چل رہی اے۔

1:- سرگودھا گجرات، 2:- سرگودھا لاہور، 3:- سرگودھا جھنگ، 4:- سرگودھا خوشاب، 5:- سرگودھا فیصل آباد، 6:- میانی توں ساہیوال براستہ بھیرہ جھاؤریاں شاہ پور واڈھی، 7:- بھلووال سرگودھا، 8:- بھاگٹا نوالہ توں بھلووال براستہ کوٹ مومن، 9:- سیال موڑ منڈی بہاؤ الدین، 10:- سیال موڑ تا احمد نگر، 11:- سرگودھا سلا نوالی فاروقہ، 12:- شاہپور حسین شاہ، 13:- واڈھی سرگودھا، 14:- بھلووال بھیرہ، 15:- بھلووال سردار پور چک رامداس، 16:- لک موڑ جھاؤریاں۔ 17:- سرگودھا سلا نوالی، 18:- لک موڑ توں شاہپور، 19:- بھلووال سرگودھا براستہ مٹھ لک۔
اج کل ہور وی وڈیاں سرٹکاں بن گئیاں آہن شاید ای کوئی پنڈ رہ گیا ہوئے جیہڑا کسے وڈی سرٹک نال نہ ملیا ہووے۔

سبھ توں ودھیا سرٹک موڑ وے طالب آلے توں بھیرہ تائیں ساڈے ضلع وچوں لنگھدی اے۔

ریلاں

ریلاں تے گڈیاں سرگودھے توں ہر پاسے ویندیاں آہن وڈیاں
لائناں ایہہ نیں۔

- 1:- ملک وال میانی بھیرہ 1887ء وچ چالو ہوئی۔
- 2:- ملک وال سرگودھا 1903ء وچ مکمل ہوئی۔
- 3:- سرگودھا جھنگ 1904ء وچ بنی۔
- 4:- سرگودھا میانوالی 25 اپریل 1931ء ریل واپل مکمل ہويا تے ایہہ
چالو ہوئی۔
- 5:- سرگودھا فیصل آباد لاہور ایہہ کئی قسماں وچ مکمل ہوئیاں۔

پل

ساڈے ضلع وچ چار پل مشہور آہن ہک دریا جہلم تے خوشاب کول
دو جاموڑ وے آلا پل بھیرے دے کول تریجا طالب آلا پل تے چوتھا خوشاب
دانواں پل۔

کارخانے

سرگودھے وچ کپڑے داہکا کارخانہ سلطان ٹیکسٹائل مل اے۔ کھنڈ
دے کارخانے ایہہ نیں، یوسف شوگر مل، نون شوگر مل، نیشنل شوگر مل۔ استوں
علاوہ بناپتی گھیو دی مل کوڑے کھوہ کول اے تے اتھے ای ہک رحمن فلور مل اے

سرگودھے موئی فلور مل اے۔

مشہور پیداوار

سرگودھے وچ پھٹی، کنک، جوار باجرہ مکئی تے چول بہوں ہوندے نیں۔ تحصیل بھلوال وچ کنوں وی کافی ہوندے ایتھوں باہر دوجیاں ملکاں وچ وی گھلے ویندے نیں۔ چینی وی دوجیاں ضلعیاں وچ گھلیندی پئی اے۔ بانس وی سرگودھا کافی پیدا کرن لگ پیا اے تے ایتھوں ہُن باہر دیاں ضلعیاں وچ گھلن لگ پئے آہن۔ اللہ دا شکر اے کہ ساڈا ضلع ہر قسم دی پیداوار وچ خود کفیل اے۔ پٹ سن دا تجربہ وی کامیاب ہو گیا اے۔

بوٹے

نہراں توں پہلے ایتھے جنگلاں وچ کڑی، جنڈ، دن، بیر، کمر، ٹاہلی، ملّا، شریہ، برنا، سوڑی، سوڑا، دھریک، نم دے رکھ ہوندے آہن۔ ٹاہلی تے کمر بہوں کم آون والی لکڑی اے۔ ٹاہلی فرنیچر بناون دے کم آوندی اے۔ سلانوالی وچ فرنیچر دا کم چنیوٹ دا مقابلہ کریندا اے تے مقامی ضرورت دے مطابق ہر پنڈ تے قصبے وچ فرنیچر بناون والے مل ویندے آہن۔

اج کل کجھ نویں بوٹے وی آ گئے ہن۔ جیہڑے پہلے ایتھے نہیں ہوندے۔ یوکلپٹس، املتاس، ارجن، جیکورنڈا، لاجسٹونیا، کچنار۔

پھلدار رُکھ

ناکھ (دِسی تے بگو گوشہ) جامنوں، امب، امرود، توت، کنو، مالٹے،
لوکاٹ، پلجی، انار، بیر، سنو بیر، کھاڑے، داکھ، سوڑا، سوڑی، گوندی، ون دیاں
پیلاں، سنترے، گنکیر، کھجور۔

پکھو

استھے کافی پکھو اہن کاں، لالی، طوطا، گر جھ، چڑیاں، اٹا گھگھو، چربل،
کال کڑچھی، دھسی، کلی دھرکھان (ہڈ ہڈ) تتر، بیڑا، ڈھوڈھر، ہل، بلبل، گھگی،
اٹیرن (ابابیل) تلیر، کونل، بگلا، لم ڈھینگ، مرغابی، ٹوبے، جل کٹری، شکاری
پکھو، چرگ، بہری، باز، شکر، پر ایہہ ہُن سارے ای شکاری جانور مُک گئے
نیں یا لوکاں مُکا چھوڑے نیں۔

جیہڑے جانور مُک گئے، یا گھٹ ہو گئے ہن

چٹی ہل:- اج توں پنجاہ سال پہلاں استھے ہوندی آہی پر ہُن تاں مدت ہوئی
نہیں دیکھی۔ اس دے پر پٹھوں کالے ہوندے آہن تے چُچ پیلی ہوندی
آہی۔ غریب جیہا جانور آہا خدا جانے اسنوں کیہ بنیا۔ ”وس مینہ“ دی طرز دی
آواز آہی۔

کونج:- کونجاں قطاراں وچ وی (V) دی شکل بنا کے آوازاں دیندیاں
لگھدیاں ہن اوہ وی اس پاسیوں ہُن کدی نہیں لگھیاں خدا معلوم ختم ہو گئیاں

یا ڈر کے راہ بدل گئیاں ہن۔ کوچ ساری عمر جوڑا بن کے رہندی اے جے ہک مرونجے تے وت جوڑا نہیں بنیدے۔

ڈھوڈرکاں:- ایہہ کالے رنگ دا ہوندا آہا مدت ہوئی نظر نہیں آیا۔ حالانکہ کسے دے کم آون والی شے وی ناہی۔ ایہہ پل توں ذرا وڈا ہوندا آہا تے بالکل کال کڑچھی ہار کال ہوندا آہا۔

شکاری کچھو:- لوکاں پھد کے وچ چھوڑے آہن اج کل کوئی نظر نہیں آوندا۔ پہلاں ٹوانیاں تے میکاناں دے نوکر جہناں نوں باز دار آہدے آہن ایہناں دے ہتھاں تے بیٹھے ہوئے ہوندے آن تے اکھیاں تے کھوپے چاڑھے ہوئے ہوندے آہن ایہناں نال شکار کھیڈ دے آہن۔

لکے کبوتر:- ایہناں دی پوچھل مور دے پیل پون ہار اُتائہ چائی ہوئی ہوندی آہی۔ مرغابیاں وی بہوں گھنڈیاں ویندیاں آہن گورنمنٹ ایہناں دی حفاظت دا کوئی انتظام کرے نہیں تاں بندوقاں آ لے محکمہ وائلڈ لائف آلیاں نال مل کے بچاون دی بجائے مکاون تے تُلے ہوئے آہن۔

کچھوواں ہار کئی شکاری جانور وی ختم ہو گئے آہن تے ہُن صرف اوہ چڑیا گھر وچ نظر آوندے نیں۔

شکاری جانور:- شیر، چیتا، بگھیاڑ، باری بلا، اج توں سو سال پہلے ایہہ سارے جانور کدھیاں تے جنگلاں وچ موجود آہن پر ہُن بالکل ختم کردتے گئے آہن اس دی ہک وجہ ڈنگراں دا نقصان وی آہا۔

ہرن:- ایہہ لوکاں شکار کر کے کھا چھوڑے آہن اج کل کچھ گورنمنٹ نے وڈی

سخت حفاظت وچ کوہستان نمک وچ رکھے ہوئے اہن پر لوک لگ چھپتے
مار لیندے اہن اج توں سو سال پہلے ڈاراں دے ڈار پھردے آہن پر ہُن
کسے شوق توں پال کے رکھیا ہویا ہووے تاں ہو رگل اے نہیں تاں بالکل ضلع
سرگودھے دے اندر مک گئے آہن۔

لاٹ آلا دُنہ:- دُنہ وڈی لاٹ آ لے ہوندے آہن کنیاں دی لاٹ تاں
ایڈی وڈی ہو ویندی آہی جے اوہ زمی نال لگ ویندی آہی اس واسطے اس
دے کچھے ریڑھا دیندے آہن جے اوہ سوکھا ٹر سکے۔

چھترے:- چھترے بھینڈ دی نسل دے نر ہوندے آہن تے ایہناں دے سنگ
وڈے ولا وینیاں آ لے ہوندے آہن لوک ایہناں نوں ٹکراں مروان کان
رکھدے آہن تے اوہ وڈے خوبصورت وی لگدے۔ پتہ نہیں اوہ نسل کدے گئی
ہُن تاں چھترے وی بھوڈے بغیر سنگاں دے ہو گئے آہن۔
سزار (مگر مچھ):- ایہہ ہُن ساڈے دریاواں وچوں مک گئے آہن۔

تاریخی دور توں پہلاں ساڈی دھرتی دی کہانی

جس زمی تے اج اسی دسدے پئے آں۔ ایہہ ہمیشہ توں انجے ہار
ناہی۔ سیانے دسدے ہن جے اج توں تقریباً ویہہ کروڑ سال پہلاں اتھتھے بلکہ
پورا برصغیر چین، وسط ایشیا سمندر جس دا ناں تیتھس TETHS آہ وچ دُبے
ہوئے آہن۔ سارے براعظم آپس وچ ملے ہوئے آہن۔ وقت گزرن دے
نال نال ایہہ وکھرے ہونے شروع ہو گئے۔ سمندر دا پانی ختم ہو گیا تے ہک

پہاڑاں دا سلسلہ وچوں نکل آیا۔ ساڈے نیڑے کوہستان نمک تے کڑانے دیاں پہاڑیاں آہن ایہناں دے متعلق ماہرین دا خیال اے جے ایہہ تہہ دار چٹاناں دی شکل وچ آہن پر بنتر دے لحاظ نال ایہہ دوہاں قسماں دیاں چٹاناں آپس وچ مختلف آہن۔ ایہناں نوں انگریزی وچ Aravali series دے عبوری دور نال تشبیہ دتی ویندی اے۔ ایہناں دا بنیادی مادہ Quartzites ایہہ جیہڑا Clay Slates دے نال ملیا ہویا اے۔

لکھاں سال پہلاں اتھے سمندر ہوون پاروں ایہہ چٹاناں تہہ دار ای آہن۔ جہناں نوں Sedimentary آدھے نیں۔ جیہڑیاں وقت تے گرمی دے نال تبدیل ہو کے Metamorphic بن گئیاں آہن۔ ضلع سرگودھا تے اسدے آس پاس دیاں پہاڑیاں سانگلہ ہل تک دیاں پہاڑیاں انجے ہار آہن۔

ایہناں پہاڑیاں دے وچ معدنیات وی دسیاں گئیاں آہن پر سوائے وڈی کڑانا آلی پہاڑی توں جس اُتے فوج دا قبضہ اے۔ باقی ساریاں دے کچھے سٹون کرشر آلے پے گئے آہن تے دیہوں رات ایہناں نوں مکاؤن دی کوشش کر رہے نیں۔ حالانکہ ایہناں دا وجود ایہناں علاقیاں واسطے ضروری آہا۔ ایہناں دے اُتے آثار قدیمہ دا ہک خزانہ کھٹیا ہویا اے جیہڑا ایہناں دے نال ای ختم ہو گیا اے۔

اوہ چٹاناں جہناں وچوں کوئلہ نکلدا اے سٹھ ملین سال پرانیاں آہن تے جہناں وچوں چوئے دا پتھر نکلدا اے چالھی ملین سال پرانیاں آہن ایہناں

دے وچ بے شمار فاسلز موجود آہن تے ایتھے راما پیتھی کس قسم دے قدیم انسان دے فاسل وی ملے آہن۔ جیہڑا Stone Age Culture اکھوندا اے۔ ایہہ آثار وی اتفاقاً چوہاں سیدن شاہ چنچی سون سکسیر کڑانے دیاں پہاڑیاں وچوں ملے آہن۔ ایہہ پتھر دے کوچھے ہتھیار مثال دے طور تے چاقو، دتی کہاڑی قسم دے اہن ایہناں دی عمر ترے لکھ سالاں توں چھ لکھ سالاں تک اے۔

ایہہ تہہ دار چٹاناں جہناں نوں ماہرین ارضیات Depositions ادھے نیں۔ ایہہ وڈے پرانے زمانے دا پتہ دیندیاں آہن۔ ایہناں دی عمر گھٹوں گھٹ 550 ملین سال بندی اے۔ ایس سارے سلسلے وچ پرانیاں چٹاناں توں لے کے جدید دور وچ بن آلیاں ہر قسم دیاں چٹاناں موجود آہن۔ ایسے واسطے عالمی ماہرین ارضیات ایہناں نوں ارضی علوم دا عجائب گھر آکھدے نیں۔ سون سکسیر دے علاقے دی آب و ہوا خطہ یونان نال ملن دی وجہ نال سکندر ایتھے چھاؤنی بنائی۔

سمندر دے سکُن نال کوہستان نمک تے کوہ ہمالیہ تے کڑانادیاں پہاڑیاں بن گئیاں۔ ہمالیہ جیسے اُچے پہاڑ توں برف جنم نال چشمے تے ندی نالے چالو ہو گئے تے ایہناں وچوں دریا بن گئے۔ ایہناں دریاواں دی لائی ہوئی مٹی نال طاس بن گئے۔ تے آخر کار ایہناں میداناں وچ سبزہ پیدا ہو گیا۔ انج کر کے جانوراں تے انساناں دے رہن دی صورت پیدا ہو گئی۔ ہُن تائیں ساڈے میدان دریاواں دی آندی ہوئی مٹی نال 15 فٹ تائیں اُچے

ہو گئے اہن۔

انسانی وسیب دی کہانی

انسان ساڈے علاقے وچ کدوں آیا تے کتھوں آیا۔ کیہڑی نسل دا آہ، ہُن تائیں ایہہ سارے دے سارے اندازے تے گوڑی آہن۔ پکی گل کائی نہیں۔ پر کجھ نشانیاں اچیہیاں وی آہن جس توں اندازہ لایا جاسکدا اے کہ انسان گھٹوں گھٹ اتھے ترے لکھ سالوں توں پنج لکھ سالوں تائیں اس علاقے وچ رہ رہیا اے۔

سائنس دانوں تے سیانیاں دا ہُن ایہہ فیصلہ اے کہ برصغیر وچ سبھ توں پہلاں انسان ضلع راولپنڈی وچ دریا سوان دے کنارے آباد ہويا۔ جس دے وسیب دے نشان ماہرین نے ڈھوڈے آہن ساڈے ضلع وچ ایہو جے نشان کڑانہ دیاں پہاڑیاں تے آہن۔ جیہڑے کرشنگ مشیناں وڈی بے دردی نال ختم کردتے آہن۔ ایہناں دے نال دے کجھ نشان دریا چناب دے کنارے چناب نگر دے کول رہ گئے آہن اوہ وی بہوں سارے ختم ہو گئے آہن۔ جے ایسے رفتار نال کم جاری رہیا تے ساڈا تاریخی ورثہ اُکا ختم ہو ویسی۔

جیہڑے نشان اتھے ملے اہن ایس دے نال دے نشان چین وچ وی ملے اہن جہناں دا 1967ء وچ جد ایہہ ملے آہن اندازہ لایا گیا اے کہ ایہہ نشان 5 لکھ سال پرانے اہن۔ ایسی طرح ہک ہاتھی دا ڈھانچہ وی ملیا جس

دے متعلق خیال اے کہ ایہہ 20 لکھ سال پرانا اے۔ سون سیکسروچ کنہٹی کول نیچرل ہسٹری میوزیم اسلام آباد دے کھوجیاں اتھوں ستر لکھ سال پرانی مگر مجھ دی کھوپڑی دا فاسل لہیا اے۔ جیہڑا اج کل اسلام آباد دے میوزیم دی زینت اے۔ اس دے شوکیس تے ایہہ عبارت لکھی ہوئی اے۔

”گھڑیاں کی یہ معدوم نسل جنوبی ایشیا کے موجودہ گھڑیالوں سے بالکل مختلف تھی۔ یہ فرق کھوپڑی کی بناوٹ میں خاص طور پر نمایاں ہے۔ زمانہ قدیم کے اس گھڑیاں کی کھوپڑی نسبتاً کم ہی تھی۔ اور ان کی آنکھیں سر کے خاصے پچھلے حصے پر واقع تھیں۔ ان کے دانت عام طور بڑے اور تعداد میں مقابلتاً کم تھے اور ایک دوسرے سے فاصلے پر تھے۔ یہ کھوپڑی 130 لاکھ سال پرانی چٹانوں سے ملی ہے اور اس گھڑیاں کی نسل 70 لاکھ سال پہلے ختم ہو گئی۔“

انجے ہارمولوی ایوب صاحب پروفیسر گورنمنٹ کالج فیصل آباد دی نگرانی وچ کالج دی ہک جماعت نے انگہ اگلی تے چٹے وچوں ہاتھی۔ گینڈے تے ہرن دے فاسلز اکٹھے کیتے نیں۔ ہاتھیاں دا ایہہ خاندان دو کروڑ سال پہلاں افریقہ توں یورپ دی راہیں برصغیر اپڑیا۔ ایہناں فاسلز دی عمر 70 لکھ سالوں توں 90 لکھ سال تائیں دی گئی اے۔ بے چٹ کے ایس علاقے وچ مختلف جماعتیں کم کرن تے ہور وی وڈے وڈے انکشافات ہونے دی توقع اے۔

وادی سون وچ بدھ مت تے ہندو مت دے بے شمار آثار پئے آہن۔ جہناں تے وی توجہ دی ضرورت اے نہیں تاں ایہہ وی ختم ہو ویسں۔

راما پتھی کس

پنج لکھ سالاں دے ایس قدیم انسان نوں رام پتھی کس آکھیا گیا
اے تے اس تہذیب نوں ”سواں تھتھی تہذیب“ داناں دتا گیا اے۔

پتھر دا زمانہ

پروفیسر سنکیلا دا خیال اے کہ پنجاب دے ایس علاقے وچ پہلا آدمی
پتھر دے ویلے دے پہلے حصے یا دو جے برفانی گیلڑ توں لے کے چوتھے برفانی
گیلڑ تائیں اتھے آباد رہیا۔
پہلا برفانی گیلڑ 5 لکھ پنجاہ ہزار سال
دو جہ برفانی گیلڑ چار لکھ سال
ترتیباً برفانی گیلڑ ڈیڑھ لکھ سال
چوتھا برفانی گیلڑ پنجاہ ہزار سال

برفانی گیلڑاں دے ہک سیانے ڈی ٹیرا دا خیال اے کہ پنجاب دا پہلا
آدمی سندھ والے پاسیوں آیا ہوئی۔ کیوں جے سندھ پنجاب نالوں زیادہ گرم
علاقہ اے۔ ایہہ اوہ زمانہ اے جد انسان حالی تائیں ترقی دیاں منزلاں طے کر
رہیا آہ۔ ایہہ عرصہ بہو وڈا عرصہ اے مشہور تاریخ دان ایچ جی ویلز نے اپنی
کتاب Out Line of History وچ لکھیا اے کہ انسان نوں حیوانی
زندگی چھوڑ کے واہی نیجی تک اوندیاں ہزاراں سال لگے۔ ایہہ سفر کوئی 20
ہزار ورھے پہلاں شروع ہو یا تے اٹھ ہزار ورھیں اج توں پورا پہلاں مسے

پورا ہویا۔ اس ویلے انسان داکم صرف ڈھڈبھرنا آہ۔ اس دے ہتھیار صرف پتھر دے آہن تے ایہہ پہاڑیاں تے ای رہندا آہ۔

اس توں پچھے انسان نے جانوراں نال دوستی لائی تے ایہناں دے اجڑ بناکے رکھنے شروع کر دتے تے ایہناں دے چراون واسطے جنگلاں تے باراں وچ پھرنا شروع کردتا۔ عورتاں گھر داکم چلیندیاں آہن۔ ایہہ وی آکھیا ویندا اے جے واہی نیجی داکم وی مرداں شروع نہیں کیتا بلکہ عورتاں شروع کیتا۔ بعد وچ مرد وی ہتھ وٹڈاون لگ پئے۔

وسط ایشیا وچ وی وٹڈ کچھ انجے ہار آہی۔ آجڑیاں نوں تورانی تے واہی نیجی آلیاں نوں ایرانی یا آریہ وی اہدے آہن۔ آریا جداتھے آئے تے ایس ویلے ایہتھوں دا وسیب کافی ترقی کر چکیا آہ اس ویلے تائیں ایہتھے گھوڑا کوئی نہ۔ آریا بہوں چنگے گھوڑ سوار آہن۔ ایہتھوں دیاں لوکاں نوں ایہناں دراوڑ داناں دتا۔ جس ویلے آریا ایہتھے آئے تے ایہتھے ایہہ قبیلے آہن۔

1:- سجادنت، 2:- مہادرش، 3:- اتراکورو، 4:- مدار، 5:- ویشن، 6:- ارسکا، 7:- ابھی سار، 8:- کیکات، 9:- اردمبجرا اسحاق مصلیاں نوں اتھوں دے اصل لوک من دے نیں۔

دراوڑ

آریاں توں پہلاں اتھوں دی تہذیب دنیا دی ہک منی پرونی تہذیب آہی۔ اس تہذیب نوں وداہی سندھ دی تہذیب آکھیا ویندا اے۔ اس تہذیب

دے ساهنے آون توں پہلاں ایہہ فرض کر لیا گیا آہا جے آریا وڈے مہذب آہن تے اتھوں دے لوک نرے اجڈ آہن۔ پر ہُن ایہہ گل غلط ثابت ہو گئی اے۔ جیوں جیوں کھوجی نویاں نویاں تہذیبیاں کڈھ رہے نیں تے ایہناں توں پتہ لگدا اے کہ آریا نوں تہذیب یافتہ سمجھنا محض ہندو پروپیگنڈا اے وادی سندھ دی تہذیب دے پتہ لگن توں پہلاں ساڈے کول صرف ہندوواں دیاں مذہبی کتاباں آہن جہناں وچ اتھوں دیاں لوکاں نوں نرے اجڈ آکھیا گیا اے۔ پر ہُن ایہہ گل غلط ثابت ہو گئی اے۔ کیونکہ ایہہ گل کسے دے خواب و خیال وچ وی ناہی کہ رگ وید جہناں لوکاں نوں اجڈ تے حقیر دسیندا اے اوہ لوک ہک دو ہزار سال نہیں بلکہ پورے پنج ہزار سال ق م وچ پنجاب تے سندھ دے تہذیب یافتہ لوک آہن۔ رگ وید دا اپنا زمانہ 1000 ق م توں 800 اے۔ مہاتما بدھ 477 ق م وچ فوت ہوئے۔

ہڑپہ تے موہنجوداڑو ایہناں لوکاں دے شاہکار نیں۔ جہناں دا اج تائیں دنیا مقابلہ نہیں کر سکی۔ ایہناں لوکاں اج توں کوئی چھ ہزار سال پہلاں ہڑپہ دی بنیاد رکھی۔ ایہہ لوک ہاتھی دے دند تے سپی دے گہنے استعمال کریندے آہن۔ موہنجوداڑو وچ 40 ہزار بندے رہندے آہن۔

دراوڑاں دے متعلق ایہہ وی آکھیا ویندا اے کہ اوہ عراق دے سمیری آہن۔ ایہناں اصل وچ مصر تے عراق دیاں استادان کولوں اتھے آون توں پہلاں مکان بناون دا کم سکھ لیا ہویا آہ۔ ایہہ لوک عراق تے مصر دے نال بیڑیاں دے ذریعے تجارت کریندے رہے ایہہ لوک اتھوں صندل تے سندھی

کپڑا لے ویندے آہن۔ ایہناں دی سماجی حالت اشتراکی قسم دی آہی۔ سارے دا سارا پنڈ سبھ دی ملکیت سمجھیا ویندا آہ۔ کیوں جے اوہ سارے ہکی قبیلے نال تعلق رکھدے آہن۔ ایہناں پرانیاں تہذیبیاں دے آثار ہن صرف ہڑپہ تے مونجوداڑ و تک ای محدود نہیں۔ کوٹ ڈجی دی تہذیب اس توں وی پرانی اے۔ ڈیرہ اسماعیل خان وچوں وی ایہو جے آثار ڈاکٹر احسان علی چیئر مین آرکیالوجی پشاور یونیورسٹی نے 1999ء وچ ڈیرے دے نیڑے کھدائی کر کے ہڑپہ دے نال دیاں مہراں ڈھوڈھیاں آہن۔ اس توں پتہ لگدا اے کہ صرف پنجاب تے سندھ وچ ایہہ تہذیب ناہی بلکہ سرحد تے بلوچستان وی کسے توں کچھ نہیں۔ ضرورت آثار قدیمہ اُتے محنت کرن دی اے جیہڑے ضائع ہو رہے نیں۔ بلوچستان وچ مہرگڑھ دی تہذیب ہڑپہ توں وی پنج ہزار سال پرانی لدھی اے۔ جدوں انسان نے پہلاں پہل اجڑ رکھ کے ایہناں دے چھیڑ بنائے تاں اوہ ساریاں ضرورتاں ڈنگراں توں ای پوریاں کرن لگ پیا۔ پورا پنجاب اس ویلے جنگلاں باراں نال بھریا آہ۔ کئی ناں ہن تک مشہور آہن مثلاً ساندل بار، گنجی بار، نیلی بار، کڑانہ بار، گوندل بار، بکھر بار وغیرہ انگریزاں دے آون توں پہلاں ای ساریاں باریں وسدیاں آہن۔ لوک ایہناں دے اندر ای رہندے آہن تے اپنے مال ڈنگر چکدیندے آہن۔ ایہناں دا لباس شروع وچ چمڑے دا ای ہوندا آہ تے ہتھیار وی ہڈیاں دے ہوندے آہن۔

دریاواں دے کناریاں تے کدائیں کدائیں وسیوں ہون لگ پئی تے لوک گھر بنا کے رہن لگ پئے۔ انجیں آبادیاں ودھدیاں ودھدیاں پنڈ بن

گئے۔ پرانے زمانے دے سارے شہر دریاواں دے کنارے تے ای آہن۔
ساڈے نیرے خوشاب ضلعے وچ ناڑی ہڑپہ توں وی پرانی دی گئی اے ایہہ گل
ماہرین آثارِ قدیمہ ڈاکٹر سیف الرحمن ڈار تے ڈاکٹر سلیم نے دیکھ کے دی۔

قدیم جغرافیہ ضلع شاہپور

ضلع شاہپور (سرگودھا) راولپنڈی ڈویژن دے چھ ضلعیاں وچوں ہک
مشہور ضلع اے۔ ایہہ ضلع 31.32 تے 32.44 طول بلد تے 71.40 تے
73.25 عرض بلد تے واقع اے۔ اس دے پربت آلے پاسے ضلع جہلم دی
تحصیل پنڈ دادنخان اے۔ اس دے لہندے پاسے ضلع میانوالی تے بھکر اے۔
اس دے اُبھر دے آلے پاسے دریا چنہاں تے ضلع گجرات اے۔ اس دی
اوسط لمبتن اُبھر دے توں لہندے تائیں 94 میل تے اس دی چوڑائی پربت
توں دھن تائیں اوسطاً 50 میل اے پر کدائیں کدائیں ایہہ گھٹ ودھ وی
اے۔ اس دا کل رقبہ 4697 مربع میل اے تے دریاواں دا رقبہ وی ملائیے
تاں وت 4741 مربع میل ہو ویندا اے۔ اسنوں دریا جہلم دو برابر حصیاں
وچ ونڈ دیندا اے۔ بھیرہ تحصیل اُبھر دے آلے پاسے اے تے شاہپور وچکار
اے۔

آبادی دے لحاظ نال اس ضلع وچ صرف ہک قصبہ بھیرہ آہ جسدی
آبادی دہ ہزار توں ودھ رہی باقی پورے ضلع وچ اتنی آبادی دا کوئی قصبہ نہیں آہ
بھیرے دی آبادی 17428 اہی۔ ضلع شاہپور رقبہ دے لحاظ نال ناویں نمبر

تے آہ تے آبادی دے لحاظ نال 24 نمبر تے آہ۔ پنجاب دے 31 ضلعیاں
وچوں سطح سمندر توں اس دیاں تحصیلاں دی بلندی کجھ انج اہی۔

تحصیلاں دی سمندر توں بلندی

بھیرہ	425 فٹ	32.28 عرض بلد	72.57 طول بلد
شاہپور	400 فٹ	32.14 عرض بلد	72.31 طول بلد
خوشاب	400 فٹ	32.18 عرض بلد	72.24 طول بلد
سیکسر	4992 فٹ	32.33 عرض بلد	71.59 طول بلد

ایہہ ضلع گنگا تے سندھ دے میدان دا حصہ اے ایہہ سارا ضلع تقریباً
ماسوائے پہاڑی علاقے دے 550 توں 700 فٹ سطح سمندر توں اُچا اے
اس دے نال نال اسدی مسلسل ڈھلوان تقریباً 1-1/2 فٹ ہک میل دے
حساب نال اے۔ دریا جہلم تے چنہاں دوویں سندھ وچ مل کے سمندر وچ اپڑ
ویندے نیں۔ ایہناں دوہاں دے وچکار اُچی جاہ ہے جتھے جتھے پانی کوڑا اے۔
اتھے گھاہ تے فصلاں وی گھٹ ای ہوندیاں آہن اس ضلع وچ کئی ڈونگھے راہ
موجود آہن۔ دسیا ویندا اے جے پرانے زمانے وچ دریا اتھے وگدے آہن۔
میرے جاچے ایہہ کانگ دے پانی دے بنائے ہوئے راہ آہن۔ ساڈے
پاسے ویکوال تے جلال دے گوہڑ دے وچکا راہہ کانگ دا راہ اے نہ کہ دریا
دی گزرگاہ اے۔ ایہتھوں سارا بھیرہ تک کانگ دا پانی لنگھدا اے۔

کھواں دی گہرائی توں پتہ لگدا اے کہ کدی اتھے دریا ہویا اے کیوں جے اوہ

گھٹ ڈوگھے اہن دریا دی وجہ نال پانی نیرے ہوسی۔

کڑانہ بار

کڑانے دیاں پہاڑیاں کسے زمانے وچ ضلع جھنگ وچ آہن وٹ
ایہہ شاہپورنوں دے کے کالو وال دے رقبے جھنگ نوں دے دتے گئے اتھے
سبھ توں اُچی پہاڑی جتھے اج کل ہوائی فوج نے ریڈار لایا ہویا اے کجھ
1000 فٹ اُچی اے۔ ایہہ کوہستان نمک توں تقریباً 40 میل دور اے۔ پر
ایہ استوں بہوں پرانیاں آہن۔ ایہہ وی دسیا گیا اے کہ ایہہ کوہ ہمالیہ توں وی
پرانیاں آہن اس پہاڑی دی چوٹی تے مسلماناں تے ہندوواں دیاں خانگاہیں
آہن۔ اج کل وی اسدی اوقاف دیاں زمیاں کئی ضلعیاں وچ آہن۔ باقی
پہاڑیاں کپ کپ کے روڑی بنادیتیاں گئیاں آہن۔

دریائے جہلم

ایہہ دریا اس ضلع دے دو پاسیوں لنگھ کے حد نبیرا اے تے بھیرہ
کولوں ایہہ پر بت آلے پاسے ویندا اے جد ایہہ شاہپور تے خوشاب دے
نیڑے آوندا اے تے اسدا رُخ دُکھن آلے پاسے ہو ویندا اے خوشاب دا پُل
اسے رُخ تے اے تے بھیرہ دا موٹروے دا پُل اس دے لہندے اُبھر دے رُخ
تے اے۔ بار تے دریا دے وچکار جیہڑا علاقہ اے اُسنوں کدھی یا دندا
آہندے اہن۔ ایہہ وی 10 توں لے کے 15 میل تک اے۔ ایہہ وی

حالانکہ چناب دی وادی ہار اے۔ پر ایہہ اس وادی نالوں بہوں ذرخیز اے۔ اس وچ کافی رقبے آباد اہن تے اس دی اصل وچ دریا دی ذرخیز مٹی اے جیہڑی اس علاقے نوں ذرخیز بنا رہی اے۔ جہلم نوں یونانیاں (Vedasta) تے Hydaspes دا ناں دتا وے اس دا ناں وہت رہیا پر آج کل شہر جہلم دی وجہ کر کے اسدا ناں جہلم مشہور اے۔ ویسے خوشاپ دے جہلم دے معنی مٹھا پانی اے اخیر ایہہ سیلڑے میلاں دا سفر کر کے ضلع جھنگ وچ دریا چنباں نال مل ویندا اے۔ سیالے وچ ایہہ دریا سک کے ہک نلے جے نالے دی شکل بنا لیندا اے تے بہوں لوک جھاگ کے لکھ ویندے اہن تے دوسو گز توں ودھ چیرا نہیں ہوندا۔ اس دا گھٹ توں گھٹ پانی 4000 کیوبک فٹ فی سیکنڈ اے تے ودھ توں ودھ 2,00,000 دو لکھ کیوسک فی سیکنڈ ہو ویندا اے۔ انہالے پانی دی سطح انہالے وچ 12 توں 13 فٹ اُچی ہو ویندی جس نال کانگ آ ویندی اے۔ کانگ دی اصل وجہ پہاڑاں تے گرمیاں وچ لگاتار مہینہ لہن دی وجہ نال ہوندی اے۔ کانگاں دے نال لوکاں دا بہوں نقصان ہوندا آبا گھر ڈھے ویندے مال ڈنگر لڑھ ویندے فصلاں برباد ہو ویندیاں ستمبر، (اسو) وچ دریا گھٹن لگ پوندے تے وٹ گھٹدے ای ویندے پر 1992 وچ مینہاں دی وجہ نال اس دریا وچ وڈی کانگ آئی آہی جیہڑی بے موسمی آہی مطلب اکتوبر وچ جد عام طور تے دریا کافی سک ویندے اہن تے کانگ دا کوئی خطرہ نہیں رہندا۔ کانگ نال زمی نوی ہو ویندی اے تے کنک دی فصل بہوں چنگی ہوندی اے۔ تے مٹی دی لیٹ کے چک مل وچ لائی ویندی اے کیوں جے

کھلون دی حالت وچ بندہ چک مل وچ غرق ہو ویندا اے۔

وادی جہلم

ایہہ وادی تقریباً دو میل چوڑی اے جد ایہہ دریا اس ضلع دی حد وچ داخل ہوندا اے تے شاہپور دے کول آ کے ایہہ 12 میل تے ساہیوال (ضلع سرگودھا) کول پندراں میل ہو ویندی اے۔ ایس وادی دے ہک پاسے دندا دا کنارہ اے جیہڑا سنوں بارتوں وکھ کریندا اے تے دوجے پاسے دا کنارہ ڈھادے ناں نال مشہور اے۔ اگانہہ تھل دا ریگستان اے۔ اس وادی دے وچ کئی قدرتی نالے وی اہن جتھے کدی ایہہ دریا وہندا رہیا اے تے ہُن پچھانہہ ہٹ گیا اے۔ تے ایہہ نیویاں جاہیں ہُن سکیاں پیاں اہن تے ایہہ دریا توں اتوں لے کے 12 میل تک دور اہن۔ دریا دی اس پرانی گزر گاہ نوں ڈھڈھار آکھیا ویندا اے اسدا نمونا شاہپور صدر توں ترے میل ڈھکن آ لے پاسے چک شہزادیاں آ لے کول اے۔ اس توں ہور ڈھکن اسدا ناں رن (Rin) پرانے شہر لڑھ گئے۔ اج کل دا خوشاب کپتان ڈیوس دا وسایا ہو یا اے تے شہر دے وچکار بازار دی شکل وچ صلیب دا پکا نشان چھوڑ گیا اے۔ بے قائم دین سارا ڈھیہ گیا اے تقریباً 135 سال پہلاں اس دریا دی ڈھانال ساہیوال ضلع سرگودھا دے نیڑے جیہڑا 15000 ایکڑ نوں رقبہ نکلیا اے۔ ایہہ اس لہندے آ لے پاسے دے مقابلے وچ بہوں ذرخیز اے۔

ایہہ وی عجب گل اے جے دریا دے سجے پاسے پانی کوڑا اے تے

ایہہ کنارہ دو جے کنارے نالوں بہوں اُچا اے صدیاں توں دی ریت نوں
 ڈھاہ لالا کے دریا لہندے ہوندا ویندا اے۔ دریا دی اس دندے آلی وادی وچ
 بے شمار مٹھے پانی دے کھوہ تے کئی پرائیویٹ نالے وی بن گئے اہن جس دے
 نال پیداوار وچ زبردست وادھا ہويا اے۔ حالانکہ ایہہ وادی ضلع دا چوتھا حصہ
 اے پر استھ آبادی ضلع دی ادھی آبادی توں ودھ اے پنج قصبے جہناں دی
 آبادی 6000 ہزار توں ودھ اے سارے اسے علاقے وچ اہن۔ میانی توں
 لے کے شاہپور تائیں سارا علاقہ آباد اے۔ شاہپور توں ڈکھن آ لے پاسے
 جیہڑیاں زمیاں بار تے دندے دے وچکار اہن اتھے حالی تائیں نہر نہیں اپڑی
 اس واسطے زمی حالی بیکار پئی اے کھوہواں نال آباد کرن دی کوشش کیتی گئی اے
 استھ پانی 30 فٹ ڈوبنگا اے۔ اس نوں آڑی یا آڑا آدھے نیں۔ اسدی زمی
 وڈی پکی اے اس واسطے لگاتار نہیں گڈی ویندی۔ نہر دے اپڑن نال ہن ایہہ
 علاقہ وی آباد ہو گیا اے۔

تھل

ایہہ سارا علاقہ ریگستان اے پانی وڈا ڈوگھا اے۔ پانی دا دارو مدار
 صرف بارش اے۔ ٹوبھے توں سارا سال ضرورتاں پوریاں کیتیاں ویندیاں
 اہن۔ اتھے ہرن ہوندے اہن تے اجڑ پالن دا رواج اے۔ (اج کل تھل وی
 نہر نال اکثر آباد اے۔) جس علاقے وچ نہر نہیں استھ صرف چھو لے
 ہوندے اہن۔ ایہناں نوں اتنی پانی دی لوڑ وی نہیں ہوندی۔

مہاڑ

ایہہ علاقہ دریا دے پار اے تے اج کل خوشاب وچ شامل اے۔
اتھہ کدائیں کدائیں چشمے اہن جھنوں جے آدھے اہن لوکاں دی آبادی دا
دارومدار ایہناں اُتے اے۔ مشہور ایہہ نیں۔ سوڈھی آلی، کٹھے آلی تے کنڈ
آلی۔ کدائیں تھل وچ ٹوبھے اہن جیہڑے لوکاں دی ضرورت پوری کریندے
اہن۔ کنہٹی آلی جے نال باغ پیوایا ویندا اے۔ پہاڑ دے تلے دی زمی ذرخیز
اے پر پانی دی کمی اے۔ ایہہ پہاڑ 2500 توں 3000 فٹ اُچے اہن
سیکسر دی چوٹی 4992 فٹ اُچی اے تے اتھہ اج کل ہوائی فوج دا ریڈار
سٹیشن اے۔ ترے جھیلاں اہن ہک داناں جھیل اچھالی تے دوجی داناں جھیل
کبھے کی اے۔ تربیگی جاہلر اے۔ اتھہ کسے زمانے وچ بدھ مت دا زور رہیا
اے۔ نوشہرہ اس علاقے دا مرکزی شہر اے تے سارا علاقہ وادی سون سکیسر
اکھویندا اے۔ وڑجھے وچ لون دی کان اے۔ اس توں وکھرا کولے دیاں
کاناں وی اہن۔

مینہ/بارش

مینہ اس علاقے وچ اج کل گھٹ ای ہوندا اے۔ وادی چنھاں وچ
مڈھ تے 15 انچ ہوندا اے میانی 14 انچ 16 انچ ساہیوال خوشاب 10 انچ
نور پور 7 انچ نوشہرہ 14 انچ ہوندا اے۔ انہالے مینہ بہوں تے سیالے گھٹ
ہوندا اے۔ جتھے پندراں انچ ہوندا اے اس دا مطلب 11 انچ گرمیاں وچ

تے 4 انچ سیالے ہوندا اے۔ اپریل توں لے کے مئی تاں ایدھ انچ وٹ ہک انچ تقریباً جون وچ تے چار انچ جولائی وچ 13-1/4 انچ اگست وچ 1-1/2 ستمبر وچ اکتوبر نومبر وچ ایدھ انچ۔ جنوری فروری مارچ وچ ہر اک وچ ہک انچ۔ اسو، ستمبر دماہینہ وڈا ضرور سمجھیا ویندا اے۔ ایہہ فصلاں گڈن دے کم آوند اے۔ ایہہ مینہاں دا اندازہ دسیا گیا اے اج کل تاں ایہہ انچ ای بے موسمے ہو گئے اہن بھیرے کدے سارے سال صرف 5 انچ بارش ہوئی (1891) استوں اگلے سال 24 انچ ہو گئی 1888 سیالے وچ بھیرے 1/2 انچ ہوئی تے 10 میلاں تے میانی وچ 4 انچ ہو گئی۔

مینہ دی اہمیت

اج کل ضلع وچ نہراں دے آون نال بارش دی ضرورت بہوں ساری گھٹ گئی اے۔ پرانے سہ وچ بندے دیاں ساریاں ضرورتاں دا دارومدار صرف تے صرف مینہ ہوندا آہا۔ وقت تے ہک انچ مینہ جٹاں نوں بادشاہ کر دیندا آہا۔ ایس طرح بجلی دی کڑک وی جٹاں دا فائدہ کریندی آہی۔ اپریل مئی (وساکھ جیٹھ) وچ تھوڑی جیہیاں کنیاں کپاہ تے اگیتے باجرے گڈن واسطے وڈی چنگی ہوندی آہی۔ نومبر تے دسمبر (مگھر پوہ) دے مینہ نال زمیندار دی ویران زمین وی گڈن دے قابل ہو ویندی۔ جے خدا نخواستہ جولائی اگست (ساون بھادوں) سکے لگھ وین تے گھاہ پٹھے واسطے وڈا گھاٹا ہوندا تے وتر نہ ہون دی وجہ نال کنک گڈنی اوکھی ہو ویندی۔ انجے 1896 تے 1890

وچ سیالا مینہ توں وکھرا ای گزر گیا تے کنک دی فصل خراب ہو گئی۔ ایسے طرحاں 1893ء وچ اپریل مئی و ساکھ جیٹھ وچ کافی بارشاں ہوئیاں تے پئی ہوئی کنک دی فصل خراب ہو گئی کنک پڑاں تے ای ترک گئی۔

پہاڑی علاقے وچ کدی کدی برف وی پوندی اے۔ تے 1894ء وچ جدوں برف پئی تے پالا ودھ گیا۔ چندرہ (اولے) و ساکھ وچ پیاتے اس سون سکسرتوں لے کے چنہاں تائیں فصلاں تباہ کر دتیاں۔ اس دالڑ 50 میل لمبا 3 توں چار میل چوڑا آہا۔ کنک تے پوست تباہ ہو گیا اسے تے حافظ برخوردار فرمایا آ۔ چندرے نوں گڑاوی آدھے نہیں۔

راکھا وچارہ کیہ کرے
جد پکی تے پون گڑے

درجہ حرارت آب و ہوا

نہراں دے آون توں پہلاں بار تھل تے پہاڑ دے نال دے میدانی علاقے برصغیر دے گرمیاں وچ سخت گرم علاقے گئے ویندے آہن۔ ایہناں مہیناں وچ بارش گھٹ ہون کارن دن بدن گرمی ودھدی رہندی تے پارہ سنٹی گریڈ دا چھاں وچ 115 درجے ہو ویندا تے اوسطاً 108 درجے جون وچ رہندا۔ کدھی تے جتھے درخت (رُکھ) ہون تے درجہ حرارت عام طور تے 90 تے 95 تائیں رہندا رات نوں 85 درجے فارن ہائیٹ ہو ویندا۔ ہاڑ تے ساؤن (جولائی اگست) وچ بارشاں دی وجہ نال 105 تے آ ویندا تے راتیں

80 تائیں ڈھیہ ویندا بھادروں تے اسو (ستمبر اکتوبر) وچ گرمی گھٹدی لگی
ویندی اے تے سیالا آ ویندا اے۔ سیالا وی تقریباً چھ مہینے رہندا اے اس وچ
دیہاڑی دھپ تے راتیں پالا ہوندا اے۔ جے بارش ہو ونجے تے لوہری گھل
پوے تے پالا ودھ ویندا اے۔

پالا پوہ نہ پالا مانہ
وا گھلے تے پالا تاں

رات نوں ککر پوندے تے پارہ صفر توں وی پٹھاں ہو ویندا اے۔
وساکھ تائیں سیالا رہندا اے استوں کچھے سیالے دے کپڑے لاہ کے انہالے
دے ہولے تے پتلے کپڑے پون دا ویلا آ ویندا اے۔ وادی سون دا درجہ
حرارت میدان نالوں 10 درجے گھٹ رہندا اے۔ سکیسر دی چوٹی تے گرمیاں
وچ 90 توں اتے نہیں ہوندا۔ رات نوں 70 ہو ویندا اے۔ کیونکہ اس دی
اُچائی تقریباً 5000 فٹ اے۔

ہنیریاں

کدھی عام طور ہنیریاں نال خراب ہوندی آہی جد کالیاں ہنیریاں
گھلدیاں آہن تے دیہوں وی رات بن ویندا آہاتے گھپ انھیرا ہو ویندا
آہا۔ ایہہ ہنیریاں خشک موسم وچ اوندیاں آہن۔ ایہہ بہوں تاں لہندے آلے
پاسیوں تھل وچوں اوندیاں آہن تے رُکھاں تے باگاں دے کچے پھلاں دا
کافی نقصان ہو ویندا آہا۔ کئی لوگ ہنیری گھلن توں پہلاں بنھ چھوڑیندے

آہن تے منتاں منیدے آہن جے گھلے تے نقصان نہ کرے۔ رُکھ جڑاں
 وچوں پٹی ویندے آہن۔ تھل آباد ہون کارن ہنیریاں ختم ہو گئیاں آہن۔
 ولوہنے دی گھٹ گئے آہن اس وچ ہوا گول چکر بنا کے وڈی تیزی نال پھر دے
 آہن۔ سیکسرتے گرمیاں وچ کافی تیز ہوا چلدی رہندی اے۔

بیماریاں

ضلع دی عام صحت پورے پنجاب نالوں چنگی آہی اتھوں دی بیماری
 نال مرن دی تعداد 26 فی ہزار آہی تے پنجاب دی 31 فی ہزار آہی۔ ایہہ
 1890ء دی گل اے۔ اتھے بیماری عام طور تے پت جھڑ دے موسم وچ حملہ
 کریندی اے۔ ملیریا دا بہوں زور ہوندا اے۔ واری دی کس (بخار) تے
 (ترتجھک) دی کس عام ہوندی اے۔ پوہ مانہہ وچ نمونیہ ہو ویندا اے۔ کھگھ،
 تلی، جلاب اتھوں دیاں عام بیماریاں آہن۔ برسات دیاں بارشاں دی وجہ
 نال مچھر بہوں ودھ ویندا اے تے استوں بچن واسطے کوئی خاص انتظام نہ ہون
 دی وجہ نال کس دا بہوں زور ہو ویندا اے تے بندے بہوں مرن لگ پوندے
 نیں۔ 1887 وچ بارشاں دے گھٹ ہون نال مرن دی رفتار گھٹ کے 20
 فی ہزار ہو گئی 1884 وچ جد بارشاں زیادہ ہوئیاں کانگ آئی تے مرن آلیاں
 دی گنتری 39 فی ہزار ہو گئی۔ 1888 وچ 5918 لوک ہیضے دا شکار ہوئے۔
 کیونکہ پانی دی صفائی دا کوئی انتظام ناہ۔ 1896ء وچ 80 فیصد لوک اس مرض
 دا شکار ہوئے۔ مرن آلیاں دی تعداد 156 فی ہزار ہو گئی۔ بھیرے وچ

1278 بندے موئے اس دی اس ویلے آبادی 17428 آہی ساہیوال وچ
 890 فوت ہوئے اس دی اس ویلے آبادی 9210 آہی۔ انجے وادی چناب
 وچ وی کئی قسم دیاں بیماریاں آہن۔ جیہڑے بندے چھپڑاں داپانی پیندے
 آہن۔ ایہناں نوں نارمہ نکل پوندا۔ ایہہ ہک کیڑا ہوندا اے جیہڑا پلی (پنڈلی)
 یا بانہہ توں نکل پوندا۔ لوک اس نوں ہتھ یا پلی تے دھیت لیندے آخر سارا نکل
 آوند اے ترٹ ویندا تے وڈی تکلیف ہوندی۔ گردے تے مٹانے دی پتھری
 وی عام بیماری آہی۔

لون/نمک

سکھاں دے زمانے وچ وڑچھا وچ لون کڈھن دی کوشش کیتی گئی پر
 ایہناں کسے اصول توں وکھرا کم کیتا تے کاناں وچ کوئی تھم نہ بنایا اس دانتیجہ
 ایہہ ہویا کہ کاناں ڈھے گئیاں۔ اج کل ٹھیک کم ہو رہیا اے۔ لون کھٹ کے
 کڈھن آلیاں نوں واڈھا ادھے آہن۔ اسی زمانے وچ ایہناں دی مزدوری
 100 من تے 3 روپے 12 آنے آہی ایہہ ریٹ 1848ء دے آہن۔ ایہہ
 کم کرن آ لے کمزور صحت دے لوک آہن 50 فیصدی ملازم ہوندے آہن 8
 آنے مزدوری (دیہاڑی) ملدی رہی۔ ایہناں دیاں سوانیاں اندروں باہر
 کڈھن دا کم کریندیاں آہن جیہڑیاں 40 توں 80 پونڈ تک چالیندیاں آہن
 اس ویلے 9 پائی فی من قیمت آہی۔ اس کان تے کم کرن آ لے سپرنٹنڈنٹ
 انسپکٹر 100 مزدور تے 22 گارڈ آہن۔ ایہناں دی تنخواہ 6440 روپے آہی

تے 29078 روپے دی آمدن ہوئی۔ ایہہ لون بیڑیاں وچ پا کے دریا دے ذریعے ملتان سکھر، جھنگ، مظفر گڑھ گھلایا ویندا دریا تائیں اٹھاں دے نال گھلایا ویندا۔

کوئلہ

پہاڑی کوئلہ وی کافی مقدار وچ کڈھیا ویندا اے پر ایہہ چنگی قسم دا نہیں صرف اٹاں دے بھٹھیاں وچ بالیا ویندا اے۔

جسپم

ابرق جسپم کھبے کی دے نیڑے ملدا اے اج کل کلر مار دے طور تے استعمال ہو رہیا اے۔

چونے دا پتھر

ایہہ سارے پہاڑ وچ اے اج کل پائینرز سیمنٹ فیکٹری چنگی ایسے وجہ تے چل رہی اے۔

چونا

ایہہ چونے دے پتھر دے ساڑن نال ملدا اے۔ بھیرہ اُس زمانے چونے دا مرکز آہ۔ چونے دا پتھر کھیوڑے توں ریل دے ذریعے 6 روپے 14 آنے سومن منگوايا ویندا بالن 12 روپے 8 آنے دا سومن ہوندا آہ۔

1893ء وچ 14 بھٹھیاں بھیرے آہن۔ ایہتھوں ایہہ لاہور ملتان امرتسر گھلیا
ویندا آہ۔

شورہ

کلر آلیاں زمیاں توں شورہ بنایا ویندا آہ جیہڑا بارود تے آتشبازی
دے کم اوندا۔ استوں علاوہ لانے توں کھار بنائی ویندی جس دے نال کپڑے
دھوتے ویندے آہن۔

سیلکاریت

ایہہ اج کل شیشے دے بھانڈے بناون دے کم آوندی اے۔ ایہہ
سیکسر دے نیڑے نکلدی اے۔

فاسلر

ایہہ پہاڑ سائنسداناں واسطے ہک وڈی نعمت اے۔ اتھتھے ہاتھی توں
لے کے مگر مچھاں دے فاسل موجود اہن اس دے اُتے ذرا محنت کیتی ونجے
تے پاکستان ایہناں نوں ویچ کے بہوں کجھ کماسکدا اے۔

جنگلی جانور

کسے زمانے وچ اتھتھے ہر قسم دے شکاری جانور ہوندے اہن۔ بار

ایہناں نال بھری ہوئی آہی پر جیوں جیوں آبادی ودھدی گئی تے ہتھیار بندوق ہوگئی تے جانور وچارے مقابلہ نہ کر سکے تے مکدے مکدے مک گئے۔ ایہناں دی تفصیل کجھ انج اے:-

پہلاں اتھے شیر وی ہوندا آہ رنجیت سنگھ نے شاہپور دے بیلے وچ اس دا شکار کیتا اے۔ پر انگریزاں دے اون تے ایہہ سارے جانور بار ختم ہوون تے وی ختم ہو گئے۔ چیتے یا چترالکڑ بگڑ شیر مارن واسطے انگریزاں انعام رکھ چھوڑیا کہ جیہڑا ایہناں نوں مرلیسی اسنوں انعام ڈھیسے۔ 1895ء وچ 3 شیر 152 بگھیاڑ (بھیڑیے) مارے گئے تے انعام دتا گیا۔ بعد وچ 3 شیر 11 چترے 745 بگھیاڑ مارے گئے۔ لومڑیاں تے باری بلے بار وچ کافی اہن۔ ہرن بار تے تھل وچ کافی اہن ہڑیاں پہاڑاں تے اہن ایہناں دے سنگھ 31.1/2 انچ تک ماپے گئے۔ 27 تے 28 انچ عام اہن۔ انہاندا شکاری کتیاں نال شکار کیتا ویندا۔ سکیسر وچ لنگور تے باندروں وی آہن پر ہن کوئی نہیں۔

پکھو

پکھوں وی ہتھیرے ختم ہو گئے اہن۔ ایہناں وچوں ہک ”لاگ“ آہا جیہڑا بار وچ عام آلا پر ہن اس داناں وی کوئی نہیں جاندا۔ اس توں ہور گورین (Bustrabd) دا وی ناں سنن وچ کدی نہیں آیا۔ ایہہ وی بار وچ عام ہوندا آہ۔ باقی تتر بٹیرے۔ لم ڈھینگ نڑی وی ختم ہو گئے۔ صرف

نمونے دے تتر تے بٹیرے رہ گئے اہن۔ اہن وی لوک ختم کر کے رہسن
کیوں جے ہُن ٹیپ رکھ کے اہن بلایا ویندا اے۔ ایہہ بہارتے خزاں وچ
اس علاقے وچ آوندے اہن۔ تلیر وی کدی عام ہوندا آہ پر اوہ وی ہُن مکن
دے نیڑے اے۔ ہُن تاں گر جھاں ای رہ گئیاں اہن جے ایہہ وی حلال
ہوندیاں تے کدوں دیاں مک گئیاں ہوندیاں۔ شکاری پکھو جیہڑے پکھواں
دا شکار کر کے توازن رکھدے آہن۔ مک گئے تے اج کل کاں شکاری باز
بن گیا اے۔

سپ

عام طور تے انتھے زہریلے سپ پھنیرتے سنگچو راہن بار صاف کرن
دے ویلے سپ مارن دا انعام رکھیا گیا۔ 1895ء وچ 435 سپ مارے گئے
پروت وی 43 بندے سپ لڑن نال موئے۔

مچھیاں

دریاواں وچ عام مچھیاں ڈبھراتے راہو اہن۔ ایہناں دے وزن 8
سیر تک ہو ویندا اے۔ ملہی 15 سیر تائیں ہو ویندی اے۔ مہاشیر 20 سیر تک
ہو ویندی اے۔ سنگھاڑا 4 سیر تک۔ ڈولا 5 سیر تائیں۔ کھاؤن واسطے راہو
سنگھاڑا تے مہاشیر ودھیا گئیاں ویندیاں اہن۔

کیڑے مکوڑے

مکڑی ایہہ اک دے گھوڑے ہار ہوندی اے۔ ریگستان وچ جمدی
اے تے کروڑاں دی تعداد وچ آوندی اے۔ جتھے رات رہ ونجے اتھے
سویرے کوئی شے سادی نظر نہیں آوندی ہر شے چٹ کر دیندی اے۔
مکڑی ہر شے کھا ویندی اے۔ پردھریک تے اک دے نیڑے نہیں
ویندی۔ ساری دنیا وچ ایہنوں مارن واسطے مہماں گھلیاں ویندیاں اہن ایہہ
عرب دے ریگستاناں وچوں آوندی اے۔ تے اج کل جد اس دے ودھن دا
پتہ لگے سپرے کر کے مار دتا ویندا اے۔ اج کل اس واسطے 40 سال ہو گئے
اہن ایہناں دا حملہ کدی نہیں ہویا۔ ٹوکے تے سوی وی خطرناک ہوندے نیں
ایہناں تے حالی تائیں قابو نہیں پایا جا سکيا۔ انجے ہار گھن تے مچھرتے وی
قابو نہیں پایا گیا۔ گھن واسطے گولیاں آ گیاں اہن جیہڑیاں کلہوٹے وچ رکھن
نال گیس بن کے گھن مار چھڑیندیاں اہن۔ ماکھی دیاں کھیاں صرف انسان
دیاں سجن اہن جیہڑیاں ماکھی (شہد) دیندیاں اہن باقی ڈیموں (بھڑ) پیلے
تے کابلی وڈے خطرناک ہوندے ایہناں دے لڑن نال سوچ چڑھ ویندی
اے۔ بھوآں لڑن نال بہو پیڑ ہوندی اے۔ ڈنگی ڈنگراں نوں لڑدی اے ایہہ
ماکھی ہار ہوندی اے۔

رُکھ

بار دے جنگل وچ ون کری جنڈ تے ملا ہوندا آہا ون اج کل صرف

ریگستاناں وچ رہ گیا اے۔ جنڈوی ورلا دسدا اے۔ کری تے ملاوی ہن تھلاں
 وچ رہ گیا اے۔ ون دیاں پیلاں لوک چُن کے کھا کے گزارہ کریندے آہن
 جون وچ پکدیاں آہن تے دو رنگاں دیاں ہوندیاں اہن چٹیاں تے لال۔
 کری دے ڈیلے اچار دے کم آوندے اہن تے پک کے جد لال ہوویندے
 تے وت وی کھادے ویندے۔ جنڈ دی سنگری دی غریب لوگ چاڑھ کے
 کھاندے آہن ملے تے کھٹے باریک بیر لگدے آہن اوہ کھوہ کے کھادھے
 ویندے اہن۔ ون چھاں دے وی کم اوندا تے جنگل وچ انج سگھناں تے زمی
 نال لگا ہویا ہوندا اے۔ اس وچ چور لک ویندے آہن۔ دریا دے کنارے
 تے ٹاہلی تے کمر ہوندے اہن جہناں دی لکڑی وڈے کم اوندی اے۔

شرہ نہہ، ہرنولی، کھجور، اوکا نہہ، ون، سوہانجا، اوکاں وی کم دے رُکھ
 اہن۔ کھجی سدا کمبوہ وچ ہوندی آہی پرہن ساریاں دریا دی ڈھانال ختم ہو
 گئیاں اہن پیل تے بوہڑ ہندوواں دے مقدس رُکھ اہن۔ اُبل موہری جہڑا
 مڈھ رانجھے دے نیڑے اے اتھے ہک وڈی بوہڑ اے۔ جیہڑی ترے کلیاں
 وچ کھلری ہوئی اے۔

جھاڑیاں تے پودے

ایہناں وچ اک، دبھی، پوہلی، بھکاٹ، ہرل، بھکھڑا، تاندلہ، جوانہہ،
 لیہا، لانی، دھماں، سروٹا۔

گھاہ

کھبل، ڈبھ، سواک، ڈیلا، مُرک، بھتل، اٹ سٹ، ڈیکو، سنجی، مینا،
باتھو، کانہہ، سر، دریا دی کدھی تے میگھے دے کول سرکار سروٹے لیلام (نیلام)
کریدی۔ 1892ء وچ 1070 دی وکی کانے کانیاں سرکئی شیاں بنان دے
کم آوندے نیں۔ منج داوان بنا کے منجیاں انیاں ویندیاں اہن۔
کچھ ہور بوٹے ہرل، اک، پاڑا، بھکھڑا، کوندرا، لدھڑی، بھکاٹ،
چھڑ، دھتورہ، مہوڑیاں، آلاں، نڑی، دھماں، سونف، نیازبو، پودینا، جویں،
دُڈھل بوئی، پدبھیرہ، کاچ ماچ، جماؤں، پوہلی، پالک، دھنیل

ٹی وی

پاکستان وچ پہلی واری ٹیلی ویژن دا افتتاح صدر ایوب نے 26
نومبر 1964ء وچ ریڈیو پاکستان لاہور دی کنٹین وچ کیتا۔ ایہہ صرف لاہور
تک ای محدود آہ۔ پروگرام ساڈھے چھ بجے شام توں ساڈھے نو بجے تک آہ
کل ترے گھنٹے جنوری 1973ء وچ سٹیلاٹ دے ذریعے پروگرام یورپ تک
اڑ گئے۔ رنگین ٹی وی نشریات 1974ء توں چالو کیتیاں گئیاں۔ سویرے دی
نشریات 14 جولائی 1989ء توں چالو ہوئیاں۔

سکیسر، ٹی۔ وی بوسٹر

ساڈھے ضلع وچ ٹی وی پروگرام دکھاؤنے دا سارا دارومدار سکیسر دے

بوٹرتے آے۔ اس 8 جولائی 1973 نوں کم کرنا شروع کیتا۔ اس دا پروگرام
43000 مربع کلومیٹر تک ویکھیا جاسکدا آے۔

آثار قدیمہ

ساڈے کول اس علاقے دے بارے وچ بہوں گھٹ علم آے۔ کجھ
اس علاقے دے آس پاس آثارِ ملدے نیں جس توں کجھ نہ کجھ پتہ لگدا
آے۔ سبھ توں پرانی عمارت امب شریف دا تاریخی مندر آے جیہڑا تریں
مندراں تے مشتمل آہ۔ ایہہ کابل دی برہمنی حکومت دے وقت 800ء وچ
کشمیری طرزِ تعمیر تے بنایا گیا۔ ایہہ دوںکے تے ہک وڈا مندر آہن پرہن دورہ
گئے آہن۔ ایہتوں ہک کتبہ وی ملا آہ جیہڑا لپہ گھلیا گیا۔ لپہ اوس ویلے اس
علاقے دا ضلع آہ ایہہ اُٹھ تے لد کے گھلیا گیا پروت کجھ پتہ نہ لکیا۔ 1888ء
وچ ہک ہور کتبہ لدھا جیہڑا لاہور عجائب گھر کھل دتا گیا۔ ہک بت لدھا اوہ وی
ایتھے گھل دتا گیا۔ امب دے اُبھر دے آلے پاسے ہک لمی کدھ تے وڈے
دروازے دے آثارِ ملدے نیں۔ جیہڑی قلعے دی نشاندہی کریندی آے۔
ایتھے ہور وی بدھ مت دے بہوں سارے چبوترے ملدے نیں۔ جیہڑے
ایہناں دیاں وہاراں دے نشان آہن۔ ایہہ عبادتگاہواں وڈے وڈے مستطیل
پتھراں نال بنائیاں گئیاں آہن۔ ایہہ آثارِ کھٹوائی توں لے کے سکلیسٹر تائیں
بے شمار بنے ہوئے آہن۔

گھوڑا کولوں ہک کتبہ لدھا آہ جہنوں لاہور عجائب گھر گھلیا تے ایتھے

بھولرتے پڑھیا تے دسیا کہ گپت عہد دے خط مئی دی تحریر اے تے زبان غلط سنسکرت تے مقامی پراکرت دی ملی جلی شکل اے۔ (مطلب پنجابی) اس دسیا جے ایہہ تحریر طوراً مناشا ہا جاؤلا (Tormana Shaha Javla) دے زمانے دی اے۔ جیہڑا ہوسگدا اے ترک بادشاہ ہوئے۔ اس وچ درج اے کہ اتھے بدھ دھرم دی عبادتگاہ روٹا سدھا وردھی (Rota Sidhavridhi) نے ماہی ساسا کا دے سکول دے استادان واسطے بنائی آہی۔ اس قصبے داناں نیچرا دسیا۔ ہوسگدا اے اوہ ہُن دا نوشہرہ ای ہووے۔ ایہہ چوتھی صدی دی تحریر اے۔ ایہہ کتبہ 1888ء وچ لدھا آہا تے ایہہ اس علاقے دی قدیم ترین تحریر اے۔

ناڑی کے کھنڈرات کے متعلق ماہرین نے نشاندہی کی ہے کہ یہ کھنڈرات موہنجوداڑو سے قدیم ہیں۔ ان ماہرین میں ڈاکٹر سیف الرحمن دار ہیں جنہوں نے اس پر 60 صفحے کا مقالہ بھی پیش کیا ہے۔

سکے

امب دے نیڑے 1884ء وچ ہک آجڑی نوں 549 سکے ملے جیہڑے کئی بادشاہاں دے اہن۔ اجمیر دے راجہ تے غوری دے زمانے دے وی اہن۔ 1888 وچ چٹے دے کول ہک بندے نوں ہل وہندیاں 498ء سکے ملے جیہڑے جلال الدین خورازم شاہ دے زمانے دے آہن۔ ہکی ہوری بندے نوں 395 سکے لدھے جیہڑے سلطان بلبن سلطان دہلی دے زمانے

دے اہن (1645ء 1687ء)۔

موجودہ سرگودھے دے آثار قدیمہ

جہلم تے چناب دیاں وادیاں وچ 280 بے اچیے اہن جہناں دا تعلق آثار قدیمہ نال اے۔ ایہہ آثار کسے زمانے وچ وڈے وسدے رسدے قصبیاں دے اہن۔ اتھے پرانے کھوہ وی ملے نیں جہناں دی اٹاں دی چنائی صرف 25 فٹ اے تے اج کل دے 60 فٹ اہن ایس دا مطلب ایہہ ہویا جے کسے زمانے وچ دریا اتھے نیڑے وہندا ہوسی۔ جس کر کے پانی نیڑے آہ تے ہن دور پٹھاں ہو گیا اے۔ ایہہ وی ہوسکدے کہ ایہہ سارا علاقہ پرانے زمانے وچ وی اسی طرح آباد ہوئے۔

پرانے قصبے

میانی دے نیڑے ترے میلاں تے جھی Vijjhi دا پنڈ اے چک سانوں شاہپورتوں 13 میل لک موڑ دے کول اے۔ پنج پیرنہنگ دے کول اے۔ ایہہ ترے سبھ توں وڈے کھنڈر اہن۔ جھی دے متعلق جنرل کنگھم نے لکھیا اے ایہتوں اسنوں انڈو سیتھین Sathian زمانے دے سکے ملے آہن تخت ہزارہ کسے زمانے وچ جہانگیر نگر۔ تخت ہزارہ اکھویندا آہ۔ آئین اکبری دی جمع بندی دے مطابق ایہہ سرکار دوآبہ چچ وچ تخت ہزارہ دا محل 4689136 دام یا 117228 روپے مالیہ دیندا آہ۔ اتھے شاہ شامدی دا

شاندار مقبرہ تے راجھے دی شاہی مسیت آہی پرہن ڈھیہ گئی اے۔ 1785
 وچ ایہہ اُجڑ کے وت آباد ہويا۔ غلام رسول ضلعدار دے بقول سرکاری ریکارڈ
 دے مطابق ایتھے کدی وی راجھے نہیں رہے۔ نہ ہن وسدے اہن۔

چک ساہنو احمد شاہ ابدالی دے جرنیل نور الدین نے برباد کیتا تے
 وت نہ بنیا۔ پنج پیر ہک وڈاٹھ اے جس تے لمے مزار بنے ہوئے نیں۔ ایہناں
 دی لمتن 9 نوگزا اے۔ ہندو اس نوں اپنے بزرگاں نال منسوب کریندے آہن
 پر اتھوں کوئی خاص شے نہیں لدھی کجھ مغلاں توں پہلے دے سکے ملے اہن۔
 کچے قلعے دے آثار اہن جسدا ناں راجہ بھوج آہ۔

تاریخی عمارتاں

بھیرہ وچ شیر شاہ سوری دی شاہی مسیت تے اورنگ زیب دی
 حفظانی نے محلے وچ دو منزلی مسیت اے۔ واں گنجیال واں میانہ خوشاب وچ
 بادشاہاں دا روضہ شاہ یوسف دا روضہ اے۔ ایہہ نوسو ہجری وچ بنیا۔
 سرگودھے شہر وچ ہندواں تے سکھاں دیاں مذہبی عمارتاں ہن محمدیہ
 مدرسہ تے انبالہ سکول اہن۔

ضلع شاہپور دی بھن ٹرٹ

شاید ای کوئی ہور اجیہا ضلع ہوئی جس دی کانٹ چھاٹ اتنی واری
 ہوئی کہ وت وت اس دا نقشہ بدلدا رہیا اس دی کہانی کجھ انج اے۔
 1849ء وچ جموں تائیں پورا چچ دو آب ہک ضلع آہ۔ جیہڑا جہلم

تے چہاں دے ملن تائیں آہا۔ اس دا ڈپٹی کمشنر مسٹر بلی بنایا گیا پر اس وڈے ضلع دے انتظام دی اوکھ نوں ویکھ کے جون 1849ء وچ اسنوں دو ضلعیاں وچ ونڈ دتا گیا۔

1- گجرات

2- شاہپور

اس توں کچھ میانی، بھیرہ، ساہیوال تے قادر پور نال ترے پنڈ مڈھ۔ احمد نگر تے کالوال چناب دے کنارے اکٹھے شاہپور نوں مل گئے۔ 1851ء وچ پوری تحصیل قادر پور جھنگ نال رلا دتی گئی۔ کیونکہ اس دے لوکاں دا سانگا جھنگ دے سیالاں نال آہ۔ اس دے بدلے خوشاب نوں لیہ نالوں کپ کے شاہپور نال رلا دتا گیا۔ فاروقہ وی شاہپور نوں واپس مل گیا۔ 1853ء وچ اس ضلع دیاں ترے تحصیلاں آہن بھیرہ کالوال تے ساہیوال۔ خوشاب گروٹ تے جوڑا نوں ساہیوال تحصیل نال رلا دتا گیا۔ 1857ء وچ تعلقہ مٹھ ٹوانہ وی لیہ نالوں کپ کے شاہپور نوں دے دتا گیا۔ کیونکہ ایٹھوں دے لوکاں نے اس دی درخواست کیتی کہ لیہ بہوں دور اے۔ 1848ء وچ ہک نویں تحصیل جابہ بنا کے اس نوں شاہپور نال رلا دتا گیا۔ اس وچ نور پور سہتی دے چار لوک (پنڈ) تعلقہ کھجے کی دے چھ لوک تعلقہ سون دے 19 لوک تعلقہ جی دے آٹھ لوک میال دے 12 لوک پکھڑ دے چار کھٹ دے پنج تے احمد آباد دے چھ لوک ایہہ کل 45 لوک آہن جہناں دا مالیہ تقریباً ہک لکھ روپیہ آہ۔ 1861ء وچ کالوال تحصیل ختم کر کے علاقہ چنیوٹ

نال رلا دتا گیا۔ 1862ء تعلقہ نور پور بنوں نالوں وکھرا کر کے شاہپور نال رلا دتا گیا۔ سکیسرنوں میانوالی نال رلا دتا گیا۔ جابہ جہلم نال رلا دتا گیا۔ اس دے ایس علاقے دا ریکارڈ خوشاب منتقل کر دتا گیا تے ساہیوال تحصیل دی ختم کردتی گئی۔ کیونکہ بنوں تے لہ علاقہ ملن نال نویں تحصیل خوشاب بن گئی۔

1877-78ء وچ تھڈا ملاحاں آلا برج فتو۔ چھنی سلطان، چھنی رحمت خان چھنی میر محمد۔ برج غوث ضلع گوجرانوالے نوں دے دتے گئے۔ اس طرح ضلع دی نویں شکل بن گئی۔ جیہڑی 1982ء تک رہی وت خوشاب نوال ضلع بنا کے وکھرا کر دتا گیا۔ 1877 وچ جد حداں ٹھیک ہو گئیاں تے مالیہ ودھا دتا گیا انج کر کے سرکار نوں چار لکھ دی بجائے چھ لکھ ملنے شروع ہو گئے۔ جانوراں تے بندیاں وچ دی وادھا ہويا۔

میانہ گوندل ملکوال، بادشاہ پور، فتو آلہ چوہیاں دا۔ ایہہ سارے پنڈ ضلع شاہپور نالوں کٹ کے گجرات نال لا دتے گئے۔ اج کل اتھھے وی ہک نوال ضلع منڈی بہاالدین بن گیا اے۔ میانہ گوندل دا پورا اتھانہ گجرات وچ رلا دتا گیا۔ ایہہ بھن تروڑ کوئی آخری فیصلہ نہیں ہوندی وقت دیاں ضرورتاں دے نال حالات بدلدے رہندے آہن۔ اج کل ساہیوال، سلاوالی، کوٹ مومن نوياں تحصیلاں بن گئیاں اہن۔

ضلع دا انتظام

ضلع شاہپور راولپنڈی ڈویژن دا حصہ آہ۔ ضلع دا افسر اعلیٰ ڈپٹی کمشنر

ہوندا۔ اس دے نال نال عدالتی اختیارات وی رکھدا اسدے ماتحت ساریاں عدالتاں ہوندیاں۔ جتھے جج، رجسٹرار تے ہک اسٹنٹ کمشنر، ہک ایکسٹرا اسٹنٹ کمشنر، ہک افسر مال، ہک افسر خزانہ ہوندا آہ۔ ہر تحصیل دا انچارج تحصیلدار ہوندا جیہڑا سکیئنڈ کلاس مجسٹریٹ وی ہوندا۔ اسدے ماتحت نائب تحصیلدار قانون گو تے پٹواری ہوندے اُس ویلے عملے دی تفصیل تحصیل وار کجھ انج آہی۔

تحصیل	دفتر قانون گو	فیلڈ قانون گو	پٹواری	اسٹنٹ پٹواری
بھیرہ	1	3	65	4
شاہپور	1	3	60	5
خوشاب	1	3	58	6
میزان گل	3	9	183	15

دیوانی عدالتاں دے مقدمات کان دو مجسٹریٹ بنائے گئے اہن ہک دی بھیرے وچ کچھری آہی تے دو جے دی شاہپور۔ انہاں دی مدد واسطے اعزازی مجسٹریٹ وی اہن جہناں دے ناں ایہہ اہن:- (1) شیخ فضل الہی (2) دیوان گنپت رائے تے ملک دیوی داس۔ ایہہ بھیرے وچ اہن۔ (3) دیوان جواہر مل وی بھیرے شہرتوں وکھرا ساری تحصیل دے مقدمے سندا آہ (4) ملک محمد خان ٹوانا ایہہ شاہپور وچ کچھری لیندا آہ تے پوری تحصیل دے مقدمے سندا آہ۔

پولیس

ضلع دی پولیس ضلع افسر پولیس دے ماتحت ہوندی آہی۔ پہلی جنوری

1897ء وچ اس دی تعداد ایہہ آہی۔

ریزرو	حفاظتی عملہ	گارڈ	میزان کل	
57	191	97	345	ضلع
	100		100	میونسپل
57	291	97	445	میزان

اس توں وکھرا 470 چوکیدار وی لوکاں وچ آہن جہناں دا کم ہر کئی وڈی واردات دی اطلاع تھانے وچ دینی ہوندی آہی۔ اس ویلے ایہہ تھانے ضلع وچ بنائے گئے آہن۔ اج کل ایہناں وچوں کئی ختم ہو گئے آہن تے کئی نویں بن گئے آہن۔

تحصیل شاہپور = شاہپور، ساہیوال، جھاوڑیاں

تحصیل بھیرہ = بھیرہ، میانی، چک رامداس، میانہ گوندل، کوٹ مومن، مڈھ

تحصیل خوشاب = خوشاب، مٹھہ ٹوانہ، اتراء، کنڈ، نور پور، نوشہرہ، گل پندراں

تھانے آہن۔ ایہناں نوں وکھریاں چار پولیس چوکیاں وی آہن دھریہ، مٹھہ

لک، بھاگٹوالہ، لکسین ایہناں دے نال پھانک وی ڈنگراں واسطے ہوندا آہ۔

جے کسے دے کھیت وچ پے وچن آہ تے اوہ ول کے تھانے دے ویندا آہ تے

اتھ جرمانہ بھر کے چھڑالیندے آہے۔

ایہناں دے وچوں شاہپور، بھیرہ، میانہ گوندل تے نوشہرہ فسٹ کلاس تھانے

آہن تے باقی سیکنڈ کلاس درجے دے تھانے آہن۔

جیل

اس ویلے صرف شاہپور وچ جیل اہی۔ اج کل سرگودھے وچ وی اے اس ویلے جیل دا سپرنٹنڈنٹ ہسپتال دا سول سرجن ہوندا آہ۔ اس دے ماتحت ہک جیلر تے کلرک تے کچھ وارڈن ہوندے اہن۔ اس دا سال دا خرچ 14672 روپے آہ تے نفع 2434 روپے آہ۔ جیہڑا قیدی کم کر کے کماوندے آہن ہر قیدی تے 40 روپے ماہوار خرچ آوندا آہ۔ باہر ہک باغ تے سبزیاں گڈن کان زمی وی اے جتھے قیدی کم کریندے اہن۔ اس جیل وچ 321 قیدیاں دی گنجائش اہی۔ پنجال سالان وچ صرف 223 مرد تے 4 عورتاں قیدی رہیاں۔

جرم دیاں قسماں

جرم دیاں قسماں کوئی انتیاں خطرناک نہن ہوندیاں پنجال سالان وچ صرف پورے ضلع وچ 14 بندے قتل ہوئے۔ ایہہ وی زمین تے زن دی وجہ نال ہوئے۔ یا بنے اگا نہہ پچھا نہہ کرن تے پانی لاؤن تے یا کئی ہور نکے نکے وقتی جھگڑے دی وجہ توں تھانے تے جیل دا مونہہ ویکھنا پیا۔ عام طور تے لوک امن پسند اہن۔ لڑائی سوٹیاں تے وٹیاں نال ہوندی۔ لڑن توں پچھے لوک ترکھی صلح کروا دیندے۔ عورتاں دے اغوا (اُدھالا) سخت جرم منیا دیندا۔

ڈنگراں دی چوری

ڈنگراں دی چوری عام آہی اسنوں بہادری سمجھیا ویندا آہ۔ گھرو تہ
پگڑی سرتے رکھ سگدا جد اوہ چوری ڈنگر کر لے آوے۔ جیہڑا چوری نہ کر سگدا
اسنوں بزدل تے مسیتز آکھیا ویندا۔ جس دا ڈنگر چوری ہو ویندا اوہ کھوجی دی
مدد نال گھرا لے کے تڑدے۔ چورنوں کالا وی ادھے اہن۔ بار وچ ایہہ وقت
پاس کرن دا ہک طریقہ آہ۔ چور ڈھکن توں پہلاں، اس جاہ دا چنگی طرحاں
نال جائزہ لیندا اس دی راکھی دا طریقہ معلوم کر لیندا۔ چوریاں عام طور تے اہ
ہنیریاں راتاں وچ کیتیاں ویندیاں اہن۔ ڈنگر کھولن توں کچھ چور دی وڈی
خواہش ہوندى اے جے کہ ڈنگر تیز توں تیز تڑے تا کہہ دیہوں چڑھن توں
پہلاں اوہ اپنی پناہ گاہ وچ اپڑ ونجے۔ اتھے ونج کے عام طور تے چور کسے
ہوری دے سپرد کر کے پچھانہ آ ویندا اے۔ اوہ مال نوں اگانہہ توں اگانہہ کر
کے تڑدے رہندے اہن کدی انج وی ہوندا کہ جھنگ دا چوری کیتا ہو یا اٹھ
پشاور توں اگانہہ خیبر کولوں لدھا۔ ہک گھوڑی شاہپور توں چوری ہوئی تے اوہ
فیروز پور توں لدھی۔ ڈنگراں دے سائیں پولیس وچ رپٹ درج کراؤن دی
بجائے آپ ڈھوڈھن نوں چنگا جاندا اہن۔ راہ تے اپنے بیلیاں نوں اہر
دیندے ویندے اہن جس وچ ڈنگرا دا حلیہ وی دسیا ویندا۔ ایہہ انج کر کے وی
مال لہہ پوندا اے۔ چور ڈنگر چکدیاں دی دوپہر نوں چوری کر کے بار وچوں
لے ویندے جس ویلے چھیڑوں چھاں تھلے سیس پوندے۔ سائیں جنگل وچ

رُکھاں تے چڑھ کے وی نظر مریندے تاکہ پتہ لگے کہ چور کدائیں نیڑے
ویندا پیا ہوئے۔

نِیاں

جے گھرا کسے دے ڈیرے تے اپڑ ونجے تے اوہ یا وِگ دے دیندا
مطلب ڈنگر دے بدلے ڈنگر دے دیندا۔ جے اوہ مگر ونجے تے وت نِیاں تے
گل آ ویندی۔ کسے معتبر نیک آدمی نوں اس دے نِیاں واسطے آکھیا ویندا۔ تے
نِیاں مسیتی وڑ کے یاں کسے خانگاہ تے ونج کے شک آ لے بندے دی جائی
سوہنہ چیندا اے۔ انج لوک اس دی گل من لیندے اہن۔ جے کوئی مرکھت
دس دیوے تے اسنوں اس دا معاوضہ ملدا۔ ساڈے وسیب وچ پولیس کول
وین دی بجائے لوک ستھاں وچ بہہ کے اپنے فیصلے آپ کریندے آہن۔

کھوجی

ڈنگراں دی چوری ڈھونڈن واسطے کھوجی دی لوڑ ہوندی۔ کئی واری
پولیس نوں وی اس دی خدمت دی لوڑ پوندی۔ کھوجی اپنے کم وچ اتنا ماہر ہوندا
کہ چاہے چور چال بدلے جتی بدلے۔ اوہ اس توں بچ نہیں سگدا۔ اوہ اسدا
قد وزن تک دس سگدا آہ۔ انج کل ساڈے علاقے دے مشہور کھوجی ایہہ
نیں۔ (1) بھائی خان جھاوری (2) زمان سنگا خورشید (3) رجادہ خان پور
واڈھرہ۔

ڈسٹرکٹ بورڈ

اج کل دی ڈسٹرکٹ کونسل دا پرانا ناں ڈسٹرکٹ بورڈ آہ۔ اس ویلے اس دا چیئرمین ڈپٹی کمشنر ہوندا آہ۔ اس دے ممبر درباری کرسی نشین تے انعام دار ای ہو سگدے اہن۔ اسدا کم سڑکاں بناؤنیاں ہسپتال ریست ہاؤس سکول قائم کرنا۔ رُکھ لاؤنا، پتن دا انتظام کرنا۔ ایہہ ممبر سال وچ چھ واری ضرور ملدے اسدی آمدنی 77110 روپے آہی تے خرچ 18000 تعلیم تے 10000 ہسپتال 31000 رفاہ عامہ دے کماں تے خرچ ہوئی۔

تعلیم

1897ء وچ پورے ضلع وچ صرف دو ہائی سکول اہن تے اوہ وی بھیرے آہن۔ ہک میونسپل کمیٹی بھیرہ چلیدی آہی تے دو جے نوں ہندو چلیدی تے ایہہ اینگلو سنسکرت ہائی سکول آہ۔ کل پنج مڈل سکول اہن جیہڑے میانی، شاہپور، ساہیوال، خوشاب تے نوشہرے آہن۔ میانی خوشاب تے ساہیوال میونسپل کمیٹیاں چلیدی اہن پر شاہپور تے نوشہرہ ڈسٹرکٹ بورڈ چلیدا رہیا۔ نوشہرے وچ انگریزی کوئی ناہی تے میانی وچ سنسکرت وی پڑھائی ویندی آہی۔ اردو دا حالی رواج ناہ۔ 35 پرائمری سکول آہن۔ 4 زمیندارہ سکول آہن جیہناں نوں ڈسٹرکٹ بورڈ چلیدا آہ۔ غیر امدادی سکول کالرے وچ آہ جیہڑا عربی رسم الخط وچ اردو پڑھیدا آہ ایہناں توں علاوہ 23 امدادی سکول آہن جیہناں وچ 821 پڑھا کو آہن اتھے عربی رسم الخط وچ تعلیم ہوندی

آہی۔

بوانز پرائمری سکول

ہریہ، بادشاہ پور، ملکوال، میانہ گوندل، بھابھڑہ، تخت ہزارہ، گرنہ، مڈھ
رانجھا، گوند پور، حضور پور، چک رامداس (تحصیل بھیرہ) چوہا موسیٰ، رکن، چاوا،
(زمینداری سکول) تحصیل۔

تحصیل شاہپور

جھاوڑیاں، بکھر، شاہپور سٹی، کنڈان، مانگوال، صابووال، دھریہ،
فاروقہ، نہنگ، غیر امدادی کالہ تے زمینداری سکول ڈھکواں۔

تحصیل خوشاب

جوڑہ، جمالی، نور پور، گروٹ، مٹھ ٹوانہ، ہڈالی، جی، کفری، کھجے کی،
اچھالی، مرد وال، انگہ، پیل، کٹھہ، راجڑ (زمیندارہ سکول) دانیوال تے
بندیال۔

گرلز پرائمری سکول

پورے ضلع وچ صرف 12 پرائمری سکول آہن جہناں دے وچوں
ترے سکول ہندوواں سکھاں دے آہن جہناں دی تفصیل ایہہ اے (1) رائے

صاحب پنڈت دیوان چند شاہپوری دا سکول (2) باوا پرتاپ سنگھ تے لالہ جوالا
ساہی میانی دا سکول (3) لالہ گورساہی ساہیوال دا سکول۔ ایہناں ساریاں علم
پسند لوکاں نے اپنی دلچسپی نال اپنے شہراں وچ بچیاں دی تعلیم آ لے پائے
لوکاں نوں مائل کیتا۔

تحصیل بھیرہ وچ گرلز پرائمری سکول

بھابھڑہ ڈسٹرکٹ بورڈ گورکھی سکول، بھیرہ دیو ناگری میونسپل بورڈ
پرائمری سکول۔

تحصیل شاہ پور

جھاڑیاں (گورکھی) بکھر (گورکھی) بکھر (اردو) شاہپور سٹی
(گورکھی) ساہیوال میونسپل بورڈ (گورکھی) شاہپور صدر غیر امدادی (سنسکرت)

تحصیل خوشاب

نوشہرہ (گورکھی) نور پور تھل (گورکھی) نور پور تھل (اردو) گروٹ
گورکھی

صحت

سو سال پہلاں پورے ضلع وچ 11 ڈسپنسریاں آہن ایہہ بھیرے

ساہیوال، خوشاب تے میانی۔ ایہناں دا خرچ ایہتھوں دیاں میونسپل کمیٹیاں برداشت کریندیاں آہن ایہناں توں علاوہ نوشہرہ، مڈھ، سکسیر، نور پور، تے گروٹ ڈسٹرکٹ بورڈ دے ماتحت آہن۔ شاہپور ہسپتال دا انچارج اسٹنٹ سرجن ہوندا آہا۔ ایہہ ساریاں ڈسپنسریاں سول سرجن دے ماتحت آہن۔ ایہناں ساریاں دا خرچ 13000 روپے آہ تے 116000 مریض مہینے وچ دوائی لیندے آہن۔ تقریباً 1300 مریض سالانہ دے حساب نال ہسپتال وچ داخل ہو کے علاج کر ویندے۔ ٹھنڈھیاں (چچک) دے علاج کان آنگے رکھے گئے آہن۔

پہلا چرچ

ضلع شاہپور وچ پہلا چرچ شاہپور وچ بنایا گیا۔ اس نئے جیسے چرچ وچ 24 بندیاں دے بہن واسطے انتظام آہ۔ اس داناں سینٹ اینڈریو چرچ رکھیا گیا۔ ایہہ شاہپور وچ ہک باغ وچ آہ۔ پاکستان بن توں کچھ دیسی عیسائیاں دی عبادت دے کم آوندا اے۔ اتھے اس ویلے کوئی مستقل پادری نانہہ جہلم وچوں ہک پادری سال وچ چار واری آوندا آہ۔

محکمہ آبپاشی

نہراں دے آون نال محکمہ دی لوڑ پئی پہلے ایہہ ڈپٹی کمشنر دے ماتحت آہ۔ وت ایکسپین دے ماتحت کردتا گیا۔ اس دا صدر دفتر لاہور وچ آہ۔

ریلوے

ریل دے آون نال اس دے دفتر وی بنائے گئے نالے محکمہ جنگلات۔ محکمہ تار تے ڈاک وی متعارف ہوئے۔ انج کر کے ہولی ہولی محکمہ ودھدے گئے۔ محکمہ مال ایہناں ساریاں محکمیاں توں بہوں ضروری آہ۔

زمین تے ماملہ (مالیہ)

دوآ بہ پنج جس وچ ضلع شاہپور دا ادھ آہ۔ ایہہ سکھ دربار نے کئی کارداراں نوں دتا ہویا آہ۔ گلاب سنگھ مہاراجہ کشمیر نے بھیرے دے علاقے نوں پٹے تے لیا ہویا آہ۔ کھڑک سنگھ نے تحصیل ساہیوال نوں اپنے قبضے وچ لیا ہویا آہ ملتان دے گورنر ساون مل نے کالوال دی تحصیل تے قبضہ کر لیا۔ سکھاں دے زمانے وچ عام دستور ایہہ آہ جے زمیاں بطور جاگیر ونڈ دتیاں ویندیاں آہن۔ جاگیردار اپنے کاشت کاراں کولوں ونڈائی (بٹائی) دی شکل وچ فصل چاؤن تے حصہ لے لیندے آہن تے جاگیردار نقدی دی صورت وچ دربار نوں دیندے آہن۔ ایہناں دی رقم مقرر ہوندی آہی۔ جاگیردار استوں نفع کماؤن کان ہمیشہ وادھے ای لیندے آہن۔ انگریزاں نے ہر لوک (پنڈ) دا وکھرا وکھرا ماملہ مقرر کیتا۔ تے ایہہ وی کوشش کیتی کہ سکھاں نالوں گھٹ توں گھٹ 20 فیصد تک ہووے۔ مسٹر لی وں بورنگ Lewis Bowring 1850ء وچ ماملہ مقرر کرن تے مقرر ہویا اس دے حسن سلوک نال کاشت کار خوش ہو گئے تے زمیاں دے مالک

بن گئے۔

رکھ

انگریزاں دے زمانے وچ ڈنگر چگاؤ نے کان بار وچ ہرلو کے (پنڈ)
واسطے رکھ (چراگاہ) دی زمی رکھی گئی جس وچ لوک اپنے اپنے ڈنگر چکیندے
آہن۔

جنگلات

کچھ زمی جنگلاں واسطے رکھی گئی جس توں آمدن ہوندی

تخصیص بھیرہ 34700 روپے

تخصیص شاہپور 20000 روپے

تخصیص خوشاب 15500 روپے

وڈے جاگیردار

1:- ملک فتح شیر خاں ٹوانہ خان بہادر اس کول دولوکاں (پنڈاں) دی
جاگیر آہی جس دی اس ویلے قیمت 4752 روپے آہی۔ اس کول ہور وی
جاگیر آہی جسدی مالیت 3610 روپے آہی۔

2:- اس دا بھراتے بھترے وی جاگیراں دے مالک بنائے گئے ملک
احمد خان کول 1699 روپیاں دی جاگیر آہی ملک عالم شیر خان نوں 2081

روپياں دى جاگير دتي گئي تے اس دے پتر ملك شير بهادر خان نوں 1286
روپياں دى جاگير ملي۔

3:- ملك دوست محمد خان ولد ملك خان بهادر شير محمد خان جيھڑا ہک دوجي
شاخ دا سردار آہ نوں 7411 روپياں دى جاگير دتي گئي تے وت پيو دى
خدمت دے صلے وچ 724 روپياں دى جاگير دتي گئي۔

4:- ساہيوال دے بلوچاں نوں وي 3372 روپياں دى پنجاں لوکاں وچ
جاگير دتي گئي۔

5:- سردار ہري سنگھ تے گيان سنگھ نوں نوشہرے وچ 4458 روپياں دى
جاگير دتي گئي۔

6:- مہنت جس نے کڑانے دى ڈھکي تے خانقاہ بنائی ہوئی اہی۔ اس نوں
14 لوکاں وچ معافی آلى ذمی دتي گئي جد تائیں اس نوں مذہبی کماں تے خرچ
کریسی۔ اچ کل ایہہ زمی محکمہ اوقاف کول اے۔

اس توں علاوہ 220 لوک اجیہے آہن جہناں نوں نکے درجے دیاں
جاگیراں دتیاں گئیاں۔ 79 بندیاں نوں ایہناں دے مردیاں تائیں جاگير دتي گئي۔
سرکار کول 828693 ایکڑ زمین آہی اس وچوں کجھ زمیناں
افغانستان دى جنگ وچ خدمات دین آلیاں نوں دتیاں گئیاں۔

انعام دار

انگریز گورنمنٹ نے اپنے انتظام نوں چنگا کرن واسطے مقامی

زمینداراں نوں کجھ لالچ دے کے وڈے وڈے کم لئے۔ ایہناں وچوں انعام دار وی آہن ایہناں دی کل تعداد 75 آہی تے ہر ہک نوں اس دی سرکاری قابلیت دے مطابق انعام دا حق دار سمجھیا ویندا آہ۔ ضلع شاہپور وچ کل انعام دی مالیت 8500 روپے آہی انعام یا صلہ خدمات دی مالیت مقرر آہی تے اوہ سرکاری مالے وچوں وصول کیتیاں ویندیاں آہن۔ ایہہ پورے ضلع دی آمدنی دا 1-1/4 فیصد آہ۔ انعام دار عام طور تے نمبردار بنائے ویندے آہن۔ کمشنر دی اجازت نال انعام دار دی خدمات ختم وی کیتیاں جاسگدیاں آہن۔ انعام دار پٹھلے درجے توں اُتلے درجے وچ جاہ خالی ہون تے ونج سگدا اے پر انعام دی رقم وچ فرق نہیں ہو سگدا۔ ایہناں 75 انعام داراں دے درجے ایہناں دے علاقے وچ اثر رسوخ دی وجہ کر کے بنائے گئے آہن۔ تاکہ وقت کو وقت حکومت دی مدد کر سکن۔ انعام داراں دی تفصیل ذات وار انج اے۔ اعوان 14، رانجھے 8، کھوکھر 7، سید 5، بلوچ 5، پٹھان 4، گوندل 4، قریشی 3 تے دوجے سارے 25 کل تعداد نمبرداراں 1437، تحصیل بھیرہ 734، تحصیل شاہپور 430 تے تحصیل خوشاب 283، ذات وار تفصیل ایہہ اے۔

ذات	تحصیل بھیرہ	تحصیل شاہپور	تحصیل خوشاب	میزان
گوندل	183	4	-	187

132	97	14	21	اعوان
122	-	-	122	رانجھے
74	13	41	20	کھوکھر
80	2	13	65	کھتری بہن اروڑے
60	24	35	1	بلوچ
59	12	26	21	سید
43	-	42	1	میکن
35	1	32	2	جھمٹ
32	5	11	16	پٹھان
24	20	4	-	ٹوانے
23	-	1	22	ریحان
22	8	9	5	قریشی
21	2	14	5	بھٹی
17	-	8	9	نون
15	-	12	3	ہتار
14	9	5	-	جوسہ
13	5	6	2	آہیر
12	-	8	4	کلیار
12	-	8	4	سیال

مخدوم	12	-	-	12
ٹاٹری	7	4	-	11
کبوه	4	6	-	10
چاچڑ	-	6	4	10
باقی قوماں	186	119	80	385
میزان	724	430	283	1437

میونسپل بورڈ

وڈے شہراوہ گنے ویندے آہن جتھے میونسپل بورڈ یا کمیٹیاں آہن اوہ
صرف چھ آہن ایہناں دے ناں ایہہ آہن۔ میانی، بھیرہ، شاہپور شہر، شاہپور
سول لائنز (صدر) ساہیوال تے خوشاب، گروٹ کچھ چر رہی وت ختم ہوگئی۔

قصبے	1855	1868	1881	1891
میانی	6005	6857	8069	7149
بھیرہ	13973	14514	15165	17465
شاہپور	4717	4743	5424	6337
سول لائنز	-	1771	2328	2896
ساہیوال	9437	8900	8880	9210
خوشاب	7261	8509	8989	9832

تقریباً سو سال پہلے 1897 وچ پورے ضلع دی آبادکاری ضلع

خوشاب سمیت 493588 اہی۔ ہُن صرف سرگودھا شہر دی آبادی
458440 اے۔ 1998ء دی مردم شماری دے لحاظ نال وڈے وڈے شہراں
دی آبادی کجھ انج اے۔

ایہناں چھیاں قصبیاں دی آبادی ودھن دی رفتار 1881 توں لے کے 8
فیصد رہی۔ حالانکہ باقی ضلع وچ رفتار 17 فیصدی آہی۔ میانی دی آبادی ودھن
دی بجائے گھٹ گئی۔ کیوں جے چک نظام دے کول دریا جہلم تے پل بن گیا
تے ریل آون دین لگ پئی جس کر کے میانی لون منڈی نہ رہی تے کاروباری
لوک وی ٹر گئے۔

بھیرہ

ہک روایت دے مطابق شہر بھیرہ راجہ کفند نے ہک ہزار قبل مسیح وچ
وسایا۔ بھیرے دی آبادی ودھی ضرور پر تیزی نال نہیں۔ 1881 وچ بھیرے
نوں ریل نال ملا دتا گیا۔ پر ایستھوں دے لوک وی تجارت تے ملازمتاں دے
سلسلے وچ باہر زیادہ رہن دی وجہ نال آبادی دا وادھا نہ ہویا۔

میونسپل کمیٹی بھیرہ

بھیرہ پہلاں دریاؤں پار آہ بابر دے ویلے تائیں پار آہ تے اس
ویلے اسدا ناں جو بناتھ نگر آہ، جنرل کنگھم دے مطابق ایہہ سوفی قوم دا
دارالحکومت رہیا۔ جیہڑی سکندر دی ہم عصر آہی۔ کجھ چر ایہہ کابل دی جلاوطن

برہمن حکومت دا وی دارالحکومت رہیا۔ 1540 وچ جد ایہہ پار اُجڑ گیا تے شیر شاہ سوری نے پیر کیا ناتھ دی مڑھی دے کول نویں شہر دی بنیاد رکھی تے شاہی مسیت وی بنائی۔ آئین اکبری دی رونال ایہہ صوبہ لاہور دا ہک محل آہ، اسدا ماملہ 5 لکھ روپے آہ تے اتھے سکے ڈھلنے دی ٹکسال وی آہی۔ نور الدین نے لٹ کے ساڑ دتا سکھاں دی بھنگی مثل نے اُسنوں وت وساؤن دی کوشش کیتی پر رونق گھٹ گئی۔ اس شہر دی تجارت وڈی دور دور تک آہی کابل تے وسط ایشیا نال کھوجے تے پراچے تجارت کریندے آہن۔ اتھے لوہے دے اوزار تے لکڑی داکم وڈا شاندار ہوندا آہ۔ کانگاں دی وجہ نال صحت واسطے کوئی چنگی جاہ نہیں موسی کس (بخار) دا زور رہندا اے۔ 1878ء وچ 73 بندے فی ہزار دے حساب نال موئے۔

1867ء وچ میونسپل بورڈ بنیا تحصیلدار صدر ہوندا آہ۔ ترے اعزازی مجسٹریٹ ہوندے آہن تے 36 میونسپل پولیس سپاہی آہن۔ ایتھوں دے لوک کافی پڑھے لکھے آہن تے وڈے وڈے عہدیاں تے لگے ہوئے آہن۔ ایتھے ضلع دی واحد پرنٹنگ پریس آہی۔ ایتھوں ہک ہفتہ وار رسالہ ”دوست ہند“ نکلا آہ۔ ملک دیوی داس داسٹیشن دے نیڑے پھٹی دا کارخانہ آہ جیہڑا بھاپ دے انجن نال چلدا آہ، بعد وچ مقامی طور تے چٹی پٹی آ لے دروازے دے ہک ہندو نے بھیرہ نوں بجلی دین کان کارخانہ وی لایا۔

بھیرے دے آس پاس ہک فصیل آہی جیہڑی کدائیوں پکی تے

کدائیوں پکی آہی۔ اس دے اٹھ دروازے آہن جہناں وچوں ابھر دے آ لے پاسے لاہوری گیٹ، پر بت آ لے پاسے کشمیری گیٹ (چٹی پٹی) تے کابلی گیٹ (چڑی چوک) دروازے آہن۔ ڈکھن آ لے پاسے چنیوٹی (چک آلا) مشہور اے باقی دروازے پیرانوالہ، ملتانی، لوہاراں موری، حاجی گلاب گیٹ آہن اتھے کسے زمانے وچ دڈے باغ ہوندے آہن پر ہُن ختم ہو گئے آہن۔ حضرت میراں دا مقبرہ وی باغ وچ آہ 1863ء وچ اس نوں تحصیل بنایا گیا۔

ٹاؤن میانی

اس دی رونق لون منڈی نال آہی۔ اس دا پہلا ناں شمس آباد آہ۔ جد ایہہ دریا بُرد ہو گیا تے آصف خان شاہجہان دے سوہرے نے اسنوں وت بناون دا حکم دتا۔ مادھو داس تے صاحب رام دے زے ایہہ کم کیتا۔ اسنوں نور الدین نے جیہڑا احمد شاہ ابدالی دا جرنیل آہ 1754ء وچ لٹ کے ساڑ دتا وت رنجیت سنگھ دے پیو مہاں سنگھ نے 1787ء وچ اس نوں آباد کرن دی کوشش کیتی پر اسدی اوہ رونق واپس نہ آئی۔ 1867ء وچ اتھے میونسپل بورڈ بنایا گیا۔ میونسپل پولیس دی تعداد 16 آہی۔ کل ممبراں دی تعداد 9 ہوندی ترے سرکاری تے چھ غیر سرکاری چنے ویندے۔ ایہہ قصبہ وی بھیرے ہار کانگاں دا گھراے۔ کافی بیماریاں لوکاں نوں لگدیاں آہن۔ کپتان ڈیوس نے اتھے دیوار اُتے 1865 وچ ڈیوس گنج منڈی بنوائی۔

ٹاؤن شاہپور

ایہہ شہر دریا جہلم توں دو میل دور اے (اج کل میل وی نہیں) اتھے
سیداں دی ملکیت اے۔ تھو آلا، کوٹلہ، جلال پور وی ایہناں دے لاگوں لوک
آہن۔ شاہ شمس شیرازی ایہناں دے مورث اعلیٰ نیں جہناں دا روضہ شہر دے
پر بت آلے پاسے اے تے میلہ وی چیترو وچ لگدا اے اتھے سیداں دا قلعہ آہ
تے میل دے فاصلے تے سکھاں دا قلعہ پر بت آلے پاسے ریلوے لائن توں
پار آہ۔ رائے صاحب پنڈت دیوان چند نے اتھے لڑکیاں دا سکول بنایا جیہڑا
پورے پنجاب وچ مشہور ہويا۔

شاہپور چھاؤنی

اس نوں سرکاری کاغذاں وچ چک چھاؤنی لکھیا ویندا اے تے لوک
اسنوں چھاؤنی ای ادھے آہن۔ پر ہن سرکاری کاغذاں وچ شاہپور صدر دے
ناں تے مشہور اے اس نوں سول لائنز آکھیا گیا۔ اتھے ای سارے ضلع دے
دفتر آہن۔ اتھے نقشہ وڈا چنگا بنا کے آبادی کیتی گئی۔ ملک صاحب خان نے
سراں بنوائی۔ 1898ء دی کانگ وچ ایہہ شہر چواں پاسیوں پانی نال گھر گیا۔
چھ انگریزاں دے بنگلے آہن۔ سالانہ میلہ مویشیاں وی لگدا آہ۔

ٹاؤن ساہیوال

اتھے کدی بلوچاں دا وڈا زور ہوندا آہ۔ اس دے چھ دروازے آہن

تے کچی فصیل دی بنی ہوئی آہی۔ لاہوری تے کشمیری دروازے آہن۔ ہک روایت دے مطابق اس شہر دی بنیاد بلوچاں دے مورث اعلیٰ گل بالک نے اپنے مینجر سائی دے ناں تے رکھی جیہڑا جھمٹ ذات نال تعلق رکھدا آہ۔ اس شہر دی تجارت ہندوواں دے ہتھ وچ آہی جیہڑے گھنپو، کنک تے پھٹی (کپاس) دی تجارت ملتان تے سکھ تائیں دریا دے ذریعے کریندے آہن۔ اتھے بچی (کھار) دی تجارت دا مرکز آہ جیہڑی کپڑے دھونے دے کم آوندی آہی تے بوٹی ساڑ کے بنائی ویندی آہی۔ 1867 وچ اتھے میونسپل کمیٹی بنی۔ ممبراں دی تعداد 9 آہی، جہناں وچوں ترے نامزد تے چھ چنے ویندے آہن۔ اتھے 18 میونسپل پولیس دے بندے رہندے آہن اسدی ماہوار آمدنی 7759 روپے آہی۔

ٹاؤن خوشاب

خوشاب دی بہوں پرانا شہر اے پر ایہہ وی دریا جہلم دے کنارے ہوون دی وجہ نال کئی واری بنیا تے کئی واری دریا برد ہويا۔ محمد شاہ رنگیلے دے زمانے وچ، نواب احمد یار خان ایٹھوں دا گورنر آہا۔ اسدا مقبرہ ڈکن لہندے پاسے آبیراں دے قبرستان وچ اے تے نواب صاحب دے روضے دے ناں تے مشہور اے۔ اج کل دا شہر کپتان ڈیوس دا وسایا ہويا اے۔ 1865ء وچ اس دی نویں بنیاد رکھی گئی۔ جعفر خان بلوچ دا باغ تے قلعہ وی آہ جیہڑا دریا برد ہو گیا۔ اس دے چار دروازے آہن کشمیری تے لاہوری مشہور آہن۔ ایٹھوں

دیاں لُنکیاں مشہور آہن اتھے چھ سو پوہلی کھڈیاں تے کم کریندے آہن، ایہہ شہر تجارت دا وڈا مرکز آہ۔ 1867 وچ اتھے کمیٹی بنی تے اسدی پولیس دی تعداد 23 بندے آہی۔ سندھ ساگر ریلوے دی وجہ نال اتھے کافی رونق ہو گئی ملک وال توں میانوالی لائن سرگودھے آلی توں پہلے بن گئی آہی۔ سرگودھا خوشاب تے 1931ء وچ بنی کیونکہ پل دے اُتے ایہہ تاریخ لکھی ہوئی اے۔ یعنی 25 اپریل 1931ء اس داناں ڈی مونٹ مورسی پل رکھیا گیا جیہڑا اس ویلے پنجاب دا گورنر آہ۔ ایسے ناں تے سرگودھا کالج وی ڈگری کالج بنیا۔

سرگودھا

اس دی بنیاد 1903ء وچ لارڈ ہیلی نے رکھی۔ 334 نویں چک آباد کیتے گئے تے 1904 وچ سرگودھا نوں تحصیل دا درجہ دے دتا گیا۔ 1914 وچ ضلع تے 1965 وچ ایہہ ڈویژن دا درجہ حاصل کر گیا۔ اس نویں مردم شماری دی رونال ایٹھوں دی آبادی 458240 اے۔ اتھے ہوائی فوج دا وڈا اڈا اے۔ ایسے واسطے اسنوں شاپیناں دا شہری آدھے نیں۔ 1965ء دی جنگ وچ بہترین کارکردگی دکھاؤن پاروں ”ہلال استقلال“ ملیا۔





حصہ تاریخ

تاریخی ماخذ

ضلع سرگودھا آثار قدیمہ دے لحاظ نال کسے علاقے توں گھٹ نہیں پر بد قسمتی ایہہ رہی اے جے اتھے اج تائیں چٹ کے کم نہیں ہويا جس دی وجہ نال ایٹھوں دی اہمیت لوکاں دی نظراں توں لگی رہی اے۔ جیوں جیوں تعلیم عام ہو رہی اے تیوں تیوں تاریخی ہنریاں توں وی پردے لہن لگ پئے آہن۔ پہلاں اسی ایہہ پڑھدے لگے اوندے آس جے اتھے حملہ کرن آ لے پہلے آریہ آئے۔ پر ہُن پتہ لگا جے ساکا قبیلے ایران توں آئے۔ پروفیسر احمد حسن دانی دے مطابق حملہ آوراں دے دو ریلے پاکستان وچ داخل ہوئے۔ پہلا ریلہ 1500 ق م تے دوجا ریلہ 1000 ق م وچ آیا۔ ساکا آریہ دے ویری آہن ایہناں دا ٹوٹی یا قبائلی نشان گُتا آہ۔ ایہناں دیاں عورتاں وی وڈیاں بھڑاکیا ہوندىاں آہن۔ ایہہ غضب دیاں شہسوار تے تلوار باز ہوندىاں آہن۔ جد تائیں دشمن نوں ٹکانے نہ لاہن آ شادی نہن کر سگدیاں۔ جد آریاں دے

اندر دیو نے حملہ کیتا تے کوہستان نمک دی جنگ دا ذکر مہا بھارت وچ انج ملدا
 اے 99 شہراں دے بادشاہ نموچی جیہڑا دو دریاواں دا آقا آہ (جہلم تے
 سندھ) اس دی ساری فوج عورتاں دی آہی جہناں نوں دیکھ کے اندر ہس پیا پر
 اُس دی ساری خوشی کا فور ہو گئی جد اسدا طلسمی گرز دی ایہناں اُتے اثر نہ کر سکیا۔

ہتھیار

ایس قبیلے دا عام ہتھیار گہاڑی آہ۔ ایہناں گلاں توں ایہہ گل پکی
 ہو گئی کہ ایتھوں دے قبائل ساکا آہن۔ ایہناں دیاں پتھراں تے بنائیاں
 ہونیاں تصویراں وچ دو چیزاں دا ذکر اے۔
 (1) گُٹا (2) کلہاڑی۔ ایہناں دا شجرہ وی ماں دی طرف آہ۔ ایہناں دی وی
 (گُتی) سرما دیوی آہی۔ آریا وی انہاں توں نفرت کریندے آہن تے ایہناں
 نوں کرشت (کالے مونہہ آلے) ابرہمن (برہمن دے دشمن) آدھے
 آہن۔ ایہناں وچ عورت دی سرداری دا رواج آہ۔ مرد دی کوئی اہمیت ناہی۔
 ذات پات تے آریہ زور دیندے آہن تے ایہہ اسدے مخالف آہن۔ ایسے
 واسطے جد بدھ دھرم اتھتے آیا تے ایہہ سارا قبیلہ اس دا پیرو ہو گیا۔ بدھ بذات
 خود ساکا قبیلے نال تعلق رکھدے آہن۔ سون سکیسر وی ایہناں دے ناں تے ای
 اے۔ اصل ناں سوہن ساکا مٹی سر۔ ساکا مٹی بدھ نوں آدھے نیں تے سردے
 معنی تلاں دے آہن یعنی بدھ دا تلا۔ مراد جھیل اُچھالی اے۔ زمانے دے ناں
 نال بدلایا ہو یا ہن سون سکیسر رہ گیا سوہن معنی (خوبصورت) زمانے دے نال

نال تبدیلیاں آوندیاں رہیاں تے حکومتاں بدلدیاں رہیاں۔ ہُن اسیں ایہناں لوکاں دی نشانیاں نوں ڈھوڈھ کے اندازہ لاسگدیاں کہ اتھے دا وسیب کتنا پرانا اے۔ ایہہ گل سُنی ایں ایتھوں دے بے دسیندے آہن جہناں دی تاریخی اہمیت اے۔ ایہہ بے تعداد وچ 676 آہن پر ہُن مکدے مکدے مگ گئے آہن۔ اسی مشینی دور وچ پہاڑ ختم ہو رہے آہن تے ایہہ بے کیہڑے باگ دیاں مولیاں آہن پر ہن جیہڑے موجود آہن اوہ ایہہ آہن۔

قلعہ راجہ بھوج (پنج پیر)

ایہہ قلعہ نہنگ تحصیل ساہیوال دے نیڑے پنج پیر دے مقام اُتے ہے۔ اتھے پنج نوگزیاں قبریں بنیاں ہونیاں پر ایہہ قبریں بہوں پچھلے زمانے دیاں آہن۔ کیوں جے اس قلعے دے آثار دسیندے نیں جے ایہہ گھٹو گھٹ وی 2000 سال پہلے دا بنیا ہویا اے۔

اس دا ذکر شاہپور گزیٹور وچ آندا اے تے دسیا گیا اے کہ اوتھوں جیہڑے سکے ملے آہن اوہ مسلماناں دے آون توں پہلاں دے آہن۔ اس قلعے دا ناں ای دسدا اے کہ راجہ بھوج ہندو راجہ ہویا اے تے اوہ پورس دے خاندان وچوں آہ۔ بھون قوم ایسے نسل دی دسی گئی اے۔

ایتھوں ہک دیوی دا ہتھ لدھا اے جیہڑا مٹی دے بنے ہوئے کسے بت دا حصہ اے ایہہ پتھر دے بتاں دے بناؤن توں پہلے دے زمانے نوں دسدا اے۔ اس توں علاوہ ایتھوں مٹی دے پکے ہوئے چھ انچ موٹے گولے

ملے اہن جہناں دا زمانہ وی بہوں قدیم اے۔ کچے قلعے دیاں کندھاں اس ویلے ظاہر ہوياں جد 1998ء وچ ملٹری نے ایتھوں جاء پدھری کیتی تے اوہ نکل آئیاں۔

اج ایتھے حیات المیر دی 9 گز لمی قبر بے دے اُتے اے۔ باقی 4 قبریں پٹھاں میدان وچ آہن۔ بھٹی قوم دے لوگ اس دے مزاؤر (مجاور) آہن تے اس وقت زمین نوں ورتدے آہن۔ آکھیا گیا اے جے حضرت بری امام ایہناں دے مرید آہن۔

بقول بلال زبیری مؤلف تاریخ جھنگ ایہہ قلعہ کسے طرحاں وی شور کوٹ دے کھنڈراں دی قدامت توں گھٹ نہیں۔ مقامی لوکاں کولوں سکے پچھے گئے پر کسے نے کوئی سکہ نہیں دکھایا۔ سکہ ہک اچھی شے اے جے بہوں سارے ہکی زمانے دے لہجہ پون تے قیاس ہوند اے جے ایہہ اُس زمانے دا ہوسی ایہہ پکی نشانی اے۔

ٹبہ وجھی

ٹبہ وجھی (صحابہ دانبہ) ایہہ ٹبہ وی بہوں پرانا اے۔ اس دے متعلق جنرل کنگھم نے آرکیالوجیکل سروے رپورٹ جلد 114 وچ دسیا کہ ایتھوں دو سکے ہندی سیتھین عہد دے شہزادیاں دے ملے اہن جس توں اس دی قدامت دا پتہ لگدا اے۔ اس دی چوٹی اُتے ہک برج دے آثار وی آہن تے کدائیں کدائیں کچے پکے ایرے وی نظر آوندے آہن۔ پنج پیر تے صحابہ دے بے

دے وچ کنڈے آلیاں سہنکاں بہوں آہن آیتھوں جیہڑے بالاں دے
کھڈونے لدھے آہن اوہ اج توں دو ہزار سال پرانے لگدے آہن۔ ہک
جانور اجیہا وی بنیا ہویا اے جس دی کنڈتے ڈانسار ہارتاج بنیا ہویا اے۔
پتہ نہیں اوہ کیہ جانور آہ۔ ایہہ چار ٹنگاں آلا جانور اے۔

بھیرہ قدیم

اس دے آثار دریاؤں پار آہن۔ کسے زمانے وچ ایہہ دریا جہلم دے
سجے پاسے آباد آہ جیویں اج کل ایہہ کھجے پاسے آباد اے۔ اج کل اس جاء
تے احمد آباد اے۔

جد موڑ وے بنی تے اکثر بے پٹ کے مٹی موڑ وے دے تھلے پاسٹی
گئی۔ ہُن ہک نکی جہی بٹی رہ گئی اے۔ جنرل کنگھم نے ہندوستان دے قدیم
جغرافیے دے صفحہ 155 توں 159 تائیں لکھیا اے۔ نالے آثار قدیم دی
سروے رپورٹ جلد نمبر 14 صفحہ 35 توں 40 تائیں لکھیا تے دسیا کہ اصل
شہر دریاؤں پار آہ بابر وی جس ویلے آیا اس ویلے دریاؤں پار آہ۔ موجودہ
بھیرہ دی بنیاد 1540ء وچ شیر شاہ سوری رکھی۔ ایتھے ایس دی سبھ توں
وڈی نشانی شیر شاہ بنوائی ہوئی تریں گنبداں آلی شاہی مسیت اے جس دی
پیشانی نے ایہہ لکھیا ہویا اے۔

تعمیر شد مسجد نوری

بنا نہاد شیر شاہ سوری

جس حد تا ئیں بھیرے دی قدامت دا تعلق اے اوہ سکندر اعظم توں
 وی پہلے دا دسیا ویندا اے۔ پر اِج اس تے ہور تحقیق کرن دی ضرورت اے
 جیہڑی اِج تا ئیں نہیں ہوئی۔ سارے آکے ٹُر گئے ایہناں کے نتیجہ کڈھیا سن
 کوئی پتہ نہیں۔ نہ کسے اخبار یا رسالے وچ کوئی مضمون چھپیا اے۔ سو سال
 پہلے تا ئیں موجودہ بھیرے دے آس پاس پکی کچی فصیل آہی جس دے اٹھ
 دروازے آہن۔ کئی گھراں وچ لکڑی دا کم مثالی ہو یا ہو یا آہ۔ جہناں وچوں
 کچھ لاہور دے عجائب گھر دی زینت آہن۔

اس توں علاوہ سون سکسر دے علاقے ناڑی وچ پتھر دے زمانے
 دے آثار ملے آہن جس دا ذکر سیف الرحمن ڈار صاحب نے کیتا اے تے
 اس علاقے وچوں ایہناں نے کوٹ ڈجی دے زمانے دیاں پھیریاں ڈھو
 ڈھیاں آہن جہناں دا زمانہ کوئی 5000 سال پرانا آئے۔ ایہہ سروے ایہناں
 1995ء وچ کیتا آہ اسی طرحاں ٹپی بلوچاں دے برتن جہناں وچ بوٹے کھٹے
 ہوئے آہن اوہ وی وڈے پرانے دسے گئے آہن تے ایہتھوں جیہڑے سکے
 ملے آہن اوہ وی پتلے تے بُت آ لے ہون دے سبب ساسانی عہد نال تعلق
 رکھدے آہن۔ ٹپی بلوچاں دریا جہلم دے سجے کنارے ضلع خوشاب وچ اے
 کھبکی دے کول قلعہ اکرندا اے۔ جتھے محمد غوری تے کھوکھراں دی جنگ ہوئی
 آہی۔ اس ویلے کھوکھراں علاقے دی حکمران قوم آہی۔

کسے زمانے وچ ایہہ سارا علاقہ بدھ مت دے منن آلیاں نال بھریا
 ہو یا آہ۔ سکسر اصل وچ سوہن ساکیا منی سر آہ جیہڑا بدھ دھرم دے بانی نوں

ساکیا قبیلے دی وجہ توں آکھیا گیا۔ جس دے معنی بدھ دا تہا یعنی جھیل اچھالی بعد
 وچ ایہہ وگڑ کے سون سکیسر رہ گیا۔ اس علاقے وچ راجہ امبریک دی حکومت
 رہی اے۔ جس دے نشان امب شریف وچ قلعہ آتے مندر دی صورت وچ
 موجود آہن۔ سکیسر دی چوٹی تے بدھ دھرم دی وڈی خانقاہ آہی۔ جس دی
 زیارت کان ساری وادی دے لوگ ڈھول ڈھمکیاں نال ٹولیاں دی صورت
 وچ حاضری دیندے آہن۔ ساڈے علاقے دے ملنگ سرمئے ہوئے گاٹے
 وچ منکے تے کشکول بلکل بدھ مت دے بھکشو دی روایت نوں زندہ رکھے
 ہوئے آہن۔ کئی درباراں تے اگ دا 24 گھنٹے بلدیاں رہنا تے بجھن نہ دنیا
 اسلامی روایت دی بجائے مجوسی روایت دے قریب اے۔ اسے طرحاں
 ساڈیاں شادی بیاہ دیاں رسماں بہوں ہندوواں آلیاں آہن۔ جیہڑیاں ساڈے
 وچ رس گئیاں آہن تے ہُن ساڈی ثقافت دا حصہ بن گئیاں آہن۔

انجے ہار وادی سون جانوراں دے فاسلز دا قدرتی عجائب گھر اے
 استھ (Siwalik) سواک زمانے دے عام فاسلز ملدے آہن جیہڑا چھ لکھ
 سالوں تک دے آہن اتھوں سن 1977 وچ پروفیسر (Pilbeam) پلیم دی
 جماعت نے فاسلز اکٹھے کیے جیہڑے اج کل کجھ تاں نیچرل ہسٹری میوزیم
 اسلام آباد وچ ویکھے جاسگدے آہن۔

ایہناں فاسلز وچ ہک سسار (مگر مچھ) دی کھوپڑی اے جیہڑی اج
 توں 130 لکھ سال پرانی چٹاناں وچوں لدھی اے۔ ایہہ کہنٹی وچوں لدھی
 آہی اس دی نسل 75 لکھ سال پہلاں ختم ہوگئی اے۔

1998ء وچ گورنمنٹ کالج فیصل آباد دی ہک جماعت پروفیسر محمد ایوب صاحب دے نال جہناں دا ضلع سرگودھا ای اے ایستھوں ہاتھی، گینڈے، ہڑیال دے فاسلز ڈھو ڈھے جہاں دا زمانہ وی گھٹوگھٹ 70 لکھ سالاں توں 90 لکھ سالاں تائیں دسیا گیا اے۔ ایہہ فاسلز کالج وچ نمائش واسطے رکھے ہوئے آہن ایہہ سارے جانور دو کروڑ سال پہلے افریقہ توں یورپ دی راہ برصغیر آئے آہن۔

ایہناں ساریاں گلاں دا نتیجہ ایہہ نکلیا جے ساڈا پورا علاقہ زمانہ قدیم توں کسے علاقے نالوں گھٹ نہیں۔ اولین انسان دیاں کڑانہ دیاں پہاڑیاں تے بنائیاں ہوئیاں تصویریاں دا پورے پاکستان وچ کوئی قدامت دا مقابلہ نہیں کر سگدا۔ جہناں دا اعتراف ڈاکٹر دانی صاحب نے وی کیتا اے۔ کدی ساڈے علاقے وچ چٹ کے کھوج کیتا ونجے تے اس توں وی زیادہ معلومات ملن دے امکانات آہن پرہن جیہڑا کرشراں دا تے بل ڈوزراں دا زمانہ آ گیا اے تے ایہہ تحقیق توں پہلاں ڈراے کہ بٹے تے پہاڑ پدھرے نہ کر دین۔

دریاواں دے کنارے وسیب

دریاواں دے کنارے دا وسیب بی کوئی ودھیا وسیب نہ ہر ویلے باہر دیاں دھاڑاں دا خطرہ رہندا تے ہر سال دریا وچ کانگ دی وجہ نال کوٹھے جیہڑے عام طور تے کچے ہوندے آہن ڈھیہ ویندے آہن کھوواں دے رواج نال لوک کھیتی باڑی کرن کان دریاواں دے محتاج نہ رہے تے دریاواں دیاں

کدھیاں توں دور کھوہ کھٹ کے واہی نیجی کرن لگ پئے۔

ساڈے ضلع دا سبھ توں پرانا تاریخی شہر بھیرہ اے تے استنوں کچھ
تخت ہزارہ دا نمبر آوندا اے۔ بھیرہ توں مراد دریاؤں پار دا بھیرہ اے موجودہ
بھیرہ نہیں۔ اس بھیرے نوں تاں شیر شاہ سوری 1540ء وچ آباد کیتا آہ۔
بابر پار آلے بھیرے وچ گیا آہ۔ تخت ہزارے تے کسے تحقیق نہیں کیتی ایہہ
وی کافی پرانا اے۔ رومانی قصے دی وجہ توں پوری دنیا وچ مشہور اے۔ برخوردار
رانجھے ہنجنے تاں نہیں آکھیا۔

عاصی دعویٰ فضل نہ کوئی تے اکھن جٹ انجان
ذات رانجھا وطن تخت ہزارہ روشن وچ جہان
بھیرہ دریائے جہلم دے کنارے تے آباد اے تے تخت ہزارہ دریا
چنہاں دے کنارے تے آباد اے۔ اصل شہر ٹبیاں دے وچ لگیا ہویا اے۔
ایتھوں لوکاں اٹاں پُٹ کے مکان بنائے آہن۔ اج کل ایہہ لوکڑا اے۔ تے
استھے رانجھا قوم دا کوئی بندہ نہیں وسدا۔

آریہ وسیب

آریاں دے وسیب بارے ساڈے کول سوائے ہندوواں دی مذہبی
کتاباں دے ہور کوئی ذریعہ نہیں۔ اسیں ایہناں نوں ای بنیاد من کے اگانہہ
ٹردے آں۔ ایہناں وچوں رگ وید ساڈے واسطے بہوں اہمیت دی کتاب
اے۔ ایہہ کتاب ساڈے علاقے وچ ای لکھی گئی اے۔ اس کتاب دے پڑھن

توں پتہ لگدا اے اس دے لکھن آلا جہلم تے چنہاں دوہاں دریاواں دے
وچکار رہیا اے۔ کیونکہ ایہہ وت وت ایہناں دوہاں دریاواں دا ذکر کریندا
اے۔

رگ وید توں کچھ رامائن تے مہا بھارت دو کتاباں دا ذکر اے۔
رامائن وچ رام چندر وی اپنے شریک بھراواں نال جنگاں دا ذکر اے اس لحاظ
نال رامائن برصغیر وچ تاریخ دی پہلی کتاب اے۔ مہا بھارت کوروآں تے
پانڈواں دی جنگاں دے متعلق اے۔ ایہہ جنگاں کبھڑے علاقے وچ ہوئیاں
اس دے بارے وچ مختلف نظریئے آہن۔ کجھ اے وی آدھے آہن کہ ایہہ
جنگ سون سکسر دے علاقے وچ ہوئی۔ اس دور نوں برصغیر دا رزمیہ دور
آدھے آہن۔ ایہناں ساریاں کتاباں دا زمانہ قبل مسیح اے۔ ایہناں کتاباں دی
تفصیل آگاں آوی۔

آریا اپنے آپ نوں اشراف یا آریا اکھواندے آہن کیوں جے ایہہ
واہی نیجی داکم کریندے آہے تے دوجیاں نوں گھٹیا سمجھدے آہے ایہہ فرق
ہُن تائیں قائم اے۔ ہُن وی غیر کاشت کارنوں کی ای سمجھیا ویندا اے۔
آریاں ای اتھے ذات پات دا سلسلہ شروع کیتا جیہڑا ہُن تائیں لگا آوندا
اے۔ ذات پات دی تقسیم نال ملک وچ مختلف طبقے بن گئے تے نفرتاں ودھ
گئیاں۔ جس دا فائدہ بدھ مت تے جین مت تے ذات پات دے خلاف
پراپیگنڈہ کر کے اٹھایا تے ایہہ مذہب وڈے مقبول ہوئے۔ اج وی بدھ مت
ایشیا دا ہک وڈا مذہب اے۔ اس دے من والے چین، جاپان، برما، سری لنکا،

کمبروڈیا، کوریا، ویت نام، تھائی لینڈ دے مُلکاں وچ اکثریت وچ آہن۔ کدی ساڈے علاقے وچ وی اس مذہب دا زور آہا پر اسلام دے آون تے ختم ہو گیا ہُن صرف اس دے اتھے نشان باقی آہن۔

ایرانیان دا حملہ

531 ق م وچ ساڈے علاقے تے ایران دے بادشاہ دارا نے حملہ کیتا۔ اس دے ناں دا شہر دارا پور اے ضلع گجرات وچ ہُن وی موجود اے۔ اس توں کچھ سکندر دا حملہ اے۔ سکندر دیاں بہوں ساریاں یادگاراں ساڈے علاقے وچ آہن۔ پھالیہ خاص کر اے اتھے اس دے گھوڑے دی قبر اے جس دا ناں کفالیہ آہ جیہڑا وگڑ کے پھالیہ بن گیا۔

سکندر توں کچھ چندر گپت موریہ نے اس علاقے تے قبضہ کر لیا اس دے متعلق ہک روایت اے کہ اس دی ماں اس ساڈے علاقے دے وچ پر نی کے آئی، آہی خاوند دے فوت ہون تے واپس وطن چلی گئی تے کوٹلیہ نے اس دے پتر چندر گپت دی تربیت کر کے بادشاہ بنا دتا۔

راجگان کشمیر

ساڈا علاقہ کافی چر تائیں کشمیری پنڈتاں دے ماتحت رہیا ایہناں اس علاقے وچ ہندومت نوں ترقی دتی تے مندر بنوائے۔ امب شریف دا مندر کشمیری فن تعمیر دی اس علاقے وچ وڈی یادگار اے۔ کشمیر راجیاں دی تفصیل

کچھ انج اے۔

راجہ میگوواہن

ایہہ راجہ 41ء توں 75ء تائیں حکمران رہیا۔

راجہ پالرگپت

95ء تا 106ء اس دے زمانے وچ ای رجاہ پروسین نے پنجاب تے قبضہ کر لیا۔

راجہ پروسین

اس دی حکومت 101ء تا 162ء تائیں رہی۔

راجہ بچھمن

اس دی حکومت 342ء توں لے کے 375ء تک رہی۔

راجہ شودک

ایہہ راجہ بچھمن دا بھتر یا آہ۔ اس 375ء توں لے کے 426ء تائیں حکومت کیتی۔

ایہناں حکمراناں دا تسلسل کدائیں کدائیں ترٹ ویندا اے تے تاریخ چُپ کر ویندی اے اس توں کچھ راجہ بالادت۔ جیانند تے راجہ درلب درون دا

ذکر اے۔ جیہڑا 617ء توں 653ء تائیں بادشاہ اپنے اس دے بعد راجہ للتا
دت نے 715ء توں 752ء تائیں حکومت کیتی اس دے کچھ راجہ جیا بیڈ
746 توں لے کے 749 تک حکومت کیتی اس سارا پنجاب فتح کر کے اپنی
حکومت وچ ملا لیا۔

شمالی مغربی علاقے دیاں حکومتاں

ایہہ باہر دیاں حکومتاں آہن سبھ توں پہلاں ساکا آئے دت کشان آ
گئے اس خاندان دا مشہور بادشاہ کنشک آہ۔

تاریخ بھیرہ

ابوشاہین فاروقی ہو ریں اپنی اس تاریخ وچ ساڈے علاقے دا ذکر
انج کریندے آہن۔ حضرت نوح علیہ السلام دے پوترے ہندوی دی نویں
پشت وچ سورج ناں دے ہک بندے اپنی حکومت قائم کیتی۔ جس دا مرکز
بھیرہ آہ۔ سورج توں کچھ مہراج کیدار، شنکل کیدراج 466 ق م وچ تخت
نشین ہويا۔ تاریخ فرشتہ دے مطابق اس دی وفات تے سوفتیں قوم نے اس
علاقے اُتے قبضہ کر لیا۔ جو ہناتھ نگر (بھیرہ) اس دا صدر مقام آہا۔ فاہیان
400 ق م وچ بھیرے آیا۔ سوفتیں قوم سکندر دی ہم عصر آہی۔ ہیون سانگ
646 بھیرے آیا۔

نوٹ:-

ابو شاہین فاروقی ہوریں 1999ء وچ اللہ نوں پیارے ہو گئے
آہن۔ ایہناں دا اصل ناں محمد حیات آہ۔ پرایہناں ساری حیاتی قلمی ناں تے
گزارا کیتا۔



ساڈی تاریخ آثار قدیمہ دی روشنی وچ

ماخذ

ساڈے ضلعے وچ گھٹو گھٹ 676 پرانے شہراں دے کھنڈر آہن جیہڑے گھٹدے گھٹدے ہن بہو تھوڑے رہ گئے آہن۔ اج دے مشینی دور وچ ایہناں دے دی بچن دی صورت نظر نہیں آوندی۔ اس ویلے وڈے پنڈ (کھنڈر) ساڈی زبان وچ کھنڈرنوں پنڈ آدھے آہن۔ پنج پیر نہنگ دے کول تے وچھی میانی دے کول اے۔ ایہناں دے تے وی حالی تائیں کسے ماہر آثار قدیمہ نے کم وی نہیں کیتا صرف جزل کنگھم نوں وچھی توں دو سکے انڈوستھین دور دے لدھے آہن۔ سبھ توں وڈی نشانی پکیاں اٹاں دی کوئی عمارت ہوندی اے یا اتھوں سکے ملن یا بھانڈے ملن ایہناں تریاں شینیاں نوں ویکھ کے آپس وچ ملاپ کھاوین تاں اس دا زمانہ پتہ لگ سگدا اے۔ نہیں تاں ہنجے اٹکل پچو ای اے۔ میں جو کجھ بھیج دھرک کر کے جو جانکاری لدھی اے۔ اوہ پڑھنہاراں دی خدمت وچ پیش کر دیندا آ۔ تاکہ آون والیاں دی معلومات وچ ایہتھوں دی صورت دا کجھ اندازہ ہو سکے۔

ساڈے سارے ضلع وچ کوئی قدیم عمارت نہیں سوائے بھیرے وچ
شیر شاہ سوری دی مسیت دے۔ ساڈے شمالی پنجاب دا سبھ توں پرانا تے مشہور
شہر ٹیکسلا اے۔ اس دی تاریخ ق م اے۔

ناڑی تہذیب

ڈاکٹر سیف الرحمن ڈار تے ڈاکٹر محمد سلیم نے ناڑی دے آثار قدیمہ
راقم دی دعوت تے آ کے دیا کہ ایہو مونجو ڈاروتوں پہلے دے آہن۔

ساڈے علاقے وچ اٹ دا استعمال

ساڈے پورے علاقے وچ ماہرین دی رائے دے مطابق سبھ توں
پہلاں جس عمارت وچ اٹ لگی اوہ ملک مالا دا سٹوپا اے۔ جیہڑا خضرو ضلع اٹک
توں چار میل اُبھر دے آ لے پاسے اے۔ ایہہ اٹ ڈھائی انچ موٹی اے۔
ایہہ پنجویں صدی عیسوی دی عمارت اے استوں پہلاں جے ساڈے علاقے
وچ کدائیں اٹ دا استعمال ہويا وی اے تے اوہ صرف فرش تے ہويا اے۔
ایہہ استعمال ٹیکسلا کول سرکپ وچ ہويا جس دا زمانہ پہلی صدی ق م اے۔ ایہہ
اٹاں $10 \times 7 \times 2$ 1/1-2 اہن وت ٹیکسلا توں 12 میل تے وادی ہرو
(H A R O) بہمالہ دے سٹوپے وچ اٹ ورتی گئی اے
جیہڑی "14"x9"x1/3-4" آہی۔ کچھ اٹاں مربع شکل دیاں آہن تے ایہناں
تے سواستیکا، کنول، پھل، پیل دا پتہ بنایا ہويا اے۔

چونے دا استعمال

چھیویں صدی ق م توں بطور سفیدی دے ورتیا ویندا رہیا۔ تریجی صدی وچ بطور گارا ورتیا گیا۔ تے پہلی صدی وچ بطور پلستر ورتیا گیا۔

مذہب

سبھ توں پہلاں جس مذہب نے اتھے مذہبی عمارتاں بنایاں اوہ بدھ مذہب اے۔ ہندوواں دیاں مذہبی عمارتاں دا اتھے ستوں صدی تک کوئی ثبوت نہیں۔ بلکہ پورے برصغیر وچ نہیں۔ جد اتھے بدھ مت نوں زوال آیا تے ایہناں دی طرز اُتے اتھے مندر بننے شروع ہوئے۔ ہیون سانگ جس اس علاقے دا دورہ کیتا (629 تا 645ء) اوہ لکھدا اے کہ بدھ مذہب دیاں عمارتاں ویران ہو گئیاں آہن یا ویرانی دے نیڑے اپڑ گئیاں آہن تے جتنے وی اس زمانے دے مندر موجود آہن۔ اوہ صرف کوہستان نمک وچ ای آہن ایہہ مندر (1) ملوٹ ضلع جہلم (2) کلرا سا سودا (3) چوہا سیدن شاہ (کٹاس) (4) پھاگن والا (5) نندنا اتھے 1014ء وچ محمود غزنوی قبضہ کیتا آہا۔ (6) سنگھ پورہ (امب)۔ ایہہ پرانا مندر ہک قلعے دے اندر آہ۔ آدھے آہن اتھے ترے مندر آہن ہک نکا گھر گیا اے۔ اتھے راجہ امبریک دی حکومت رہی۔ ایہہ قائد آباد توں سون سکیسروین آلی سڑک تے آوندا اے۔ قلعہ دے آثار وی حالی تائیں باقی آہن۔ (7) کافر کوٹ دریائے سندھ دے کنارے تے چشمہ بیراج دے نیڑے۔ ایہناں ساریاں مندراں وچ ترے شنیاں مشترک آہن۔

- (1) ایہہ سارے مندر شیوجی دے نال منسوب آہن۔
- (2) ایہناں ساریاں مندراں دا زمینی خاکہ منسوب آہن۔
- (3) اُتلا حصہ سکھارے (Sikhara) دی صورت وچ سلامی دار مخروطی (Pyramidal) شکل وچ آہن

ایہہ سارے مندر اس زمانے وچ بنائے گئے جد ایہہ علاقے تے کوہستان نمک (Salt Range) آہن۔ حکمران مہر گل دی ہارتوں پچھے (جیہڑی 525ء تا 528ء وچ ہوئی)۔ ایہہ علاقہ کشمیر دے ہندو حکمراناں دے قبضے وچ آ گیا۔ تے تقریباً نائیس صدی دے ادھ تائیں ایہناں دے کول رہیا۔ ہو سگدا کہ کشمیریاں برف باری دا کر کے مخروطی چھتاں ای رکھیاں ہون جیویں اج کل پہاڑی علاقے دیاں ہوندیاں آہن۔ بعد وچ ایہہ طرز مذہبی عمارات دا نشان بن گیا تے اج تک ایہو ای نمونہ چل رہیا اے۔ سوائے اتوں دی مخروطی شکل دے باقی دا سارا ڈھانچہ بدھ مت دیاں عبادت گاہواں دی طرز دا اے۔

بُت پرستی دی تاریخ

حالی تائیں کوئی اچھا بُت نہیں ملیا جس دا تعلق پہلی دو صدیاں نال ہووے پہلی دو صدیاں تائیں بُت پرستی دا کوئی بُت دی پوجا واسطے ناہے ہوندے ایہہ مٹی دے کھڈونیاں ہار ہوندے آہن۔ ایہہ پنجویں صدی تک رہے۔ استوں پچھے چوئے دے بُت بناؤن دا رواج ہو یا اس دا مرکز۔ ٹیکسلا

آہ۔ سوات دے بعض نیلے پتھر دے ہوندے آہن۔ جد بدھ مت نوں زوال آیا تے ہندوواں اپنے بُت سنگ مرمر دے چھیویں صدی وچ بناؤنے شروع کیتے۔ نائیں صدی وچ ٹیکسلا دی بجائے اوہ ہند ترک شاہی دارالحکومت بنیا تے ٹیکسلا نوں دنیا بھل ای گئی تے ایہہ شاہ ڈھیری بن گیا۔ سر جان مارشل نوں جد کھدائی دے وقت چاندی دے پترے تے ٹیکسلا ناں دا پتہ چلیا تے اس دی بجائے ریلوے سٹیشن تے شہر دا نام بدل کے شاہ ڈھیری دی بجائے ٹیکسلا رکھ دتا۔

ساڈے علاقے وچ گھوڑے تے لوہے دا استعمال 1000 ق م توں آ رہیا اے۔ کارنس جہنوں اسی کٹس آدھے آل یونانیاں دی یادگار سمجھی وئے ایہہ گھر دیاں چیزاں سجاون دے کم آوندی اج کل دیہاتاں وچ بھانڈے ٹنگ کے سجاوٹ بنائی ویندی اے۔

قدیم بھیرہ وچ مٹی دے پکے ہوياں کڑیاں (ٹھیکری) نال کھوہ اُساریا گیا اے جیویں ٹیکسلا وچ بنے ہوئے آہن۔ حالی اتھے اٹ دا ورتن نہ ہويا۔ اس توں پتہ لگدا اے کہ بھیرہ وی کسی طرح ٹیکسلا توں گھٹ پرانا نہیں یعنی قبل مسیح والے یعنی سکندر توں پہلاں دا آباد اے۔ اس قسم دے کھوہ نوں انگریزی وچ Terracotta rign Well یعنی ٹھیکری کھوہ آدھے نیں۔ ضلع سرگودھا دی تاریخ اتنی ای پرانی اے جتنی کہ سارے پنجاب سگوں پاکستان دی اے۔ بد قسمی نال اس گل دا ثبوت سن اپنے آسیوں پاسیوں لہے کے لے آؤنا پوندا اے کیوں جے ایہہ سارا علاقہ مدتاں تائیں جنگل رہیا تے وسیوں صرف

دریاواں دے کناریاں دے نال ہوندی آہی۔ کیوں جے بندیاں دی سبھ توں
وڈی لوڑ پانی اے۔ تے دریاواں توں وکھرا ہور کدائی پانی نہ ملدا۔ اس توں
وکھرا پہاڑاں وچ جتھے چشمے آہن ایتھے وی آبادی ہوگئی۔ کئی جاہیں تے
چھپڑاں دے کنارے وی آبادی ہوگئی۔ پاکستان بنن توں بعد تک نہاؤن،
دھون تے پین کان بندے تے ڈنگر چھپڑاں تے ای پلدے آہن جد چھپڑوی
سُک ونجے آہاتے وت ہور وخت پے ویندا آہ تے لوک کدائیں ہور پانی دے
نیڑے ٹر ویندے آہن۔

ایہہ گل تاں اسی سارے ای جان دے آں جے کدی ایتھے تاریخ
دے زمانے توں پہلاں ہندوواں تے بدھاں دا زور رہیا تے ساڈے کول
ایہناں دوہاں مذہباں دے آثار تے کتاباں ہن جس توں اسی تاریخ قدیم دا کجھ
حال احوال پتہ لگدا اے۔ سبھ توں پہلاں اسی ایہناں دا ذکر کریندے آں۔

ویدک دور

وید دے لغوی معنی سنسکرت زبان وچ پاک یا دینی علم یا کہانی دے
ہن۔ ایہہ وید ہندوواں دیاں مذہبی کتاباں نیں تے ایہہ گل چار نیں۔

- 1- رگ وید
- 2- یجروید
- 3- سام وید
- 4- اتھروید

رگ وید یا رچ وید

کیونکہ بعض لسانی اصولاں دے ناں چ گ نال بدل دی وینی اے۔
رگ وے معنی تعریف، دُعا، بھجن یا مصرعہ دے ہین۔ ایہہ بہوں تاں دیوتاؤں
دی شان وچ گیت آہن جہناں نوں اشلوک آدھے نیں۔

یجر وید

اس وچ قربانی دے منتر نیں جہناں نوں یاجوس (Yajus) آدھے
نیں۔

سام وید

اس وچ گیت راگ یا بھجن ہین۔ جیہڑے مذہبی کماں دے وقت
گائے ویندے اہن۔ اس دا مطلب مذہبی موسیقی وی ہوسکدا اے۔

اتھرو وید

اس دے وچ یا تو (Yatu) یعنی ٹونے تے جادو دے متعلق گیت
نیں۔ اس دے ہک مصرعے نوں بھجن یا منتر آدھے ہین۔ ویدک زمانے دی سبھ
توں دور دی حد 1200 ق م دا زمانہ آکھیا جاسکدا اے۔ اس دے اشلوک
چھندا کھواندے نیں جس دا مطلب وزن یا میزان اے۔

برہمی ادب

اس دا زمانہ 400 ق م تک دا اے ایہہ ویداں دیاں تفاسیر نہیں۔
ایہناں نوں عبادت تے رسماں دیاں کتاباں وی آکھ سکدے آں۔ ایہناں
دے جیہڑے حصے تصوف دے متعلق نیں ایہناں نوں اسیں آرن ایکس
(Aran Yakas) یعنی جنگل دیاں کتاباں آدھے آں اس دی وجہ شاید ایہہ
ہووے جے ایہہ جنگل دے وچ ہکلیاں دنیا توں دور رہ کے لکھیاں گئیاں
نیں۔ اس توں بعد سوتر دا زمانہ آوندا اے۔ ایہہ 400 توں لے
200 ق م۔ تک دا اے۔ سوتر تے حصیاں وچ ونڈے ہوئے نیں۔

شُرُتی

اس وچ قربانیاں کرنے دے قانون درج نیں۔

گرہیا

(Griha) اس وچ گھر دی عبادت دیاں رسماں تے طریقے درج
نیں۔

دھرم

اس وچ سماجی قانون تے رواج نوں موضوع بنایا گیا اے۔ ایسے
حصے وچ دھرم شاستر وی آوندے آہن۔ اس توں بعد اپنیشد (Upnishad)

دا زمانہ اوندا اے۔ ایہہ ہندو مذہب دی پرانی تے مشہور کتاباں آہن۔ ایہناں
وچ خدا تے روح دے متعلق دسیا گیا اے۔ انسان دی حیاتی تے موت دے
بارے دسیا گیا اے۔ ایہناں دی تعداد 100 توں لے کے 200 تک اے۔
پر 10 یا 12 مستند نیں۔ ایہناں دا زمانہ 550 ق م توں پہلاں دا اے۔

پران (Puran)

پران دا مطلب پرانے اے۔ ایہناں دی تعداد 28 اے تے مشہور
ویشنو پران اے۔ ایہناں وچ دنیا دی پیدائش، دوجی تخلیق دیوتاواں دے حسب
و نسب ایہناں دے کارنامے تے شاہی خانداناں دے شجرے شامل نیں۔
ایہناں دا زمانہ 400ء توں کچھ دا نہیں اے۔

اس سارے ادب نوں ویدک ادب آکھیا گیا اے تے اس وچ
سنسکرت زبان ورتی گئی اے۔ ویشنو گیتا چانکیا نے جس نوں کوٹلیا وی آکھدے
نیں۔ ارتھ شاستر ایہدا زمانہ چوتھی صدی ق م اے۔

ارتھ شاستر وچ اُتے دتیاں گئیاں ساریاں کتاباں نوں ویدک ادب
مندا اے۔ اس دی اپنی کتاب قانون سیاست دی منی ہوئی کتاب اے۔ ایہہ
خود وی پنجاب دے پنڈ کوٹلی ای دے کول دا رہن آلا آہا ایسے وجہ توں ایہہ
کوٹلیا اکھاوندرا رہیا۔ کوٹلی راولپنڈی دے نیڑے وی اک پنڈ اے۔ کوٹلی نکلے
پنڈ نوں آدھے آہن ایہہ ناں ساڈے علاقے وچ وی آہن۔ پتہ نہیں اوہ
کیہڑی کوٹلی وچ جمیا آہ۔

رزمیہ ادب

ایس ادب وچ ہندو ثقافت تے روایات دا ہک پرانا تے بہوں سارا رزمیہ ادب وی موجود اے۔ جیہڑا سنسکرت زبان وچ اے تے نظم وچ اے۔ ایہہ رزمیہ ادب ویدک ادب توں وکھرا اے۔ اس ادب توں اگر غور نال ویکھیا ونجے تے اس وچ اس دور دی لسانی سماجی، مذہبی، جغرافیائی تے تاریخ مواد بہوں سارا موجود اے اس ادب دیاں دو وڈیاں کتاباں رامائن تے مہا بھارت نیں۔

رامائن

ایہہ کتاب دا رام چندر جی دے متعلق اے۔ ایہہ اجودھیا دے شاعر والمیک دی لکھی ہوئی اے۔ ایہہ کتاب ست جلدیں وچ اے اس وچ کل 24000 اشلوک یعنی بند آہن۔ اس دا ہندی ترجمہ اکبر بادشاہ دے زمانے وچ ٹلسی داس نے کیتا آہا۔ جیہڑا آج تک وڈے شوق نال پڑھیا ویندا اے۔ ایہہ عجیب گل اے جے رام چندر جی دا اس توں علاوہ ایہناں دی بیوی جس دا ناں سیتا اے۔ ایس دا کوئی ذکر نہیں۔ بقول پروفیسر جکوبی مکڈائل۔ رامائن نہ تاں تاریخی واقعہ اے۔ نہ مجازی یا تمثیلی۔ ایہہ بالکل شاعرانہ تے خیالی اے ایہہ کدوں ہوئے کوئی پتہ نہیں۔

رامائن دی کہانی کچھ انج کر کے دسی گئی اے۔ اجودھیا دا راجہ دسترتھ جد بڈھا ہو گیا تے اس نے اپنے وڈے پترنوں ولی عہد بنان دا ارادہ کیتا۔ پر

اس دی دوجی بیوی لکیتی نے جیہڑی بھرت دی ماں آہی مخالفت کردیاں آکھیا
 جے میرے نال راجہ نے دو قول پورے کرن دا وعدہ کیتا ہویا اے۔ اوہ ہُن
 پورے کرے۔ پہلی گل ایہہ جے رام چندر جی دی جاہ تے اسدے پُتر بھرت
 نوں بادشاہ بنایا ونجے تے دوجے رام چندر جی نوں 16 سالوں دا بن باس دتا
 جائے۔ رام چندر جی نوں جد پتہ لگا تے اوہ اپنی بیوی سیتا تے دوجے بھائی
 پچھن نوں نال لے کے جنگل نوں چلے گئے۔ بھرت نے جا کے ایہناں نوں
 واپس لے آؤن دی وڈی کوشش کیتی پر کامیاب نہ ہویا تے ایہناں دیاں
 کھڑاواں تخت تے رکھ کے نائب دی حیثیت نال کم کردا رہیا۔ آخری سال لنگا
 دا راجہ جس دا ناں راوَن آہا اوہ سیتا جی نوں لے گیا۔ رام چندر جی نے راجہ
 سگریو دی مدد نال راوَن تے حملہ کیتا تے ایس نوں قتل کر کے سیتا واپس لے
 آئے۔ اس ساری کہانی وچ پُتر دی فرمانبرداری بھائی تے بیوی دا پیار تے
 پاک دامنہ دا بہترین نمونہ دسیا گیا اے۔

تہوار

دسہرہ تے دیوالی رام چندر جی دی واپسی دی خوشی وچ منائے ویندے
 نیں۔ دسہرے تے کاغذی راوَن دے پتلے بنا کے ایہناں وچ گولے بھر کے
 اگ لا کے ساڑے جاندے نیں تے دیوالی تے روشنی کیتی ویندی اے تے
 ڈیوے بالے ویندے آہن۔

مہا بھارت

ایہہ ہک وڈی جنگ دی کہانی اے جیہڑی دو خانداناں دے وچکار کرکیشتر دے میدان وچ لڑی گئی۔ ہک پاسے کورو آہن تے دوجے پاسے ایہناں دے پتریر پانڈو آہن۔ ایہہ لڑائی پورے 18 دہاڑے جاری رہی تے دوویں فریق تباہ ہوئے۔ آخر پانڈوواں نوں فتح ہوئی تے کورو تقریباً سارے ای مارے گئے۔ ایس نوں ویکھ کے پانڈوواں دا دل دنیا توں اچاٹ ہو گیا تے اوہ پنچ بھراتے ایہناں دی مشترکہ بیوی دروپدی تے ہک کُتا بادشاہی چھوڑ کے میرو پہاڑے چلے گئے۔ ایہہ کتاب اٹھارہ جلدیں وچ اے تے تقریباً ہک لکھ اشلوک درج نیں۔ اس توں وکھری وی ہک جلد اے جس وچ سولہاں ہزار اشلوک آہن۔ ایس دا ناں ہری ولسا (Hari Vamsa) اے۔ مہا بھارت مختلف لکھاریاں نے مختلف زمانیاں وچ لکھی۔ اس توں بعد ہک ہور کتاب جیہڑی فلسفیانہ قسم دی اے تے اسدے اٹھارہ باب ہین تے گیتا دے ناں نال مشہور اے۔ اس وچ شامل کردتی گئی مہا بھارت دا ذکر وی رامائن دی طرح کسے ویدک ادب وچ نہیں۔

مہا بھارت دی کہانی

دہلی توں سٹھ میل دے فاصلے تے ہک شہر آہا جس دا ہستناپور آہا۔ ایتھے چندر بنسی خاندان دی حکومت آہی تے راجہ شانتو ایتھوں دا راجہ آہا۔ راجہ شانتو دو شادیاں کیتیاں ہک وچوں بھیشم پتامہ تے دوجی وچوں

وچتر ویریہ پیدا ہوئے۔ اپنی متری ماں دے آکھن تے بھیشم پتامہ برہمچاری بن گیا تے اس شادی ای نہ کیتی تاکہ اس دا بھرا بادشاہ بن سکے۔ اس دے بھرا دے دو پُتر ہوئے ہک دا ناں دھرت راشٹر تے دوجے دا ناں پانڈو آہا۔ وڈا پُتر جمیاں دا مناکھا (انکھا) آس اس واسطے اس دا نکا بھرا پانڈو تخت تے بیٹھا۔ وڈے بھرا دی بیوی دا ناں گندھاری آہا تے ایس وچوں سو پُتر جے۔ وڈے پُتر دا ناں دریودھن آہا۔ ایہہ سارے بھرا کورو اکھواندے آہن۔ پانڈو دیاں دو بیویاں آہن۔ ہکی وچوں جس دا نکل، سہدیو دو پُتر جے کنتی دے ترے پُتر جے جہناں دے ناں یدھشتر، بھیم تے ارجن آہن۔ ایہہ پنجے بھرا پانڈو اکھواندے آہن۔ پانڈو دے مرنے توں بعد دھرت راشٹر اپنے نکلے بھتریاں دی طرفوں حکومت کرنے لگ پیا۔

رون اچاریہ

دھرت راشٹر نے اپنے پُتراں تے بھتیجیاں توں ورون چاریہ دے سپرد کیتا۔ پرکورو کورے دے کورے ای رہے۔ پانڈواں نے استاد توں فنون سپہ گری تے علم سکھایا۔ اس دا نتیجہ ایہہ ہویا جے یدھشٹر ہک ماہر نیزہ باز تے نیک اوصاف دا مالک بن گیا۔ ارجن ماہر تیر انداز تے ارجن نے کشتی تے گرز زنی وچ کمال پیدا کیتا۔ نکل بہترین شہسوار بنیا۔ سہدیو علم نجوم دا ماہر تے شمشیر زنی وچ لاثانی بن گیا۔ جد پانڈو جوان ہوئے تے دھرت راشٹر نے حکومت یدھشٹر دے سپرد کردتی اس گل دا اسدیاں پُتراں نوں دکھ لگاتے پانڈوواں نوں مارن

دی ترکیباں کرن لگے۔ ایہناں نوں ساڑن دا کارن کیتا پر اوہ نس گئے تے دروپدی دا سوئمہر جت لیا۔ سوئمہر دی شرط ایہہ آہی کہ ہک مچھی جیہڑی ہک میدان وچ ہک لکڑی تے لائی ہوئی آہی۔ تے اوہ لکڑی پھر دی پئی آہی شرط ایہہ آہی کہ جیہڑا بندہ مچھی دی اکھ وچ تیر مار لے دروپدی اسنوں مل ویسی۔ کوئی وی راجہ کامیاب نہ ہویا۔ ارجن نے تیر مار کے شرط جت لئی تے دروپدی پنجاں بھراواں دی ساجھی بیوی بن گئی کیوں جے اسوقت اس علاقے وچ رواج آہا ہُن وی تبت وچ رواج موجود اے۔

جوا بازی

کورو پاٹڈواں دے پچھے لگے ہوئے آہن۔ جد ایہناں دروپدی جت لئی تے ریاست دے مالک وی ہو گئے کیوں جے اسدے پیو دی شرط آہی کہ جیہڑا جت لے اُس نوں ادھا راج تے ساک ملسی۔ آخر دریودھن کورو نے یدھشٹرتوں جوا کھیڈن تے بلایا تے اسدی ریاست تے بیوی وی جت لئی۔

کورو کیشتر دی لڑائی

جد کوروواں سبھ کچھ جت لیا تے سری کرشن مہاراج جیہڑے ہن پاٹڈواں دے رشتے دار وی بن گئے آہن کیوں جے ارجن دی شادی ایہناں دی بھین سمھدرا نال ہوئی آہی کوروواں نوں سمجھاؤن واسطے پروہت گھلیاوت کرشن مہاراج آپ وی گئے پر اوہ نہ منے۔ آخر کار جنگ ہوئی جس وچ

پانڈوواں دا استاد کوروواں دے پاسے آہا ارجن جنگ کرن توں جھکدا آہا پر کرشن جی مہاراج نے وڈیاں تقریراں کیتیاں تے آخر ایہناں نوں رشتہ داراں تے استاد دے خلاف لڑن تے تیار کر لیا۔ سری کرشن دیاں ایہہ تقریراں بھگوت گیتا دے ناں تے اکٹھیاں کر لئیاں گئیاں۔ آخر پانڈو کامیاب ہوئے۔

مہا بھارت دی تاریخی اہمیت

کوروواں دے زمانے دے دوشہر ہستنا پور تے اندر پرست و ت و مہا بھارت وچ اوندے نیں ایہہ دوہیں شہر ہُن وی موجود آہن۔ جیہڑے دلی تے میرٹھ دے ضلعیاں وچ شامل نیں۔ اس توں ایہہ وی معلوم ہوندا اے جے اوس زمانے وچ کوروواں دی چنگی خوشحال حکومت آہی۔

بھگوت گیتا

مہا بھارت دی جنگ وچ سری کرشن مہاراج نے ارجن دے رتھ بان دے فرائض سرانجام دتے۔ جد ارجن نے مخالفان وچ اپنے عزیزاں دوستاں تے استاد نوں ویکھ کے لڑن توں انکار کیتا اس ویلے کرشن مہاراج نے اسنوں سمجھایا تے دسیا کہ جنگجو دے فرائض کیہ نیں۔ حق و صداقت دی خاطر تے دھرم دے واسطے ذاتی تعلق رکاوٹ نہیں بننا چاہیدا اے۔ روح غیر فانی اے تلوار اس نوں نہیں مار سگدی سری کرشن جی دے ایہناں اُپدیشاں نوں بھگوت گیتا دا ناں دتا گیا اے۔ اس دا دنیا دی کئی زبانان وچ ترجمہ ہو گیا اے۔ تے سری کرشن

جی نوں ہندو اوتار مندے نیں۔

بقول آرسی دت۔ ایہہ وید ہندو مذہب اس دی حکمت عملی دی لگاتار
ترقی داباعث آہن۔ نالے ایہہ آریہ تمدن تے تہذیب دالب لباب آہن۔

ویدک دور دے تہذیبی خدوخال

آریاں دی سیاسی تنظیم پہلاں ہک گھر بار آہی کئی گھریا خاندان مل
کے ہک قبیلہ بن ویندے آہن تے کئی قبیلے اکٹھے ہو کے شہر بنالیندے آہن
تے کئی شہر مل کے ہک حکومت بنالیندے آہن۔

طرز حکومت

دو طرحاں دا آہا کدائیں بادشاہت تے کدائیں جمہوریت پر بہوں
بادشاہت ای آہی۔

حکمران دے فرائض

حکمران دراصل قبیلے دا سردار ہوندا آہا اسنوں راجن آدھے آہن۔
کئی واریں اس نوں چن کے بناندے تے کئی واری وراثت دے طور تے بن
ویندا۔ اس داکم (1) سرحداں دی حفاظت (2) قانون دا احترام کراؤناں
(3) منصف دے فرائض (4) قربانیاں پیش کرن (5) جنگ وچ فوج دی
راہنمائی (6) راجہ خود مختار نہ ہوندا بلکہ رعایا دی مرضی نال ہر کم کریندا آہا۔ (7)

سارے قبیلیاں دے نمائندیاں دی سستی اسمبلی منعقد کریندا آہا۔ (8) برہمن
نوں تکلیف دینی گناہ سمجھی ویندی۔

راجن دی مدد واسطے تے مطلق العنانی توں روکن واسطے پنج صلاح کار
ہوندے آہن۔ (1) سینا پتی (سپہ سالار) (2) مادھیہ سماسی منصف
(3) ساگر نیر (خزانچی) پروہت (شاہی مذہبی پیشوا) (5) گرامانی (دیہات
دا کم چلاؤ عہدیدار۔

معاشرتی زندگی

جد بہوں سارے لوک مل کے ہک گاؤں بنا لیندے آہن تے کئی
گاؤں ملا کے ہک ضلع بنا لیا ویندا آہا۔ تے کنیں ضلع ملا کے ہک جن (Jan) بنا
لیا ویندا

ذات پات: ہک بھجن وچ چار ذاتاں دا ذکر کیتا گیا اے۔ جیہڑیاں
ایہہ نیں۔ برہمن، کھتری، ویش، شودر

کھتری: ایہہ اُچے خاندان دے رئیس ہوندے تے ایہناں دا کم ملک دی
حفاظت کرنا ہوندا آہا۔

ویش: اس دا کم واہی بجی کرنا ہوندا آہا۔

شودر: ایہہ محکوم قوم نال تعلق رکھدے آہن تے ایہناں توں گھٹیا قسم دے کم
لے ویندے آہن۔

برہمن: اس دا کم پڑھنا پڑھاؤنا تے مذہبی راہنمائی کرنا آہا۔

سماجی ذمہ داریاں

آریا لوکاں دی حیاتی سماجی سخت قانوناں دے وچ جکڑی ہوئی
آہی۔ ایہناں اداریاں نوں آشرم آدھے آہن۔

- 1- برہمچاریہ: اس قانون دے نال 25 سال دی عمر تائیں علم حاصل کرنا،
شادی نہ کرنا، سادہ زندگی بسر کرنا۔
- 2- گرہست آشرم: 25 سال توں کچھ پنجاہ سال تائیں شادی کرنا
تے بچے پیدا کرنا۔ تے ایمانداری نال دولت پیدا کرنا۔
- 3- بان پرستھ آشرم: ایہہ انسانی عمر دا پنجاہ توں پچھتر سال دی عمر دا زمانہ اے۔
اس وچ بندہ مال متاع وارثاں نوں دے کے جنگلاں وچ اللہ اللہ کرے۔

سنیاسی آشرم

ایہہ عمر دا آخری حصہ پچھتر توں مرن تک دا اے اس وچ مذہب دے
ظاہری فرائض ادا کرن دی ایڈی لوڑ نہیں صرف خدا نال لولائی رکھے تے سارا
وقت ایسے دی یاد وچ گزارے تے گرہستی لوکاں نوں وعظ نصیحت کر کے بھلائی
دی راہ دکھائی۔

اخلاقی حالت

چوری، شراب، کوڑ مارنا بہو اخلاقی جرم خیال کیے ویندے اغواتے زنا

دا بالکل رواج نہ پیا۔

مذہب

مذہب سادہ اہا مظاہر قدرت دی پوجا ہوندی۔ مندر (عبادتگاہ) دا حالی رواج نہ پیا۔ کنیں مظاہر دی پوجا ہوندی آہی۔ جہناں نوں دیوتا سمجھدے آہن۔ (1) ورونا آسمان دا دیوتا (2) اندر دیوتا بارش (3) اگنی (اگ) دا دیوتا (4) یا سادہ سورج دیوتا (5) ماروٹ (اندھی دیوتا) (4) اوشا (صبح دی دیوی) ایہہ دیوتے عرباں دے اسلام توں پہلاں دے دیوتیاں نال ملدے جلدے آہن۔

ورونا دی تعریف دا ہک بھجن

وڈی قدرت آلا سائیں اسماناں توں ساری دنیا تے حکومت پیا کریندا اے۔ انساناں دے سارے کم سامنے ہوون یا لگ چھپ کے ہوون سارے ویدھا پیا اے تے جاندا اے۔ ایہہ وڈے اسمان توں زمیناں جہناں دی کوئی انتہا نہیں ایہناں دی پیمائش توں انسان عاجز اے۔

پر ماتما

دیوتیاں دی پوجا دے نال نال ایہہ خیال وی آہا کہ آخر سورج تے اگ نوں کس پیدا کیتا اے اس واسطے ہک مختار کل ہستی دا تصور پیش کیتا گیا۔ جس نوں پر ماتما آدھے۔ جس دا مطلب ارفع تے اعلیٰ روح اے تے سارے

دیوتے خدا پاک دے مختلف مظہر آہن۔ ساری کائنات ایسے دے قانون دے
مطابق چلی رہی اے جس وچ کوئی تبدیلی نہیں ہو سگدی۔

نظریہ تخلیق دنیا

اس ویلے نہ زمی آہی نہ اسمان آہا۔ نہ سمندر آہا۔ جس ایہناں نوں
پیدا کیتا اوہ ای اس دا علم رکھدا اے۔



مذہبی تے اصلاحی تحریکاں

بدھ مت تے جین مت

چھویں صدی قبل مسیح دنیا وچ ہک مذہبی انقلاب آیا۔ اس زمانے وچ چین وچ کنفیوشس ایران وچ زرتشت تے برصغیر وچ بدھ مت تے جین مت دا ظہور ہويا تے ایہناں مذہباں دنیا دے ہک وڈے علاقے نوں متاثر کیتا۔ ایتھے صرف بدھ مت تے جین مت دے موٹے موٹے اصول دسے ویسے۔

سبب

برہمن جہاں نے سارے ہندو معاشرے نوں ذات پات وچ جکڑ کے تے آپ من مانیاں کریندے آہن باقی طبقیں وچ بغاوت دی صورت اختیار کر گئی۔ علم حاصل کرنا ایہناں صرف اپنے تائیں رکھیا ہويا آہا باقی قوماں نوں اس دے نیڑے وی ناہن لگن دیندے۔ کھشتری جہاں دا کم ملک دی حفاظت کرن آہا ایہناں توں وڈے تنگ آہن۔ کیونکہ مرنے مارن دا اوکھا کم ایہناں دے ذمے تے عیاشی برہمن دے حصے وچ۔ شودر انج ای ساریاں

ذاتاں دی خدمتاں کر کے تنگ آہن تے مذہب دے ایہناں نوں نیڑے
 ناہن لگن دیندے۔ جے ایہہ کدی کوئی مذہبی گیت بول لیندے تے ایہناں دی
 زبان کپ لئی ویندی جے سُنن لیندے تے کناں وچ سیسہ پگھار کے پاتا
 ویندا۔ ایہناں حالات وچ معاشرے نوں کسے پاسیوں وی بغاوت دی آواز
 پوے تے سب اس آواز تے لیک آکھن کان تیار ہو ویندے نیں۔ ایہہ ای
 حال بدھ مت دے ظہور تے ہو یا اسنے ہندومت دے خلاف آواز اٹھائی تے
 لوک اس دے نال ہو گئے تے اس دے پھیلنے دی وڈی وجہ ہندو سماج دی تنگ
 نظری ایہی تے ایہہ ای تنگ نظری ہُن تک اس سماج وچ اے جس توں تنگ آ
 کے مسلماناں نوں پاکستان د ا مطالبہ کرنا پیا۔

بدھ مت

برصغیر دی تاریخ وچ گوتم بدھ دی وڈی اہمیت اے۔ اوہ ہک نویں
 مذہب دا بانی تے ہک وڈا مصلح آہا۔ اس ویلے وی اسدے پیروؤں دی تعداد
 دنیا وچ سبھ توں زیادہ اے۔

پیدائش تے خاندان

گوتم بدھ دا اصل ناں سدھارتھ آہا تے ایہہ کپل وستو دے راجہ سدھو
 دھن دے گھر جمیا جیہڑا کھشتری خاندان نال تعلق رکھدا آہا۔ ایہدی پیدائش تقریباً
 533 ق م وچ ہوئی۔ اس دے والد نے اس دی تعلیم و تربیت بہترین استادان

کولوں کروائی۔ ایہہ پیو دا ہتھ وٹا کے اسنوں خوش نہ کر سکیا۔ 14 سال دی عمر وچ اس دی لیشودھرا نال شادی ہو گئی۔ اس دا ہک پتر وی جمیا جس دا ناں راہول رکھیا گیا۔ (راجیو گاندھی دے پتر دا وی ایہو ای ناں اے) ایہہ ساریاں گلاں تخت تے بخت آل اولاد اسدی زندگی وچ ٹھسیاں نہ لے آ سگی۔ آخر اوہ اس نتیجے تے اپڑیا کہ ایہہ دنیا دکھاں دا گھراے۔ اس توں نجات پاؤن کان تے اسدا حل لمھن کان اس تے ہر شے نوں قربان کر کے ہک رات نوں جنگل دی راہ لئی۔ جنگلاں وچ مارا مارا پھر دا رہیا کئی لوکاں نوں وی ملیا پر کسے نے اس دی تسلی نہ کیتی۔

ترک دنیا تے عرفان

گوتم نے 4 سالوں تائیں سخت چلے کٹے پر اس نوں کوئی فائدہ نہ ہویا۔ کھون پین تقریباً چھوڑ دتا سک کے کرنگ ہو گیا۔ آخر تھک ہار کے گیا دے مقام تے ہک بوڑھ دے پیٹھ ڈیرا لا دتا۔ تے ایہہ ارادہ کر لیا کہ چاہے میرا خون سک ونجے۔ ہڈیاں تے گوشت گل ونجے میں ایس ویلے تائیں ایتھوں نہیں ہلنا جد تک مینوں مکمل معرفت حاصل نہ ہو ونجے۔ اس مراقبے وچ اس نوں نور حق دی تجلی نظر آ گئی۔ اس تے حقیقت کھل گئی تے اس دے دل نوں تسلی ہو گئی۔ ایسے واسطے ایسدا ناں بدھ یعنی عارف پے گیا۔

راہ نجات دا طریقہ

بدھ دی تعلیمات دا نچوڑ ایہہ ہے کہ مخلوق دا محبت کرنا کسے نوں وی

تکلیف نہ دیو۔ بدھ نے اپنا پہلا وعظ سار ناتھ دے نیڑے کیتا تے ایس دے
پیروکار بنے شروع ہو گئے۔ اپنے ملک وچ وی گیا تے سارے گھر والیاں نوں
اپنا پیرو بنایا۔ ہولی ہولی کئی راجیاں اس مذہب نوں قبول کر لیا۔

آخری نصیحت

اس اپنے خاص چیلے نوں جس دا آئند آہا۔ اخیر نصیحت جیہڑی بدھ
مت دی تاریخ وچ سنہری لفظاں وچ لکھین دے قابل اے:-
”اے آئند، آپ مینار نور بنوں کسے باہر دے دوجے بندے توں
پناہ لین وچ وقت ضائع نہ کرو۔ جیہڑے اصول میں دسے نیں اوہ ای تیرے
رہنما آہن۔“

دھولی دا کتبہ

بدھ نے اس کتبے دے مطابق ایسانا (Isana) تے ایمان لاؤن
کان آکھیا تے اس توں ثابت ہو یا اے کہ اوہ خدا دی ہستی دا قائل آہ۔ ایسانا
(ایسٹور) تے ایمان لاؤ۔ اس ہستی دا اقرار کرو۔ کیونکہ اوہ ای اس گل دے
قابل اے کہ اس دی فرمانبرداری کیتی ونجے۔

دھولی دا کتبہ

بدھ نے اس کتبے دے مطابق ایسانا (ISANA) تے ایمان لاؤن

کان اکھیا اے ایسا نا (ایٹور) تے ایمان لاؤ۔ اس ہستی دا اقرار کرو۔ کیونکہ اوہ
ای اس گل دے قابل اے کہ اس دی فرمانبرداری کیتی ونجے اس توں ثابت
ہوندا اے کہ اوہ خدا دی ہستی دا قائل آہ۔

وفات

483 ق ن وچ گوشي نگر نیپال وچ دنیا توں کوچ کر گئے۔

بدھ مت دے اصول تے احکام

1۔ نروان: بدھ مت دے نزدیک حیاتی دا اصل مقصد نروان (نجات) حاصل
کرنا اے۔ اس نال دل نوں سکون مل ویندا اے۔

2۔ چنگے کم: (اچھے کرم) چنگے کماں دا چنگا نتیجہ تے بُرے کماں دا بُرا نتیجہ۔

3۔ نتیجہ: گوتم تناسخ یا آواگون دا قائل آہا۔ جہدا مطلب ایہہ ہے کہ انسان
وت و ت مردا تے وت و ت جیوندا اے۔ (ہندو وی آواگون عقیدے دے
قائل آہن)۔

4۔ درمیانی راستہ: گوتم سخت ریاضت تے سخت عیش و عشرت دی زندگی توں
بچ کے وچکار راہ دسدا اے۔ خیر الامور اوسطہا۔

5۔ اہسنا: بدھ اس گل دی تلقین کریندا اے کہ کسے جاندار نوں دل زبان تے
عمل نال تکلیف نہ دیو۔ کیونکہ ہر جاندار وچ روح ہوندی اے تے جاندار نوں
تکلیف دیئے تے اسدی روح نوں وی تکلیف ہوندی اے۔

6۔ انسانی برابری: گوتم بدھ سارے انساناں نوں برابر سمجھدا آہا۔ برہمن نوں اُچا تے شودر نوں گھٹ سمجھنا غلطی اے۔ ذات پات دی تقسیم نوں غلط تے خلاف فطرت آکھیا۔

7۔ ویداں تے اوکھیاں رسماں توں نجات: گوتم بدھ نے ویداں نوں آسمانی کتاباں تے برہمن دیاں اوکھیاں قربانی دیاں رسماں توں انکار کر کے عام فہم تے سوکھیاں رسماں تے زور دتا۔ ایسے واسطے اس سنسکرت دی بجائے پالی زبان توں ترجیح دتی۔

8۔ خود اعتمادی: بدھ مت داسبھ توں وڈا اصول خود اعتمادی اے دو جیاں اُتے بھروسہ کرنا چھوڑ کے اپنے آپ دی حفاظت کرنا۔

9۔ برہمن دی مخالفت: بدھ نے برہمن دی مذہبی اجارہ داری دے خلاف آواز بلند کیتی تے لوکاں نوں چھٹکارا دیوایا۔

10۔ مذہبی احکام: بدھ ستارے ضابطہ اخلاق دے بارے وچ دہ احکام ایہہ نیں۔ جہناں تے عمل کرن تے سچا بدھ اپنی حیاتی وڈے ضابطے دے تحت گزار سکدا اے۔ 1۔ حیاتی برباد نہ کرو، 2۔ چوری بلکل نہ کرو، 3۔ گندے کماں توں بچو، 4۔ شراب نہ پیو، 5۔ گوڑ بلکل نہ مارو، 6۔ بے وقت بلکل نہ کھاؤ، 7۔ پھل تے خشبو بلکل استعمال نہ کرو، 8۔ ودھیا کھانیاں توں بچو، 9۔ سونا یا چاندی کسے توں نہ حاصل کرو، 10۔ دو جیاں دی مدد دے محتاج نہ بنو اپنے آپ تے بھروسہ رکھو۔

خانگاہی نظام

بدھ مت دا خانگاہی نظام وڈا مضبوط آباہتھے بھکشو تے بھکشینیاں رہ
کے دین سکھ کے گھر گھر اسنوں اپڑاون دا آہر کر لیندے تے عام فہم زبان وچ
پرچار کریندے اسدے نال اس مذہب نوں وڈا وادھا ہويا تے دور دور تک
پھیل گیا۔ پر برصغیر وچ اتنا چرچا ہون دے باوجود ہندو مت نے کروٹ لئی
تے خدا دی ہستی دے بارے وچ اس مذہب دی خاموشی نوں آڑ بنا کے اس
نوں غلط ثابت کرن دی کوشش کیتی۔ جس دا ایہہ نتیجہ ہويا جے برصغیر وچوں
ایس دا وجود بہوں گھٹ ہو گیا۔ پر دو جیاں ملکاں مثلاً چین جاپان، تبت، کوریا،
برما، سری لنکا، کمبوڈیا، ویتنام تے ہور وی کئی ملکاں دا مذہب اے۔ کسے زمانے
وچ سرگودھے دے علاقے وچ وی بدھ مت دا وڈا زور رہیا۔ جسدے آثار
وادی سون سکیسر وچ ہُن وی کھلے پئے اہن۔ سکیسر داناں وی ادھے نیں
کہ ساکیا منی سر اے۔ جیہڑا بدھ مت دا لقب آبا بھیرہ دے وچ وی اس
مذہب دے نشانات ہن۔ کڑانہ پہاڑی دی ایسدا مرکز رہی۔ 1953ء تائیں
تلاں موجود آہن آج کل اتھے فوج دی وجہ نال پتہ نہیں کوئی نشان باقی ایہہ یا
نہیں۔ کھوڑو دے کولوں بدھ مت دے ماہی ساسا کا سکول دے استادان واسطے
بورڈنگ دا کتبہ 1888ء وچ لدھا جیہڑا وڈا مشہور اے۔

جین مت

اس مذہب دا بانی ہک شہزادہ مہاویر دسیا ویندا اے۔ ایس مذہب دی ابتدا کتھے ہوئی کوئی پتہ نہیں۔ جین مت آلے آدھے نیں کہ اس مذہب وچ کوئی 23 تڑھنکر (پیغمبر) ہوئے نیں۔ پر باویاں دا کوئی پتہ نہیں۔ ایس دا آخر تڑھنکر یارشوا ناتھ ہويا اے۔ ایہہ راجہ اشواسینا دا پتر آہا۔ ایس پہلاں خوب عیاشی کیتی تے وت تارک الدنیا ہو گیا۔ تے بدھ دی طرحاں نویں فرقے دی بنیاد رکھی۔ 12 سالاں دی محنت توں کچھ جد ایس نوں معرفت یا گیان حاصل ہو گیا تے ایس نوں مہاویر یعنی وڈا بہادر آکھیا گیا۔ ایس نوں جن (فاتح) دی ادھے نیں۔ کیوں جے ایس خواہشات نفسانی تے فتح پائی۔

وفات: مہاویر 72 سال دی عمر وچ پاوا دے مقام تے موجودہ پٹنہ دے نیڑے فوت ہوئے۔

عقائد تعلیمات

1۔ ایہہ وی دسدے کہ خدا انسان دے نیک ارادیاں دا مظہر اے، 2۔ دوزخ دی حیاتی i مادی ii روحانی، 3۔ نفس کشی، 4۔ انہسا، 5۔ شدید چلے کشی، 6۔ ویداں

توں انکار، 7۔ ذات پات دی مخالفت، 8۔ اواگون دا قائل، 9۔ روحانی بلندی
دے چار اصول i درست عقیدہ ii درست علم iii درست عمل iv درست گفتگو۔

وعدے

ہر جینی نوں پنج سچے وعدے کرنے ہوندے نیں۔ اوہ ایہہ نیں۔
1۔ کسے جاندار نوں دکھ نہ دینا، 2۔ کوڑ نہ مریسی، 3۔ چوری نہ کریسی، 4۔ دنیا
داری وچ نہ رُجھسی، 5۔ ویاہ نہ کریسی۔

اشاعت

ایہہ اپنے سخت اصولاں دی بناتے بدھ مت ہار قابل قبول نہ ہویا
جانوراں نوں مارن توں ایہہ ایس حد تک پرہیز کریندے جے بھیرے وچ
جینی طاؤن دے وچ لوک چوہے باہر وگیندے تے ایہہ پھدھ کے شہر لے
آوندے۔ ایہناں دیاں ایہو جیہاں گلاں توں لوکاں نوں نفرت ہو گئی۔ بھیرے
وچ جینیاں دا مندر حالی تائیں موجوداے۔ لاہور وچ وی جین مندر موجوداے۔

خلاصہ

ہُن تائیں جو کجھ لکھیا گیا اے صرف ربط قائم کرن واسطے تے
ہندومت۔ بدھ مت تے جین مت دے مذہباں نوں سمجھن واسطے لکھیا گیا
کیوں جے ایس نوں لکھنے توں وکھرا گزارا نہیں۔ قدیم سماج معاشرہ نہیں سمجھ

سگدے۔ پرانے زمانے دا ایہہ ربط تقریباً تگ بندی ای اے ساڈی اصل
 تاریخ سکندر اعظم دے آؤن توں ای چالو ہوندى اے۔ بال کشن دے مطابق
 اتھے سالب دی حکومت اہی ایسدى اولاد یادو بنسی یا جادو بنسی آکھویندى
 اے۔ ایس قوم دی حکومت روس تے چین تک کھلری ہوئی اہی۔ اسی مورخ
 دے مطابق گنج ناں دے راجے گنجی دا شہر آباد کیتا۔ جیہڑا بعد وچ غزنی مشہور
 ہویا۔ ایسے گنج شاہ دے پتر دا ناں بھٹی آہا جیہڑا بھٹی خاندان دا مورث اعلیٰ
 بنیا۔ اس خاندان نے ساڈے ضلع وچ حکومت کیتی اے۔ ایس واسطے ایس دا
 حال وی بیان کیتا ویندا اے۔





سلاطین دہلی دا زمانہ

سلطان محمد غوری دا پُتر کوئی نہ ہونے دے سبب قطب الدین ایبک
نوں ترک افسراں مشورہ کر کے اپنا بادشاہ چن لیا اس ویلے غزنی دی حکومت
تاج الدین یلدوز کول آہی۔ ملتان اُتے سندھ وچ ناصر الدین قباچہ تے لاہور
اُتے قطب الدین ایبک دی حکومت قائم رہی اس دا نتیجہ ایہہ ہویا جے ہک
دیاں ترے حکومتاں بن گئیاں۔ ایہناں تریاں حکومتاں دی آپس وچ دشمنی
شروع ہوگئی۔ قباچہ نے حملہ کر کے جھنگ اُتے قبضہ کر لیا۔ 1210ء وچ قطب
الدین فوت ہو گیا تے شمس الدین لُٹمَش نوں امرانے بادشاہ مقرر کیتا۔
لُٹمَش پہلا بادشاہ اے جس نوں خلافت عباسیہ نے بادشاہ منیا۔ ایبک
دے جیہڑے علاقے قباچہ نے قبضے وچ کر لے آہن ایہناں اُتے وی وت
قبضہ کر لیا۔ انج کر کے شور کوٹ توں بھیرہ تائیں تے کوہستان نمک دے
علاقے وی لُٹمَش دے قبضے وچ آ گئے۔ جد جھنگ اُتے سلطان لُٹمَش دی
حکومت پکی ہوگئی تے نول سردار ٹوڈرنوں باقاعدہ حکومت دے اختیار دتے۔

ایہہ پہلا موقع اے جے کسے سردارنوں اجیے اختیار ملے ہوں۔

خوارزم شاہ دا حملہ

جلال الدین خوارزم شاہ چنگیز خان توں شکست کھا کے پنجاب وچ آ گیا تے ایتھوں ایس التتمش تے قباچہ نوں مدد واسطے خط لکھے پر دوہاں کوئی چنگا جواب نہ دتا تے امداد دینے توں معذرت کر لئی۔ خوارزم شاہ دی سپاہ جیہڑی سرگودھا دے علاقے وچ اپڑی اسدا جرنیل ازبک ہائی ایتھوں دیاں کھوکھراں نوں نال ملو نے اچ کامیاب ہو گیا۔ ایہناں کھوکھراں دی فوج لے کے سلطان نے ملتان اُتے حملہ کر کے قباچہ نوں شکست دتی تے اوہ بھج کے بھکھر چلا گیا۔ سلطان موسم گرم ہون پاروں واپس کوہستان نمک چلا گیا تے قباچہ واپس آ گیا۔ سلطان نے ایتھے سمرقند دے نال اُتے قلعہ تعمیر کرایا تے آپ تلاجھ دے قلعے وچ رہیا۔ جیہڑا کھوڑہ کول اے۔ اس دے جرنیل سیف الدین قرلاغ نے ایتھے 20 سال حکومت کیتی۔ سکے وی ڈھالے۔

مغلاں دا حملہ

جد خوارزم شاہ دی کامیابیاں دی خبر چنگیز خان نوں اپڑی جے اس کھوکھراں دی مدد نال علاقے فتح کر لئے نیں تے چنگیز خان بھیرے اپڑ کے ایتھوں دیاں لوکاں نوں بیڑیاں تیار کرن دا حکم دتا۔ جد اوہ تیار ہو گئیاں تے ایہناں وچ پتھر بھروا کے دریا جہلم دے ذریعے خوشاب اپڑ کے خوشاب جیہڑا

اس ویلے وی کھوکھراں کول آہا تباہ کر دتا تے لوکاں نوں لٹ لیا۔ اس توں بعد تریمو گیتے آس پاس دیاں قبیلیاں نوں مدد واسطے بلایا۔ جس انکار کیتا ایہناں دا قتلَام کرایا۔ بعد وچ ملتان اُتے حملہ کیتا پر فتح نہ کر سگیا تے پرت گیا۔

تاج الدین یلدوز دا پنجاب اُتے حملہ

یلدوز غزنی دا حاکم ہونے دی وجہ کر کے غوری دی سیاسی سلطنت تے قبضہ کرن دی خاطر پنجاب اُتے 1615ء مطابق 612ھ حملہ کر دتا۔ التتمش جھنگ دے نول حکمران نوں مقابلے واسطے حکم دتا۔ قبول خان نول لشکر لے کے تریمو توں دہ میل پر بت آ لے پاسے جم گیا۔ انجے ہار کوہستان دے جنجوعے خوشاب دے کھوکھر شور کوٹ دے کاٹھیہ مقابلے واسطے تیار ہو کے آ گئے۔ سلطان التتمش بی بھیرہ تے پنڈی بھٹیاں دے لشکر لے کے آ گیا۔ سخت لڑائی توں بعد یلدوز ہار کھادی تے پکڑیا گیا۔ التتمش نے خوش ہو کے خوشاب دی حکومت کھوکھراں نوں کوہستان دی جنجوعیاں نوں تھل دی حکومت میکاناں نوں تے جھنگ دی حکومت نولاں نوں دے دی۔ چنیوٹ نوں ایہناں ریاستاں نال رابطہ رکھن واسطے مرکزی حیثیت دی۔ سلطان التتمش نے قباچہ نوں سبق دین واسطے ملتان اُتے اچانک حملہ کر دتا۔ قباچہ مقابلے دی تاب نہ لاسکیا تے پہلے اُچ تے وت دریا سندھ پار کر کے بھکھر وینا چاہندا آہا پر سلطان دیاں فوجاں کچھا کیتا تے اس دی بیڑی بڈ گئی تے قباچہ بال بچیاں سنے سندھ وچ غرق ہو گیا۔ 1236ء وچ التتمش مر گیا تے رضیہ سلطانہ نے حکومت سنبھال کے

جھنگ دے نول حکمران کبیر خان پہلاں جماعتی تے پچھے باغی ہو گیا تے ملتان اُتے قابض ہو گیا۔ رضیہ نے ایس نوں شکست دے کے ملتان تے قبضہ کر لیا رضیہ توں پچھے سلطان ناصر الدین محمود بادشاہ بنیا پر اس سارے اختیارات الغ خان جیہڑا وزیر اعظم آہا سوہنپ دتے تے آپ قرآن مجید دی کتابت کر کے گھردا خرچ چلاندا رہیا۔ 1326ء وچ اس دی وفات اُتے الغ خان آپ غیاث الدین بلبن دے ناں تے بادشاہ بن بیٹھا۔

ٹوانیاں۔ سیالاں تے گھپیوں دا قبول اسلام

بلبن دے عہد وچ رائے سیال نے بغاوت کیتی پر جد شاہی فوج دا مقابلہ نہ کر سکیا تے بھج کے پنجاب آ گیا کیوں جے ایس دے بھراواں جہناں دے ناں ٹیو تے گھیسو آہن۔ اتھے پنجاب وچ آ کے بابا فرید گنج شکر دے مرید ہو گئے آہن۔ بلبن کولوں بابا صاحب نے سفارش کر کے معاف کرا دتا تے رائے سیال اس سلوک توں متاثر ہو کے مسلمان ہو گیا۔ بعد وچ ایس دے بھراوی مسلمان ہو گئے ٹوانے دریا خان تے بعد وچ اوکھلی موہلہ آ گئے تے گھٹیو دی اولاد گھبے پنڈی گھیب وچ وس پے۔ ایہہ سارے قبیلے بابا فرید دے مرید آہن۔

ریاست اموانی

کسے زمانے وچ ریاست اموانی میکن قوم دے کول آہی۔ جنجوعہ

قوم نے اس تے حملہ کر دتا تے کھوکھراں نوں نال ملایا۔ اس ویلے خوشاب دی حکومت کھوکھراں دے کول آہی۔ کھوکھر تے جنجوعے مسلمان ہو گئے، آہن پر حالی میکن مسلمان نہن ہوئے۔ کھوکھراں دی منشا آہی کہ اموانی تے قبضہ کر لین۔ پر میکن سردار جس دا نال بہاؤ آہا بابا فرید دے کول فریاد لے کے گیا۔ آپ نے کھوکھراں تے جنجوعیاں نوں روک دتا۔ جس دی وجہ نال میکن وی مسلمان ہو گئے۔ بلبن نے بہاؤ نوں خان دا خطاب دتا نالے اموانی دا حکمران مقرر کر دتا۔ بابا فرید نے بہاؤ نوں مشورہ دتا جے رائے سیال نوں دامادی اچ لے لے۔ مرشد دا حکم سن کے بہاؤ نے اپنی دھی جس دا ناں سوہاگ آہا رائے سیال نال پرنا دتی۔ تے گزارے دے واسطے جہلم دے کنارے جاگیر دتی۔

تیمور دے حملہ توں پہلاں مغلاں دے بھیرہ تے حملہ

مغل یا منگول سرداراں تیمور توں پہلاں پنجاب نوں فتح کرن تے لٹ مار کرن دی خاطر دہ وڈے وڈے حملے کیتے۔ ایہہ حملہ آور سندھ دی راہیں آ کے تریموگھاٹ چنیوٹ خوشاب تے بھیرہ نوں نشانہ بناندے رہے۔ اس علاقے دیاں لوکاں نوں تقریباً ہک صدی تک اطمینان نہ مل سکيا۔ ایہناں حملیاں دی تفصیل کجھ اس طرحاں اے۔

پہلا حملہ: چنگیز خان نے خوارزم شاہ دا پچھا کر دیاں ہویاں کیتا چنگیز آپ تاں پنجاب وچ نہ آیا پر خوارزم شاہ دی وجہ توں بھیرہ خوشاب کوہستان چنیوٹ تے

جھنگ دے لوک پریشان ہوئے۔

دوجا حملہ: چنگیز خان دے نواسے الغو خان نے کیتا۔ پنجاب بری طرح متاثر ہويا۔ اس دی فوج بھیرے توں گزر کے دلی ول گئی۔ جلال الدین خلجی نے حکمت عملی نال صلح کر لئی الغو خان مسلمان ہو گیا۔ اسنو جاگیر دے کے تے استھے ای آباد کر لیا گیا۔

ترجیا حملہ: ایہہ حملہ 494ء مطابق 1297ء وچ دوا خان نے کیتا ایہہ تقریباً ترکستان وچوں ہک لکھ فوج لے کے آیا پر علاؤ الدین خلجی نوں جد پتہ لگا کہ مغل فوجاں بھیرہ نوں لٹ لیا اے تے اس نے دو جرنیلاں ظفر خان تے الغ خان نوں زبردست فوج دے کے مقابلے تے گھلیا۔ 12 ہزار مغل مارے گئے تے باقی نس گئے۔

چوتھا حملہ: اگلے سال 467ء مطابق 1398ء وچ دوا خان دا پتر قتل خان دو لکھ فوج لے کے بھیرے آیا۔ بھیرے نوں اپنا علاقہ سمجھ کے کسی قسم دا نقصان نہ کرن دتا۔ ایہہ لشکر جدا گانہہ ودھیا تے اسنوں وی علاؤ الدین خلجی دے لشکر نے شکست دتی۔

پنجواں حملہ: 704ھ مطابق 1305ء تر تاک ناں دے ہک مغل سردار نے چالھی ہزار فوج لے کے بھیرہ تے حملہ کیتا۔ اس نوں لٹ کے اگانہہ گیا تے علاؤ الدین نے ملک تغلق بیگ نوں مقابلہ کرن واسطے گھلیا۔ تر تاک قتل ہو گیا بہوں سارے مغل مارے گئے تے کافی پکڑے گئے۔

چھیواں حملہ: تر تاک دے قتل دی وجہ نال مغلاں نوں اگ لگ گئی۔ اوہ

بدلا لینے دے واسطے 1306ء مطابق 705ھ وچ مغل سردار ددا خان دا
 ہک امیر جس دا ناں کنک آہا سٹھ ہزار دا لشکر لے کے بھیرے دے ڈکھن
 آلے پاسے جنگل وچ رہ کے کافی تیاری نال اگانہہ ودھے تے
 علاؤالدین خلجی نے غازی ملک تغلق نوں مغلاں نوں سبق دین واسطے گھلیا۔
 غازی ملک نے ایہناں نوں زبردست شکست دتی صرف ترے ہزار بچے
 جہناں نوں قیدی بنا کے ہاتھیاں دے پیراں تلے کچل دتا گیا تے سرکپ
 کے مینارہ بنا دتا گیا۔

ستواں حملہ: ایہہ حملہ اقبال دی سرکردگی وچ ہويا۔ اس دا وی اوہ ای حشر ہويا
 جیہڑا تر تاک دا ہويا۔ اس توں کچھ کافی عرصہ تک مغلاں نوں ادے حملہ کرنے
 دی ہمت نہ ہوئی۔

اٹھواں حملہ: 1329ء مطابق 727ھ اقبال منہ طرح دے بہادر مغل سردار دا
 انجام ویکھ کے مغلاں دی کنڈ لگ گئی۔ اس توں کچھ تیموشین خان نوں اچانک
 خیال آیا کہ ہندوستان فتح کریئے تیموشین وی پرانی راہ تے چلدا ہويا بھیرہ
 آیا۔ استوں کچھ دلی ول گیا اس ویلے اتھے محمد تغلق دی حکومت آہی اس نے
 خون خرابے توں بچن واسطے کجھ دے دوا کے مغلاں نوں راضی کر لیا تے اوہ
 پچھانہہ ول گئے۔

نانواں حملہ: ایہہ حملہ 1351ء مطابق 756ھ وچ فیروز شاہ تغلق دے زمانے
 وچ ہويا۔ ایہہ لشکر وی بھیرے توں گزر کے جداگانہہ ہويا تے سلطان فیروز
 شاہ نے ایہناں دی دھکی من سٹی تے اوہ نس گئے۔

امیر تیمور دا بھیرے تے حملہ

1397ء وچ تیمور برصغیر تے حملہ آور ہويا۔ دریا سندھ پار کر کے نوے ہزار دالشر لے کے بھیرے آ گیا۔ بھیرے آ لے اطاعت تے تیار ہو گئے مال گزاری دا وعدہ کیتا۔ اس توں بعد بھیرہ دے ماتحت علاقے خوشاب، چنیوٹ، شورکوٹ دے لوکاں وی اطاعت دا وعدہ کیتا۔ تیمور نے بھیرے نوں کوئی نقصان نہ پہنچایا تے اس توں بعد وی بابر نے وی اپنا علاقہ سمجھدیاں ہوياں لٹ مارتوں پچایا۔ استھے بابر دے زمانے وچ علی خان دی حکومت آہی اوہ سکندر لودھی دا خطبہ پڑھدا آہا۔ بابر نے ایستھوں دیاں سرداراں نوں ملک دا خطاب دتا جیہڑا ضلع سرگودھا دی اکثر قوماں اج وی استعمال کریندیاں نیں۔

تیمور دے حملے دا نتیجہ

تیمور دے حملے دا فوری نتیجہ ایہہ ہويا جے تعلق خاندان دی حکومت ختم ہو گئی۔ تیمور نے خضر خان نوں پنجاب وچ اپنا نائب مقرر کیتا۔ جد اس ویکھیا کہ دلی دی حکومت ختم ہو گئی اے افراتفری دا دور دورہ اے تے اس نے دلی تے 1414ء وچ قبضہ کر کے سید خاندان دی بنیاد رکھی پر اس خاندان دا 1451ء وچ خاتمہ ہو گیا تے لودھی خاندان دا حکومت تے قبضہ ہو گیا۔

سرگودھا دے آس پاس نوياں سیاسی تبدیلیاں

847ء مطابق 1446ء جد ملک گڑ بڑ دا شکار آہا سندھ وچوں ہک

لنگاہ خاندان دا سردار کسی فوج توں وکھرا محض عیاری نال ملتان تے قابض ہو گیا۔ اس کمال چالاکی نال حاکم ملتان شیخ محمد یوسف نوں دھی دا ساک دے کے اس دا اعتبار جما کے موقع پا کے اس نوں قید کر لیا تے امراء نوں لالچ دے کے اپنی حکومت دا اعلان کر دتا تے سلطان قطب الدین لنگاہ دے ناں نال اپنا خطبہ جاری کر دتا۔ 14 سال حکومت کرن توں پچھے اس دا پتر سلطان حسین خان لنگاہ حاکم بنیا تے اموانی وچ میکاناں دی حکومت تے قبضہ کر لیا۔ انجے ہار ہوندیاں کوہستان نمک تے دریا جہلم دا لہندے آلا پاسہ وی ایس دے قبضے وچ آ گیا۔ خوشاب وی ایسے کول آ گیا۔ جھنگ دی ریاست تے نول خاندان دا حاکم ولی داد آہا۔ اس ویلے کھڑاں دی ساندل باروچ حکومت قصور تک کھلری ہوئی آہی۔ چنیوٹ دی ریاست لاہور دے ماتحت آہی۔ لیہ توں ڈیرہ اسماعیل خان تک بلوچ قبیلہ حکمران آہا۔ ایہہ صوبے ملتان دے ماتحت آہن۔ رنگ پور دی ذیلی ریاست وچ کھیڑے حکمران آہن۔ بہلول لودھی نے لنگاہ حکومت نوں فتح کرن واسطے اپنے پتر باربک شاہ تے ہک سردار تاتار خان لودھی نوں ملتان گھلیا۔

نولاں دی بے حیائی

سلطان بہلول نے نول سردار ولی داد نوں ہدایت کیستی۔ جے اوہ اپنی فوج لے کے تے کھڑاں نوں نال ملا کے تریہو تے حسین شاہ دا مقابلہ کرن واسطے اکٹھے ہوون۔ پراہیہناں کورا جواب دتا البتہ مل خان سیال جیہڑا مائی ہیر دا

پتیر آیا نے اپنے سیال قبیلے دے ہزاراں جوان بہلول دی مدد واسطے اکٹھے کر لئے پر وٹ وی باربک شاہ نوں ملتان وچ ہار ہو گئی جس دا سبب بہلول نے نولاں دی بغاوت سمجھی اس واسطے اس نے مل خان نوں جھنگ تے نولاں دی حکومت ختم کرن دا حکم دتا نالے ایہہ وی وعدہ کیتا جے شاہی فوجاں وی مدد کر سن۔ بہلول اس ویلے لاہور دا گورنر آہا۔ آخر کار مل خان نے نولاں نوں شکست دتی تے جھنگ تے قبضہ کر لیا۔

نولاں تے کھراں دا سمجھوتہ

ولی داد ہار کھان توں بعد کھراں نال سمجھوتہ کیتا جے کسے طرحاں سیالاں دی حکومت ختم ہو وے۔ اسے سلسلے وچ اوہ وفد بن کے بہلول کول گئے تے مائی ہیر تے بد چلنی دا الزام لایا بہلول مائی ہیر نوں عارفہ سمجھدا آہا اس واسطے ایہناں دی اتھھے دال نہ گئی تے ایہناں سیالاں نوں بدنام کرنے دے واسطے اپنے بھنڈاں نوں پیسے دے کے ہیر رانجھے دا قصہ گھڑیا۔ جیہڑا مشہور ہوندا ای گیا۔

ہیر دے متعلق جیہڑی نوی تحقیق اے اوہ ایہہ ہے جے اوہ ہک تارک الدنیا پارسا عورت آہی اس نوں سیاسی مخالفت دی بناتے فرضی قصہ گھڑ کے بدنام کیتا گیا۔ ہیر 46 سال دی عمر وچ 1471ء وچ فوت ہو گئی۔ اس دا مقبرہ دریا چہاں دے لہندے پاسے قلعہ برہمن گڑھ تے موجود اے۔

بلوچاں دا حملہ

ایسے افراتفری دے زمانے وچ بلوچاں دے سردار کوہ سلیمان توں مار دھاڑ کر بندیاں ہوئیاں تھل پار کر کے دریا جہلم تک اپڑ آئے۔ ایہناں بلوچاں میکاناں دی ریاست اموانی تے قبضہ کر لیا۔ جھنگ وچ کچھی دا علاقہ مل خان توں کھس لیا۔ اس طرحاں بلوچاں دی ہک نویں ریاست وجود وچ آ گئی۔ بلوچاں دا اصل مطلب ملتان تے قبضہ کرنا آہا۔ سلطان خان لنگاہ نوں جد اس گل دا پتہ لگا تے اس وی مکران دے بلوچ سردار سہراب خان دودانی تے جام اسمعیل خان نوں اپنی مدد واسطے بلا لیا۔ ہزاراں بلوچ نعرے مریندے ہوئے آئے۔ حسین خان نے انہاں نوں کوٹ کروڑ توں لے کے کوہستان تک دا علاقہ بطور ریاست دے دتا۔ سندھ دا سردار حاجی خان میرانی بی لشکر لے کے ملتان آیا ایس نوں سیت پور توں لے کے کروڑ تک دا علاقہ بخش دتا۔ مل خان بلوچاں دی دھاڑاں نوں خطرہ سمجھدا آہا اس انہاں دا زور تروڑن واسطے 1468ء وچ انہاں تے حملہ کر کے کچھی دا علاقہ آزاد کر لیا۔ ایسے زمانے وچ جام اسمعیل خان نے ڈیرہ اسمعیل خان دا شہر وسایا۔ تے ہک دوجے بلوچ سردار غازی خان نے ڈیرہ غازی خان آباد کیتا۔

شور کوٹ تے سندھیاں دی حکومت

حسین خان لنگاہ نے ملتان نوں بچاؤن دا ایہہ ای سستا نسخہ تجویز کیتا۔ جے ملتان دے آس پاس اپنے دوست قبیلے وسادے جان۔ اس توں

علاوہ اس ایہہ وی کیتا جے بلوچاں نوں بلوچاں نال لڑا دتا۔ بلوچاں نوں
 میکاناں تے سیالاں نال بھڑا دتا۔ انہاں دناں وچ سندھ دے حکمران جام نظام
 الدین دی بے رُخی دے سبب سمہ قوم دے دوسر دار جام بازید تے جام ابراہیم
 ناراض ہو کے ملتان آ گئے۔ لنگاہ نے ایہناں دی آمد تے خوشی دا اظہار کیتا تے
 انہاں دیاں ہمدردیاں حاصل کرن واسطے جام بازید نوں شور کوٹ جام ابراہیم
 نوں اُچ دی حکومت دتی۔ جام بازید نوں اہل علم نال محبت آ ہی اسے واسطے
 شور کوٹ علم و فضل دا مرکز بن گیا۔ حسین خان توں کچھے اسدا پتر فیروز تخت
 ملتان دا وارث بنیا تے استوں کچھے محمود وارث بنیا۔

میر چاکر رند بلوچ دا حملہ

میر چاکر خان رند بلوچ علاقہ سبی بلوچستان دا حکمران آہا۔ مسلسل خانہ
 جنگیاں توں تنگ آ کے پنجاب وچ قسمت ازماؤن واسطے آیا۔ اس ویلے ملتان
 وچ محمود کمزور حکمران آہا تے مہراب خان اس دا وزیر اعظم آہا۔ میر چاکر اُچ
 دے حکمران جام ابراہیم کول گیا تے اس اسنوں ہک جاگیر عطا کیتی جتھے ہُن
 وی ہک پنڈ کوٹ چاکر دے نال مشہور اے۔

مل خان دی حکمت عملی


مل خان نے جد میر چاکر دی خبر سنی تے اوہ بہوں خوش ہو یا کیوں
 جے اوہ کمالیہ دے کھڑاں کولوں چھٹکارا چاہندا آہا مل خان نے شور کوٹ دے

حاکم جام بایزید نوں مشورہ دتا جے اوہ وی میر چا کرنوں جاگیر دیوے۔ تاکہ
کدی کھرلاں دے خلاف مدد دی لوڑ پوے تے لے سکیئے۔ بایزید نے اتفاق
کر کے میر چا کرنوں کمالیہ دے نیڑے قصبہ ست گھرا دا علاقہ دے دتا۔ اس
طرحاں شور کوٹ اُچ ملتان دے آسے پاسے بلوچ آباد ہو گئے۔ انج کر کے مل
خان نے کھرلاں دے مقابلے وچ بلوچاں دیاں ہمدردیاں حاصل کر لیاں۔

☆☆☆



مغلاں دا زمانہ



بابر دا بھیرے اُتے حملہ
بھیرہ تے اورنگزیب عالمگیر
شاہجہاں تے رانی واہ بھیرہ

مغلاں دا زمانہ

بابرتوں پہلاں سرگودھا دی سیاسی حالت

- 1- چنیوٹ دی ریاست جیہڑی سرگودھا دے ڈکھن آ لے پاسے آہی استھے منگورائے جٹ حاکم آہ اس دی ریاست دیاں حداں پنڈی بھٹیاں توں لے کے لہندے آ لے پاسے دریا جہلم توں پار تک آہن۔
- 2- خوشاب دی ریاست کھوکھراں دے قبضے وچ آہی اس دا اصل حاکم ماچھی خان تاتاری آہا اس دے ذمے خوشاب دا انتظام وی آہا خوشاب وچ اسدانا ب اجیاس کھوکھر آہا۔ اصل وچ ماچھی خان بھیرہ دا حاکم آہا۔
- 3- اموانی ناں دی ریاست جس تے میکن حکمران رہے آہن اس ویلے بلوچاں دے قبضے وچ آہی۔ ایہہ ریاست خوشاب توں مظفر گڑھ تک دریا جہلم دے لہندے آ لے کنارے توں لے کے سندھ تک کھلری ہوئی آہی۔ ایہہ ساریاں ریاستاں لاہور دربار دے ماتحت آہن۔

خوشاب تے مغلیں دا حملہ

چنیوٹ تے تاتاری سردار مغلیں ناں دا حکمران آہا اس خوشاب تے

حملہ کرتا۔ خوشاب دا نائب حاکم اجیاس کھوکھر قلعہ بند ہو گیا۔ جد ماچھی خان
 نوں پتہ لگاتے اوہ فوراً اسدی مدد نوں بھیرہ توں آیا پر مغلیٰ دی تازہ دم فوج
 دے ہتھوں شکست کھا کے قتل ہو گیا۔ اس دی بھین جس دا ناں چنی آہا اس
 بھرا دا بدلہ لینے دی ٹھانی دو سال مکمل تیاری کر کے مردانہ لباس پا کے فوج دی
 کمان اپنے ہتھ وچ لے کے چنیوٹ تے حملہ کرتا۔ اس ویلے چنیوٹ دریا
 دے سجے پاسے آہا جتھے اج کل (ربوہ) یا چناب نگر اے۔ جد ایہتھوں مغلیٰ
 نوں شکست ہو گئی تے دریا دے دو بجے پاسے موجودہ چنیوٹ دے قلعے وچ
 بہہ گیا پر چنی نے زوردار حملہ کر کے قلعہ فتح کر لیا۔ مغلیٰ قتل ہو گیا۔ چنی نے
 چنیوٹ نوں نوے سرے توں وسایا خوشاب تے چنیوٹ تے چنی دا قبضہ ہو
 گیا۔ ماچھی وال ماچھی خان دے ناں تے ضلع جھنگ وچ جہلم دے کنارے
 موجود اے۔

بابر دا حملہ بھیرہ

بابر دریا سندھ نوں اوہند دے مقام توں پار کر کے کلر کہار دی راہیں
 بھیرے آیا۔ بھیرے دے متعلق ایہہ دسیا جاندا اے کہ جے بھیرہ بابر دے حملہ
 دے وقت اس کدھی توں پار احمد آباد دیاں بھراڑیاں آلی جاہ تے آہا تے ایہہ
 وی دسیا گیا اے جے بھیرہ اج توں ترے ہزار سال پرانا اے تے اس نوں
 گشتاسپ شاہ ایران دے زمانے وچ کفند نامی حکمران نے ہک ہزار قبل مسیح
 وچ وسایا۔

بھیرہ دی تباہی دی کہانی

تاریخ بھیرہ وچ دسیا گیا اے جے بابر دی وفات توں کچھ ہمایوں دے عہد وچ افغاناں نے اپنی شکست دابلہ لین کان بھیرہ تے حملہ کر کے اس دی اٹ نال اٹ وجا دتی تے ڈھیر قتل عام وی کیتا۔ جد شیر شاہ حاکم بنیا تے ایس نوں اُرارلی کدھی تے نوں بھیرہ وساؤناں پے گیا تے ایستھوں دی بادشاہی مسیت وی ایسے ویلے دی یادگار اے۔

بھیرہ دی ایہہ بد قسمتی اے جے اس تے آج تاں کوئی تحقیق نہیں کیتی گئی۔ دریاؤں پار آثار ضرور آہن پر اوہ آثار ڈائیو کمپنی جیہڑی موٹر وے بنا رہی آہی اس پٹ کے سڑک بنا چھوڑی اے۔ ہُن صرف ہک نکا جیہا ٹبہ رہ گیا اے جے توجہ نہ دتی گئی تے ایہہ وی ختم ہو ویسی۔

اُتے جیہڑی افغاناں دے حملے دی کہانی دسی گئی اے کوئی سچی نہیں لگدی کیوں جے تاریخ وچ لودھیاں دی شکست توں کچھ وت حملے کرن دی طاقت بنا کے بھیرہ نوں تباہ کرنا غلط لگدا اے۔ لودھیاں نے شیر خان نال ضرور اتحاد کر کے دشمنی دا ثبوت دتا انہاں چوں محمود لودھی دا ناں آوندا اے۔ پر اوہ تاں بنگال بہار آلے پاسے دی گل اے 1940ء توں 1964ء تاں میں وی ایہناں بھراڑیاں دا جائزہ لیندا رہیا آں پر ایستھوں کوئی شے سوائے ٹھکریاں دے نہیں ملی۔ ایستھے پکی اٹاں دی کسے عمارت دے نشان نہیں لدھے۔ صرف تندور دی طرز دے کڑے بنا کے ایہناں وچ مٹی دے بھانڈے رکھے ہوئے ملے آہن جہناں دے نمونے

ٹیکسلا دے عجائب گھر وچ وی ہین۔ میں ایہہ برتن محکمہ آثار قدیمہ دے بزرگ جناب ولی اللہ خان صاحب کول لاہور قلعے وچ لے گیا پر کوئی نتیجہ سامنے نہیں آیا۔ اتنا ضرور اے جے پروفیسر ڈاکٹر محمد سلیم صاحب نے مینوں دسیا جے اتھے جا کے ٹھکریاں دا جد جائزہ لیا تے اوہ قبل مسیح دیاں لگدیاں نیں۔ ایس واسطے ساڈا ہک وڈا تاریخی ورثہ ضائع ہو رہیا اے اس تے جلد تحقیق کر کے نتائج سامنے لے آونے چاہیدے نیں۔ نہیں تاں سبھ کجھ ختم ہوون دے نیڑے ہے۔ اج کل 1999 وچ یونانی وی کوئی بورڈ لاگے آہن۔ کڑیاں آ لے برتن دراصل گندے پانی دیاں غرقیاں آہن۔ ٹیکسلے وچ اس دے نمونے آہن۔

بابر دی بھروچیاں نوں تسلی

”اہل بھیرہ (بھروچی) ڈرن نہیں اسی ایس شہرنوں اپنا شہر سمجھدے آں۔ ایہہ ملک پرانے زمانے توں ترکاں دے ماتحت رہیا اے۔ تساں بلکل نہ کھنڈو تے امن نال گھراں وچ رہو۔ سن مُلک تے لوکاں دا وڈا خیال اے اتھے کسے قسم دا سوئی دا وی نقصان نہ ہوسی۔“ (تزک بابری)

ایہہ پیغام بابر نے عبدالرحیم نامی دے ہتھ گھلیا تے ایس توں کچھے آپ وی بھیرہ آ لے پاسے تڑپیا۔

بابر دا بھیرے اپڑنا

جد بابر بھیرہ دے نیڑے آیا تاں دیوانا می ہندو تے علی خان لودھی

خدمت وچ حاضر ہوئے۔ علی خان حاکم بھیرہ آہاتے اس داپو دولت خان
 لودھی حاکم لاہور آہا جس بابر نوں برصغیر تے حملے دی دعوت دتی آہی۔ آخر کار
 بھیرہ تے نیڑے بابر نے اپنے دو ہزار سنگیاں نال بھیرہ توں اُبھر دے پاسے
 ہک سوہنی جاہ تے خیمے لاؤن دا حکم دتا۔ کچھ چر آرام کرن توں پچھے دیواتے علی
 خان نوں نال لے کے بھیرے دی سیر کیٹی۔ اس توں پچھے اتھے اس نے ہک
 شاندار دربار لایا جس وچ شہر دے سارے وڈے وڈے لوک حاضر ہوئے تے
 بابر نے انہاں نوں امن و امان دا یقین دویا تے مشورے نال چار لکھ شاہ رخی
 (سکہ) محصول قرار دتا گیا بھیرے نوں چار حصیاں وچ تقسیم کر کے ایہناں تے
 چار حاکم مقرر کیئے (1) توج بیگ (2) ناصر بیگ (3) سید قاسم (4) محبت
 علی۔ ایہناں نوں ہدایت دتی کہ اوہ لوکاں نال سختی نہ کرن تے ایہناں نوں ہر
 سہولت پہنچان دی کوشش وی کرن۔

نک کپن دی سزا

بابر تے بھیرہ دے لوکاں نوں ہر طرحاں امن و امان دا یقین دویا۔
 پر بابر دے کچھ نا سمجھ فوجیاں لٹ مار کرن دی کوشش کیٹی جس دا لوکاں نوں دکھ
 ہو یا تے بابر کول شکایت کیٹی۔ بابر نوں وی وڈا دکھ لگاتے اس تحقیقات دا حکم
 دتا جیہڑے لوک مجرم پائے گئے ایہناں نوں سخت سزا دتی۔ کنیاں نوں نک تے
 کپن دی سزا دتی تاکہ دوجیاں واسطے سبق ہوئے۔

دریا دی سیر

بابر نے ایتھے دریا دی سیر وی کیتی کشتی وچ کافی چر رہیا دریا دے کنارے کھوہ توں ماہل نال پانی کڈھن دے طریقے نوں وڈا پسند کیتا۔ بھیرہ دے قلعہ جہاں نما وچ قیام کیتا۔

بھیرے دا انتظام

بابر نے قلعہ جہاں نما وچ اک دن جشن منایا تے ایتھوں دا انتظام ہندو بیگ دے سپرد کیتا تے اس دی مدد واسطے کچھ ترک سپاہیاں دی تنخواہ وچ وادھا کر کے ایتھے چھوڑے ایہناں وچوں بعض دے ناں ایہہ نیں۔ (1) شاہ محمد (2) مہر داد تے اس دا نکا بھرا دولت مہر داد نظر علی ترک، منو چہر خاں، لشکر خاں جنجوعہ ملک ہست جنجوعہ وغیرہ۔ باقی پنجاب دے جیہڑے لوک ملن واسطے آئے آہن ایہناں نوں رخصت کیتا۔ چنیوٹ دا علاقہ لشکر خاں نوں عنایت کیتا۔ حسین انکراک نوں چناب دے آس پاس دا علاقہ بخشیا۔

ہندال دی پیدائش

بابر حالی بھیرے ای آہا جمعے آلے دیہاڑے۔ شیباق پیادہ تے درویش علی بچے دی پیدائش دی خوشخبری لے کے آئے چونکہ بچہ ہند دی فتح دے زمانے وچ جمیا آہا اس واسطے اس دا ناں ہندال رکھیا گیا۔

خوشاب دا وفد

جمعے آ لے دیہاڑے خوشابیاں ہک وفد بھیرے گھلیا اس وفد دے نال
شاہ حسین بن شاہ شجاع ارغون نوں وفد دے نال خوشاب گھلیا تاکہ خوشابیاں
نال معاملہ طے کرے۔

شراب دا دور

بھیرے ای بابر نے بیڑی اچ بہہ کے شراب پیتی۔ اس دے نال
اس دے سنگی خواجہ دوست محمد خاوند، خسرو میرم، مرزا قلی محمدی، احمدی کدائی،
لقمان، لشکر خان، قاسم علی تریاکی، یوسف علی تے تنکر قلی آہن۔ اس توں کچھ
مجون (ایم) وی کھادی تے سوتے تائیں ایہہ شغل چلدا رہیا۔

واپسی

گرمیاں شروع ہو جان دی وجہ نال واپسی دا فیصلہ کیتا ایہہ گرم علاقہ
بابر دی زندگی دا پہلا تجربا آہا۔ اتھے ہر شے نوی نظر آئی۔ جانور پرندے تے
لوکاں دے رسم و رواج سارے ای نواں تجربہ آہا۔ ایہہ سبھ کچھ دیکھ کے حیرانی
وی ہوئی۔ ایہہ ساریاں نویاں یاداں لے کے کلر کہار دی راہیں واپس کابل
پرت گیا۔

1526ء وچ بابر نے پانی پت دے میدان وچ ابراہیم لودھی نوں

شکست دے کے ہندوستان دی حکومت تے قبضہ کر لیا۔ تے 26 دسمبر 1530ء نوں فوت ہو گیا تے کابل وچ دفن ہو یا۔

نصیر الدین ہمایوں

نصیر الدین ہمایوں والد دی وفات توں بعد وڈی مشکلات وچ گھر گیا شیر شاہ سوری نال جنگاں کرنیاں پئیاں تے بھرا وی دشمن ہو گئے۔ انہاں حالات وچ شیر شاہ نے چوسہ تے قنوج وچ ہمایوں نوں شکست دے کے ملک تے قبضہ کر لیا ہمایوں نوں بھیرہ دے کمانڈر کالان بیگ نے مدد دا وعدہ کیتا۔ جد ہمایوں بھیرہ آیا تے پتہ لگیا جے کامران نے پہلے ای قبضہ کر لیا اے۔ ایہہ ویکھ ہمایوں خوشاب آیا اتھے حسن تمر سلطان تے خوشایاں نے اسدا وڈا استقبال کیتا تے ہر طرحاں دی مدد دا وعدہ کیتا۔ اتھے اسنوں کامران تے شیر شاہ دے تعاقب دی خبر ملی چنانچہ اوہ تیزی نال اونچ تے بھکر دی راہ ایران اپڑ گیا تے طہماسپ شاہ ایران اسدا شاندار استقبال کیتا اتھے ہمایوں چودہ سال رہیا آخر اُسدی فوجی مدد نال کابل تے قابض ہو گیا۔ استوں ہک سال بعد 1556 وچ فوت ہو گیا۔

شیر شاہ سوری

شیر شاہ سوری ہمایوں نوں شکست دے کے 1540ء وچ بادشاہ بن گیا۔ اس صرف پنج سال حکومت کیتی پر اس عرصے اس نے جتنا رفاہ عامہ دا کم

کیتا ہندوستان دی تاریخ وچ ہور کسے نہیں کیتا ساڈے پاسے لاہور تک جرنیلی سڑک دریا جہلم دے دوہاں پاسے بھیرہ تک سڑکاں بنوائیاں واں پھر اں واں کیلا واں بولا۔ واں میانہ تے بھیرہ دے شاہی مسیت اس دیاں یادگاراں نیں۔ ہک روایت دے مطابق موجودہ بھیرہ وی اسے دا وسایا ہویا اے۔ کیوں جے ایہہ پہلے دریاؤں پار آہا کسے وجہ نال تباہ ہو گیا تے شیرشاہ نے اس نوں دریا دے اس کنارے تے آباد کیتا تے اتھے مسیت وی بنائی جیہڑی ہُن تائیں موجود اے۔ شیرشاہ صرف پنج سال حکومت کرنے توں بعد 1545ء وچ بارود نوں اگ لگن نال فوت ہو گیا۔ اس توں پچھے ہمایوں نوں اتھے حملہ کر کے ملک فتح کرن دا موقع ہتھ آ گیا۔ 1555ء وچ ہمایوں پورے پندرہ سال توں پچھے ہندوستان دا بادشاہ بنیا۔

جلال الدین محمد اکبر

ہمایوں دی 1556ء وچ وفات توں پچھے اکبر تیرہ سال دی عمر وچ بادشاہ بن گیا۔ اکبر 1556ء توں 1605ء تک حکومت کیتی 1581ء وچ اکبر دے بھرا مرزا حکیم نے بغاوت کر کے پنجاب تے چڑھائی کر دتی۔ اکبر نوں جد خبر ہوئی تے فوراً مقابلے واسطے گیا پر مرزا حکیم مقابلہ نہ کر سکیا تے معافی منگ لئی اکبر واپسی تے بھیرے آیا۔ جہاں لوکاں بغاوت فرد کرنے وچ مدد دتی آہی ایہناں نوں انعام دتا۔

اکبر ملتان دے صوبیدار نوں ہور اختیار دتے خوشاب تک دے

علاقے ملتان نال ملا دتے گئے۔ راجہ ٹوڈرمل دے متعلق مشہور اے جے ایہہ
چنیوٹ دارہن آلا آہا۔

جہانگیر

اکبر دی وفات توں کچھ جہانگیر بادشاہ بنیا اس دے زمانے وچ اس
دے پتر خسرو بغاوت کردتی۔ 1606ء وچ بدخشانی روسا دی مدد نال لاہور
تے حملہ کردتا پر سخت جنگ توں بعد خسرو نوں شکست ہو گئی۔ لاہور وں نسیا پر
دریا چناب پار کر بندیاں ہویاں گرفتار ہو یا۔ خسرو نوں ہتھکڑیاں تے بیڑیاں لا
کے جہانگیر دے ساہمنے پیش کیتا گیا۔ جہانگیر اس ویلے کامران دی بارہ دری
وچ آہا جھڑی دریا راوی دے وچ لاہور سرگودھا پل دے کول اے۔ جد خسرو
ساہمنے آیا تے زور زور نال روون لگ پیا ہر اک دے دل وچ رحم آیا۔ پر
جہانگیر نے کوئی اثر نہ لیا۔ اس دے سنگیاں نوں راہ وچ سولیاں تے لٹکا دتا تے
ایتھوں خسرو نوں لگھایا گیا وت قید کردتا گیا۔ 1607ء وچ ایس نوں بادشاہ
بناون کان بغاوت ہوئی تے اسنوں انٹھا کردتا گیا آخر 1641ء وچ ایہہ فوت
ہو گیا۔

جہانگیر دا بھیرے تائیں دریائی سفر

1625ء وچ جہانگیر اجمیر دا سفر کیتا واپسی تے صحرا عبور کر کے
جھنگ آیا اس توں کچھ اس بھیرے تک دا سفر دریا جہلم دے کنارے کیتا

جس دا مفصل حال اس اپنی کتاب تزک جہانگیری وچ لکھیا اے۔ ایہہ واسو، خوشاب توں ہوندا ہويا تے شکار کھیڈا ہويا کشتی دے ذریعے ڈیگر ویلے بھیرے اپڑ گیا۔

شاہجہان 1637 توں 1657 تک

شاہجہان مغلیہ خاندان دا وڈا مشہور بادشاہ ہويا۔ اس اپنے زمانے وچ عمارتاں تے تاج محل بنا کے دنیا وچ مشہوری حاصل کیتی۔ ایس دا وزیراعظم ساڈے پاسے دا سعد اللہ خان آہا۔ جیہڑا چنیوٹ دا رہن آلا آہا۔ اس اپنے زمانے وچ چنیوٹ دی مسیت بنوائی۔ لاہور، دلی، بنارس دیاں عمارتاں واسطے ایہتوں کڑانہ دیاں پہاڑیاں دا پتھر استعمال کیتا گیا۔ چنیوٹ دی مسیت دے پتھر دے بارے وچ ولی اللہ خان صاحب محکمہ آثار قدیمہ نے تحقیق کیتی تے پتہ لگا کہ ایہہ کڑانے دیاں پہاڑیاں توں لیا گیا۔ انگھڑ قسم دے تھم حالی وی بچے ہوئے۔ کڑانہ پہاڑی کول پے ہوئے نیں۔ ایہہ گل وی دسی گئی اے جے شاہجہان دیاں عمارتاں دے کاریگر چنیوٹ دے آہن ایہناں دے ناں نذر حسین محمد یعقوب تے استاد خیر محمد آہن۔ شاہجہان خوش ہو کے ایہناں کاریگراں نوں جاگیراں دتیاں۔

شاہجہان تے رانی واہ بھیرہ

شاہجہان دے زمانے وچ بھیرہ دے ہک رئیس جھنگ وچ اپنی دھی

پرنائی اس اپنی دھی واسطے بھیرہ کولوں ہک نہر کڈھ کے جھنگ اپڑائی اس نہر دا
ناں جھنگ گزیٹر 1884ء دے مطابق رانی واہ آہا۔ اس نال جھنگ دا علاقہ
آباد ہو گیا۔

محی الدین اورنگزیب عالمگیر 1657 تا 1707

اورنگ زیب اپنے بھراواں نال جنگ جت کے بادشاہ بنیا۔ ایہہ
بادشاہ دوجے سارے مغل بادشاہاں دی نسبت زیادہ دین دار آہا اس شریعت دی
خود دی پابندی کیتی تے رعایا نوں وی ایسے راہ تے لایا۔ کھی روپیہ ختم کر دتا
جے اس طرحاں کھلے شریف دی بے ادبی ہوندی اے۔ لوکاں دے کئی ناجائز
ٹیکس معاف کردتے۔

بھیرہ تے اورنگ زیب

اکبر دے زمانے وچ ہک حاجیاں دا قافلہ حج واسطے بھیجیا گیا
تے اسدا امیر بھیرہ دے ہک بزرگ جنہاں دا ناں نظام الدین آہا بنایا گیا
بھیرہ مغلاں دے زمانے وچ مرکزی حیثیت رکھدا آہا۔ اس شہر وڈے وڈے
عالم دین پیدا کیتے۔ اورنگ زیب دے زمانے وچ حاجی قاری حافظ رحیم
الدین ہوئے جیہڑے امیر حج نظام الدین دی اولاد وچوں آہن۔ اورنگ زیب
نے ایہناں دی خوش الحانی دی قدر کردیاں ہوئیاں جاگیر بخشی۔ اس توں علاوہ
ایہناں واسطے ہک شاندار مسیت بنوائی جیہڑی دو منزلہ اے تے اپنی مثال آپ

اے مسیت دی پہلی منزل زمین دے اندر اے تے دوجی منزل عام سطح تے
 پہلی منزل سخت گرمیاں تے سردیاں وچ استعمال ہوندی آہی اس دے چاروں
 پاسے اندر جانے دے راہ آہن پرہن پہلی منزل استعمال دے قابل بن گئی۔
 ایہہ پاکستان دی تاریخ وچ ہک اوپری مسیت اے تے اس دی ہور مرمت دی
 کوشش کرنی چاہیدی اے۔ ایہہ مسیت حافظانی مسیت دے ناں تے حافظانہ
 محلہ بھیرہ وچ موجود اے۔ محمد شاہ رنگیلا دے زمانے وچ محی الدین خان جیہڑا
 نواب سعد اللہ خان دا پوترا آہا۔ بھیرہ چنیوٹ جھنگ خوشاب شورکوٹ کوہستان
 دا گورنر بنا دتا گیا۔

افراتفری دا زمانہ

عالمگیر دی وفات توں کچھ سارا ملک بد نظمی دا شکار ہو گیا۔ ہر کوئی اپنے
 اپنے پر پُزے کڈھن لگ پیا۔ سبھ توں زیادہ سکھاں نے تباہی مچائی۔ انہاں
 دی رہی سہی کسر بندہ بیراگی نے کڈھ دتی ایہہ ظالم سکھ مذہب نال تعلق رکھدا
 آہا تے مسلماناں دا سخت دشمن آہا اس بھیرے نوں وی نشانہ بنایا۔ اس توں
 کچھ خوشاب تے وت چکوال گیا۔ پر اتھے حملہ توں پہلاں دولو مراد پندرہ ہزار
 پیادہ فوج لے کے بندہ بیراگی تے حملہ آور ہويا تے اس نوں خوشاب توں
 پرے تائیں دھک دتا۔ دولو مراد نوں اس کارنامے تے شیر زمانہ دا خطاب ملیا۔
 فرخ سیر بادشاہ نے عبدالصمد خان نوں بندہ بیراگی نوں ختم کرن تے لایا۔ آخر
 پکڑیا گیا تے اپنے ہزار سنگیاں نال قتل کر دتا گیا۔ اس توں بعد ادینہ بیگ گورنر

پنجاب بنیا تے سکھاں نے ہور کھل کے غدر مچایا ادینہ بیگ 1756ء وچ مر گیا۔ مرہٹہ سردار سندھیا نے لاہور تے قبضہ کر لیا تے افراتفری ہور ودھ گئی۔

نورالدین بامی زمی دا بھیرہ تے حملہ

نورالدین دے متعلق آکھیا ویندا اے جے اوہ احمد شاہ ابدالی دا ایہہ سالار آہا۔ کئی ادھے آہن صرف لٹیرا آہا۔ جو کجھ وی آہا اس ضلع سرگودھا نوں جی بھر کے لٹیا تے پورے ضلع وچ جیہڑ پنڈ کھنڈر بنے پئے آہن اوہ سارے اس شخص دیاں کارستانیاں نیں۔ اس میانی نوں چک ساہنوں لٹیا پر بھیرے آلیاں اس نوں اگے ودھ کے بھج دتا۔

عباس خان خٹک دی غداری

عباس خان خٹک وی نورالدین دی طرحاں دا لٹیرا آہا۔ ایہہ پشاور وچ لٹ مار کر کے پنجاب بھج آیا تے سلامت رائے حاکم بھیرہ توں پناہ منگی۔ اس جد پناہ دے دتی تے اس نے دھوکھے نال زہر دے کے راجہ نوں مار کے آپ حاکم بن گیا تے سکھاں نال مل کے لٹ مار شروع کر دتی۔

ایہہ دور سارے ملک نے وڈا سخت آہا پورے ملک وچ سکھ تے مرہٹے قہر خدا بن کے لٹ مار کرن لگے ہوئے آہن تے ایہناں نوں کوئی ڈکن آلا ناہ۔

بقول بلھے شاہ:

کھلا در حشر عذاب دا
برا حال ہويا پنجاب دا
ايہہ حال وکيہ کے حضرت شاہ ولی اللہ نے احمد شاہ ابدالی نوں حملہ
کرن دی دعوت دتی۔

احمد شاہ ابدالی دا حملہ

احمد شاہ نے 1761ء وچ پانی پت دے میدان وچ مرہٹیاں دی انج دکھی
منی تے تباہی کیتی جے اوہ وت کدی نہ اُٹھ سکے۔ انہاں دا اقتدار مٹی وچ رُل گیا۔

بھیرہ تے سکھ

مرہٹیاں دی تباہی نال سکھاں نوں فائدہ ہويا جے پنجاب وچ ہک وڈا
دشمن ختم ہو گیا تے اوہ ہور شیر ہو گئے۔ ساڈے پاسے سو بھاسنگھ نہا سنگھ تے گجر
لہنا سنگھ نے تباہی مچائی۔ بھیرے دے لوکاں وی احمد شاہ نوں اس عذاب توں
چھٹکارے واسطے لکھیا۔ احمد شاہ 1764ء وچ آیا تے اس سکھاں دا قتل عام کیتا
ادھے نیں کوئی پنجاب ہزار دے نیڑے سکھ مارے گئے تے سکھ اس حملے نوں گھلو
گھاڑا ادھے نیں۔ ایہہ جنگ لدھیانہ دے نیڑے ہوئی۔ ایہناں تیناں سکھاں
دی وی شامت آئی تے کسے شاعر آکھیا:

سو بھے دی سو بھا گئی گجر دا گیا مال
لہنے نوں دینا آیا ترے ہوئے کنگال

احمد شاہ ابدالی دی وفات

احمد شاہ دے بار بار حملے کرن دے باوجود سکھ ختم نہ ہوئے اس دی
سبھ توں وڈی وجہ احمد شاہ دا اتھے نہ ٹکنا آہا۔ اوہ حملہ کرن آوند اتے سکھ نس
ویندے جد اوہ اٹک پار ہوندا تے اوہ نکل کے لٹ مار شروع کر دیندے۔
پنجاب دی لٹ مار دی وجہ نال حالت سخت خراب رہی احمد شاہ دے فوجی گھٹ
نہیں کردے سن ایس سبب ہک اکھان بنایا گیا کہ:

کھادا پیتا لاہے دا
باقی احمد شاہے دا

یعنی جو کچھ کھاپی لینے اوہ ای غنیمت اے باقی بچایا ہویا تاں احمد شاہ
لٹ کے لے ویسی۔ آخر ایہہ 1776ء نوں فوت ہو گیا۔ اتنا کر گیا جے
استوں پہلاں افغانستان بطور ملک کوئی نہ جاندا استوں پچھے بطور ملک متعارف
ہویا۔ اس نوں جدید افغانستان دا بانی آکھیا ویندا۔ اسدی توجہ افغانستان تے
رہی اس واسطے ایہوں دا انتظام مستقل بنیاداں تے کر سکیا۔ اگر اوہ اتھے رہ
ویندا تے شاید سکھ حکومت نہ قائم ہوندی۔

احمد شاہ ابدالی دے پچھے پنجاب دی حالت

احمد شاہ ابدالی توں لے کے انگریزی دور تک افغانستان تک سارا
پنجاب ای آہا انگریزاں اپنی سیاسی ضرورت دی وجہ نال نواں صوبہ بنایا۔ احمد
شاہ توں بعد سارے علاقے وچ کلیاں کلیاں ریاستاں بن گئیاں۔ قصور نظام

الدین پٹھان کول آہا۔ اوّل کاک رام داس استوں پچھوں چک گروتے اخیر
 تے امرتسرناں ہو گیا۔ اتھے گلاب سنگھ بھنگی دا قبضہ آہا۔ ملتان وچ مظفر خان
 سدوزئی دی حکومت آہی۔ منکیرہ، ہوت، بنوں تے نواب بہاول خان دی
 حکومت آہی اس بعد وچ بہاولپور ریاست دی بنیاد رکھی۔ جھنگ چنیوٹ،
 بھیرہ، احمد خان سیال دے کول آہا۔ پشاور فتح خان بارک زئی کول آہا کشمیر
 ایس دے بھرا کول آہا۔ اٹک وزیر خیل سرداراں کول آہا۔ چمبہ سردار چڑت سنگھ
 کول آہا۔ چکوال، خوشاب تے وی سکھاں دا قبضہ آہا گوجرانوالہ رنجیت سنگھ دے
 والد مہان سنگھ کول آہا 1780ء وچ رنجیت سنگھ جمیا۔ 1809ء وچ بھیرہ تے
 قبضہ کر لیا۔

☆☆☆



حصہ دوم

PUNJAB INSTITUTE OF LANGUAGE, ART & CULTURE

مقامی ٹوانہ حکومت
(راجہ کرن توں میر عالی تائیں)

مقامی ٹوانہ حکومت

راجہ کرن توں میر عالی تائیں

اعواناں دا حملہ

شیر خان دی بغاوت

مقامی ٹوانہ حکومت

راجہ کرن

اجمیر، بیکانیر، ڈھانگر، مارواڑ دیاں ریاستاں تے راجہ کرن نامی راجہ
ہویا جس دے ناں توں ہندوواں دا بچہ بچہ واقف اے۔ اس توں کچھے اس دا
پُتر راجہ کام دیو اس توں کچھے کرم چند اس توں کچھے اس دا دوجا پُتر راجہ دھارن
گرٹھ رائے شکر ہویا جس دی اولاد جھنگ دے سیال نیں۔ اس توں بعد راجہ
مونگر تے اس دا پُتر راجہ برال تے اس دا پُتر ٹوانہ راجہ بنیا۔ اس توں بعد رائے
سندھ و ت راجہ اجودھڑا تے سین پال تے اسدا پُتر رائے میلو راجہ بنیا۔

رائے میلو

رائے میلو 1195ء مطابق 612ھ علاقہ مارواڑ بیکانیر راجپوتانا اجمیر
وغیرہ دا حاکم بنیا اس دی راجدھانی داناں ڈھانگر آہا۔ شہاب الدین غوری دے
حملے توں کچھے حالات کجھ ٹھیک ہو گئے۔ قطب الدین ایبک توں کچھے جد سلطان

التتمش دا زمانہ آیتے کئی راجیاں دی دیکھا دیکھی رائے میلو وی بغاوت کر دتی
 جد التتمش داسپہ سالار ولی محمد خان مقابلے تے آیتے اوہ قتل ہو گیا۔ اس تے
 التتمش ناراض ہو گیا تے اس ناصر الدین محمود اپنے پُتر نوں مقابلے تے گھلیا۔
 رائے میلو مقابلہ نہ کر سکیا تے نس پیا۔ شاہی فوجاں انہاں دے محلات ہر شے
 تباہ کر دتی۔ رائے میلو پنجاب دا منہ کیتا ملتان وچ اس ویلے حاجی محمد خان گورنر
 آہا اس آؤ بھگت کیتی۔ اس دا رائے میلو تے اس دے سنگیاں تے چنگا اثر پیا
 تے ایہہ بابا فرید گنج شکر دی خدمت وچ حاضری دے کے مسلمان ہو گئے۔
 اس دے نال اس دے پُتر ٹیپو تے واٹو مسلمان ہو گئے تے تریجا پُتر لکھو
 مسلمان نہ ہويا۔ اپنے نانا کول مالوے لگا گیا۔ اتھے اوہ راجہ آہا۔ اس دی اولاد
 پٹیا لہ وچ موجود اے۔ سکھ ہو کے ٹوانے مشہور ہوئے۔

بابا فرید نے انہاں نوں اپنے کول رکھ کے دلجوئی کیتی تے اس دے
 نال جیہڑیاں قوماں دے سردار آہن۔ سیال، کھل، شلوی، گندی، کلیرا منج
 ڈھوری ڈھڈی تے چدھر سبھ مسلمان ہو گئے۔ بابا صاحب نے حاجی محمد خان
 صوبہ دار ملتان نوں انہاں نوں آباد کرن واسطے لکھیا تے رائے میلو سندھ دے
 کنارے کھل تے سیال ساندل بار وچ واٹو دی اولاد بہاولپور وچ آباد ہو کے
 داؤد پوترے مشہور ہوئے تے بہاولپور ریاست دی بنیاد رکھی۔ میلو دی اولاد
 جیہڑی سندھ دے کنارے آئی اس دریا خان دے کول ٹھہرے ٹوانہ دے ناں تے
 پنڈ وسا کے رہائش رکھی گندی نے کندیاں دے ناں تے شہر بسایا جیہڑا ہن کافی
 مشہور اے۔ رائے میلو آپ گوشہ نشین ہو گیا کاروبار ٹیپو دے سپرد کیتا۔

سلطان حاجی بزید

دریا خان وچ حضرت سلطان حاجی بزید زندہ سن تے میلو نے
انہاں نال تعلق پیدا کر لیا انہاں دی وفات توں کچھ انہاں دے قدماں
وچ قبر بنوائی۔ اس توں کچھ ٹیو نے قبیلہ، واگھا، چھینا، بھٹا، شیخ، بالی، گھلو،
مہوٹا، انکرا، جوڑا، کھچی، جھمٹ، لک، کہاوڑ، گدارے، بھوچر، جویتے
آوان نوں نال ملایا تے اس سارے علاقے دے سردار بن گئے۔ تھل توں
علاوہ دندہ تک قبضہ کر لیا۔ پیر صاحب دی کرامت دا ہک واقعہ ایہہ تے
جے دریا سندھ ڈھالائی تے مزار دے ڈھان دا خطرہ پیدا ہو گیا۔ لوکاں
کڈھن دا سوچیا تے آپ نے خواب وچ آکے منع کر دتا کہ دریا ہٹ
ویسی۔ آخر دریا ہٹ گیا۔

رائے مل

ٹیو توں کچھ رائے مل اس علاقے دا سردار بنیا۔ پہلے تاں ایس دا بھرا
جس داناں مورخ آہ تے عیسیٰ خیل دے پٹھاناں نال وی متھالایا تے آخر بھرا
دے خلاف ہو گیا۔ بھرا نے حملہ کر کے شکست دتی تے نس کے اٹک آ لے
پاسے ٹر گیا تے اتھے اپنے پتر گھیبہ دے ناں تے پنڈی گھیب دا پنڈ وسایا۔
گھیبے وی سیالاں دی طرحاں ٹوانیاں دی شاخ نیں۔ مل وی فوت ہو کے دریا
خان وچ پیو دادے نال دفن ہو یا۔

رائے اودر

رائے میلو توں پچھے ایس دا پتر پھیر و سردار بنیا پر اوہ جلدی فوت ہو گیا۔ اس توں پچھے ایس دا پتر اودر حاکم بنیا پر ایہہ وڈا ظالم آہا۔ اس دیاں شکایتاں نویں صوبیدار نوں 1269ء وچ پہنچیاں اس نویں صوبے دار دا ناں سلطان حسین خان آہا۔

بلوچاں دی آمد

تیرھویں صدی وچ بلوچستان دا بلوچ سردار سہراب خان ہوت اپنے ڈھیر سارے قبیلے دے لوک لے کے حسین خان کول ملتان وچ ملازم ہو گیا۔ حسین خان نے انہاں نوں دریا سندھ دے کنارے آباد کیتا سہراب خان نے اپنے پتر اسمعیل دے ناں تے ڈیرہ اسمعیل خان وسایا تے دوجے پتر فتح خان دے ناں تے 20 میل دور فتح گڑھ وسایا۔ سہراب خان نے منگیرہ، حیدر آباد، لدھانہ، لئیہ، کوٹ سلطان، کوٹ ادو، محمود کوٹ تائیں لہندے کنارے تے ابھر دے کنارے تے۔ غازی خان نوں مقرر کیتا تے اس اپنے ناں تے ڈیرہ غازی خان آباد کیتا۔ اس طرحاں ہور وی پنڈ وسا کے اس علاقے نوں بلوچاں وڈا آباد کیتا۔ انہاں دی عزت وڈی ودھی ایس ویلے ایہہ علاقہ کابل دے ماتحت آہا۔

بلوچاں دے اس علاقے وچ آون نال آپس وچ ٹوانیاں تے بلوچاں دی گڑ بڑ ہوئی۔ جد لڑائیاں تائیں نوبت اپڑی تے حسین خان نے حد

بندی کر دی۔ دُ لے آلا، جنڈانوالہ، منکیرہ، سہراب خان نوں دتا تے اس توں
پر بہت آ لے پاسے پہاڑ تائیں رائے اودر نوں دتا۔ اس توں وکھرا دریا دے
لہندے پاسے وزیرستان دیاں پہاڑاں تک دا علاقہ بلوچاں نوں دے دتا۔
رائے اودر دے مرنے توں کچھ اس دا پتر شہزادہ سردار بنیا۔

سردار شہزادہ

ایہہ سردار وڈا لائق تے رعایا پرور حکمران آہا۔ اس دے زمانے وچ
محمود تغلق تے فیروز شاہ تغلق اس علاقے تے چڑھائی کیتی تے اس علاقے وچ
بد امنی پھیلی۔ شہزادہ دی وفات توں کچھ اس دا پتر مالہو سردار بنیا پر ایہہ وی
چھیتی فوت ہو گیا تے دریا خان وچ دفن ہويا۔ جتھے اس دے دو بے قبیلے دیاں
قبراں آہن۔

سردار جلال

سردار جلال اپنے والد مالہو توں کچھوں سردار بنیا۔ اس دے زمانے دا
مشہور واقعہ تیمور دا حملہ اے۔ محمود تغلق نس گیا جیہڑا تخت دہلی تے بیٹھا ہا پر امیر
تیمور دے ویںے توں کچھ وٹ آ گیا۔ اس ویلے ملتان دہلی حکومت دے ماتحت
آہا۔ تیمور نے ایس نوں دہلی توں وکھرا کر کے اپنے نال ملا کے اتھے سید
خضر خان نوں صوبے دار بنا دتا۔ سید خضر خان نے بلوچاں نوں کافی مضبوط سمجھ
کے سندھ دے دوہاں پاسے منکیرہ، حیدر آباد، لدھانہ، چوہارہ، جنڈانوالہ، منڈا،

دولے والا، خانسر، محمود کوٹ، کوٹ ادو، دین پناہ، لیہ تے بھکھر وچ قلعے بنوائے
 اس طرحاں بلوچ کمزور ہو گئے کیوں جے اتھے افغان فوج رکھی گئی۔ پر افغان
 فوج دی ٹوانیاں نال ان بن ہو گئی۔ دولے آلا تے جنڈانوالہ دے افغان
 فوجیاں نال ٹکراؤ ہو گیا۔ سید خضر خان جد تحقیق کرائی تے وادھا افغاناں دا
 نکلیا۔ انہاں دی صلح کرا دتی تے جلال خان دی عزت ودھ گئی۔ ایہہ سردار وی
 دریا خان فوت ہو یا۔

حسین خان

اس دے زمانے وچ تغلق خاندان دی حکومت ختم ہو گئی تے لودھی
 خاندان دی حکومت قائم ہوئی۔ لودھیاں جد خضر خان تے حملہ کیتا تے حسین
 ٹوانہ نے پورا پورا ساتھ دتا تے لودھیاں نوں شکست ہوئی۔ امیر تیمور نوں جد
 کامیابی دا دسیا گیا تے اس خضر خان دے مرتبے وچ ہور اضافہ کر دتا۔ آخر کار
 سید خضر خان نے خود مختار ہو کے خراج بند کر دتا۔ ایسے واقعے دی طرف اشارہ
 کر دیاں ہو یاں کسے فارسی شاعر نے اشارہ کیتا اے۔

مداں در دور تیموری کسے را دوست و محرم

کہ صادق راز داراں را ہم اینجا خضر خان دیدم

سید خضر خان حسین خان دی مدد تے وڈا خوش ہو یا تے اس نوں
 خلعت دتی۔ راستے وچ واپسی تے کرنال چوں مندا تے مستی دوسر دار نال لئے
 جہناں دے ناں توں ہڈالی وچ مندیاں تے مستیاں دو مشہور قبیلے ہوئے۔ ایہہ

وی اپنے آپ نوں ٹوانہ ای اکھواندے نیں۔ جہان آباد دے ٹوانے اصل وچ مندیال نیں۔ ایسے دے زمانے وچ اوکھلی موہلہ آباد ہويا۔

میر عالی خان

میر عالی سارے گزرے ہوئے مسلمان سرداراں وچوں سبھ توں زیادہ خوبیاں آلا سردار آہا۔ میر عالی آپ وی شہسوار آہ تے اپنے سواراں نوں وی وڈے کرتب سکھیندا آہا۔ نیزہ بازی دا رواج اس علاقے وچ ایسے پایا۔ 1534ء وچ جد بابر بادشاہ بنوں آ لے پاسیوں ملتان اُتے چڑھائی کرن واسطے آیا تے میر عالی نے ملتان دے صوبے دار دی طرفوں بابر دی فوج دا مقابلہ کیتا تے اس دے کئی فوجی مارے گئے بابر نوں اس گل دا وڈا غصہ آیا اُتے اس دریا خان اُتے حملہ کرا کے ٹوانیاں دا مرکز تباہ کر دتا۔ میر عالی ایہتھوں نس کے اوکھی موہلہ آ گیا تے ایس علاقے وچ کافی اثر رسوخ ودھا کے کافی علاقے تے قبضہ کر لیا۔ ایہتھے ایس دا مقابلہ خوشاب تے ساہیوال دے بلوچاں نال تے پہاڑ دے علاقے وچ اعواناں نال ہويا۔ جس وچ ملک ہمیشہ کامیاب ہويا ہک لڑائی وچ اعواناں دا سردار چنگ خان ماریا گیا۔

شیر شاہ نال تعلقات

بابر توں پچھے جد شیر شاہ بادشاہ بنیا تے میر عالی نے ایس دے نال چنگے تعلقات بناون دی کوشش کیتی۔ جد ایس دی فوج دا من کوہ آ لے پاسے

آئی تاں اس دی ہر طرح دی خاطر کیتی۔ اس علاقے وچ پانی پیون دی وڈی تکلیف آہی۔ شیر شاہ نے میر عالی نوں رقم دے کے ترے (باولیاں) وائیں بنوائیاں۔ واں پھچراں۔ واں کیلا (گنجیال) واں بولا (نزد ہڈالی جوہر آباد)۔ شیر شاہ نے میر عالی دی خدمات توں خوش ہو کے خلعت تے ملک دا خطاب دتا۔ جیہڑ اہُن تائیں ٹوانے استعمال کریندے ہین۔ وڑ چھا دی نمک دی کان وی میری عالی کول آہی۔ ایسے اُتھوں لون کڈھنا شروع کرایا۔

میر عالی اوکھی موہلہ دے آس پاس نویاں بستیاں وسائیاں ادھی کوٹ وی ایسے دی وسائی ہوئی اے۔ میر عالی دی حدود سلطنت۔ (1) اُبھر دے پاس۔ دریا جہلم دا لہندا کنارہ شیخووال، خوشاب، واں بولا۔ (2) لہندے پاس۔ کلور کوٹ، کندیاں۔ (3) پر بت پاس، کوہ سون دا دامن۔ (4) ڈکھن آ لے پاس۔ جنڈاں آلا تے ماڑی شاہ سخیہ۔

ٹوانیاں دا ذریعہ معاش زمیناں تے ڈھور ڈنگر آہا۔ پوری ریاست وچ اس نویاں نکلیاں آبادیاں وسائیاں۔

وفات

میر عالی ہک سو اُنھی 119 سال عمر پا کے فوت ہو گئے۔ میر عالی اخلاق دے لحاظ نال سبھ ٹوانیاں توں بے مثال سردار ہويا۔ فیاضی وچ وی کوئی اس دا ثانی ناہ۔

ملک میر احمد خان

میر عالی دے دو پُتر آہن۔ وڈے داناں میر حامد آہاتے نکلے داناں
میر احمد آہا۔ میر حامد سادہ طبیعت ہوون دی وجہ نال میر عالی نے میر حامد نوں
اپنا ولی عہد بنایا کیونکہ ایہہ وڈا ہونہار لائق ہوشیار سردار آہا۔ اگرچہ حامد نے اس
فیصلے نوں بھیڑے دے نال من لیا پر اس نوں زیادتی دا احساس آہا۔ کنڈیاں
تے پھراں اس دا ساتھ دینے دا وعدہ کیتا۔ پر میر احمد نے اس فتنے نوں جلد ای
ختم کر دتا تے میر حامد گرفتار ہو کے اوکھلی موہلے اپڑ گیا باقی عمر نظر بندی وچ
گزاری اس دے دو پُتر آہن۔ جہاں دے ناں رانجھا خان تے فتح محمد آہن۔
میر حامد دی اولاد ہُن وی حامدی ٹوانہ اکھواندی اے۔

مٹھ ٹوانہ دی آبادی

میر احمد نے 1580ء وچ ہک نواں پنڈ وساؤن دا آہر کیتا۔ آبادی
واسطے سبھ توں پہلاں اتھے پانی دا انتظام ضروری آہ۔ اس واسطے پہلے اتھے ہک
کھوہ کھٹن دا حکم دتا گیا۔ اللہ دے فضل نال اتھے مٹھ پانی نکل آیا۔ اس
علاقے وچ مٹھ پانی وڈی نعمت اے۔ ہُن وی مٹھ ٹوانہ دے آس پاس نمکین
پانی اے۔ ریلوے سٹیشن تے وڈا کوڑا پانی اے۔ نہر دی وجہ کر کے ہُن کجھ
کھالیاں تے نکلے لگن لگ پئے نیں تے پانی وی کجھ ول ہو گیا اے۔ نہر توں
پہلاں تاں کوہستان نمک دے اثر نال پانی کافی خراب آہا۔

مٹھے پانی دے سبب نال اتھے آبادی وڈی تیزی نال ودھی تے ایسے

نسبت نال مٹھا ٹوانہ اس آبادی دا ناں پے گیا۔ مطلب ایہہ جے اوہ آبادی جس دا پانی مٹھا اے۔ ٹوانیاں توں علاوہ اتھے ہور قوماں وی آ گئیاں۔ شلوی، رتیاں، چھل ڈھوری، مندیال، رنجیاں، جوئے، کلیرے تے ہندواں وچوں اروڑے منکیرہ توں آ کے مٹھا ٹوانہ آباد ہوئے۔

نویاں آبادیاں

میر احمد دی اس علاقے وچ آون نال خوشاب دے بلوچاں تے دامن پہاڑ دے اعواناں نال کھٹ پٹ ہو گئی۔ اس واسطے مٹھا ٹوانہ دا دفاع مضبوط کرن واسطے میر احمد نے بولا ہڈالی، بوتالہ، روڈا، چسو، حفاظتی چوکیاں دے طور تے وسائے اتھے چنگے ترکڑے سردار مقرر کیتے جیہڑے زمیناں وی آباد کرن تے دشمن دا مقابلہ وی کر سگن۔ انہاں نوں مناسب ہتھیار وی دے دتے گئے۔

اعواناں دا حملہ

میر احمد نے دامن پہاڑ دا سارا علاقہ اعواناں توں کھس لیا آہا اس واسطے اپنی زمیناں واپس لین کان انہاں ہک لشکر بنا کے ٹوانیاں اُتے حملہ کرن دی نیت تے تڑ پئے۔ جد اوہ لشکر موجودہ ہڈالی دی جائی اپڑیا تاں میر احمد وی مقابلے واسطے اتھے آ گیا۔ کافی جنگ ہوئی میر احمد کامیاب ہو یا تے اعواناں دے ہزاراں بندے تے نالے سردار وی مارے گئے۔ اس توں کچھ میر احمد

نے انہاں دے ایناں پنڈاں اُتے قبضہ کر لیا جہناں دے ناں ایہہ نیں۔ جی، چکی، کند، نلی، ناڑی وغیرہ۔ اس میدان وچ کافی عرصے تک مُردیاں دیاں ہڈیاں پیاں رہن دی وجہ نال اتھے جیہڑی بستی وسائی گئی۔ ایس دا ناں ہڈیا آلی پے گیا۔ ایہہ قصبہ ہُن وی ہڈالی دے ناں نال آباد اے۔ بتالے وچ ملک میر احمد نے قطب خان ٹوانہ نوں سردار مقرر کیتا جس توں کچھ قطبی تے حسنال ٹوانیاں دیاں دو ہور شاخاں بنیاں۔ حسنال ہموکہ وچ آباد آہن تے خدا بخش ٹوانہ ایسے قوم دا فرد اے۔ ایہہ کافی عرصہ وزیر وی رہیا تے سرگودھا ضلع دی ڈسٹرکٹ کونسل دا چیئرمین وی رہیا۔ ایس دا بھرا غلام محمد وی سیاست وچ آ گیا اے۔ اوہ ہک واری ایم این اے وی بنیا۔ ملک میر احمد دے زمانے وچ مٹھ ٹوانہ دے ٹوانیاں دی طاقت اپنے عروج تے پہنچ گئی آہی۔ اس اپنے دوہاں بھتریاں نوں فوجی خدمات وی لیاں تے گزارہ مقرر کیتا پر ایسدے مرنے اُتے انہاں بغاوت کر دتی۔ آخر میر احمد 100 سال دی عمر پا کے فوت ہو گیا تے مٹھ ٹوانہ وچ دفن ہو یا۔ اس توں پہلاں میر عالی تے میر حامد اوکھلی موہلے وچ دفن ہوئے آہن۔

ملک اللہ داد خان المعروف ملک دادو

میر احمد خان دے پنج پتر آہن جہناں چوں وڈا ملک اللہ داد آہا ایہہ ساریاں بھراواں وچوں سیانا تے بہادر آہا۔ اس دے سارے بھرا اس دے مددگار رہے۔ اس اپنے والد دے کھوہ نوں پکا کیتا پہلے اوہ کچا ای آہا۔ اس زمانے دے

کھوہ تے رونق لفظاں وچ بیان نہیں کیتی جاسکدی۔ ایسے کھوہ توں جوان فوجی اپنے گھوڑیاں نوں جد پانی پیوان آوندے آہے تے عجب نظارہ ہوندا آہا۔ ایسے کھوہ تے پانی بھرنا تے نہاوندی ہوندا آہا۔ اس واسطے ہر ویلے رونق رہندی آہی۔

حامد خان دے پُتراں دی بغاوت

حامد خان دے پُتراں نوں لوکاں چا چوا کے سرکشی اُتے تیار کر دتا انہاں دی مدد واسطے بھجھر کندی۔ شیخ تے بندیاں وی تیار ہو گئے۔ ملک دادو نے تلوار دے زور نال اس فتنے نوں ختم کیتا و ت اس سر نہ چایا۔ اس واسطے اس اوکھی موہلہ گنجیاں بندیاں واں بھجھراں تے کنڈیاں اُتے حملہ کر کے اپنے بھتریاں دے حامیاں دی طاقت ختم کیتی۔

ہور لڑائیاں

(1) خوشاب دے بلوچاں نال جنگ کر کے کامیابی حاصل کیتی۔
(2) جنڈاں والے دے پٹھاناں نال جنگ ہوئی۔ جس توں کچھ صلح ہو گئی حد بندی کر دی گئی۔ (3) اس دے پُتر شیر خان نے گروٹ اُتے حملہ کر کے ساہیوال دے بلوچاں کولوں کھس لیا۔ اس جنگ وچ کافی بندے مارے گئے تے کافی قید وی ہو کے آئے ملک دادو نے کجھ غلام بنالے تے کجھ چھوڑ دتے انہاں قیدیاں وچ کجھ عورتاں وی آہن جہناں وچوں ہک دانان ٹھری ذات دی نونئی آہی۔ اس دے نال اس دے دو پُتر وی آہن جہناں دے ناں سپاہی

خان تے گھاہی خان آہن۔ ٹھری حالی تائیں جوان آہی۔ ملک داؤد نے عدت گزرن مگروں اسدے نال نکاح کر لیا۔ تے اُس دے پتراں دی پرورش اپنے ذمے لے لئی۔ مائی ٹھری وڈی قابل تے سنجیدہ بی بی آہی۔ اس واسطے جلدی ای اقتدار حاصل کر گئی۔

شیر خان دی بغاوت

ملک اللہ داد اخیر لی عمرے آرام نال ڈنگ پورے کر رہیا آہا۔ جے اچانک گھر وچ غدر پیدا ہو گیا۔ ملک دادو دوشادیاں کیتیاں آہن۔ ہک وچوں محمد شیر تے عالم شیر آہن تے دوجی وچوں پہاڑ خان آہا۔ پہاڑ خان دی ماں زور آلی آہی تے چاہندی آہی جے ملک اللہ داد شیر خان دی بجائے پہاڑ خان نوں ولی عہد بنائے۔ ہولی ہولی گل ودھدی گئی تے ملک دادو نوں آکھیا گیا جے شیر خان پہاڑ خان نوں قتل کرن دا بندوبست کر رہیا اے۔ ملک دادو کوشش کر کے ساریاں پُتراں نوں راضی بازی کر لیا۔ پر اندر دی آگ نہ بجھی اس دا نتیجہ ساہمنے آ گیا۔ ملک شیر دے پاسے حسنال مندیال تے مسیتال ہو گئے تے دوجے پاسے پہاڑ خان دے نال بندیال تے پھچر ہو گئے۔ ملک دادو نے ایہہ ویکھ کے شیر خان نوں مٹھ ٹوانہ وچوں کڈھ چھوڑیا۔


شیر خان دا مٹھ ٹوانہ تے حملہ

ملک شیر نے مایوس ہو کے اپنے حمایتاں نال حملہ کر دتا۔ دوہاں پاسے

کافی نقصان ہو یا پر شیر خان نوں شکست ہوئی تے اوہ نس کے جھنگ دے
 سیالاں کول مدد لین گیا۔ پر مایوسی ہوئی تے اپنے سنگی وی ساتھ چھوڑ گئے آخر
 مایوس ہو کے اپنے چند سنگیاں نال مٹھ ٹوانہ آ گیا تے گڑ گج آلی مسیتی کول
 قلعہ بنا کے رہن لگ پیا۔ آخر ہولی ہولی طاقتور ہو کے پیو اُتے حملہ کر دیوس۔
 اس حملے نال ملک دادو اس دا بھرا میر خان مارے گئے۔ پہاڑ خان ہڈالی آ لے
 پاسے نس گیا۔ کافی لوک موئے ترے دیہاڑے لاشاں ترکدیاں رہیاں انہاں
 اُتے پہرہ بہادتوس بعد وچ مٹھ ٹوانہ دے گستان وچ دین دی اجازت ہوئی۔



ملک شیر خان ٹوانہ



پہاڑ خان دی اطاعت
نصرت خان ہوت دی بغاوت
نواب منکیرہ دا حملہ

ملک شیر خان ٹوانہ

ملک شیر خان اپنے والد دے زمانے وچ کئی جنگاں لڑ چکیا آہا۔ آخر اس اپنے پیونوں مار کے سرداری لئی۔ دستار بندی توں کچھ اس اپنے بھرا عالم شیرنوں بندیاں اُتے بھجراں دی سرکوبی واسطے گھلیا تے آپ پہاڑ خان دے کچھ گیا۔ اس دے حامی مستیاں تے مندیال آہن۔ ملک شیر خان نے وڈے وڈے پھنے خاناں نوں قتل کر دتا۔ جہناں وچوں ہک مندیال شیر خاں وی آہا۔ جیہڑا اللہ داد دے زمانے وچ کافی طاقتور ہو گیا آیا۔

پہاڑ خان دی اطاعت

پہاڑ خان ہر پاسیوں نا اُمید ہو کے اس نتیجے تے اپڑیا جے قسمت شیر خان اُتے مہربان اے تے ایس دی اپنی قسمت ہر گئی اے اس واسطے اسی ایسے وچ بھلا سمجھیا کہ زندگی دے باقی ڈنگ خواری نالوں اطاعت کر لئی و نچے تاں فائدہ اے اس واسطے اس بلا شرط اطاعت دا اعلان کر دتا تے شیر خان نے وی

اس نوں غنیمت سمجھ کے موضع جو یا اسنوں گزارے واسطے دے دتا۔ جیہڑا جہلم دی لہندی کدھی اُتے اے۔

بھائیاں دی محبت

ملک شیر خان تے عالم شیر وچ وڈا گوڑھا پیار آہا ایسے دی وجہ نال انہاں نے سارے مخالف قبائل نوں نہ صرف دبایا بلکہ انہاں دیاں ذرخیز زمیناں تے وی قبضے کیتے تے اپنی ریاست دیاں حداں دور دور تک ودھالئیاں۔ ایہہ زمیناں زیادہ تر اعواناں پھچراں تے کنڈیاں دیاں آہن۔ ملک افراتفری دا شکار آہا نواب عبدالصمد خان، وزیر جنگ تے نواب زکریا خان توں بعد کوئی قابل حکمران پنجاب وچ نہ رہیا جس دی وجہ توں ہر ایک اپنی طاقت نال ای امن نال رہ سگدا آہا۔

نور پور دی آبادی

ملک شیر خان نے 1745ء وچ منکیرہ تے نواں جنڈاں آلے پاسیوں حملے روکن واسطے نور پور ٹوانہ ہک نویں آبادی دا اضافہ کیتا۔ اس دا ہک ایہہ وی سبب آہا جے ماڑی آلے پاسیوں جھنگ دے سیال حملہ کرن تے انہاں نوں فوراً جواب دتا جا سکے۔ اس دے آس پاس ستارہاں نویاں جھوکاں آباد کیتیاں۔ اتھے اپنے بھرا عالم شیر نوں فوج دے کے ناظم مقرر کیتا۔

خراج دینے توں انکار

لگاتار کامیابیاں دی وجہ توں شیر خان کافی طاقتور تے مغرور ہو گیا۔
جیہڑی قدرتی گل اے۔ ڈیرہ اسماعیل خان دے حاکم دا دستہ جد خراج وصول
کرن واسطے مٹھہ ٹوانہ آیا تے اس اُتے حملہ کر کے بھجاء دتا تے خراج دینے توں
انکار کر دتا۔ انہاں دا سالار ماریا گیا تے باقی نس گئے۔

تحفہ امیر توں پتہ لگدا اے ڈیرہ اسماعیل خان اس زمانے ملتان دے
ماتحت آہا مٹھہ ٹوانے نوں وی ڈیرہ تے ملتان دے ماتحت کر دتا گیا آہا۔ افغانی
دستے دے سالار داناں محمد اکبر خان آہا۔ اس شکست دی خبر جد ملتان اپڑی تے
اس منکیرہ تے جنڈاں آلے دی فوج نوں ٹوانیاں اُتے حملہ کرنے واسطے گھلپا پر
انہاں نوں وی ٹوانیاں بری طرحاں شکست دتی تے انہاں دی دھاک ہور وی
بہہ گئی۔

سیالاں نال لڑائی

ملتان دی فوج نوں شکست دینے توں کچھ شیر خان نے سردار عنایت
اللہ خان سیال اُتے حملہ کر کے ماڑی شاہ سخیار کھس لئی تے کوٹ کھائی تے
کوٹ لنگر خان دا محاصرہ کر لیا۔ پر عنایت اللہ نے ایتھوں بھجاء دتا۔ ماڑی
ٹوانیاں کول ای رہی۔ میپل گرن دے بیان دے مطابق ماڑی عنایت اللہ
خان صوبے دار ملتان توں کھس کے آپ کسے سیاسی مصلحت دے تحت شیر خان
نوں دے دتی آہی۔

نواب منکیرہ نال لڑائی

صوبے دار ملتان نے نواب حافظ محمد خان نوں منکیرہ دا حاکم بنا دتا۔ اس دریا توں پار وزیرستان تائیں وڈی قابلیت نال اپنی فتوحات دی شروعات کیتی۔ اس منکیرہ دی حفاظت کان کئی قلعے تعمیر کرائے جہناں دے نال خانسر، کلور کوٹ، دنگھانہ، حیدر آباد، موج گڑھ، فتح پور، بھکر، دریا خان، چوبارہ تے لیہ ہین۔ انہاں ساریاں قلعیاں وچ افغانی فوج رکھی۔ ایہہ سارے انتظامات کر کے صوبے دار ملتان دے اشارے تے ملک شیر خان ٹوانہ تے حملہ کر دتا۔ ملک شیر خان نے حافظ محمد خان دا ڈٹ کے مقابلہ کیتا۔ عالم شیر دے قتل دی خبر سُن کے آخر کار دوہاں صلح کر لئی تے ملک شیر خان دے علاقے دی حد بندی کر دتی گئی۔ ایہہ کچھ انجے ہار آہی۔

(1) ابھر دے آ لے پاسے دریا جہلم تائیں۔

(2) پر بت سون سکسرتائیں۔

(3) لہندے کنڈیاں تائیں۔

(4) ڈکھن ماڑی تائیں۔

عالم شیر دا قتل

جس ویلے شیر خان نواب منکیرہ نال لڑ رہیا آہاتے اس ویلے بھجراں تے کنڈیاں بغاوت کر دتی۔ ملک نے اپنے بھائی عالم شیر نوں بغات دباؤن واسطے گھلیا۔ عالم شیر کول اس ویلے وڈی گھٹ فوج آہی۔ اس نوں انہاں گھیر

کے قتل کر دتا۔ ایہہ گل سن کے شیر خان نے منکیرہ دی جنگ توں فارغ ہو کے
بھچراں تے کنڈیاں اُتے حملہ کر دتا تے ہزاراں بندے مارے گئے تے
جیہڑے قید ہوئے انہاں بھارا تاواں دے کے جان چھڑائی۔

ملک شیر خان دی وفات

ملک عالم شیر دی وفات توں بعد ملک شیر خان دی کنڈ ترٹ گئی تے
بیمار رہن لگا سارا ریاستی انتظام ایسی اپنیاں پتراں ملک خان محمد خان تے ملک
خان بیگ دے سپرد کر دتا۔ خان محمد نوں نور پور تے خان بیگ نوں مٹھ ٹوانہ
سونپ دتا۔ ہک دیہاڑے ملک شیر خان گو لے بارود دی پڑتال کر رہیا آہا جے
ہک چڑنگ اڈ کے بارود وچ ونج پئی جس تے دھماکہ ہو یا تے ملک شیر خان
تے اس دے کئی سنگی سڑ گئے۔ ملک شیر خان نے ساہیوال دے کجھ علاقے
تاں لے لئے پر خوشاب اُتے قبضہ کرن دی اس دی خواہش پوری نہ ہوئی۔ اس
اپنے مترے (سوتیلے) بھراواں نوں جان دی امان دے کے جوئے توں مٹھ
ٹوانہ بلا لیا۔ قبضہ ماڑی توں کجھ لوک ماہل قبیلے دے سیالاں توں تنگ آ کے
مٹھ ٹوانہ آ گئے تے ہن تاں اتھے انہاں دی اولاد آباد اے۔

نادر شاہ دا حملہ تے قتل

اس زمانے وچ نادر شاہ پنجاب اُتے حملہ کیتا بہت کجھ لٹ کے لے
گیا پر اتھے ویندیاں ای قتل ہو گیا۔ ایہہ 1747ء دی گل اے پنجاب کابل

دے ماتحت ہو گیا تے ملتان وچ مظفر خان نواں صوبے دار مقرر ہو یا جس حافظ
محمد خان نوں منکیرہ دی ریاست دے دتی۔ ملک شیر جد محمد خان نال لڑائی کر
رہیا آہا تے کنڈیاں پھراں نال مل کے بغاوت کر دتی تے عالم شیر ماریا گیا۔

مراثیاں دا المناک قتل

ملک شیر خان نوں کسے بندے شکایت کیتی جے مراثی قوم وڈی خراب
قوم اے جے ساڈا کھاندے وی نیں تے بھنڈیندے دی نیں ملک آکھیا کوئی
گل نہیں انہاں دا مکوں ٹھپ لیندے آں۔ ملک اعلان کرا دتا کہ قوم مراثی
دے نکے وڈے سارے فلانے واڑے وچ آ کے اپنا حق لے ونجن جد واڑہ
مراثی قوم نال بھر گیا تے پھاٹک بند کر کے واڑے نوں اک لا دتی گئی مراثیاں
دی ساری نسل ای اس ظلم دی نظر ہو گئی۔ اس توں پچھے بچے کچھے مراثی حق لینے
توں ڈر گئے۔

ایہہ وی آکھیا ویندا اے جے ملک نے غریب مراثیاں نوں ساڑیا آہا
اس واسطے اللہ تعالیٰ اس نوں تے ایس سنگیاں نوں ساڑ کے ماریا۔
کرند لہند لیکھا صاحب دے دربار

ملک خان تے ملک خان بیگ دی کشمکش

ملک شیر خان اپنی حیاتی وچ ای اپنی جاگیر اپنے دوہاں پُتراں نوں
ونڈ دتی آہی ملک شیر خان 1767ء وچ فوت ہو گیا۔ ملک خان اپنے بھرا

دے نال مل کے ریاست دا انتظام کریندا رہیا ملک خان 1865ء وچ فوت
ہویا تے انج اوہ تقریباً 58 سال قوم دا سردار رہیا۔

ملک خان دی ساری مدت لڑائیاں وچ گزری۔ ایہہ لڑائیاں آس
پاس دے سرداراں نال سکھاں نال تے اپنے باغیاں نال ہوندیاں رہیاں۔
ملک خان نے سبھ توں پہلاں حسناں تے مندیال قبیلیاں دی بغاوتاں نوں ختم
کیتا۔ ایہہ بغاوتاں ختم کرن توں بعد اوہ سیالاں نوں ملن جھنگ گیا۔ جد واپس
آیا مٹھ ٹوانے دے دروازے اس واسطے بند کر دتے گئے تے اس دا بھرا خان
بیگ جس نوں سوئپ گیا آہا قابض ہو گیا آخر ملک خان مجبور ہو کے نور پور لگا
گیا تے ایتھوں تیاری کر کے مٹھ ٹوانہ تے حملہ کر دتا خان بیگ نوں شکست
ہوئی تے قید کر دتا گیا۔ آخر معافی منگ کے باہر آ گیا۔

بھائیاں دی لڑائی دی وجہ

کچھ چر دوویں بھرا ہسی خوشی اکٹھے مل کے حکومت کریندے رہے۔ پر
دوہاں بھراواں وچ دوپھیڑ پاؤن دی کوشش نور محمد نوں نے کیتی۔ نور محمد نوں ملک
خان تے خان بیگ دا بہنوئی آہا ایہہ اس ٹھری دا پوترا آہا جس نوں شیر خان
گروٹ دی لڑائی وچ قیدی بنا کے لے آیا آہ۔ ہُن نور محمد ایسے خاندان دا بندہ
آہا۔ نور محمد نوں نوں وڑ چھانمک دی کان دا نگران بنایا گیا پر اس لون بغیر
حساب کتاب دے ویچنا شروع کر دتا۔ جد ملک خان بیگ نوں پتہ لگا تے اوس
نوں ہٹا دتا تے مٹھ ٹوانہ بلا گھلیا۔ ایہہ مٹھ ٹوانہ اون دی بجائے نور پور ملک

خان کول کُ گیا۔ تے اس نوں ملک خان بیگ دے خلاف بھڑکایا نالے
اسدیاں پُتریں احمد یار تے چراغ نوں وی اپنی سیٹی چاڑھ لیا۔ نالے صلاح دتی
جے ہُن کجھ نہ کیتا گیا تے تہاڑی حکومت اوہ ختم کر کے رہسی۔

نور محمد نوں دی صلاح تے ملک خان نے خان بیگ نوں لکھیا کہ
حکومت تے میرا حق اے مٹھ ٹوانہ مینوں ملنا چاہیدا اے۔ خان بیگ دے
انکار تے لڑائی دی صورت پیدا ہوگئی ہک دیہاڑے ملک خان بیگ باہر شکار
تے ودا آہا تے ملک خان کافی بندے لے آ کے اس نوں پھدھ کے نور پور
لے گیا تے اتھے ڈک دتا۔ کجھ بندیاں وچ پے کے صلح کرا دتی تے پہلے دی
طرح کم چلن لگ پیا۔

نصرت خان هوت دی بغاوت

پنجاب تے کشمیر احمد شاہ ابدالی دے حملے دے بعد کابل حکومت دا
حصہ بن گئے آہن۔ حاکم حکومت افغانستان مقرر کریندی آہی۔ احمد شاہ توں
کچھ زمان شاہ نے شاہ نذر نوں ڈیرہ اسماعیل خان دا حاکم مقرر کر کے اس نوں
نصرت خان بلوچ اُتے حملہ کرن دا لکھیا کیوں جے ایہہ باغی ہو گیا آہا نصرت
خان هوت دے لے آ لے وچ آہا۔ شاہ نذر نوںیاں توں وی مدد منگی چنانچہ انہاں
دوہاں مل کے بلوچاں نوں بھاری شکست دتی۔

نصرت خان قید ہو گیا۔ شاہ نذر نے ملک خان محمد دی مدد دا وی ذکر
اس رپورٹ وچ کیتا جیہڑی کابل گھلی 1795ء مطابق 1210ء زمان شاہ نے

ملک خان واسطے خلعت تے پروانہ خوشنودی گھلیا۔

نواب منکیرہ دا حملہ

نواب محمد خان نے نور پور اُتے اچانک حملہ کر دتا۔ ہک روایت ایہہ دی اے جے حملہ ہرنولی اُتے ہويا۔ جتھے دی ہويا ملک خان بیگ گولی ہار اپڑیا تے نواب منکیرہ دے سوار فوج دے کماندار دریائی سنگھ پور بیا تے انور خان خاکوانی نوں شکست دتی خان محمد دی بھرا دی مدد نوں اپڑیا پر اس توں پہلاں نواب منکیرہ نوں بھاری شکست ہو گئی آہی۔

جاگیر دا انتظام

ملک وچ عام بد نظمی آہی اس واسطے ہر جائی اپنا انتظام آپ کرنا پوندا آہا۔ اس کم واسطے اپنے علاقے دے سارے بہادر لوکاں نوں چُن کے مختلف جھوکاں دی حفاظت واسطے سردار مقرر کر دتے۔ مسیتال، مندیال، بھچر، اترا، چاہل، شلوی ایہہ ساری دیاں ساریاں قوماں ٹوانیاں دیاں وفادار تے جان نثار بن گئیاں۔

سردار خوشاب نال جنگ

خوشاب دے بلوچ سردار لال خان دے تعلقات ملک خان نال چنگے آہن ہک واری ملک خان ملن خوشاب آیا تے لال خان دے پتر جعفر

خان نے سازش کر کے ملک خان نوں قتل کرن دی سازش کیتی ملک خان
 کسے طرحاں بچ کے نکل گیا تے ونج کے خوشاب اُتے حملے دی تیاری کرن
 لگ پیا۔ لال خان نوں پتہ لگا تے اوہ اپنی بیوی نور بھری تے نکلے پُتر
 نوں لے کے مٹھ ٹوانہ مناؤن گیا۔ پر ملک خان نے انہاں نوں قید کر دتا
 تے خوشاب اُتے حملہ کر دتا۔ جعفر خان بھج کے سکھاں کول گوجرانوالے گیا
 تے اتھے مہان سنگھ نوں مدد واسطے آکھیا۔ مہان سنگھ نے صلح کرا دتی۔ تے
 ملک خان واپس ہو گیا۔ ٹوانے دوویں بھرا پہلے ہار خوش خوش اکٹھے رہن
 لگ پئے۔

بھراواں دا جھگڑا تے سکھاں دی مدد

صلح کیتیاں حالی زیادہ چر نہ ہويا جے نور محمد نوں نوں ایہہ گل نہ
 سکھائی تے اس نویں سرے توں ملک خان دے پُتر نوں نویاں پٹیاں
 پڑھونیاں شروع کر دتیاں۔ دو جے پاسے خان بیگ نے وی اپنی دھڑ بناوئی
 شروع کر دتی سبھ توں پہلاں ایس خوشاب ساہیوال تے منیکرہ دے رئیس
 نال گوڑھے تعلقات بنائے تے اس دے نال نال اس بھچراں، اتراواں،
 حسناں، مسیتال، مندیال خانداناں نوں نال ملا کے مقابلے واسطے سب تیار
 ہو گئے۔

ملک خان نے وی اپنی طرفوں بہوبھج دھڑک کیتی پراسیدی کسے نہ سنی
 آخر جد کدائیں وی اس دی دال نہ گئی تے اوہ سدھا گوجرانوالے سکھ سردار

مہان سنگھ کول گیا۔

مہان سنگھ حالی کسے نتیجے تے نہ پہنچیا۔ ملک خان مایوس ہو کے سیالاں کول گیا تے کجھ مدد لے کے خان بیگ دا مقابلہ کیتا پر ہار گیا ایسے کشمکش دے وچ مہان سنگھ وی مر گیا تے ایس توں پچھے اس دا پتر رنجیت سنگھ اس دا وارث بنیا جس نے بعد وچ سارا پنجاب فتح کر لیا۔ ایہہ وی رنجیت سنگھ دی خوش نصیبی آہی جے زمان شاہ والے کابل نے ایس نوں مسلمان گورنر دی بجائے پنجاب دا باجگزار صوبے دار بنا دتا۔ ایس توں رنجیت سنگھ دی قسمت نوں پر لگ گئے تے ایس ہولی ہولی سارے پنجاب سرحد تے قبضہ کر لیا (رنجیت دے دور وچ سرحد کوئی وکھرا صوبہ نہ سارا پنجاب آہا ایہہ انگریزاں آ کے وکھرا کیتا۔)

جاگیر دے دھڑے

جد دوہاں بھراواں دے اختلاف و دھدے گئے تے انہاں اپنے آپ علاقے ونڈ لئے۔ ملک خان بیگ کول ایسے ویلے مٹھ ٹوانہ، ہڈالی بتالہ، بولا، اوکھلی موہلا، اترانگیاں، ہموکہ جوہا، واں بھجراں، ادھی کوٹ، ہرنولی کنڈیاں تائیں تے وڑ چھاتے پہاڑ دے نال دے شہر خان بیگ دے قبضے وچ آہن۔


ملک خان دے کول نور پور، رنگ پور، راہداری، جمالی، ڈراوی، لکو، چن، وینس، بمبول، نواں سگو، ڈھک محمود شہید، جھرکل، جوڑا، پلوواں، عینوں، شاہ

والا، مسکین، کھاٹواں، چھینا، گروٹ مہاپور، شیخو وال، وغیرہ دے علاقے آہن۔
ملک خان دے نال صرف اس دے پتر تے نورانوں آہا۔
اس سال بارش نہ ہونے دی وجہ نال پانی دی تنگی ہوئی تے ملک
خان بیگ مٹھ ٹوانے وچ ہک ہو رکھوہ کھٹوایا۔ اس دا پانی وی اللہ دے فضل
نال مٹھ نکلیا۔

☆☆☆



سکھی دور تے ٹوانے



رنجیت سنگھ دی مداخلت

حافظ احمد خان دا حملہ

ساہیوال اُتے سکھاں دا حملہ

سکھی دور تے ٹوانے

1799ء وچ رنجیت سنگھ لاہور تے قابض ہو گیا تے انج پنجاب وچ مسلماناں دی رہی کھہی پنجاب دی حکومت ختم ہو گئی۔ زمان شاہ دی ناعاقبت اندیشی دے ایس فیصلے تے مسلماناں نوں پنجاب وچ سکھا شاہی دے ظلم ستم سہنے پئے۔ جہناں دا ذکر اگانہہ آوی۔ اتھے صرف مڈھ ای اے جے پنجاب دے مسلمان آزادی توں محروم ہو گئے۔ مسیتاں ویران ہو گئیاں بانگاں بند کر دتیاں گئیاں۔ اس دی ساری ذمہ داری مسلماناں اُتے آوندى۔ جہناں دی نا اتفاقی پاروں ہک اقلیت اُٹھ کے اکثریت اُتے حاکم ہو گئی۔ انگریزاں دی طرح سکھاں نوں وی مسلمان مسلماناں دے خلاف حمایتی مل گئے جہناں دا حال اگانہہ آوندا پیا اے۔

رنجیت سنگھ دی مداخلت

جد ملک خان ہر پاسیوں نا اُمید ہو گیا تے اوہ رنجیت سنگھ کول گیا تے

ایس نوں حملہ کرن دی دعوت دتی۔ انھنھاں کیہ منگدا دو اکھیں دے مصداق
رنجیت فٹ تیار ہو گیا۔ ٹوانیاں ایس نوں دعوت دے کے اپنیاں پیراں اُتے
آپ کہاڑی ماری۔

ملک خان دا وعدہ

ملک خان رنجیت سنگھ نوں دسیا جے اوس دے اس ویلے چارزبردست
دُشمن آہن۔

- (1) خان بیگ رئیس مٹھہ ٹوانہ
- (2) جعفر خان بلوچ رئیس خوشاب
- (3) فتح خان رئیس ساہی وال
- (4) چراغ خان رئیس واں بھجراں

اس دے نال ملک خان رنجیت سنگھ نال وعدہ کیتا۔ جے مہاراجہ اس
نوں دندہ تے تھل دا سردار بنا دیوے تاں اوہ باقاعدہ خراج دیندا راہسی۔ اس
توں وکھرا جے انہاں چواں دُشمنناں وچوں رنجیت جس نوں وی پھدھ کے اس
نوں دے دیوے تے اوہ ہر ہک دے بدلے ہک لکھ روپیہ بطور معاوضہ دیسی۔
لیبل گفرن دے مطابق خان بیگ نے گڑھ مہاراجہ دے رئیس سردار رجب خان
سیال۔ فتح خان رئیس ساہی وال تے جعفر خان رئیس خوشاب دی مدد نال ملک
خان بیگ نے ملک خان اُتے حملہ کر دتا۔ کجھ مدت تے ملک خان ماڑا چنگا
مقابلہ کریندا رہیا جد جتن دی کوئی اُمید نہ رہی تے 1803ء وچ رنجیت سنگھ

نوں مدد دی درخواست کیتی۔

خان بیگ دی گرفتاری

رنجیت سنگھ وعدے دے مطابق پنڈ دادنخان دے راہ خوشاب اپڑ گیا۔ اتھے ایس ہک چال چلی۔ جس دے وچ خان بیگ پھس گیا۔ تے قید ہو گیا۔ چال ایہہ آہی جے رنجیت دی آمد اُتے ملک خان ڈر ظاہر کر کے نس ونجے تے جد خان بیگ نوں نسن دا پتہ لکسی تے اوہ اپنے آپ رنجیت سنگھ کول حق لین واسطے آ وسی تے رنجیت سنگھ ایس نوں پھدھ کے ملک خان دے حوالے کر دیسی۔

جد رنجیت سنگھ خوشاب آیا تے ملک خان محمد نس گیا۔ خان بیگ فوراً خوشاب آیا حالانکہ فتح خان رئیس ساہیوال تے جعفر خان رئیس ساہیوال منع کیتا کہ ایہہ چال اے راجہ ایسے دا بلایا ہویا آیا اے۔ پر خان بیگ ہک نہ منی تے مہاراج کول خوشاب حاضر ہو گیا۔ مہاراجہ اس نوں چنگی طرحاں ملیا۔ خیر خیریت کچھی۔ انج کر کے ملک خان بیگ مطمئن ہو گیا۔ تے اگلے دیہاڑے مہاراجہ نے ملک نال بیلے وچ شکار کھیڈن دا پروگرام بنایا۔ ملک خوش ہو کے تیار ہو گیا۔ خان بیگ نوں مہاراجہ دے نال ہک دوجے ہاتھی اُتے سوار کیتا تے نالے ہور فوجی وی ہاتھیاں اُتے سوار ہو کے شیر دا شکار کرن بیلے وچ وڑ گئے۔ فوجیاں کمال ہوشیاری نال خان بیگ دا ہاتھی وکھرا کر کے دوجے ہاتھیاں دے وچکار رکھ کے جلدی اس نوں توپ خانہ پلٹن تے رسالہ دے وچکار لیا آ کے قید

کر دتا۔ خان بیگ دے جد دوسو باڈی گارڈاں نوں پتہ لگاتے اوہ اس نوں
چھڑاون واسطے تیار ہو گئے۔ پر انہاں جعفر خان بلوچ مت دتی جے ”توپخانہ
تے رسالے دے ہوندیاں مقابلہ فضول اے ناحق اپنی جاناں اُتے ظلم نہ کرو۔
کچھ دے دوا کے خان بیگ نوں چھڑا لیاں صبر کرو۔“

جد ملک خان نوں منصوبے دی کامیابی دا پتہ لگاتے اوہ فوراً اپنے
پتراں احمد یار تے چراغ دے نال خوشاب اپڑ کے مہاراجہ دی خدمت وچ لکھ
روپیہ نقد دے کے اپنا بھرا لے لیا۔ ملک خان نے ملک خان بیگ دے
حمایتیاں نوں دسیا جے میں تاں بطور ہمدردی لکھ روپیہ دے کے اس نوں چھڑایا
اے۔ اگر تسیں اس نوں لے وینا چاہندے او تے میرا روپیہ مینوں دے دیو
تے آئندہ واسطے خان بیگ اطاعت دا وعدہ کرے تے تسی لے جاؤ مینوں کوئی
اعتراض نہیں۔

قصہ کوتاہ رنجیت سنگھ لکھ روپیہ لے کے پنڈ دادخان دی راہیں واپس
لاہور گئے۔ ملک خان نے ملک خان بیگ نوں نور پور وچ نظر بند کر دتا۔
ملک خان دا ارادہ ایہہ آہا جے کچھ مدت دے بعد ایہہ اطاعت قبول کر لسی تے
اوہ ایس نوں چھوڑ دیسی۔ پر اس دے حمایتیاں بغاوت کردتی تے خونریزی تک
نوبت آ گئی ملک خان بیگ دی حالت اس ویلے بقول شاعرانج آہی۔

امروز در دستے توام مرتحتے کن

فردا کہ شوم خاک چہ سودا شک ندامت

اس دا مطلب ایہہ تے جے آج تیرے قبضے وچ آں رحم کرکل مر کے

خاک ہو ویاں تے تیرا رونا کس کم داسی۔

خان بیگ دا قتل

جد ملک خان ویکھیا جے بغاوت نوں ختم کرنا ایسدے وس دا نہیں
تے اوہ وت مہاراجہ کول لاہور گیا۔ میدان خالی ویکھ کے نور محمد نوں ملک احمد یار
خان تے چراغ نوں ملک خان بیگ دے مارن لئی تیار کر لیا۔ آخر کار سوتے
دی نماز پڑھیاں ہویاں ایس نوں مار دتا تے مٹھ ٹوانہ لے آ کے دفن کر دتا۔

ملک خان دی اصلاحی کوشش

ملک خان جد واپس آیا تے اس نوں بھرا دے قتل دی اطلاع ملی تے
اس نوں کافی منگھ لگا اپنے پتراں تے نور محمد نوں نوں دھر پھٹ کیتی۔ جیہڑے
سردار باغی ہو گئے آہن انہاں دے خلاف کجھ کرن توں پہلاں اس ایہہ
ضروری سمجھیا جے اپنے یتیم بھتریاں تے انہاں دی ماں نوں راضی کر لے۔
انہاں نوں نور پور توں مٹھ ٹوانہ لے آیا تے اتھے اپنے پتراں ہار رکھن لگا تے
ایہہ ای گل ایس دوجے باغی سرداراں نوں دی مسیتال تے مندیال بدستور باغی
رہے۔ ملک نے انہاں نوں سدھا کرنے کان ہڈالی تے حملہ کر دتا تے مبارز
خان مندیال تے اس دے دو پتراں چراغ خان تے شاہنواز خان نوں قتل کر
دتا۔ مبارز خان دی بیوہ تے اپنے دو نکلے پتر لے کے سردار فتح خان رئیس
ساہیوال دے کول پناہ لئی۔ بندیالاں تے اتراواں دے لڑن واسطے اپنے پتر

احمدیار خان نوں گھلیا۔ تے اس حملہ کر کے کافی قتل و غارت توں بعد انہاں مغلوب کر لیا۔

بھتریاں نال سلوک

ملک خان نے اپنے بھتریاں دی جتنی وی خاطر کیتی پر انہاں دے دل وچوں اپنے والد دا قتل نہ بھلیا تے آپ وی ہر ویلے خطرہ محسوس کریندے رہے۔ ہر ویلے ایٹھونسن دے منصوبے بناندے رہے۔ ہک دیہاڑے موقع پا کے دوہیں بچے انہاں دی ماں تے دادی نس کے اپنے نانکے شہر ہمو کے اپڑ گئے تے ایٹھوں دریا پار کر کے ساہیوال اپنے والد دے بچن فتح خان رئیس ساہیوال کول اپڑ گئے۔ ملک خان نوں جد پتہ لگا تے افسوس کیتا پر ہُن تیر کمان وچوں نکل گیا آہا۔

سردار فتح خان دا مشورہ

جد ہڈالی دے مظلوم تے خان بیگ دا مظلوم ٹبر فتح خان کول آیا تے اس اپنے سچا نال ظلم دا وڈا اثر لیا تے خدایار جیہڑا خان بیگ دا پتر آہا اس نوں رنجیت سنگھ کول گھلن دا مشورہ دتا۔ خدایار دی حفاظت واسطے اس دے نال معتبر سردار تے لشکر دا ہک دستہ وی گھلیا۔ لاہور اپڑ کے خدایار نے مہاراجہ نوں ملک خان دے خلاف ظلم دیاں وڈیاں شکایتیاں کیتیاں نال ای خوشاب دے سکھ سرداراں وی مہاراجہ نوں قتل عام دی تفصیل لکھ گھلی۔ سکھ دربارتاں چاہندا

آہا جے کوئی موقع ہتھ آوے تے اس علاقے تے ہتھ صاف کر لئے چنانچہ ملک دے خلاف حملہ کرن دے مشورے ہون لگ پئے۔

ملک خان دی سیاست

ملک خان نوں جد انہاں گلاں دا پتہ لگاتے اس ہر قیمت تے سردار فتح خان تے خدا یار بھترے نال صلح کرن دا فیصلہ کر لیا۔ اس کم واسطے خدا یار دے نانا شیر خان حسناں نوں بلا کے سارے حالات اس دے اگے رکھے تے دسیا پہلے ای ٹوانہ قوم دا کافی نقصان ہو گیا اے۔ خدا یار دی مخالفت دی وجہ نال رہی کھنہی کسروی نکل ویسی۔ اس واسطے ضروری اے خدا یار نوں راضی کر یئے۔ اس ایہہ وی دسیا جے اس نوں تسلی دینے کان اوہ اپنی دھی وی خدا یار نوں دیونے نوں تیار اے۔ ایہہ گلاں کر کے تے ملک خان شیر خان نوں آکھیا جے اوہ ساہیوال ونج کے خدا یار نوں اس دے کول لے آوے۔

خدا یار دی صلح

شیر خان حسناں نے جد ملک خان نوں مخلص پایا تے اوہ ساہیوال گیا تے ایتھے اپنی پھنھی تے دھی نوں ساری گل دی تے آون آ لے خطرے توں وی اگاہ کیتا۔ فتح خان نے وی ایہہ صلاح دتی کہ جائزہ لینے کان خان بیگ دی ماں تے شیر خان دی پھنھی مٹھ ٹوانہ ونجے جد اوہ مشورے دے مطابق مٹھ ٹوانہ گئی تے ملک خان اس دے پیراں تے ڈھہ پیا تے زارو قطار رورو

کے اس نوں منایا۔

والدہ خان بیگ داسنیہا

ملک خان دی حالت دیکھ کے تے حالات توں مجبور ہو کے اس اتنا
آکھیا۔

”توں ای اپنے بھرا دا قاتل ایں۔ اس بھرا نوں توں شہید کرایا جس
دے سرتے توں سردار بنیا ہویا آہا۔ اوہ تیرے واسطے تیرے دشمن نال لڑدا
آہا تے انہاں دی بربادی دا حیلہ کریندا آہا۔ ہُن توں اس توں کچھ مصیبتاں
بھگت رہیا ایں۔ اس دے موت تے ساڈے نالوں بہوں تیرا اپنا نقصان
ہویا۔ توں چنگا کیتا جے اپنے پیراں تے آپے کہاڑی ماری۔ خیر اسیں تیری
ریاست تے حکومت دی خیر خواہی دی خاطر معاف کریندے آں۔ اگر توں
ڈھڈھو خدایار تے عالم شیر نال محبت رکھدا ایں تے توں انہاں نوں اپنی فرزند
وچ لے لے۔ اوہ اس ویلے تک تیرے نیڑے نہ لگسن جد تک انہاں نوں مکمل
تسلی نہ ہو ونجے۔ انہاں دی تسلی واسطے ایہہ ضروری اے جے اپنی دھی دا ڈولا
پرنا کے اوتھے ساہیوال گھلدے انج انہاں دی تسلی ہو ویسی۔“ ملک خان نے
گل دی حامی بھر لئی۔

حافظ احمد خان دا حملہ

نور پور نوں خالی سمجھ کے حافظ احمد خان رئیس منیکرہ نے حملہ کر دتا۔

ملک خان نوں پتہ لگاتے اُس اپنے پُتراں احمد یار خان تے خدایار خان نوں
لشکر دے کے مقابلے واسطے گھلیا۔ منیکیرے آلیاں نوں ہار ہوئی تے سامان
چھوڑ کے نس گئے۔ خدایار نوں تے چراغ دے پُتر غلام حسین نوں نور پور دی
ذمہ داری سوپئی۔

رنجیت سنگھ دا حکم

ہک پاسے تے خدایار دی دادی اس دے رشتے دی گل بات کرن
مٹھ ٹوانے گئی ہوئی تے ملک خان راضی وی ہو گیا آہا دوجے پاسے خود خدایار
ملک خان دے خلاف رنجیت سنگھ کولوں مدد لین واسطے گیا ہو یا ہا۔ رنجیت سنگھ
نے حاکم خوشاب سکھ سردار نوں لکھیا کہ مٹھ ٹوانہ اُتے حملہ کر کے مٹھ ٹوانہ ملک
خان توں لے کے خدایار نوں دتا جائے۔

ملک خان نوں جد پتہ لگاتے اوہ وی لاہور اپڑیا تے مہاراجہ توں
معافی منگی تے خدایار نال چنگا سلوک کرن دا یقین دوا یا۔ اہل دربار نوں وی
دے دوا کے راضی کیتا تے مٹھ ٹوانہ واپس آ گیا۔ خدایار وی نویں صورت
حال دا جائزہ لین ساہیوال آ گیا۔

اوپری جج

ملک خان نے شیر خان تے نظیرا خان جیہڑے خدایار دے نانائے ماما
آہن تارنخ مقرر کرن واسطے ساہیوال گھلیا۔ ساہیوال ونج کے تارنخ مقرر

ہوئی۔ تے مقررہ تاریخ تے احمد یار خان بمعہ لشکر تے ہمشیرہ دا ڈولا شیخوال دے پتن تے شیر خان تے نظیرا خان دے سپرد کر کے واپس مٹھ ٹوانہ اس وقت تک نہ گیا جد تاں بیڑیاں و وہٹی سمیت دو بے کنارے شیخوال نہ اپڑ گئیاں۔ دو بے کنارے تے خدایار بیڑی دے انتظار وچ مع لشکر دے موجود آہا۔ جد بیڑی کنارے لگی تاں نفارے وگنے شروع ہو گئے توپاں دی سلامی ہوئی تے انج ایہہ اوپری جج ساہیوال اپڑ گئی۔

خدایار تے اس گل دا وڈا اثر ہو یا سردار فتح خان نے ملک خان نوں ہک محبت بھریا خط وی لکھیا۔ ملک خان دی انج سارے سرداراں نال صلح ہو گئی۔ ملک خان دی ایہہ لوہندیاں دی دھی آہی۔ ایہہ پنجاب بھراواں دی بھین آہی۔ ملک خان نوں وی مشورے دیندی آہی۔ کجھ چر پچھے خدایار دی مٹھ ٹوانہ آ گیا کیوں جے سکھاں نے ساہیوال حاصل کرن کان تدبیراں شروع کر دتیاں آہن۔ خدایار اپنی بھین دا نکاح فتح خان نال کر دتا تے اس دا بھرا عالم شیر ساہیوال ای رہیا۔

شاہ شجاع والے کامل دی مٹھ ٹوانہ آمد

1809ء وچ شاہ شجاع مٹھ ٹوانہ آیا۔ کیوں جے اس دے بھرا محمود نے تحت اُتے قبضہ کر کے اس نوں بھجا دتا۔ شجاع دی ملک خان نے وڈی داری کیتی اتھے ایہہ پندرہاں دیہاڑے رکھ کے وڈی عزت نال اس نوں لاہور اپڑایا۔

رنجیت سنگھ دا شجاع نال سلوک

رنجیت سنگھ تے پہلاں تاں شجاع دی وڈی داری کیتی پر ہولی ہولی ہتھ چھک لیا تے اس تے الزامات لا کے اسد سارا مال اسباب لٹ لیا۔ ہک ایہہ وی روایت اے جے شجاع دی پگڑی وچ کوہ نور ہیرا آہا رنجیت سنگھ نے اس نوں لین واسطے پگڑیاں وٹا کے بھائی بناؤن دا ڈرامہ کھیڈیا۔ آخر تک آ کے شجاع نس کے انگریزاں کول لدھیا نے ٹر گیا۔ حالانکہ رنجیت سنگھ دی حکومت پٹھاناں دی ای دتی ہوئی آہی۔ ایہہ ای سوچ کے شجاع اس کول آیا پر رنجیت سنگھ نے طوطا چنشی توں کم لے کے سبھ کچھ لٹ لیا۔ شاہپور دے نیڑے چک شہزادیاں آلا شاہ شجاع دی اولاد نوں انگریزاں دتا تے اوہ ہُن تائیں اتھے رہندے پئے اہن۔ فارسی بولدے ہن۔

رنجیت سنگھ دا نور پور تے حملہ

رنجیت سنگھ بھیرہ خوشاب اُتے قبضہ کرن توں بعد تھل تے وی قبضہ کرن دی منصوبہ بندی کر بیٹھا آہا تے صرف موقع دے انتظار وچ شجاع دے مٹھ ٹوانہ ٹھہرن نال اس نوں موقع مل گیا۔ اس ملک خان دا پیغام گھلیا کہ جیہڑے مٹکی گھوڑا تے تلوار شجاع دے گیا اے اوہ مینوں دے چا۔ ملک خان نے جد ایہہ دوہیں شیاں گھل دتیاں تے اس آکھیا کہ اصلی نہیں بلکہ نقلی نیں۔ اس گل دا بہانہ بنا کے اس نے 1807ء وچ مصر دیوان چند نوں فوج دے کے نور پور تے حملہ کرن دا حکم دتا پر ٹوانیاں سکھ فوج دا مونہہ بھنوا دتا۔ رنجیت نے

ایہہ گل سُن کے اپنے بہترین جرنیل ہری سنگھ نلوہ نوں ٹوانیاں اُتے حملہ کرن واسطے گھلیا۔

ہری سنگھ نلوہ دا حملہ

رنجیت سنگھ نے ٹوانیاں دے علاقے نوں مکمل فتح کر کے انہاں دی طاقت ختم کرنے واسطے ہری سنگھ نوں ہک زبردست فوج دے کے گھلیا۔ ہری سنگھ نے پہلاں ہڈالی فتح کر لیا تے استوں بعد مٹھہ ٹوانہ تے حملہ کیتا۔ توپاں دی سخت گولہ باری نال کچے قلعے دے پرچھے اڈ گئے۔ وڈے ٹوانا سردار مارے گئے تے باقی جنڈانوالہ آلے پاسے نس گئے۔ جتھے حافظ احمد خان نے دشمن ہون دے باوجود خاطر مدارت کیتی۔ سکھ لشکر نے انہاں دوہاں شہراں نوں جی بھر کے لٹیا۔ لوک نس گئے زراعت ختم ہو گئی۔ تے سکھاں نوں ہوش آئی۔ انہاں لوکاں نوں واپس آون دا آکھیا پر انہاں آکھیا جے سن سکھاں تے اعتبار نہیں ٹوانے آسن تے اسی آوساں۔ اخیر سکھاں نے ٹوانیاں نوں واپس بلایا پر انہاں نوں مٹھہ ٹوانے دی حکومت نہ دتی۔

نویں ٹوانہ ریاست جھاوریاں

ٹوانیاں واپس آ کے سکھ فوج نوں مار بھجایا۔ سکھ فوج وٹ آئی تے ٹوانے بھج گئے پر رنجیت سنگھ سمجھ گیا جد تائیں ٹوانیاں نوں کچھ دے کے نہ منایا۔ ایہہ پُچ کر کے بہن آلے نیں۔ ایہہ سوچ کے اس 1864ء وچ دہ ہزار دی

نویں جاگیر جھادریاں ملک خان دے سپرد کیتی۔ اس وچ چاچڑ سید رحمن حلقہ
بھیرہ دا علاقہ شامل آہا۔ اس نال سو اٹھاں دا بھار جتنا لون وی ملک خان نوں
دینا منظور کیتا۔ آخر 1865ء وچ چاچڑیں وفات پائی تے مٹھ ٹوانہ دفن ہويا۔

ملک احمد یار خان

ملک خان دی وفات تے ملک احمد یار وارث بنیا۔ پرہن اوہ اپنی
مٹھ ٹوانہ آلی جاگیر ناہی بلکہ جھادریاں آلی جاگیر آہی۔ کیونکہ انہاں دی جاگیر
نلوے نوں مل گئی آہی۔ احمد یار دا بھرا خدا یار تے اس دا بھتر یا قادر بخش لاہور
در بار نال وابستہ ہو گئے آہن۔ خدا یار رنجیت سنگھ دے خصوصی اصطلہ دا نگران
آہا۔ ہزار روپیہ سالانہ تنخواہ بنی۔

ملک قادر بخش پنجاہ سواراں دا افسر بنیا۔ ملتان دے حملے وچ انہاں
ناموری حاصل کیتی۔ دھیان سنگھ وزیر اعظم رنجیت سنگھ تے گلاب سنگھ حاکم کشمیر
نال وی دوستی بنا لئی۔ اُمید آہی جے پرانی ریاست مل ویسی پر احمد یار بونگا
بلوچاں نزد ساہیوال فوت ہو گیا۔ مٹھ ٹوانہ دفن ہويا تے جاگیر دا معاملہ وت
کھٹائی وچ پے گیا۔

ہری سنگھ نلوے مٹھ ٹوانہ وچ جونت سنگھ متوکل نوں اپنا کاردار بنا کے
رکھیا تے نور پور وچ اسے جونت سنگھ دے ماتحت فوج رکھی گئی۔ تے مٹھ ٹوانہ
وچ مضبوط قلعہ بنوایا۔ ہری سنگھ نلوہ ایہہ نویں انتظام کر کے مہاراجہ نوں تھل
دے حالات دسے تے مہاراجہ مطمئن ہو گیا۔

نواب منکیرہ دی گڑ بڑ

جدہری سنگھ نلوے سارے ٹوانے علاقے اُتے قبضہ کر لیا تے ٹوانے
نس کے جنڈاں آ لے ٹر گئے پہلاں تاں نواب منکیرہ آؤ بھگت کیتی پر پچھے
لوکاں دے بھڑکاؤن اُتے حملہ کر کے ٹوانیاں نوں میانوالی آ لے پاسے نسا دتا
کچھ دریا دے ٹاپو وچ لک کے رہن لگ پئے۔ ٹوانے اپنے آپ نوں ٹوانہ وی
نہیں دسدے سن۔ آخر خدا یار خان دی محنت نال۔ واپس آون دی اجازت ملی
مٹھ ٹوانہ دی بجائے جھاو ریاں ای جاگیر ملی۔

حیات خان لونی دا حملہ

1818 وچ حیات لونی عیسیٰ خیل تے میانوالی دے لوکاں دا لشکر تیار
کر کے بظاہر رنجیت سنگھ دے خلاف جہاد دا اعلان کیتا تے جد مٹھ ٹوانے کول
آئے تے اس نوں لٹن واسطے حملہ کر دتا خدا یار خان ڈٹ کے مقابلہ کیتا سردار
جونت سنگھ نے وی سو سواراں نال مدد کیتی 10 ہزار دا لشکر شکست کھا گیا تے
حیات خان دی کوئی اُگھ مہر نہ رہی۔ سردار جونت سنگھ نے ٹوانیاں دی بہادری
دی رپورٹ دربار رنجیت سنگھ گھلی۔ خدا یار نوں مہاراجہ نے خلعت عطا کیتی۔
واپس آ کے سکھیرے آلاکھوہ کھٹوایا

ریاست منکیرہ دا خاتمہ

رنجیت سنگھ نوں ٹوانیاں تے افغاناں دی دشمنی دا پتہ آہا۔ کیوں جے

انہاں نوں پناہ دے کے وساہ کے ماریا تے اوہ جنگلاں تے بیلیاں وچ
 رُلدے رہے۔ 1821ء وچ مہاراجہ بذات خود ٹوانیاں نوں نال ملا کے حملہ
 آور ہویا تے منکیرہ دا آخر کدوں تائیں بچن دی کوئی صورت نظر نہ آئی تے ہار
 من لئی مہاراجہ نے جان دی امان دے کے ڈیرہ اسماعیل وچ کچھ زمین دے
 کے منکیرہ توں کڈھ دتا۔ جیویں ٹوانیاں نوں مٹھ ٹوانہ وچوں کڈھ کے دریاؤں
 پار جھاو ریاں گھل دتا۔ منکیرہ دا علاقہ فتح سنگھ مان دے سپرد کیتا۔ مہاراجہ ٹوانیاں
 دی دلیری تے مدد نال وڈا خوش ہویا تے ہک ٹوانہ رسالہ ترتیب دینے دا حکم دتا
 جیہڑا بنایا گیا تے اس اُتے فتح خان موتیاں آلا افسر مقرر ہویا۔ خدا یار جلدی مر
 گیا تے مٹھ ٹوانہ دفن ہویا۔

ساہیوال تے سکھاں دا حملہ


رنجیت سنگھ نوں کوئی وی مسلمان ریاست ناہی بھاندی اس واسطے اس
 رئیس ساہیوال فتح خان دا علاقہ کھسن واسطے فروکے دے سکھاں نوں اگے کیتا
 تے زمین دا جھگڑا بنا لیا۔ حالانکہ سکھ مہاراجہ دی شہمہ اُتے آپ ای ساہیوال
 دے علاقے اُتے زیادتیاں کریندے آہن۔ آخر نوبت لڑائی تک آئی تے
 دوہاں پاسے کافی جانی نقصان ہویا۔ جد اس لڑائی دی خبر رنجیت سنگھ نوں اپڑی
 تے اس سکھاں دی مدد دے بہانے ساہیوال تے حملہ کر کے ساہیوال تے قبضہ
 کر لیا تے سردار فتح خان نس کے بہاولپور چلا گیا تے نال عالم شیر جیہڑا خدا یار
 دا نکا بھرا آہا اس نوں وی لے گیا پر اوہ اُتھے ای فوت ہو گیا۔

کافی چر بعد لنگر خان جیہڑا فتح خان دا پُتر آیا ریاست دی کوشش کیتی
تے اپنے بلوچ قبیلے نال واپس ساہیوال آ گیا رنجیت سنگھ نے ساہیوال تاں نہ
دتا۔ کجھ دل رکھن کان گزارے واسطے کدائیں ہوئے دی دتی۔ بعد وچ ایسے
لنگر خان نے احمد یار خان دے پُتر صاحب خان نال مل کے انگریزاں پاروں
سکھاں دے کتے چائے تے اپنا ویر ڈٹ کے لیا۔ چنیوٹ تے جھنگ دیاں
لڑائیاں مشہور نئیں۔

☆☆☆



انگریز دا ویلا تے ٹوانے



انگریز دا ویلا تے ٹوانے

ملک فتح خان موتیاں آلا

سکھاں نے ٹوانیاں دی اوہ سرداری ختم کر دتی جیہڑی ایہناں نوں
 راجپوتانے توں نکل کے پنجاب وچ اپڑ دیاں ای لہجہ گئی آہی۔ ٹوانے اس دی
 حفاظت کان ہمیشہ سرگرم رہے۔ ایہناں دی ہمت تے سرداری وچ کوئی فرق نہ
 آیا۔ لیکن ایس دے باوجود سکھاں دے زمانے وچ ایہناں دی عظمت ختم ہو گئی
 تے اوہ کوڈی کوڈی دے محتاج ہو گئے تے گھروں بے گھر ہو گئے۔ ایہناں
 حالاں وچ ایہناں دے وچوں ہک بندہ اٹھیا تے اگے ودھیا اس اپنے خاندان
 نوں رنگ لا چھوڑے تے اگے نالوں ودھ کے اس خاندان نوں شہرت ملی۔
 ایہہ جنا ملک فتح خان خدا یار دا پتر تے ملک خان دا پوتا آہا۔ اس دے ون
 پونے کمالات دیاں شہادتیاں وقت دے سکھ حاکماں تے ایہناں توں کچھ انگریز
 حاکماں دیاں تحریراں آہن۔ ایہہ وی آکھیا جاسکدا اے جے اس شخص نوں
 سازگار ماحول مل ویندا تے اوہ ہک مستقل ریاست دی بنیاد رکھ دیندا۔ اس دی

پوری حیاتی سکھ دربار وچ گزری جیہڑی قسم قسم دیاں سازشاں دا گڑھ آہا ملک
تے اس ماحول وچ وی اپنی ہستی بحال رکھی۔ اس ملک فتح خان دی بدولت
ٹوانیاں دا ستارہ نویں سرے توں بلندی اُتے اڑیا تے انگریزی دور وچ اس
چمک وچ ہور وادھا ہویا۔ اس زمانے وچ پورے خاندان نے وڈے وڈے
کارنامے انجام دتے۔ پر انہاں ساریاں دامن ملک فتح خان آہا باقی سارے
ایسے دے سورے وچ کھاندے آہن۔

والد دی وفات

1837ء وچ ملک خدا یارا دھی کوٹ فوت ہو گیا۔ ملک فتح دی
خاندانی جاگیر تے اس ویلے ہری سنگھ دا قبضہ آہا اس واسطے ملک فتح خان ہری
سنگھ نلوہ نال تعلق بنایا۔ ادھی کوٹ دا جیہڑا علاقہ ایہناں نوں ملیا اوہ ہری سنگھ دا
دتا ہویا آہا۔ لاہور دربار نال اس دا کوئی واسطہ نہ۔ اپنی جاگیر دا پٹا اس
1838ء وچ ہری سنگھ توں لے لیا کیوں جے ہری سنگھ اس دی خدمات تے
انتظام توں خوش آہا۔

مٹھ ٹوانہ جاگیر دی بحالی

1838ء وچ ہری سنگھ نے جیہڑا رنجیت سنگھ دا ہک منیا ہویا جرنیل
آہ۔ وائی افغانستان شاہ شجاع نوں پشاور دا قبضہ چھوڑنے واسطے لکھیا۔ نالے
ایہہ وی لکھیا نہیں تے مہاراجہ کابل تے چڑھائی کردیسی۔ شاہ شجاع نوں

رنجیت سنگھ دی احسان فراموشی تے اوہ سلوک یاد آہا جیہڑا اس شاہ نال بطور
 پناہ گزیر دے کیتا تے اس نوں نس کے انگریزاں کول لدھیانہ وینا پیا۔ شاہ
 شجاع نے جواب اچ ہک رباعی فارسی زبان وچ لکھ کے گھلی۔ جس دا
 مطلب ایہہ اے مغرور سکھ تیرا دماغ خراب ہو گیا تے جے میں ہُن ایہہ
 تیری سر پھری کھوپڑی جس دے وچ دماغ اے نہ بھناں تے میں پائندہ
 خان دا پُتر ای نہیں۔

اِلا اے ہری سنگھ امرت سری
 ذخیرہ سری در خیال سری
 اگر سر بسر نشکستم استخوان
 مرا پُور پائندہ خانم خواں
 شاہ شجاع دے پُتر ہری سنگھ اُتے حملہ کر کے اس کھوپڑی بھن کے
 اپنے پیو دی گل سچ کر دکھائی۔ اس توں کچھ رنجیت سنگھ نے ملک فتح خان نوں
 اس فوج دا سالار بنا کے ہری سنگھ دی شکست دا بدلہ لیا۔ جاگیر چونکہ فوجی
 خدمات واسطے ملدی آہی اس واسطے فتح خان نوں واپس مل گئی۔
 جد ہری سنگھ ماریا گیا تے رنجیت سنگھ نے اوہ جاگیر مٹھ لوانہ جیہڑی
 ہری سنگھ دے کول آہی تے فتح خان دی اوہ پیو دادے دی جاگیر مل گئی۔ دربار
 وچ قادر بخش اس دا پُتر شیر محمد تے ملک فتح خان دا پُتر فتح شیر موجود رہے۔ باقی
 رشتہ داراں نوں مختلف علاقیاں وچ سردار بنا کے گھل دتا۔ وڈ چھے آلی لون دی
 کان وی مل گئی۔

نونهال سنگھ دا مٹھ ٹوانے دا دورہ

نونهال سنگھ بنوں چوں مالیہ وصول کرن ویندیاں ہوياں مٹھ ٹوانے آیا۔ ملک فتح خان نے حسب توفیق خاطر کیتی تے نذرانہ وی پیش کیتا پر فتح سنگھ مان دی شرارت پاروں نونهال سنگھ تے ڈھائی ہزار دا ہور مطالبہ کیتا ملک بہتر اکال داتے پیداوار دے گھٹ ہوون دا آکھیا پر اوہ لے کے ای ٹلیا۔ ملک فتح خان نے نونهال سنگھ دے اسے روپے دی رپورٹ رنجیت سنگھ نوں گھلی تے رنجیت واڈا ناراض ہويا نونهال دی ماں نوں کھریاں سنا کے ڈھائی ہزار وصول کر کے آکھیا جیہڑا میرے سرداراں دی بے عزتی کر لسی اس دے نال استوں ودھ کے ہوتی۔

ملک فتح خان گورنر ٹانک

ٹانک دے دو بھرا سردار آہن اللہ داد تے صاحب داد۔ نونهال سنگھ نے حملہ کر کے ریاست ٹانک اُتے قبضہ کر لیا اللہ داد نے ٹانک تے متواترست حملے کیتے تے بہترے سکھ قتل ہوئے اُتے ایہہ سارا علاقہ بدظمی دا شکار ہو گیا۔ رنجیت سنگھ نے فتح خان نوں گورنر بنا کے ٹانک گھل دتا۔ تاکہ حالات اُتے قابو پایا جاسکے۔ ملک نے ونج کے حالات سدھار دتے۔

رنجیت سنگھ دی موت

رنجیت سنگھ نوں 1834 وچ فالج دا حملہ ہويا تے آخر اوہ 1838ء

وچ مرگیا۔

انقلاب

رنجیت سنگھ دے مرن توں پچھے حکومت صرف ناں دی رہ گئی۔ روز نویاں سازشاں تے فساد ہوون لگ پئے۔ اجیت سنگھ سندھاں آلے خاندان دا وزیر اعظم دا سخت مخالف آہا اس نے شیر سنگھ تے دھیان سنگھ وچکار غلط فہمیاں پیدا کر کے ہک دوجے دا دشمن بنا دتا۔ صرف ایہہ نہیں بلکہ شیر سنگھ تے اس دے پُتر پرتاب سنگھ نوں شاہ بلاول وچ قتل کر کے دھیان سنگھ نوں ویکھیا جو اوہ قلعے وچ وڑ رہیا اے۔ اُتے اس دے نال فتح خان وی اے۔ فتح خان نوں باہر روک کے دھیان سنگھ نوں اندر بلا کے قتل کر دتا۔ بعد وچ اجیت سنگھ نے بچن واسطے سارا بھار ملک فتح خان تے سٹ دتا۔ دھیان سنگھ دا پُتر ہیرا سنگھ وی اس سازش دا شکار ہو گیا تے ملک نوں مجرم سمجھ کے اس دے وارنٹ گرفتاری جاری کر دتے۔ ملک لاہور وچوں نس کے لُکدا چھپدا مٹھہ ٹوانے اپڑیا پر ایہتھے وی خبر اپڑ گئی آہی تے نس کے دریاؤں پار وزیرستان سوان خان وزیری کول پناہ لئی۔ سکھاں سوان خان نوں ملک واپس کرن دا لالچ وی دتا پر اس ملک دی پوری حفاظت کیتی۔

مٹھہ ٹوانہ تے حملے

ہیرا سنگھ نے ملک فتح خان نوں گرفتار کرن واسطے لشکر گھلایا۔ ملک فتح

خان نے وی اپنے سنگی ساتھی بلا کے لشکر تیار کر لیا۔ سکھاں دے اس علاقے وچ جتنے جتھے آہے انہاں نوں بھجا دتا گیا۔ ملک فتح خان نے آخر مٹھ ٹوانہ تے وی حملہ کیتا تے ایہتھوں داسکھ حاکم جس داناں وی حاکم رائے آہانس گیا۔ لنگر خان دے پتر مبارک خان نوں دستہ دے کے قلعے وچ چھوڑ گیا۔

ہری سنگھ ناظم خوشاب پنوں سنگھ ناظم پنڈ دادن خان تے لنگر خان رئیس ساہیوال نے مل کے ہڈالی اُتے حملہ کر دتا۔ ایہناں کول توپاں وی آہن پر ملک فتح خان نے ایہناں نوں شکست دے کے دھولو (موجودہ جوہر آباد) تک پیچھا کر کے نسا دتا۔

جد ایہہ پے درپے ہاراں دے خبر ہیرا سنگھ نوں اپڑی تے اس ہک ہور لشکر منگل سنگھ سراں والیہ تے مول راج ناظم ملتان دے ماتحت مٹھ ٹوانہ تے حملہ کرن واسطے گھلیا۔ ایہہ لشکر خوشاب تے گروٹ دے وچکار موضع جوسیہ وچ دریا دے کنارے خیمہ زن ہويا۔ ملک فتح خان نوں پیغام گھلیا جے اطاعت قبول کر لے تے جاگیر نہ لئی ویسی۔ ملک جان دا آہا جے ایہہ ساریاں گلاں محض دھوکھانیں ہتھیار رکھن دی صورت وچ۔ ہیرا سنگھ نے پنڈت جلاتوں خیر دی کوئی اُمید نہیں۔ لہذا ملک نے لڑن دا فیصلہ کر کے مٹھ ٹوانہ دے چاروں پاسے مورچے بنا کے فوجاں بہا چھوڑیاں۔

سکھ فوج نے جد حملہ کیتا تے قلعے وچ مقیم سکھ فوج نے دی گولہ باری شروع کر دتی جس دی وجہ نال ملک فتح خان چپ کر کے راہداری ہرنولی میانوالی دے راہ سندھ پار کر گیا۔

خاتون دی بہادری

عالم خاتون کلیرے خاندان دی ہک عورت ہائی جس دے بھائی نوں سکھاں زخمی کر دتا آہا۔ سخت غصے وچ آ کے سکھاں نوں تلوار نال مارنا شروع کر دتا۔ پنج سکھ اس مارے تے آکھیا بندوق نہ مارنا جے ہمت اے تے تلوار نال مقابلہ کر لئو۔ پر اس بہادر خاتون نوں گولی مار دتی گئی۔ اس توں بعد ملک فتح خان دے گھراں نوں لٹ کے اگ لا دتی گئی۔

ڈیرہ اسماعیل خان دی گورنری

ہیرا سنگھ تے پنڈت جلا جیہڑے ملک دے دشمن آہن اپنی اس فوج دے ہتھوں مارے گئے۔ اس توں بعد رانی جنڈاں دا بھرا جواہر سنگھ وزیر اعظم بنیا اوہ ملک فتح خان دا یار آہا۔ ملک فوراً لاہور آیا جواہر سنگھ وی ہیرا سنگھ دا مخالف آہا اس واسطے اس ملک دی حوصلہ افزائی کیتی تھے تحائف دے کے ایہناں علاقیاں دا حاکم بنا دتا۔

مٹھ ٹوانا، روالپنڈی تے جہلم دے کجھ حصے۔ ڈیرہ اسماعیل خان تے بنوں۔ اس علاقے دی سالانہ آمدن سو لکھ روپیہ آہی۔ ایہہ بہوں وڈا اعزاز آہا جیہڑا ملک نوں ملیا تے اس دا مطلب ایہہ وی ہویا جے ملک فتح خان جواہر سنگھ دی حکومت دا ہن چوتھا پاوا آہا۔

ملک نوں ہاتھی وی دتا گیا جس اُتے نقرئی ہو دا آہا تے دریا سندھ دے پار میانوالی خوشاب نور پور سہتی عیسیٰ خیل کی مروت دا علاقہ وی دتا گیا۔

مطلب ایہہ ہویا جے پنڈی توں لے کے ڈیرہ اسماعیل خان تک دا پورا علاقہ
ملک نوں سوئپ دتا گیا۔ اس علاقے دیاں سرداراں نوں حکم دتا گیا کہ اوہ ملک
فتح خان دے حکم اُتے عمل کرن ملک فتح خان نے آپ تے ڈیرہ اسماعیل خان
وچ ڈیرے لائے تے باقی علاقیاں وچ اپنے ناظم مقرر کر کے گھل دتے۔

(1) ملک قادر بخش، خوشاب کٹھا، ڈھاک، نور پور، احمد آباد، مانگوال

(2) ملک صاحب خان ٹوانہ، لکی

(3) ملک بخش خان ٹوانہ عیسیٰ خیل

(4) ملک غلام محمد خان ٹوانہ، خوشاب شاہپور

(5) ملک شیر محمد خان ٹوانہ، میانوالی

پشورا سنگھ دا قتل

کھڑک سنگھ، شیر سنگھ، دلیپ سنگھ، توں وکھرے رنجیت سنگھ دے دوہور
وی پُتر اہن۔ کشمیر سنگھ تے پشورا سنگھ۔ کشمیر سنگھ مرگیا تے پشورا سنگھ سیالکوٹ
دی جاگیر وچ بہہ گیا۔ جد مکی حالات بہوں خراب ہو گئے تے اس وی ہتھ پیر
مارن دا سوچیا پشورا سنگھ نے اٹک دے قلعے اُتے قبضہ کر لیا۔ اس خطرے نوں
دیکھدیاں ہوياں۔ جواہر سنگھ نے فتح خان تے چتر سنگھ اٹاری آ لے نوں پشورا
سنگھ دے ختم کرن دا کم سوچیا۔ کیوں جے ایہہ دوویں اس دے وڈے اعتبار
آ لے آہن۔ چتر سنگھ دی دھی دلیپ سنگھ نال منگی ہوئی آہی۔ آخر کار انہاں
دوہاں اٹک اُتے حملہ کر دتا تے پشورا سنگھ جان دی امان دی شرط تے قلعہ حوالے

کرنے اُتے راضی ہو گیا۔ اس نوں جد لے کے حسن ابدال اپڑے تے جواہر سنگھ دا حکم آیا کہ واپس ونج کے اس نوں قتل کر دیو۔ ایہہ واپس اٹک آئے تے رات نوں پشور سنگھ دا گاٹا گھٹ کے ماردتا تے اس دی لاش دریا سندھ وچ وگا دتی گئی۔ اس گل دا جد سکھاں نوں پتہ لگا تے اوہ جواہر سنگھ تے فتح خان دے خلاف ہو گئے۔ چیترا سنگھ نے نس کے جلا وطنی وچ وفات پائی۔ جواہر سنگھ ماریا گیا تے ملک فتح خان نوں معزول کر کے دولت رائے نوں ڈیرہ دا گورنر بنا دتا گیا۔

فتح خان دا سکھاں نوں چھوڑ کے انگریزاں نال تعلق

جد ملک نوں سکھاں معزول کر دتا تے ملک اندازہ لایا کہ سکھاں دی حکومت جھٹ پل دی مہمان اے اس واسطے اس انگریزاں دی طرف رجوع کیتا۔ اس وچ تعجب دی کوئی گل نہیں دھیان سنگھ اس دا بیلی قتل ہو گیا ہو یا آہا اس واسطے ملک فتح خان سوچیا جے نوکری ای کرنی اے تے کسے جنگی تھائیں کرنی چاہیدی اے۔

جواہر سنگھ ستمبر 1845ء وچ ماریا گیا۔ نومبر وچ انگریزاں تے سکھاں دی جنگ ہوئی تے فروری 1846ء وچ ختم ہوئی 8 مارچ نوں سکھاں صلح نامہ اُتے دستخط کیتے۔ 20 فروری تائیں انگریز لاہور اُتے قبضہ کر چکے سن۔ انگریزاں تے سکھاں دی پہلی جنگ ہو چکی آہی۔ ترے داری شکست کھادی۔

صلح دیاں شرطیں

سکھ ڈیڑھ کروڑ تاوان دیسن چونکہ سکھاں کول روپیہ دینے واسطے کوئی

نہ۔ اس واسطے انگریزاں بیاس تے دریائے سندھ دے پورے پہاڑی علاقے اُتے قبضہ کر لیا جس وچ کشمیر تے ہزارہ دا سارا علاقہ وی آہا۔ اس طرح کشمیر دی ریاست دی بنیاد وی بنی جیہڑا انگریزاں ہک کروڑ دے بدلے گلاب سنگھ دے ہتھ وچ دتا۔ رانی جنڈن نائب بنی تے لال سنگھ وزیر اعظم بنیا رہیا۔ اٹھ بندیاں دی ہک کونسل بنا دتی گئی۔ جیہڑی پورے نظام دی ذمہ دار آہی۔ سر ہنری لارنس نوں ریڈیڈنٹ بنا کے لاہور رکھیا گیا اس دے نال دو ہزار فوجی وی رکھنے منظور ہوئے تے انہاں دا خرچ 20 لکھ سالانہ مقرر ہويا۔ اس طرح ہی سکھاں دی حکومت صرف ناں دی حکومت رہ گئی آہی۔ اصل وچ انگریز حکومت اُتے چھا گئے آہن۔

مسئلہ کشمیر تے فتح خان ٹوانہ

انگریزاں کشمیر دا سودا گلاب سنگھ دے ہتھ کرتاں دتا پر اوہوں دا گورنر نواب امام الدین چارج دینے توں انکاری ہو کے مقابلے واسطے تیار ہو گیا۔ انگریزاں اس نوں فوج گھل کے ڈراون دی کوشش وی کیتی پر کوئی اثر نہ ہويا تے پہاڑی علاقے وچ اس زمانے وچ لڑنا کوئی خالہ جی دا گھر نہ۔

انگریزاں اپنی سیاست لڑائی تے فتح خان ٹوانے نوں اگانہہ کیتا۔ کیوں جے اوہ انہاں کماں دا ماہر آہا تے امام الدین نال وی ول گل بات آہی۔ گلاں گلاں وچ امام دین نے دسیا جے اس نے ایہہ انکار لال سنگھ وزیر دی خفیہ ہدایت دی وجہ نال کیتا اے۔ اس ساری خط و کتابت ملک فتح خان

دے حوالے کردتی۔ وزیر اعظم دی اس غداری دا بھید کھل وین اُتے سکھ دربار
ملک فتح خان دے خلاف ہو گیا۔

ملک فتح خان نوں قید سخت

سکھ دربار نے سازش کر کے فتح خان دے دے چار لکھ روپے دی
بقایا رقم کڈھ ماری تے ہنری لارنس دی منظوری نال ملک نوں قید کر کے
بیڑیاں لا دتیاں گیاں تے گوبند گڑھ وچ رکھیا گیا۔ اتھے ملک سال توں اُتے
قید رہیا۔ جد ملتان اُتے انگریزاں حملہ کیتا تے ملک دی ضرورت محسوس ہوئی
تاں اس دی رہائی دی صورت پیدا ہوئی۔ ایہہ موسم بہار 1948ء وچ رہا
ہویا۔ تے ایہہ رہائی ہربرٹ ایڈورڈز دی ریڈیو اینٹ لاہور نوں سفارش تے
ہوئی۔

رہائی تے بنوں دی گورنری

جد انگریز نوں ملک دی لوڑ پئی تے اپنا الوسدھا کر کے وت اکھاں
پھیر لیاں تے ملک فتح خان سکھاں دی قید وچ رہن دتا حالانکہ انگریز چاہندے
تے اس نوں بری کراؤناں کوئی اوکھا نہ۔ کشمیر دا امام الدین توں گلاب سنگھ
چارچ لے دیونا۔ انگریزاں دا ہک کروڑ نقد دا فائدہ آہا۔ پر کسے پرواہ نہ کیتی۔
جد مول راج دی بغاوت کسے طرح ختم ہوون وچ نہ آئی تے فتح خان نوں رہا
کر کے بنوں دا گورنر بنا کے گھل دتا۔ اس وچ وی ایہہ سیاست کھیڈی گئی جے

ہربرٹ ایڈورڈز لیفٹیننٹ ٹیلر نوں بنوں چوں فارغ کر کے سکھاں توں بچاؤناں
 چاہندا آہ تے اس دی تھائیں ملک فتح خان تے رہائی دا احسان چاڑھ کے
 بھساؤناں چاہندا آہ۔ اوہ آپ دی لکھدا اے کہ ”میں ملک نوں صاف دس دتا
 آہا جے میں ٹیلر نوں بچاؤنا چاہندا واں کیوں جے سکھاں ضرور بغاوت کر دینی
 اے تے اوہ بغاوت دی صورت وچ ماریا ویسی۔ قربانی دا اکبرا بنے تے فتح خان
 بنے ٹیلر کیوں بنے۔ حالانکہ ملک دا اپنا دل ملتان جان اُتے آہ پر انگریز نہ
 منے۔

ملک فتح خان دا قتل

آخر اوہ ای ہویا سکھاں بغاوت کر دتی۔ ملک قلعہ دلیپ گڑھ وچ
 محصور ہو گیا۔ سکھاں نے پانی تے ایس دے سارے راہ بند کر دتے۔ آخر ملک
 فتح خان نے قلعے دا دروازہ کھول کے مردانہ وار نکل کے سکھاں نوں دسیا کہ میں
 ملک فتح خان آں بندوق دی بجائے تلوار نال مقابلے واسطے لکھاریا اس دے
 جواب وچ سینکڑے گولیاں چلیاں تے ملک نوں ختم کر دیاں نکل گئیاں۔ ملک
 فتح خان دا پتر فتح شیر انگریزاں کول ای رہیا۔

ملک فتح خان دی سیرت تے کردار

ملک فتح خان ٹوانہ خاندان دا آخری سردار آہا جس پورے خاندان
 نوں ہک مٹھ بنا کے رکھیا۔ خوشی غمی وچ سارے ٹوانے شریک ہوندے۔ میر

عالی توں لے کے فتح خان تک مٹھ ٹوانہ دی مرکزی حیثیت قائم رہی۔ عروج و زوال دے زمانیاں وچ وی ٹوانے پھر پھرا کے مٹھ ٹوانے ای آ ویندے آہن ملک فتح خان توں پچھے ایہہ حالت قائم نہ رہ سکی۔ انگریزاں توں پہلاں سکھاں دے زمانے وچ وی وڈیاں وڈیاں تبدیلیاں ہوئیاں ٹوانے اپنی جاہ تے جے رہے فتح خان نے ای انگریزاں دے عروج تے سکھاں دے زوال دا اندازہ لا کے سکھاں نوں چھوڑ کے انگریزاں آ لے پاسے دوستی دا ہتھ ودھایا۔

فتح خان دا سکھاں دے زوال وچ وی وڈا ہتھ اے۔ پشور سنگھ دا قتل ایسے سلسلے دی ہک کڑی اے۔ مسئلہ کشمیر وی ایسے زمانے توں چلیا آ رہیا اے۔ ہک روایت دے مطابق نونہاں سنگھ دا قتل وی ملک فتح خان دے ذمے لایا ویندا اے۔ رام سنگھ چھاپے آ لے نے بنوں وچ ملک فتح خان نوں قتل کرایا تے استوں پچھے ملک صاحب خان نے چلیا نو لے وچ رام سنگھ نوں ڈھونڈھ کے اپنے ہتھ نال قتل کر کے فتح خان دا بدلہ لیا۔ لیکن افسوس کہ ملک فتح خان توں بعد اتحاد ختم ہو گیا۔ تے اس خاندان دے کئی بندیاں نے کالرہ، جہان آباد، مظفر آباد، خواجہ آباد تے کئی ہور مرکز بنا لے ایہہ سارے مرکز ہن وی ضلع سرگودھا وچ موجود نیں۔ لیکن شان و شوکت ختم ہو گئی اے۔

ضلع سرگودھا تے ٹوانے

ہن تائیں جہاں ٹوانیاں دا ذکر کیتا گیا اے۔ اوہ علاقہ اج کل ضلع خوشاب وچ اے۔ خوشاب سرگودھا دی تاریخ سا جھی اے۔ ٹوانیاں دے آون

توں پہلاں ایہہ سارے علاقے بار تے جنگل اکھو بندے آہن۔ ٹوانیاں نے استھہ آکے واہی بیچی نوں زبردست ترقی دتی۔ اپنیاں پرائیویٹ نہراں کھٹائیاں تے پورے ضلع نوں سیراب کیتا۔ اس توں علاوہ انہاں انگریزاں نوں اس گل اُتے راضی کیتا جے اوہ مسلمان فوجیاں اُتے اعتبار کرن۔ ایہناں نے مسلمان فوجی بھرتی کر کے فوج وچ شامل کیے نہیں تاں غیر مسلم دے پرائیویٹ دے دی وجہ نال مسلمان نوں اوہ بھرتی کرن واسطے تیار ای نہیں ہوندے۔ جتھے ٹوانیاں دیاں اس 1857ء دیاں انگریزاں دی مدد کرن نوں خامیاں سمجھدے آں استھہ انہاں دیاں خوبیاں وی ہین۔ نہیں تاں ساڈے علاقے تے دی غیر مسلم چھائے رہندے۔ ایہہ ٹوانے آہن جہناں سکھاں دے دور وچ استھہ سکھاں دے پیر نہ جمن دتے۔ نہیں تاں سکھی دور وچ اس علاقے اُتے سکھ اقلیت وچ ہون دے باوجود چھائے آہن جہان آباد دے نیڑے سکھنی دا پنڈ اے۔ اوہ اتنی اثر آلی ہو گئی آہی جے جہان آبادیاں دے مقابلے وچ اپنی نہر کھٹوائی تے اُسدا ناں سکھنی آلی نالی رکھیا۔ انہاں ساریاں گلاں دا ذکر اگا نہہ آوسی۔

جہان آباد دے ٹوانے (مندیاں)

جہان آباد دے ٹوانے وی ایسے مٹھ ٹوانہ خاندن دی شاخ اے انہاں ساریاں دیاں آپس وچ رشتہ داریاں آہن جہان آباد دے ٹوانے مندیاں اکھواندے نیں تے ایہناں دا مرکز مٹھ ٹوانہ دی بجائے ہڈالی آہا۔ ایس وچ رشتہ داریاں دی بدولت ہکا کجھ آہن مثال دے طور تے مٹھ ٹوانے شاخ

دے سردار احمد یار خان دی شادی اسے مندیال خاندان وچ ہڈالی ہوئی۔ مبارز خان اول صاحب خان (جیہڑا کالہ شاخ دا بانی ہويا) دا نانا آہا وت صاحب خان نے اپنے مامے غلام حسین دے گھر شادی ہڈالی کیتی مطلب ایہہ ہويا کہ پیوتے پُتر ایسے گھر وچ شادیاں کیتیاں احمد یار خان صاحب خان دا پیو آہا تے عمر حیات خان دا دادا آہا۔ ملک جہان خان صاحب خان دے مامے دا پُتر آہا سالار وی آہا۔ ایہہ ای جہان خان جہان آباد جاگیر دا بانی ہويا۔ اس صاحب خان دے نال ہو کے معرکے مارے۔ انگریزاں اس نوں سردار بہادر دا خطاب دتا۔ اس صاحب خان نال مل کے جہلم تے اجنلے وچ کم کیتا۔ خاص طور تے اجنلے دی لڑائی وچ دشمنان دے چھکے چھڑا دتے۔ اس دی بہادری نوں ویکھدیاں ہوياں 18 بنگال لارنس وچ رسالدار بنا دتا گیا۔

نواب مبارز خان

ملک جہان خان 1893ء وچ فوت ہو گئے تے انہاں دے کچھے انہاں دا وڈا پُتر ملک مبارز خان جاگیر دا مالک بنیا۔ مبارز خان ناویں بنگال لارنس وچ 1885ء وچ کمشن حاصل کیتا۔ چھ سال تائیں اتھے اپنے فرائض ادا کریندے رہے۔ ریٹائرمنٹ توں کچھے انہاں نوں اعزازی لیفٹیننٹ بنا دتا گیا تے ایہہ عہدہ ترقی کریندیاں کریندیاں جد ایہہ فوت ہوئے تے ایہہ عبد کپتانی تک اپڑ گیا آہا۔

ملک مبارز خان نے فوج وچ کئی کھیڈاں وی متعارف کرائیاں۔

ایہہ آپ وی چنگے بھلے کھڑاری آہن۔ انہاں نوں صوبائی درباری دی حیثیت وی حاصل آہی۔ ایہناں جنگاں وچ جس جذبے دا اظہار کیتا صوبائی حکومت اس دا کھل کے اعتراف کیتا۔ انہاں 39600 روپے جنگ فنڈ وچ جمع کرائے۔ انہاں نوں ڈسٹرکٹ بورڈ شاہ پور تے وار لیگ دا صدر بنایا گیا۔ ایہناں ایس ویلے وچ رگروٹاں دی بھرتی تے جنگی قرضہ اکٹھا کرن دا وڈا کم کیتا ملک مبارز خان اہل دل تے بے شمار خوبیاں دے مالک آہن اوہ مسلم یونیورسٹی علی گڑھ تے انجمن حمایت اسلام دے زبردست حامی آہن۔

انہاں اپنی جیب توں اس فنڈ وچ ہک لکھ روپیہ جمع کرایا تے ہور 75000 روپیہ چندہ جمع کیتا۔ ایہناں 1914ء وچ اسلامیہ ہائی سکول شاہ پور صدر دی بنیاد رکھی۔ ایہہ سکول ترقی کر کے 1929ء وچ ڈگری کالج بن گیا۔ بقول حفیظ جالندھری یونیورسٹی تک لے وین دا انہاں دا خیال آہا۔ 1915ء وچ خان بہادر دا خطاب دتا گیا اس دے ہک سال بعد OBE دا خطاب دتا گیا۔ 1917ء وچ انہاں نوں ہک تلوار تے 15 مربع زمین انعام دتی گئی۔ ملک مبارز خان ہوریں 1923ء وچ فوت ہو گئے۔

سیرت

پوری ٹوانہ قوم وچ تے ضلع سرگودھے وچ اس جیہا انسان پیدا نہیں ہويا۔ اس زمانے وچ لکھ روپیہ چندہ دینا دل گردے دا کم اے ڈاکٹر اقبال مسلم لیگ دے چندے واسطے وی جہان آباد گئے آہن تے ملک صاحب نے انہاں

نوں وی پورا لکھ روپیہ چندہ دتا۔ ملک صاحب نے اپنی حیاتی وچ وڈے وڈے
رفاہ عامہ دے کم کیتے سرگودھے ٹیشن دے نال مسافراں واسطے ہک سراں بنوائی
جیہڑی مبارز سراں دے ناں توں مشہور اے۔ ہڈالی تے شاہپور دے غریب
بچیاں نوں وظیفے دیندے آہن۔ جیہڑے تعلیمی خرچ برداشت نہیں کر سکہ
سن۔ انجے ہار یتیم تے بیوہ عورتاں دی پندھریاں مقرر کیتیاں۔ گورنمنٹ کالج
سرگودھا جیہڑا پہلا شاہپور آہا تے ایتھوں پئی کے سرگودھے گیا اور ملک صاحب
دی ہک سب توں وڈی یادگار اے۔ کچھریاں دے کول انہاں دی کوٹھی دے
نیڑے سنہری مسجد دے نمونے تے مسجد بنوائی جیہڑی ہُن وی موجود اے۔ اوہ
کالج ہن سرگودھا یونیورسٹی بن گیا اے۔

میجر نواب ملک ممتاز محمد خان

اپنے وڈے بھرا مبارز خان دی وفات توں کچھے ایہہ خاندان دے
سردار بنے۔ انہاں نوں درباری گُرسی وراثت وچ ای مل گئی۔ انہاں اپجی سن
کالج وچ تعلیم حاصل کیتی تے امپریل کیڈٹ کور وچ شامل ہو گئے۔ اوہ ایس
کیڈٹ کور وچ ترے سال سکھدے رہے تے کافی ہونہار کیڈٹاں وچ انہاں دا
شمار ہون لگ پیا۔ 1907ء وچ ایہناں کنگ کمشن حاصل کیتا تے انہاں
دیاں خدمات شملہ ہیڈ کوارٹر وچ محکمہ جاسوسی دے سپرد کردتیاں گئیاں۔ جنگ
وچ انہاں ہک وڈا خفیہ پشاور دے مشن تے کم کیتا۔ اوہ اس ڈیوٹی تے 27
مہینے رہے۔ اس توں کچھے ضلع راولپنڈی، شاہپور تے کیبل پور وچ ریکروٹنگ

افسر رہے۔ جد ملک مبارز خان بیمار ہو گئے تے ایہہ اپنی جاگیر دی نگرانی واسطے نوکری چھوڑ کے آ گئے۔ تحریک عدم تعاون دے ویلے انہاں نوں اعزازی مجسٹریٹ بنایا گیا۔ ملک صاحب 1924ء توں 1925ء تائیں پنجابی لیجلیٹو کونسل دے ممبر رہے۔ اودوں ڈسٹرکٹ سولجر بورڈ تے ڈویژنل سولجر بورڈ دے صدر وی آہن۔ ملک صاحب سخی نال صاحب دل انسان آہن اودہ کالج واسطے سالانہ 400 روپے تے اسلامیہ ہائی سکول دے واسطے 1200 روپے دیندے رہے۔ اودہ کورٹ آف علی گڑھ یونیورسٹی دے وی ممبر آہن۔

سلور جوہلی فنڈ وچ ایہناں 500 روپے جمع کرائے۔ نالے اپنے اثر رسوخ نال 15000 روپے اس فنڈ وچ جمع کیتے ایہناں نوں انہاں خدمات دے بدلے وچ۔ کنگ ایڈورڈ دہلی دربار۔ کنگ جارج دربار میڈل، مون سٹار، جنرل سروسز میڈل آف گریٹ وار۔ وکٹری میڈل تے جوہلی میڈل دتے گئے۔ ملک صاحب اپنے علاقے دے وڈے اثر آ لے بندے آہن۔ اپنے علاقے دے وچ کسے قسم دی قانون شکنی برداشت ناہن کریندے اسے واسطے ایہناں دے علاقے وچ کدی پولیس نوں وین دی لوڑ نہیں پئی۔

تحریک پاکستان

ملک صاحب مسلم لیگ دے حمایتی آہن تے اس تحریک وچ اگانہہ ودھ کے حصہ لیا۔ آپ بیماری دی وجہ کر کے قید نہ ہو سکے۔ پر انہاں داپٹر عزیز اللہ خاں ودھ چڑھ کے حصہ لیندا رہیا۔ ملک صاحب نے مسلم لیگ دی طرفوں

خضر حیات خان دے مقابلے وچ خوشاب توں الیکشن لڑیا تے ہر گئے۔ پر خضر نوں وی ایہہ جت ماہنگی پئی تے آخر اس نوں ماں دے آکھن تے استعفیٰ دے کے فارغ ہونا پیا۔

خوشاب تحصیل دی ایہہ سیٹ ایس واسطے مشہور ہوئی کیوں جے اس سیٹ اُتے خضر حیات وزیر اعلیٰ الیکشن لڑ رہیا ہا۔ مسلم لیگ دے کول ایس دے مقابلے دا کوئی بندہ نہ۔ آخر ساریاں دی نظر نواب ممتاز خان تے پئی اوہ اس ویلے بیمار آہن تے اس ویلے ممدوٹ ولا دے نال اپنی لاہور آلی کوٹھی وچ رہ ہوئے آہن۔ قائد اعظم ایہناں دی بیمار پُرسی واسطے تشریف لے گئے تے ایہناں نوں خضر حیات دے مقابلے واسطے تیار کیتا چنانچہ اوہ تیار ہو گئے۔ حالانکہ اوہ ایس ویلے ضعیف تے بیمار آہن۔ ایہناں نوں نہ اقتدار دی خواہش آہی محض قوم دی خاطر ذمہ داری قبول کر کے خضر دے مقابلے وچ روپیہ پانی ہار خرچ کیتا۔ آدھے نیں کہ تقریباً اس زمانے نے وچ 5 لکھ روپیہ خرچ ہويا۔ کیونکہ پہاڑی تے تھل دا لما چوڑا علاقہ نواب صاحب دی مدد توں وکھرا آمدورفت تے دو جے خرچے ہو ر کوئی نہ چا سگدا۔ نواب صاحب دی سرگودھے آلی کوٹھی مسلم لیگ دی جدوجہد دا مرکز بنی رہی۔ جدسول نافرمانی تے گرفتاری دا وقت آیا تے نواب صاحب نے اپنا وڈا پُتر عزیز اللہ خان پیش کر دتا۔ کیونکہ اوہ آپ بیمار آہن۔ اس طرح نواب صاحب تحریک دی سرپرستی فرماندے رہے۔ یونینسٹ ٹوانیاں دی سیاست ختم ہو گئی۔ ایس خاندان ہک ہو ر بندہ وی چمکیا اوہ ملک جہاں خان دا بھرا عظمت حیات ہے۔ جیہڑے فوج وچ رسالدار

ہوئے۔ اس ٹوانہ لانسرتے گوالیار دیاں مہماں وچ حصہ لیا۔ ایہناں دے وڈے پُتر وی اسے عہدے توں ریٹائر ہوئے۔ ایہناں دے دو بچے تے ترتبے پُتر بہادر خان دی فوج وچ رسالدار میجر رہے۔ تے انگریزاں دے خلاف چلن آلیاں تحریکیاں نوں ختم کرنے دے واسطے وڈا کم کیتا۔ اس نوں رسم تاجپوشی میڈل O.B.E تے درجہ اول دے سردر بہادر دا خطاب دتا گیا۔ ایہناں 1904ء وچ انگریز نے ایہناں توں وڈے وڈے ذمہ داری دے کم لئے۔

شیر بہادر اعزازی کپتان دی حیثیت نال ریٹائر ہوئے۔ مظفر خان دے پُتر محمد خان نے دی نوکری فوج توں ای شروع کیتی۔ چترال دی مہم وچ شریک ہویا۔ فوج وچ امن و امان قائم کرن واسطے وڈا کم کیتا۔ 1895ء وچ چترال دا امن بحال کرن دے بدلے وچ ایہناں نوں ریلیف چترال میڈل دتا گیا۔ 1897-98ء وچ پنجاب فرٹیر میڈل 15-1914 وچ سٹار میڈل۔ برٹش وار میڈل تے وکٹری میڈل دتے گئے۔ ایہناں نوں اعزازی لیفٹیننٹ بنایا گیا۔ ڈیڑھ مربع زمین وی دتی گئی۔

خان محمد خان نوں 1939ء وچ سلور جوبلی میڈل دتا گیا۔ ملک غلام حسین ملک سعادت خان دے ترتبے پُتر آہن۔ ایہناں 1857ء وچ برطانیہ دی وڈی خدمت کیتی تے میوینی میڈل حاصل کیتا۔ ایہناں دے بھرا عظمت خان دے مرنے توں کچھے ملک سعادت خان نمبردار بن گئے۔ ایہناں دے پُتر عبدالرحمن خان دی فوج توں نوکری شروع کیتی۔ اوہ ترقی کریندیاں کریندیاں رسالدار بن گئے۔ ایہہ جنگ عالمگیر وچ وی شامل ہوئے۔ ایہناں خدمات

دے صلے وچ ایہناں نوں سٹار وکٹری تے جنرل سروسز میڈل ملے۔ ایہہ کپتان موڈی نوں بچیدیاں ہوئیاں آپ مارے گئے۔

ایہناں دی وفات تے ایہناں دی بیوہ تے پُتر نوں ڈھیر سارا انعام و اکرام دتا گیا۔ عبدالرحیم خان دا پُتر عبدالحمید خان تے عبدالجید خان نے وی فوج دی نوکری شروع کیتی عبدالجید خان والد دی وفات توں کچھ نمبردار بنائے گئے۔ پیرا خان دی ڈویژنل درباری آہا۔ ایہناں دا وڈا پُتر دفعدار آہا۔ عالمی جنگ دے وچ ایہناں وڈی خدمت کیتی ایہناں نوں ایہناں خدمات دے بدلے سٹار دی وکٹری جنرل سروسز تے بلوچستان میڈل دتے گئے۔ ایہناں دے دو بچے پُتر عبدالغفار نے 1917ء اپنی نوکری شروع کیتی ایہناں دے چوتھے پُتر محمد صادق خان دی فوج وچ ملازم ہو گئے۔

ملک جہان خان دے نکلے بھرا فتح شیر خان نے وی 1857ء دی جنگ آزادی نوں ختم کرن واسطے بہوں کجھ کیتا اس بدلے وچ اس نوں میوٹی میڈل دتا گیا۔ ایہناں دے پُتر عالم شیر خان وی فوج وچ نوکری کیتی اٹھ سال دی نوکری پاروں پنج مربے زمین ملی۔ ایہناں دے وڈے پُتر عطا محمد خان وی 1917ء وچ فوج دی نوکری شروع کیتی۔ 1921ء وچ ملکی تے غیر ملکی کافی مہماں وچ حصہ لیا۔

فتح شیر دا پُتر محمد شیر خان جمعدار دے عہدے تے ٹکے رہے۔ ایہناں نوں ایہناں خدمات دے بدلے کئی ایوارڈ ملے۔ ایہناں دے دو پُتر یعقوب خان تے محمد ایوب خان وی اُچیاں عہدیاں تے رہے۔

میر اعظم داسیان پتر میر باز خان نمبردار آہا۔ اس دا پتر محمد خاں ذیلدار
بن گیا۔ اس توں کچھے سکندر خان جیہڑا اعظم خان دا پتر آہا۔ ایہناں عہدیاں
تے رہیا۔ ایہناں جنگ عظیم وچ وڈی خدمت کیتی تے 1919 وچ خلعت
حاصل کیتی۔

☆☆☆



کالرہ سٹیٹ دے ٹوانے

ملک صاحب خان
1857ء دی جنگ آزادی
صاحب خان دی پیشکش

کالرہ سٹیٹ دے ٹوانے

ملک صاحب خان

ملک صاحب خان دی تاریخ جنم معلوم نہیں۔ خضر حیات نے چھان بین کرے کے 1804ء یا 1805ء منی۔ ملک صاحب خان دی ماں ہڈالی دے مندیال خاندان وچوں ملک مبارز خان دی دھی آہی تے ملک مبارز خان دا پوترا جہان خان ہويا جس جہان آباد ریاست دی بنیاد رکھی۔ اس دا مطلب ایہہ ہويا جے ملک مبارز خان جس نوں ملک خان تے حملہ کر کے قتل کر دتا آہا تے اس دی بیوی بچے لے کے نس گئی آہی۔ بعد وچ اوہ ای بچے ٹوانیاں دیاں نوياں زبردست ریاستاں دے بانی بنے۔

ملک صاحب خان اسے ملک خان دا پوترا آہا جس اس دے نانے نوں قتل کیتا اس دے بیوہاناں احمد یار خان آہا۔ جد فتح خان زوال توں دو چار ہويا تے صاحب خان نے پہلاں سکھاں دی نوکری کر لئی۔ تنخواہ ست روپے مقرر ہوئی بعد وچ اسے سکھ سالار نوں بچیندیاں ہوياں ملک نے 30 آدمی

اپنے ہتھ نال قتل کر کے بہادری دکھائی تے سالار نے وی خوش ہو کے کمانڈر بنا دتا تے صاحب خان اپنے دو جیاں دو بھراواں فتح خان تے جہان خان نوں وی کول بُلا لیا۔

بسالاں تے سکھاں دی جنگ وچ وی ملک نے بہادری دکھائی۔ سکھ جیہڑے دو واری بسالاں توں شکست کھا بیٹھے آہن فتح توں ہمکنار کیتا اوس ویلے ملک دے نال کرنل سکندر خان تو پچی وی آہا جیہڑا رنجیت سنگھ دے تو پچی الہی بخش دا پتر آہا۔

پنجاب وچ سکھاں دی پہلی لڑائی توں پچھے۔ انگریزاں دی حکومت اُتے قبضہ کرن دے آثار ظاہر ہو گئے آہن۔ عام مسلمان وی جس سکھاں دی ظالم حکومت دیکھی آہی ایہناں توں کسے نہ کسے طرح نجات حاصل کرنی چاہندا آہا۔ اس دی تبدیلی دی صورت انگریزاں دی شکل وچ نظر آوندی آہی کیوں جے جہناں علاقیاں تے ایہناں دا قبضہ آہا۔ او تھے پنجاب نالوں زیادہ امن آہا۔ اس گل نوں دیکھ کے ٹوانے وی انگریزاں آ لے پاسے ہو گئے۔ پہلاں جنرل وہیلر (Wehler) دے تھلے کم کیتا۔ کئی واری ایہناں نوں بغاوتاں فرو کرن تے گھلایا گیا۔ صاحب خان نے لنگر خان بلوچ رئیس ساہیوال نوں وی اپنے نال ملا کے انگریزاں دی مدد کیتی۔ ایہناں دے کارنامیاں وچوں رجوعہ تے چاچڑاں دیاں لڑائیاں خاص طور تے مشہور آہن سب توں اخیر چیلیاں والے دی آخری لڑائی وچ شامل ہو کے سکھاں دی تباہی دا سبب بنے۔

بھائی مہاراج سنگھ دا خاتمہ

بھائی مہاراج سنگھ سکھاں دا مذہبی پیشوا آہا۔ مولراج دی بغاوت دے زمانے وچ اس انگریزاں دے خلاف لڑن نوں مذہبی جنگ قرار دے کے سکھاں نوں بغاوت تے اُبھاریا۔ ملک صاحب خان تے لنگر خان نے اس دا پچھا کر کے جھنگ کول گھیر کے اس نوں زبردست شکست دتی اس بہادری دے صلے وچ ملک دی دربار لاہور وڈی تعریف کیتی۔ اسے طرح ریزیڈنٹ فریڈرک نے وی تعریفی خط لکھیا۔

جنگ رجوع

رجوع ضلع جھنگ سیداں دا ہک مشہور قصبہ اے۔ 1848ء وچ سکھاں اس تے حملہ کر کے مورچے بنا لئے۔ سید نو بہار شاہ ایٹھوں دا ہک معزز سید آہا ایہناں نوں سکھاں پیغام گھلیا جے جان دی خیر منگدے اوتار ڈھیر ساری رقم گھلو۔ شاہ صاحب کول اتنی رقم دا انتظام نہ ہو سکيا تے تھوڑی جیہی مہلت منگ کے ملک صاحب خان نوں پیغام گھلیا میری مدد فوراً کرو۔ جے مدد نہ کیتی گئی تے آل رسول ﷺ دی عزت و آبرو برباد ہو ویسی۔ ملک فوراً جہاد واسطے تیار ہو گیا تے اپنے بھراواں جہان خان تے فتح خان نوں نال لے کے سکھاں اُتے حملہ کر کے مار بھجایا۔ ملک صاحب نوں پھلاں دے ہار پوائے گئے۔ ملک صاحب نے سکھاں دا مال غنیمت وی سیداں نوں ای دے دتا۔

چناب نگر دی لڑائی

سکھ رجوع وچوں نس کے دریا پار کر کے پہاڑیاں وچ لگ گئے۔
ملک صاحب خان نے ایہناں دا پچھا کر کے اس جاہ تے ایہناں نوں شکست
دتی جتھے اج کل چناب نگر (ربوہ) اے پہلاں اس جاہ دا ناں ڈھکیاں آلاسی۔

جنگ چاچڑاں

ملک صاحب خان نے سکھاں دا پچھا نہ چھوڑیا ایہناں نوں جتھے وی
ایہناں دی خبر ملدی فوراً اپڑ ویندے۔ ملک صاحب خان توں ہک وڈی لڑائی
چاچڑاں وچ لڑنی پئی۔ چاچڑاں جھاوریاں دے نیڑے پریت لہندے کر کے
ہک پنڈ اے۔ ملک صاحب نوں پہلے معلوم ہویا جے سکھ جھاوریاں وچ اکٹھے
ہو رہے نیں۔ جد سکھاں نوں پتہ لگا کہ ملک صاحب خاں آ رہے نیں تے اوہ
پچھانہ ہٹ گئے اخیر چاچڑاں دے پنڈ دے کول مقابلہ ہویا۔ ملک صاحب
خان اتنی ڈھل تلوار چلیندے رہے جے ایہناں دا ہتھ تلوار دے قبضے وچ سچھ
گیا۔ جنگ ختم ہوئی تے قبضہ کپ کے تلوار دکھری کیتی گئی۔ اتھے سکھاں دی
فوج ہزار دے نیڑے تریرے آہی ایہناں دے کول اٹھ زبورے وی آہن۔
اس واسطے ملک صاحب خان آکھیا کہ سب توں پہلاں اوہ آپ حملہ کر لیں
استوں پچھے جہاں خان تے سب توں پچھے فتح خان سکھاں اُتے حملہ کر لیں۔
سکھاں دے زبوریاں نے ملک دی فوج تے گولے سٹے جس توں پریشانی
ہوئی پر اللہ تے بھروساں کر لیندیاں ہوئیاں زوردار حملہ کیتا تے سکھ نس گئے۔

اس حملے وچ ملک دے نال بدیاں دے مردان علی شاہ تے پہلوان علی شاہ وی
 اہن۔ مردان علی ہوراں دی پٹی تے گولی وی لگی۔ ملک صاحب خان نے
 ایہناں نوں گھوڑی تے کجھ نقد انعام دتا۔ ملک صاحب خان نے سکھاں دے
 پنج زنبورے قبضے وچ کرلیے۔ پنج سوسکھ مارے گئے۔ چاچڑاں دے سکھاں
 دے بارے وچ ایہہ گل وی جھاوریاں وچ عام مشہور اے کہ سقوط ڈھاکہ دا
 بھارتی کمانڈر جگجیت سنگھ اروڑا۔ اسے پنڈ چاچڑاں دا رہن والا آہاتے اس دا
 پیو جھاوریاں وچ ڈاکٹری دی دکان کریندا آہا۔ اس دا ناں گلاب سنگھ آہا۔
 ایہہ گل اروڑے نے اس علاقے دے جنگی قیدیاں نوں دی۔ جس توں ایہہ
 گل مشہور ہوئی۔

چیلیاں آلا تے گجرات دیاں لڑائیاں

دیوان مول راج دی شکست توں کچھ سکھاں دیاں دو وڈیاں لڑائیاں
 ہوئیاں پہلی چیلیانوالے جنوری 1849ء وچ ہوئی تے دوجی گجرات دی پہلی
 توں تقریباً ہک مہینہ کچھ۔ دوہاں لڑائیاں وچ سکھاں نوں زبردست شکست
 ہوئی تے ایہناں دی حکومت ختم ہوگئی چیلیانوالے دی لڑائی وچ ملک صاحب
 خان نے ایہناں دے سنگی بہوں سارے سکھ مارے۔ رام سنگھ چھاپے آ لے
 دے کیمپ اُتے خصوصی حملہ کیتا گیا تے ملک صاحب خان نے اس دی دھون
 تلوار نال آپے لاہی۔ جس دے نال باقی فوجاں دے حوصلے ودھ گئے۔ رام
 سنگھ نوں مارن دا ملک صاحب دا ہک ذاتی بدلہ لینا وی آہا کیوں جے رام سنگھ

تے ایس دے سکیاں ملک فتح خان موتیا نوالے نوں قتل کیتا آہا جیہڑا ملک صاحب خان دا چاچے دا پتر آہا۔

ملک کافی ہتھیار اکٹھے کر کے ہک جا ہی لگا چھوڑے تاکہ ضرورت دے وقت کم آون، ایہناں خدمات دے بدلے ملک صاحب نوں میگھا دی جاگیر ملی جیہڑی دریا جہلم دے کنارے تے آہی۔

1857ء دی جنگ آزادی

انگریز 1849ء وچ پنجاب تے قابض ہو گئے۔ چھست سال امن و امان نال گزر گئے۔ ملک صاحب خان ایہہ سارا وقت زمیناں دی آبادی دی کوشش وچ ٹاپا۔ انگریز حکام نے ایہناں نوں اعزازی عدالتی اختیارات دینا چاہے پر ایہہ نہ منے 1857ء وچ اچانک پورے ملک وچ بغاوت ہو گئی۔ انگریز اس نوں ”عذر“ تے تاریخ پاکستان وچ اس نوں جنگ آزادی آکھیا گیا اے۔ کیوں جے انگریز دی غلامی توں بعد ایہہ اہل وطن دی انقلاب لے آون دی پہلی کوشش آہی۔ اس دی وجہ کئی انگریز افسراں دی نااہلی آہی۔ 1857ء وچ اس دی پہلی آواز میرٹھ وچوں بلند ہوئی۔ ایتھوں دی فوج انگریز افسراں نوں قتل کر کے دہلی آ کے بہادر شاہ ظفر نوں بادشاہ بنا دتا۔ اس دی دیکھا دیکھی پورے ملک وچ جتھے جتھے خبر پڑی گئی بغاوت شروع ہو گئی۔

پنجاب دے حالات

اس جنگ آزادی وچ پنجاب دے حالات دو جیاں علاقیاں نالوں

و کھرے آہن کیونکہ اتھے نویں نویں انگریز آئے آہن تے ایہناں توں پہلے
 اتھے سکھاں دی ظالم حکومت مگروں لٹھی آہی۔ عالمگیر دی وفات توں ای اتھے
 پنجاب وچ قتل و غارت تے سکھا شاہی شروع ہو گئی آہی۔ پہلاں 1765ء
 وچ ترے سکھاں مل کے لاہور حکومت شروع کیتی جتھوں تنگ آ کے۔ 1799ء
 وچ لاہوریاں چوری چوری رنجیت سنگھ نوں حملے دی دعوت دتی۔ ایہناں نوں ایہہ
 اُمید آہی جے رنجیت سنگھ دا زمانہ ول ہوسی پر ایہناں دیاں اُمیداں بر نہ آیاں
 تے اس دے مرنے توں کچھ تے حالات اُکوں خراب ہو گئے تے پنجابیاں
 نوں حالی انگریزاں نال واہ ناہی پئی۔ اس واسطے ایہناں نوں سکھاں دے
 مقابلے وچ چنگا سمجھدے آہن تے جتھے جتھے ہنگامے ہوئے اوہ پنجابیاں دی
 بجائے ہندوستانیوں دی طرفوں آہن تے اس وچ مسلماناں دے نال
 دوجیاں قوماں وی برابر دیاں شریک سن۔ پنجابی فوجیاں درخواست وی کیتی
 جے ایہناں نوں ہندوستانی فوجیاں توں الگ رکھیا ونجے (سوانح عمر حیات
 ٹوانہ غلام رسول مہر)۔

مولانا غلام رسول مہر صاحب اگے لکھدے نیں جے ”پنجاب دے
 اکثر رؤسا تے خود ٹوانیاں دے سامنے سبھ توں وڈا سوال ایہہ آہا پور بیاں تے
 مدراسیاں دی برتری تے سرداری من لین؟ اس ویلے اگر اوہ حکومت دی حمایت
 نہ کریندے تے آئندہ واسطے فوج وچ مسلماناں دی جاہ کدی وی نہ بندی۔
 ہک قابل غور نکتہ ایہہ آہا سکھ جہناں توں حکومت کھسی گئی آہی اوہ ساری دی
 ساری قوم انگریزاں دے نال ہو گئی۔ اس توں ایہہ خطرہ پیدا ہو گیا کہ جنگ

توں کچھ اوہ ای وت سارے امتیازات دے وارث نہ بن وین۔ پنجابی مسلمان
 جیہڑے ہک صدی توں مصیبتاں وچ پھسے ہوئے آہن۔ اوہ نویں شکل وچ وت
 نہ آونجی ایہہ حالات وچ پھسے ہوئے آہن۔ اوہ نویں شکل وچ وت نہ آونجی
 ایہہ حالات آہن جہناں دی بناتے ٹوانیاں نے انگریزاں دی اگے ودھ کے مدد
 کیتی تے ایہو گل اگانہہ ونج کے فوج وچ پنجابی مسلماناں دی برتری دا سبب
 بنیا۔ اج پاکستان جس فوج تے ناز کریندا اے ایس دا ایہہ پتھر 1857ء وچ
 ای رکھیا گیا۔ (غلام رسول مہر ص 159)

ملک صاحب خان دی پیشکش

خاندانی روایت دے مطابق انگریزاں دی مدد کرن دی تیاری دا واقعہ
 وڈا دلچسپ اے۔ شروع شروع وچ انگریزاں نوں ملک صاحب خان کول
 ہتھیار ہوون دیاں لوکاں شکایتاں کیتیاں۔ سرکار چھاپے وی مارے پر کجھ ہتھ نہ
 آیا۔ غدر دی اطلاع تے ڈپٹی کمشنر نے ملک صاحب خان نوں بندہ گھل کے
 بلوایا۔ ملک صاحب نوں خیال آیا جے کسے وت شکایت کیتی ہوئی تے اپنا
 بندوبست کر کے ونجیئے۔ اس بندوبست واسطے اس اپنے جانثار سنگی نال لے کے
 انہاں نوں ہدایت کیتی جے مینوں قید کرن لگن تے تسی حملہ کر کے سب نوں قتل
 کر دینا تے استوں کچھ نس کے آزاد علاقے وچ لگھ وساں۔ ایہہ انتظام کرن
 توں بعد ملک صاحب ڈی سی کول گئے۔

ڈپٹی کمشنر نال ملاقات

ڈی سی نے فوراً بلا کے اندر دا دروازہ بند کرا دتا۔ ڈی سی دا مطلب ایہہ جے ملک صاحب خان نوں جنگ آزادی دی اطلاع وکھری دیوے ملک صاحب خان سمجھے کہ ایہہ قید کرن دی شروعات اے۔ ڈی سی نے جد دسیا کہ ایہناں دی مدد دی لوڑ اے تے ایہہ آپ مطمئن ہو گئے پر اپنے سنگیاں دا خطرہ کہ کدائیں حملہ نہ کردیوں اس واسطے ڈی سی توں اجازت لے کے باہر آئے تے سنگیاں نوں دسیا کہ خطرے دی کوئی گل نہیں آرام نال بہہ جاؤ تے میں گل کر کے آندا واں۔

ڈی سی نے ملک صاحب خان نوں دسیا کہ انگریزاں نوں میرٹھ دی بغاوت دی وجہ نال فوجیاں دی ضرورت اے۔ نالے ملک صاحب نوں دسیا کہ روپیہ جتنا دل منگے خزانے وچوں لے لو تے سرکار کول ہتھیار اس ویلے کوئی نہیں۔ ملک صاحب نے ڈی سی نوں دسیا جے روپے تے ہتھیار میرے کول موجود نہیں تے ایہیے نازک موقع واسطے رکھے ہوئے ہین۔ اجازت ہووے تاں کڈھ لئیں۔ ڈی سی نے اجازت دے دتی تے ملک صاحب نے 300 سوواراں دا دستہ تیار کر کے دے دتا۔ اس ویلے مسٹر گور اوسلے (Gore ouseley) ڈپٹی کمشنر آہا۔ اس توں کچھ جد سر جیمز ولسن ڈی سی بن کے آیا تے لیڈی ولسن ملک دے متعلق اپنے خط وچ لکھیا:-

ملک صاحب نے مسٹر اوسلے دے سامنے آ کے سلام کیتا۔ ننگی تلوار دا

قبضہ مسٹر اوسلے دے ہتھ وچ دے کے اسدی نوک اپنے دل تے رکھ کے آکھیا
میرے کول پنجاہ سوار آہن ترے سو سوار دے سگدا آں۔ انہاں دی وردی تے
خوراک دا وی ذمہ لیندا واں اگر جواب جلی نہ کیتی ونجے تے ہتھیار وی دے
سگدا واں تے نالے میری اپنی جان تہاڈی نذر اے۔

اس دا ایہہ وی مطلب اے جے ڈی سی ملک صاحب خان توں علاوہ
اس غدر دا اس علاقے وچ کسے بندے نوں پتہ نہ۔ ملک صاحب نے دستہ تیار
کر کے پہلے جہلم گئے تے اوتھوں انبالہ ضلع امرتسر گئے تے اُتھے 280 بندے
گرفتار کرن وچ مدد دتی۔

وسط ہند دے حالات

ایہہ حالات لیپل گرفن تے ہک فوجی افسر جان اینجلو (John
Angelo) دے لکھے ہوئے نیں۔ ایہناں توں علاوہ ہور کتھوں پتہ نہیں لگدا۔
لیپل گرفن چار واقعات فتح دہلی دے لکھے ہین۔

- 1۔ ملک صاحب نوں کان پور دے آس پاس امن داکم سوپیا گیا
آہا۔ جتھے لوکاں وچ کافی بے چینی آہی۔
- 2۔ کالپی وچ ملک صاحب دے رسالے توپاں آ لے رسالے دی
حفاظت کیتی۔ ایہہ کم ملک صاحب نے جنگی طرحاں نبھایا۔
- 3۔ اس توں کچھ ایہہ رسالہ جنرل نیپڑ دیاں فوجاں نال وسط ہند دیاں
لڑائیاں وچ شامل ہو گیا۔ جتھے وی لڑائی ہوندی سی ایہہ رسالہ سب توں اگے

رہندا۔

4۔ ملک صاحب دے رسالے نے جمنادے پل دی حفاظت کیتی۔

جان انجیلو دی لکھت:-

- (1) ملک صاحب خان کاپی دی جنگ وچ حاضر آہن۔
- (2) ملک صاحب خان نے شہزادہ فیروز شاہ دے خلاف لڑائی وچ حصہ لیا تے ہک توپ اُتے قبضہ وی کر لیا۔
- (3) گوالیار وچ ملک صاحب خان نے جنرل نیپڑ دے ماتحت کم کیتا جس دا ذکر جنرل نیپڑ نے اپنے مراسلیاں وچ کیتا۔
- (4) ملک صاحب خان نے اپنے سنگیاں نوں (انگریزی) فوجی وردی پونے تے راضی کیتا (کیوں جے اوہ اس قسم دی وردی دے عادی نہن)۔

تانیتا توپی دا خاتمہ

مرہٹہ سردار جس دا ناں تانیتا توپی آہا تے 2500 دی فوج نال کان پور اُتے حملہ کیتا۔ انگریزاں کول فوج دی کمی آہی لیکن کالن کیمپ نیل مدد واسطے اپڑ گیا تے تانیتا توپی نس گیا بعد وچ اس دا مقابلہ کوچ وچ جنرل سرہیو روز (Hagh Rose) نال ہویا تے اس دی فوج کھنڈ گئی تے کاپی وچ مرکز بنایا اتھے وی شکست ہوئی تے جھانسی دی رانی نال گوالیار چلا گیا۔ گوالیار وچ 17 جون نوں جھانسی دی رانی لکشمی بائی بہادری نال لڑدی ہوئی کم آئی تے توپی

کسے پاسے نس گیا وت کوئی پتہ نہ لگا۔

شہزادہ فیروز

شہزاد فیروز شاہ عالم ثانی دے پتر ناظم بخت دا پتر آہا اس دی ماں فرخ سیر دی دھی آہی۔ 1856ء وچ ایہہ حج تے گیا ہويا آہا جد واپس آیا تے سندھیا دیاں فوجاں مندے سور تے قبضہ کر چکیاں آہن ایہناں فوجاں شہزادے نوں سپہ سالار بنا لیا۔ ستمبر تک شہزادے کول 17000 فوجی جوان ہو گئے۔ پر رانود وچ شہزادے نوں شکست ہو گئی۔ اس جنگ وچ ملک صاحب خان تے جہان خان شامل آہن۔

اعزازات

جنرل نیپڑ نوں ملک صاحب خان نال کافی تعلق پیدا ہو گیا آہا جس ویلے اوہ فارغ ہو کے وطن گیا تے ملک صاحب خان نوں اپنی خاص تلواریں سنہری گھڑی بطور یادگار تحفے دے طور تے دی۔ 1867-68ء جنرل نیپڑ حبشہ گیا۔ میڈال دے مقام اُتے فیصلہ کن فتح حاصل کیتی تے لارڈ نیپڑ آف میڈال دا خطاب پایا۔ بعد وچ نیپڑ ہندوستانی فوجاں دے کمانڈر انچیف بن کے آئے تے ملک صاحب خان نال تعلقات گوڑھے رہے۔ نیپڑ نے اپنے گھوڑے دا ناں میڈال رکھیا۔ جد ایہتھوں فارغ ہو کے واپس ہويا تے اوہ گھوڑا ملک صاحب خان نوں دے گیا۔

خطابات

ملک صاحب خان نوں ”بہادر“ دا خطاب دتا گیا۔ نالے ”ستارہ ہند“ وی دتا گیا۔ ایہہ گل وی یاد رکھنی چاہیدی اے کہ اس زمانے وچ خطابات لینے اتنے سوکھے نہیں سن۔ ملک صاحب خان فارغ ہو کے اپنی زمیناں دی آبادکاری وچ لگ گئے اس توں کچھ اوہ کسی مہم وچ شامل نہ ہوئے۔

ٹوانہ لانسرز دی کہانی

جنرل مپڑ جنگ مراد دے بعد خیال ظاہر کیتا کہ ہک خاص رسالہ بنایا جائے۔ جیہڑا باغیاں دا تعاقب تے امن قائم کرن وچ مدد دیوے۔ پہلے ایس داناں مرہٹہ ہارس رکھیا گیا۔ بعد وچ اس داناں ٹوانیاں دی مناسبت نال ٹوانہ ہارس رکھ دتا گیا۔ ملک جہان خان اس دے سالار مقرر ہوئے۔ ایہہ ٹوانے ہارس اگے ونج کے 18 ٹوانہ لانسرز بنی وے اس داناں کنگ جارج اون لانسرز رکھیا گیا۔ اج کل اس نوں نمبر 19 لانسز ادھے نیں۔ ملک عمر حیات اس دے بانی اول آہن۔ اس توں کچھ ملک خضر حیات اس دا اعزازی کرنل رہیا۔ خضر حیات دی وفات تے اس نوں اس دستے آخری سلامی دتی۔

سرگودھے وچ نہراں دا رواج

ملک صاحب نے واپس آ کے پہلے ہار زمیناں دی طرف توجہ دتی ایہناں دی زندگی مثالی قسم دی آہی۔

(1) ایہناں خاندانی وسیلے توں فائدہ نہ اٹھایا بلکہ کنارہ کش ہو کے ہر میدان وچ عزت حاصل کیتی۔

(2) لڑائیاں دے موقع اُتے ہک بہادر سپاہی دی طرحاں اگے اگے رہے ہر میدان وچ عزت حاصل کیتی۔

(3) ملک صاحب خان انگریز دی نوکری توں ہمیشہ دور رہے۔ جیہڑی خدمت کیتی اوہ رضا کارانہ طور تے کیتی۔ اگر اوہ چاہندے تے وڈے توں وڈا عہدہ حاصل کر سگدے آہن۔

بقول ملک عمر حیات دے اوہ سپاہی وی آہن تے حکومت چلاؤن دا ڈھنگ وی جان دے آہن۔ حاکماں نال تعلقات پیدا کرنے واسطے سیاست وچ حصہ لیا۔ اوہ اپنے وجود وچ ہک انجمن رکھدے آہن۔

کالرے دی جاگیر

ملک صاحب خان جد میگھے دی جاگیر نوں چنگی طرحاں آباد کر چکے ایہہ مدت توں ہک ویران پتن آہا۔ اتھے بہوں ڈاکے پوندے رہندے آہن۔ اس وجہ توں پہلے اتھے آبادی دی کوئی صورت ناہی بن دی۔ ملک صاحب نوں جد ایہہ علاقہ ڈھیالتے ایہناں تھوڑی ای مدت وچ جرائم ختم کر کے علاقہ آباد کر چھوڑیا۔ 1860ء وچ ملک صاحب نوں کالرہ اس شرط تے ڈھیالے اوہ اسدی وی آبادی دا انتظام کرن۔ ایہہ جاہ پہلوں رکھ کاہرلا اکھاواندی آہی۔ اسی تھاں تے نہراں کڈھ کے آس پاس دے لوکاں نوں وی فائدہ دیسن۔ اس

زمانے وچ پنجاب نہری نظام بالکل کوئی نہ کوئی انجینئر آہن ملک صاحب آپ گھوڑے تے چڑھ کے سروے کریندے آہن تے نہر کڈھن دی جاہ چنڈے آہن۔ ہک سال دے اندر ایہناں نہر تیار کرا لئیں۔ ایہہ 1862ء وچ چالو ہوئی تے صاحب خان آلی ناں رکھیا گیا ایہہ نہر پنجاب دے نہری نظام دی پہلی نہر آہی۔

ملک صاحب خاں دی آباد کاری

ملک صاحب خان نے زمیناں آباد کرن دی پہل کر کے ضلع دے دو بے زمینداراں دے واسطے ہک چنگی مثال قائم کیتی۔ رکھ کاہر لا جیہڑی ہک بنجر جاہ آہی سرسبز ہو گئی۔ لوگ زمیناں تے واہی نیجی آ لے پاسے شوق نال آون لگ پئے تے لوکاں نوں روزگار ملیا۔ ایہہ زمیناں تھل دیاں بے کار بارانی زمیناں نالوں بہوں سرسیاں آہن۔ اس واسطے مٹھ ٹوانہ تے آس پاس دے ٹوانیاں دے تعلق آ لے اکثر لوک ایہناں دے نال ای ترک وطن کر کے ضلع شاپور (سرگودھا) آ کے وسن لگ پئے اکثر آباد کار کاشتکار تحصیل خوشاب دے اہن جد خوشاب وی نہر آ گئی تاں ایہہ اپنے پاسے پر تے۔

پیراں آلہ نالہ تے چہارمی نالہ

ملک صاحب خان 1870 تے 1871ء وچ دو ہور نہراں کھٹائیاں بک دا ناں اپنے بیلی پیر حیدر شاہ دے ناں تے پیراں نالہ رکھیا تے دو بے دا

ناں چہاری رکھیا۔ چہاری دا مطلب ایہہ ہے کہ جہناں لوکاں دیاں زمیناں نوں
ایہہ نالہ پیویندا آہا ایہناں توں آمدن دا چوتھا حصہ ملک آب پاشی دا خرچہ دے
طور تے لیندا آہا۔ الغرض ایہناں نہراں نال ضلع سرگودھا وچ کافی آبادی دا
سامان ہو گیا۔

روٹی ویلے دی مشین

جد ملک صاحب خان دیاں زمیناں کافی آباد ہو گئیاں تے پھٹی ویلے دا
مسئلہ سامنے آیا۔ پرانی قسم دے دستی ویلے منگوا کے پھٹی ویلے دی کوشش کیتی گئی پر
پھٹی نہ ویلی گئی۔ اس توں کچھے ملک صاحب خان نے ہک ویلنا خود ڈیزائن کر
کے بنوایا ایہہ دانداس (بیل) نال چلدا اہا تے اس نال کافی کم وچ سہولت ہو گئی۔

روٹی دی برآمد

ملک صاحب نے روٹی تے باقی جنساں دریا جہلم دے ذریعے سکھر
تائیں کشتیاں نال اپڑا دیندے اتھوں اگا نہہ تاجر کراچی لے ویندے۔

ملک صاحب خاں دیاں شادیاں تے اولاد

ملک صاحب خان نے واری واری چھ شادیاں کیتیاں۔ چار وچوں
تاں اولاد ہوئی ای کوئی نہ تے مائی جویانی جیہڑی روڈے دی آہی ہک پتر مظفر
خاں نو مہینے دا ہو کے مر گیا۔ ہور کوئی اولاد نہ ہوئی۔ دوجی مائی ہندوستان وچوں

چار پُتر ہوئے جیہڑے نکلیاں ہوندیاں ای مر گئے۔

اولاد دی خواہش

اللہ تعالیٰ نے ملک صاحب نوں وڈی جائیداد دتی تے چھ شادیاں کرن دے باوجود کوئی وی پُتر موجود نہ۔ اس واسطے عمر وی 65 سال ہو گئی آہی تے دن بدن ایہہ خواہش تیز ہوندی گئی۔

خواب

ملک صاحب نوں چوہا سیدن شاہ گئے تے اتھے خواب آیا جے اللہ تعالیٰ اس نوں پُتر دتا اے۔ ایہہ خواب دیکھ کے وت نویں شادی دا خیال آیا۔ تے آخر اپنے سنگی ہوتا خان گوندل دی دھی نال نکاح کیتا تے اللہ تعالیٰ نے خواب پوری کر دتی عمر حیات پیدا ہوئے۔

وفات

ملک صاحب عمر حیات دے جمن توں پچھ پنج سال جیوے آخر اپنے اصل گھر ول پرت گئے۔

ملک صاحب خان دی سیرت

ملک صاحب ضلع سرگودھا دا سب توں وڈا زمیندار ہوون دے باوجود

ہک بہو چنگا انسان آہا۔ جد زمیناں آباد ہو گئیاں تے ایہناں دا حوصلہ وی وڈا ہوندا گیا۔ جد ہک واری عمر حیات بیمار ہو یا تے ابنار دا مونہہ کھول کے ضرورت منداناں نوں آکھیا کہ جتنا مرضی اے اناج لے ونجو۔ غریب کاشتکاراں نوں بیل دتے سید قوم دے لوکاں نوں مجھیں دتیاں اللہ کیتا اس حیلے نال عمر حیات ٹھیک ہو گیا۔ بیوہ عورتاں دی پندھری مقرر کیتی (پندھری دا مطلب 15 ٹوپے ماہوار دانے) تقریباً 34 سیر دانے جتنی علاقے وچ بیوہ لاوارث ہوندے ملک صاحب مدد کریندے۔

صاف گوئی

ملک دا ہک وڈا وصف صاف گوئی آہا اس دی مثال ہک درج کیتی ویندی جیہڑی ملک صاحب نے انگریز دے مونہہ تے کیتی۔ ملک صاحب ہک واری کسے کم ہک انگریز کول گئے تے اس شرارتا ملک صاحب توں پچھیا کہ دسو ”محمد صلی اللہ علیہ وآلہ وسلم سچے رسول آہن؟“

ملک صاحب نے جواب دتا کہ میں تاں کجھ نہ جاندا۔ پر اتھے تیری کوٹھی تے آ کے مینوں اوہ سچے رسول ای معلوم ہوندے نیں۔ انگریز پچھیا اوہ کیوں۔ ملک دسیا کہ:-

میرے کول ترے لکھ روپیہ جمع اے۔ اسی سال دی عمر اے۔ اولاد کوئی نہیں وت وی تہاڈی کوٹھی تے آ کے ایہہ ای دل کریندا اے کہ کجھ ہور زمین مل ونجے۔ گُرسی دا درجہ ودھ ونجے۔ دنیا وچ دولت تے عورت مزے دیاں

شیاں آہن۔ لیکن حضور اکرم صلی اللہ علیہ وآلہ وسلم فرمایا ”دنیا نال محبت نہ کرو، کسے دی عورت نوں نہ دیکھو، زنا نہ کرو“ ایس توں ودھ کسے اپنی اولاد واسطے وی کوئی آمدنی مقرر نہیں کیتی۔ بلکہ زکوٰۃ لین توں وی منع کردتا۔

ہُن تسی دسو بھائی حضور صلی اللہ علیہ وآلہ وسلم نے پیغمبری توں کیہ فائدہ اٹھایا۔ تے کیہڑا آرام ملیا۔ انج معلوم ہوندا اے جے کسے نے زبردستی ای پیغمبری دا دعویٰ کرایا ہوسی۔ یعنی اللہ تعالیٰ نے ای بنایا ہوسی اس واسطے اوہ سچے رسول آہن۔

اس زمانے انگریز دا اقتدار اتنا آہا جے اس دی گل نوں رد کرنا سوکھا نہ۔ پر ملک صاحب نے اتھے ایہہ گل وی صاف دس دتی ذرا بھراوہلا نہ رکھیا۔ جد ایہہ گل جس وی سنی تے اس نے وی آکھیا کہ انگریز دے سامنے اتنی جرات کرن تے اللہ تعالیٰ ضرور پُتر دے سی۔ آخر اللہ تعالیٰ نے عمر حیات دی شکل وچ عنایت کیتا۔



ملک عمر حیات ٹوانہ

جمن تے تربیت

عمومی خدمات

ہندو راج نوں رد کرنا

ملک عمر حیات ٹوانہ

جمن

ملک عمر حیات ہو ریں اکتوبر 1874ء مطابق 23 شعبان 1691ھ
ملک صاحب خان دے گھر میگھا جے۔ والد اس ویلے بھیرے بیمار آہن۔ جہدا
انہانوں بچے دی خوشخبری ملی تے فوراً بیڑی دے ذریعے دریا جہلم دے کنارے
میگھے آ لگے۔ میگھے خوشیاں منائیاں گئیاں اس توں بعد شاہپور جیہڑا ایس ویلے
ضلع آ اتھے پورے ضلع دے لوکاں نوں دعوت اُتے بلایا۔

خوش نصیبی دا پرکھنا

1875ء وچ ملک صاحب خان اس خیال نال شملہ گئے جے بچے
واسطے کالرے دے پٹہ نوں چھوڑ کے مستقل حقوق ملکیت لینے دی کوشش کریندا
آں جے حقوق مل گئے تاں سمجھیا ویسی کہ بچہ خوش قسمت اے۔ اللہ دا کرنا اجیہا
ہویا جے حقوق ملکیت ویندیاں مل گئے۔ اس توں کچھ میگھے چھوڑ کے کالرے آ

گئے تے ایتھاں اپنی ضرورت دیاں عمارتاں بنوایاں۔

تربیت

جد ملک عمر حیات دی عمر چار سال چار مہینے تے چار دہاڑے ہوئی تے بسم اللہ کرنے واسطے چاچڑاں شریف دے مولوی فضل دین صاحب بلائے گئے۔ مولوی صاحب حضرت خواجہ شمس الدین سیالوی دے خلیفہ آہن۔ مولوی صاحب توں ابتدا صرف تبرک واسطے ایہی۔ اس توں بعد پرائیویٹ استادان دا انتظام کیتا گیا جہناں دے کچھ ناں ایہہ نیں۔ ڈاکٹر فتح محمد صاحب، قریشی علی مردان صاحب، مسٹر کرتی سنگھ۔ اس دا پیو آخری سکھ راجہ دلیپ سنگھ دے نال ولایت گیا آہ۔ تے کرتی سنگھ نے ایتھے ایڈنبرا یونیورسٹی توں ایم اے کیتا۔

چیف کالج وچ داخلہ

1888ء وچ ملک صاحب چیف کالج داخل ہو کے ایتھے پنج سال گزارے۔ ملک صاحب دے اساتذہ کالج دے سٹاف وچ شامل کر لئے گئے۔ مسٹر کرتی سنگھ ایتھے ہیڈ ماسٹر بن گیا۔ ملک صاحب گھوڑ سواری کالج دے زمانے وچ سکھی جانوراں دا علاج وی سکھیا۔ فسٹ ایڈ وی سکھی پر تیرنا نہ ایسا طرح موٹر وچ ہزاراں میل سفر کیتا پر چلائی نہ آئی۔

املاک دا انتظام

1893ء وچ ملک عمر حیات تعلیم توں فارغ ہوئے اس وقت تک
املاک دا انتظام سرکار دے کول آہا سرجمز ولسن دی نگرانی وچ املاک دے
انتظام دی تربیت حاصل کیتی۔ ضلع دے معاملات سمجھن واسطے کجھ وقت ملک
حاکم خان کول گزاریا۔ ملک صاحب وڈی جائداد دے ہکے مالک آہن اگر
چاہندے تے عیش وچ اڈا دیندے پر ایہناں آپ کر کے کھاون دا گر سکھیاتے
اسے اُتے عمل وی کیتا۔ آخر اوہ ہولی ہولی ایسے مرتبے تے اپڑے جیہڑا کسے
ہور ہندوستانی نوں نصیب نہیں ہویا۔ ایہناں ہر کم آپ کرن دا گر وی سکھیاتے
ایسے وچ کامیاب وی رہے۔

روپے دا ٹھیک استعمال

کورٹ آف وارڈز دی وجہ نال کافی روپیہ جمع ہو گیا آہ تے ملک
صاحب نے کجھ اپنے خاندان دے قرضے اتارے تے باقی دے نال شیخوپورہ
تے فیصل آباد وچ زمین خرید کے ایہناں ضلعیاں وچ وی وڈا زمیندار بن گیا۔
سرگودھے دی جائداد اس توں وکھ آہی۔

مینجر دا تقرر

ملک صاحب نے پہلا ہندو مینجر بھیرے دا دیوان کرپا رام مقرر کیتا
جیہڑا مشہور کانگریسی لیڈر دیوان چمن لال دا چاچا آہ بعد وچ اس دی جائی دیوان

جواہر مل نوں رکھیا۔

شروع دیاں سرگرمیاں

جائیداد دا انتظام سنبھالن توں بعد ملک صاحب نے کئی ہک مفید سرگرمیاں شروع کیتیاں جہناں دی تفصیل ایہہ ہے۔ (1) جائیداد دا انتظام اجیہی خوبی نال کیتا کہ آمدن دونی ہو گئی۔ (2) جائیداد دا انتظام ایجہاں لوکاں دا پتہ لا کے جیہڑے امن دشمن آہن ایہناں نوں ذاتی اثر رسوخ نال ٹھیک کر دتا۔

کھیڈاں دا شوق

ملک صاحب نے لوکاں وچ کھیڈاں دا وڈا شوق پیدا کر دتا۔ اوہ چنگے کھڈکار نوں سونے دے کڑے انعام وچ دیندے ہن جیہڑا بہوں وڈا انعام اے۔ گھوڑ دوڑ، نیزہ بازی (چپلی) تے پڑ کوڈی ملک صاحب دیاں پسند دیاں کھیڈاں آہن ایہناں کھیڈاں توں ملک صاحب بہترین فوجی ویندے آہن۔ ملک صاحب اپنی ٹیماں نوں لے کے فوجی چھاؤنیاں ویندے آہن تے مقابلے کرا کے افسراں وچ وی کھیڈاں دا شوق پیدا کریندے آہن تے چنگے کھڈاری فوج وچ بھرتی ہو ویندے آہن۔ استنوں علاوہ ملک صاحب دے سارے کاردار بہترین کھلاڑی ہوندے آہن۔

گھوڑے پالن دا شوق

ملک صاحب نوں گھوڑے پالن دا وی وڈا شوق مختلف نسل دے گھوڑے پالنے واسطے اپنے ذاتی خرچ تے سہ قائم کیتا ہک مقصد ایہہ وی آہا جے دوجے زمیندار ایہناں دی دیکھا دیکھی اس شوق نوں شروع کر دین۔ اس دا ہک مقصد فوجی وی آہا جے اتنے گھوڑے ملک وچ ہووین جے باہروں حکومت نوں نہ منگوانے پوون گھوڑیاں دے نال نال گائیں مجھیں، بھیدیاں، داند وی پالن دا انتظام کیتا تے میلہ منڈی مویشیاں تے سارے دے سارے انعاماں دے ایہہ ای مستحق ہوندے۔

گھوڑی پال سکیم

گھوڑے پالن واسطے گورنمنٹ نے ہک گھوڑے تے ہک مربع زمین دینی منظور کیتی۔ پہلاں اس سکیم نوں شک دی نظر نال ویکھیا بعد وچ ملک صاحب نے زمینداراں نوں سمجھایا کہ ایہہ تہاڈے فائدے داکم اے۔ آخر کار اوہ تیار ہو گئے تے حکومت دے نال زمینداراں دا وی فائدہ ہو گیا۔ زمیناں وی آباد ہو گئیاں۔

شتر سوار دستہ

ملک صاحب نے سارے ضلع وچ پھر کے لوکاں نوں فوج وچ بھرتی ہووون تے مسے مسے راضی کیتا تے ہک شتر سواراں دا دستہ وی ترتیب دتا۔ جس صومالی لینڈ افریقہ وچ جا کے کم کیتا۔ ملک صاحب ایس دستے دے

نائب کماندار بنائے گئے۔

رفاہی کم

ملک صاحب نے اپنے زمانے وچ وڈے وڈے رفاہی کم کیتے جہناں وچوں کچھ ایہہ نیں۔

رجسٹر نکاح

ملک صاحب جد مجسٹریٹ لگے تے ایہناں ویکھیا کہ طلاق نکاح دے بہوں مقدمے ہو گئے آہن تے ثبوت منگیا ملدا نہیں۔ ملک صاحب نے ضلع سرگودھے دیاں مسلماناں وچ نکاح رجسٹر دا رواج دتا۔ جتھوں مقدمے گھٹ گئے۔

مرض طاعون وچ مدد

پچھلی صدی دے اخیر تے اس صدی دے شروع وچ طاعون دی وبا پھیل گئی۔ دیہاتی کم علمی دی وجہ توں ڈاکٹری اصولاں تے کن نہن دھریں دے۔ ملک صاحب نے دیہاتیاں دے مزاج دے مطابق تجویزاں دتیاں جیہڑیاں دیہاتیاں من لیاں اس طرحاں مرض توں نجات ملی۔

ڈنگراں نوں داغنا

ملک صاحب نے ڈنگراں دی چوری نوں روکن واسطے ڈنگراں نوں

داغن دا طریقہ شروع کیتا۔ اس دا نتیجہ ایہہ ہویا جے چوری کیتا ہویا جانور جلدی پتہ لگ ویند آہا۔ اس واسطے چوریاں گھٹ گئیاں۔

شملة وفد وچ شرکت

1904ء وچ مسلماناں دا جیہڑا وفد وائسرائے ہند لارڈ منٹونوں ملن واسطے شملے گیا۔ اس دے وچ پورے ہندوستان وچوں ستر مسلمان اکابر چنے گئے ایہناں وچ ملک عمر حیات داناں وی آہا۔ حالانکہ ملک صاحب اس ویلے بالکل جوان آہن۔ اس وفد وچ چوٹی دے لیڈر سر آغا خان نواب محسن الملک جیسے لوک آہن۔ اس وفد دا مقصد جداگانہ انتخاب واسطے منظوری حاصل کرنا آہا۔ آخر وائسرائے نے ایہہ جائز مطالبہ منظور کر لیا۔ تے مسلماناں دی علیحدہ قومیت تسلیم کر لئی گئی۔

عوامی خدمت

ملک صاحب نے اپنے خرچے تے کالرے وچ سکول ہسپتال۔ ڈنگر ہسپتال تے ہک دینی مدرسہ بنایا۔ اس توں علاوہ اپنے علاقے دے سارے یتیم بے سہارا بیوہ عورتاں واسطے اتنی گندم دام مستقل انتظام کر دتا۔ جو اس دے گزارے واسطے کافی ہوندا آہا۔ اس توں علاوہ ملک صاحب نے کدی وی وڈیائی نہیں کیتی وڈی انکساری نال لوکاں دی جس حد تک ہو سکدا خدمت کردے رہے۔ ایہہ ای ایہناں دی ترقی تے عظمت دا راز آہا۔ اس سلسلے وچ

ایہناں دے عوامی خدمت دے بے شمار قصے لوکاں دیاں زباناں تے ہُن وی ہن۔

فوجی خدمات

ملک صاحب نوں وارو واری جنگی خدمات دے موقع ملے 1895ء وچ دو واریں چترال دی مہم وچ نال گئے جنوبی افریقہ وچ بوڑوں دی جنگ دے موقع تے کم کیتا۔ 1897ء تیراہ دی مہم وچ شامل ہوئے۔ ایہہ ساریاں خدمات صرف رضا کارانہ آہن۔ ایہہ صرف ٹوانیاں دی جنگی روایات نوں قائم رکھن واسطے۔ اختیار کیتیاں گئیاں۔ طاہری طور تے لوہندیاں دا صاحب جائیداد بندہ ایہناں کماں وچ نہیں پوندا۔ حالانکہ ایہناں دی ماں نے کدی وی خوشی نال اجازت نہ دتی ہوسی۔

پنجاب لیجیسیلٹو کونسل وچ نمایاں کارکردگی

ملک صاحب جوانی وچ ای ممبر بن گئے تے ایہناں نے لوکاں دی بھلائی واسطے کجھ نہ کجھ کرن دا ارادہ کیتا۔ جد آباد کاری دے قانون وچ ترمیم کر کے آباد کاراں واسطے کجھ سخت قانون بناون دا مسودہ پیش کیتا۔ ملک صاحب جیہڑے حالات توں چنگی طرحاں واقف آہن ایہناں ہکلیاں اس دی مخالفت کیتی تے اسمبلی وچوں منظور ہو گیا۔ پراونسر اے نے ملک صاحب دی رائے نال اتفاق کردے ہویاں ویٹو کر کے منسوخ کر دتا۔

قانون انتقال اراضی

جد ایہہ مسودہ اسمبلی وچ پیش ہویا تے ملک صاحب نے پُر زور حمایت کیتی نالے دلیلاں نال دسیا کہ ایہہ قانون غریب زمینداراں واسطے وڈا فائدہ اے کیوں جے ساہوکار ایہناں زمیناں تے قبضہ کرن واسطے قرضے وچ جکڑ کے زمیناں توں زمیندار مرحوم کر دیندے آہن۔ اس قانون نال غیر کاشتکار بنیا زمیناں اپنے ناں نہ لگوا سگدا۔ پنجاب وچ اکثریت مسلمان زمینداراں دی آہی اس واسطے ایہناں نوں بہوں فائدہ ہویا۔

مرکزی مجلس قانون ساز دی رکنیت

ملک صاحب اس مجلس دے تقریباً 20 سال 1909 توں 1930ء تائیں ممبر رہے۔ اس مجلس وچ ملک صاحب نے ایہناں گلاں تے بہوں زور دتا۔

- 1- مسلماناں دے حقوق
- 2- زمینداراں خصوصاً نکلیاں زمینداراں دے حقوق دی ترجمانی
- 3- پنجاب دے حقوق دی ترجمانی
- 4- فوج تے سپاہیاں دے حقوق دی ترجمانی
- 5- تعلیمی پسماندگی، عام تعلیم کرنا، مذہبی تعلیم
- 6- ریلوے دے ترتیجے درجے دیاں ڈبیاں وچ مسافراں دی سہولت
- 7- جنوبی افریقہ وچ ہندوستانیوں دے حقوق

8۔ عدالتی تے انتظامی اختیارات دی علیحدگی

9۔ میثاق لکھنؤ

10۔ فوج وچ درست لوکاں دی شمولیت

دارالحکومت دہلی بناؤنے دی کوشش

1911ء توں پہلاں ہندوستان دا دارالحکومت دہلی نہ بلکہ کلکتہ آہا۔ ایہہ شہر انگریزاں دا شروع وچ مرکز بنیا تے انجے لگا آؤندا آہا۔ نالے دہلی دے مقابلے وچ اس دی کوئی حیثیت وی کوئی ناہی۔ دہلی اٹھ سو سال مسلماناں دا دارالحکومت رہیا۔ سب توں ودھ ایہہ کے ایہہ ملک دی ہک گٹھے وچ آہا۔ اس دے مقابلے وچ دہلی وچکار آہی۔ آخر ایہہ مطالبہ 27 مارچ 1911ء آسمبلی دی ہک تقریر وچ عمر حیات کیتا۔ جد جارج پنجم تاجپوشی دی رسم دے سلسلے وچ اتھے آیا تے ملک عمر حیات اس ویلے شاہی نقیب آہن۔ ایہہ اوہ عہدہ اے جیہڑا اس توں پہلاں تے پچھے کسے ہندوستانی نوں نہیں ملیا۔ دلچسپ تے قابل ذکر گل ایہہ اے جے اس دارالحکومت دی تبدیلی دا اعلان ملک صاحب نے نقیب دی حیثیت نال اردو زبان وچ کیتا۔

نہرو رپورٹ دی مخالفت

1928ء وچ کانگریس نے مسلماناں تے ہندوواں دے سمجھوتے نوں

چھوڑ کے نہرو رپورٹ دا مسودہ تیار کر کے پیش کیتا۔ ملک عمر حیات نے اس دی مخالفت کردیاں ہوياں آکھیا جے اس دے وچ جداگانہ انتخاب دی جاہی مخلوط طریقہ رکھیا گیا اے۔ جیہڑا مسلماناں واسطے نقصان دہ اے۔ نالے دسیا کہ پنجاب دا مسلمان زمیندار جیہڑا ہندوواں دا مقروض اے کیویں اوہ آزادی نال ووٹ پاسکسی۔ ایہہ رپورٹ مسلماناں نال بے انصافی دی بنیاد تے بنائی گئی اے۔ ملک صاحب نے نالے شملہ وچ ہک اسلامی جلسے دی صدارت کیتی جیہڑا نہرو رپورٹ دے خلاف بطور احتجاج کیتا گیا آہا۔ اس طرح مسلماناں اس رپورٹ نوں روک دتا۔

سرکاری ملازمتاں وچ مسلماناں دا حصہ

سرکاری ملازمتاں تے سارے غیر مسلم چھائے ہوئے آہن تے جواز ایہہ پیش کردے آہن کہ مسلمان معیار تے پورے ای نہیں اُتر دے۔

ہندو راج نوں روکنا

1927ء وچ ہک قرار داد پیش کیتی گئی جس دے وچ جداگانہ انتخاب نوں ترک کرنے دا آکھیا گیا آہا۔ ملک صاحب نے دسیا کہ ہندوستان دی آبادی وچ چوتھائی مسلمان اہن اچھوت نال مل وین تاں اسی اکثریت وچ ہو ویندے آں پر ہندوواں اچھوتاں نوں ہندو ہونے دا دعویٰ کر دتا۔ اس توں مسلماناں وچ ڈر پیدا ہو گیا کہ اکثریتی پارٹی دا

راج ہوسی۔ اکثریتی پارٹی چونکہ ہندو اے ایس واسطے یقیناً ہندو راج ہو
سی۔ جیہڑا سانوں منظور نہیں۔

روزنامچہ

ملک صاحب روزنامچہ لکھن دی وی عادت آہی۔ جیہڑی اوہ باقاعدگی
نال نبھاندے رہے نمونہ ملاحظہ ہووے۔
7 اگست 1908 انجمن اسلامیہ شملے دے وفد نال گورنر کول گئے۔
9 اپریل 1909 انجمن حمایت اسلام دے جلسے وچ شرکت۔
23 اپریل 1914 انجمن حمایت اسلام دے جلسے دی صدارت کیتی۔
9 جولائی 1925 پنجاب دے مسلماناں دی طرفوں ہک وفد گورنر نوں ملیا میں
اس دارنیں آس۔

ذاتی روزنامچہ

31 اکتوبر 1934ء نوں خضر حیات دی شادی ہوئی۔ سارے
مزارعان تے برادری نوں کپڑے دتے۔
17 نومبر 1927ء نوں عزیززی خضر حیات دا پتر جمیا شکرانے نے
نفل پڑھے تے ناں نذر حیات رکھیا۔

سفر حج

1935ء وچ ملک صاحب نے حج کیتا اوہ سعودی عرب وچ شاہ

عبدالعزیز دے مہمان رہے کیونکہ ملک صاحب تے شاہ عبدالعزیز ہک دوہے
 نوں 1914ء توں جان دے آہن۔ شاہ نے خوشی دا اظہار کیتا تے ہک سٹیشن
 وگین سواری واسطے ملک صاحب دے سپرد کیتی۔ مدینہ طیبہ اپڑ کے سلام دی
 حاضری دے وقت ایہہ دُعا کیتی کہ میری لت نوں تکلیف اے تے تیرے اس
 نیک بندے حضرت عمرؓ دے وسیلے نال دعا منظور کر۔ کیوں جے میرے ناں دا
 پہلا حرف ایہو ای اے اللہ دا کرنا ہو یا جے معذوری ویندی رہی۔ جدہ وچ ای
 مشہور متشرق جان فلسی نال ملاقات ہوئی۔

بیماری تے وفات

7 مارچ 1944ء نوں بیماری شروع ہوئی۔ معمولی بخار چڑھیا حکیم
 نے جلاب دتا بخار دا افاقہ ہو یا پر خسرہ نکل آیا جس توں کمزوری ودھ گئی۔
 تھوڑے دناں بعد خسرہ ٹھیک ہو گیا پر کمزوری بدستور رہی۔ بیماری دا سارا وقت
 سرگودھے اپنی کوٹھی تے لگھایا۔ 24 مارچ نوں بظاہر ٹھیک ٹھاک نظر آوندے
 آہن۔ انڈہ دُدھ ملا کے پیتا لیٹ گئے تے اپنے خالق کول اپڑ گئے۔

مقبرہ

ملک خضر حیات خان اس ویلے پنجاب دے وزیر اعلیٰ آہن۔ ملک
 صاحب دی قبر جہانگیر دی قبر دے نمونے تے بنوائی۔ اسی طرح دے قبر دے
 آس پاس اسما حسنی لکھوائے اپنے باغ کالرہ وچ ای دفن ہوئے جتھے ایہناں

دے دو جے رشتہ داراں دیاں قبریں آہن۔

سیرت

ملک عمر حیات خان ضلع سرگودھا دی ہک منی پرونی شخصیت آہن۔
جہناں دے دوست تے دشمن سارے ای گن گوندے نیں۔ کدی وی کسے نوں
جان بچھ کے نقصان نہ دتا۔ کدی کسے توں فائدہ اٹھاؤنا پسند نہ کیتا۔ ہر موقع
تے ہر ضرورت مند دی مدد کیتی۔ ہمیشہ خدا تے بھروسہ رکھیا۔ لڑائی وچ ہمیشہ
سب توں اگے رہے۔ اچھا ہستیاں کدی کدائیں پیدا ہوندىاں نیں روز
نہیں۔ انہاں دی وفات توں بعد کالرے دا زوال شروع ہو گیا۔ اج کل تاں
اُکوں ای معاملہ ٹھپ گیا اے۔ نذر حیات امریکہ گُ گیا تے اوہ کدی انتھے نہیں
آیا زیناں ونڈی گئیاں رہے رب داناں۔

ملک خضر حیات خان

ملک خضر حیات 1900ء وچ ملک عمر حیات خان دے گھر جے اپنے
والد دی طرحاں اپچی سن کالج وچ تعلیم حاصل کیتی۔ دہلی دربار وچ اپچی سن
کالج دے نمائندے دی حیثیت نال شریک ہوئے۔ 1914ء وچ کمشن
حاصل کیتا 1921ء عارضی بھرتی افسر مقرر ہوئے۔ شاہ پور ڈسٹرکٹ بورڈ دے
صدر وی رہے۔ ایہہ اول درجے دے مجسٹریٹ تے اسٹنٹ مجسٹریٹ دے
اختیارات وی ورتدے رہے۔ 1931ء وچ کانگریس دی طرفوں عدم تعاون دی
تحریک سُرخ پوش تحریک دے خلاف انگریزاں دی مدد کیتی۔ فوج وچ خدمات

سرنجام دینے دی وجہ توں انہاں نوں O.B.E فوجی اعزاز دتا گیا۔ جاپان تے ہندوستان دے درمیان ہون والی گل بات وچ کپاہ پیدا کرن والے زمینداراں دی طرفوں شامل ہوئے۔ جارج پنجم دی رسم تاج پوشی تے ایہناں نوں سلور میڈل دتا گیا۔ 1937ء وچ پبلک ورکس دے وزیر بنے 1944ء وچ سکندر حیات دی وفات مگروں پنجاب دے وزیر اعظم بن گئے۔ (پنجاب دا وزیر اعلیٰ وزیر اعظم اکھواندا آ) قائد اعظم دی خواہش آ ہی جے ایہہ یونینسٹ پارٹی توں الگ ہو وئجن ایہہ مسلم لیگ دے خلاف کم کردے رہے۔ مسلم لیگ نے ہک وکھرا پارلیمانی گروپ بنا کے مخالفت شروع کر دتی خضر وزارت نوں انگریز سہارا دیندے رہے۔ خضر وزارت نوں مسلم لیگ نے سکھ دا ساہ نہ لین دتا۔ ملک صاحب دے اعتبار والے لوگ بلدیوسنگھ تے چھوٹو رام آہے۔ جد پنجاب دے حالات خراب ہوئے تے ملک صاحب نے ماں دی ضد تے وزارت توں استعفیٰ دے دتا۔ بلکہ بقول مسٹر ظفر اللہ خان ماں نے استعفیٰ لکھوا کے قائد اعظم نوں پیش کر دتا۔ اس توں بعد عوام دا غصہ ٹھنڈا ہو گیا۔ 1947ء توں اوہ سیاست توں کنارہ کش ہو گئے تے اخیر تک رہے۔

وفات اور سیرت

خضر حیات 19 جنوری 1975ء نوں فوت ہو گئے۔ تھل پراجیکٹ خضر وزارت دا بڑا وڈا کارنامہ اے۔ جیہڑا 1939ء وچ ہويا۔ جنگ عالمگیر دے باجود کم نہ روکیا۔ ایس توں 10 لاکھ تھل دی زمی

سیراب ہوئی۔ ایس طرح سرگودھا وچ شاہپورتوں بھیرہ تک تے سرگودھا
توں کٹھہ تک پکی سڑکاں بنوائیاں۔ جھاوڑیاں دا ہائی سکول بنوایا۔ متحدہ
پنجاب دا آخری وزیر اعلیٰ آہ۔

☆☆☆



نون خاندان



ملک فیروز خان نون

فیروز خان توں کچھے نون سیاست

سرگودھے دے پراچے

نون خاندان

ضلع سرگودھا سیاست دے میدان دا شہسوار اے۔ اس نے وڈے سیاست دان تے لیڈر پیدا کیتے۔ متحدہ پاکستان دا آخری وزیر اعظم ملک فیروز خان نون تے متحدہ پنجاب دا آخری وزیر اعلیٰ ملک خضر حیات ٹوانے دا تعلق سرگودھے نال ای آہا۔ ہُن تائیں ایہناں خانداناں دے لوک سیاست وچ اگے اگے نیں۔

اس خاندان دے نھیال ٹوانے آہن تے ایہہ خاندان اسے خاندان دے نال رہیا۔ ایہناں دے ناں وی ہکا چیسے آہن۔ اس خاندان وچ وی فتح خان تے جہان خان ہوئے۔ جہناں مہاراجہ رنجیت سنگھ دی خدمت کیتی تے کئی دیہات فوجی خدمت دے بدلے وچ وصول کیتے۔ بغاوت ملتان وچ ایہہ انگریزاں دے نال رہے۔ جہلم تے بنوں تے چڑھائیاں کیتیاں۔ فتح خان نوں 1200 روپیہ پنشن ملدی آہی تے اس دے پتر محمد حیات کول بھیرہ دے نیڑے 3000 ایکڑ زمین آہی۔

نون خاندان دا بندہ خان بہادر ملک محمد حاکم خان 1857ء دی جنگ آزادی وچ ملک فتح شیر خان دے رسالے وچ شامل آہا۔ کئی مہماں وچ حصہ لیا تے زخمی وی ہوئے۔ انگریزاں دے خیال دے مطابق ایہہ وڈا شاہ زور آہا۔ انگریزاں دی وڈی خدمت پاروں ملاقات دے دروازے انگریزاں ہر ویلے کھلے رکھے۔ اس نوں وی گھوڑے پالن دا شوق آہا۔ 1857ء دی خدمات دے بدلے وچ 675 روپے پنشن تے ہک وڈی جاگیر ملی۔ اس توں کچھ ملک حاکم پولیس وچ بھرتی ہو گئے۔ انسپکٹر دے عہدے نوں تحصیلداری نال بدلوا لیا تے لوکاں دی بے لوث خدمت کر کے ناں کمایا۔ ملک حاکم خان نے حکومت کولوں 5000 ایکڑ زمین سستی خرید لئی تے اپنی ریاست بنائی۔ تے جلدی نال نون خاندان وچ پنجاب دے وڈے وڈے جاگیرداراں وچ شمار ہوون لگ پیا۔ 1888ء وچ ڈویژنل درباری دی سیٹ مل گئی۔ اسے سال خان بہادر دا خطاب وی مل گیا۔ ایہناں دے پتریر محمد حیات خان اس توں پہلے ای ڈویژنل درباری آہن۔ حاکم خان دا وڈا پتر اعزازی مجسٹریٹ بنایا گیا۔

فیروز خان نون

محمد حیات دا پتر فیروز خان 1875ء وچ جمیا اپکی سن کالج وچ پڑھیا تے بعد وچ آکسفورڈ وچ تعلیم حاصل کیتی۔ 1917ء وچ ہائی کورٹ وچ وکالت شروع کیتی۔ 1967ء وچ لوکل سیلف گورنمنٹ دے وزیر بنے۔ ترے سال کم کرن توں بعد تعلیم دے وزیر بن گئے۔ 1934ء وچ انگلستان وچ ہائی

کمشنر بنادے گئے۔ واپسی تے وائسرائے دی ایگزیکٹو کونسل دارکن بنادتا گیا۔ 1945ء تائیں کونسل وچ ڈیفنس ممبر دے طور تے کم کردے رہے۔ اس زمانے وچ ایہناں امپیریل وار کیمنٹ تے پیسیفک وار وچ ہندوستان دی طرفوں نمائندگی کیتی۔ اس توں کچھ ایہہ مسلم لیگ وچ آ گئے۔ پنجاب وچ خضر وزارت تے سیفٹی ایکٹ دے خلاف مسلم لیگ دی تحریک تے قید ہو گئے۔ ایہناں دیہاڑیاں وچ ایہہ ای خیال عام آہا جے مسلم لیگ دی اسمبلی پارٹی دی قیادت فیروز خان دے حصے وچ آوسی۔ پرافتخار حسین ممدوٹ جس دیاں مالی قربانیاں زیادہ آہن۔ تے دولتانہ، فیروز خان نوں ممدوٹ دے مقابلے وچ اپنے واسطے گھٹ خطرناک سمجھدا آہا۔ ممدوٹ دی دھڑکیتی۔

1947ء وچ مجلس دستور ساز دارکن چنیا گیا۔ پاکستان بن توں کچھ اتحادی فوجاں دے اقتصادی کمشن برائے مشرق بعید دے اجلاس وچ شریک ہوئے۔ 1945ء وچ برطانیہ نے جیہڑا سردا خطاب دتا آہا۔ قائد اعظم دی ہدایت تے 1946ء وچ واپس کردتا۔

جھاوڑیاں دی جاگیر تے نوں

ملک فیروز خان صاحب نے اپنی کتاب جس داناں چشم وید اے۔ وچ لکھیا اے کہ جھاوڑیاں وچ ایہناں دے دادے دی جاگیر آہی تے لوکاں فتح خان دے ناں دی وجہ توں اس نوں فتح خان ٹوانہ سمجھ لیا۔ اس گل دا ایہناں ثبوت ایہہ دتا جے 1936-41ء وچ جداوہ لندن گئے تے اتھے انڈیا آفس

لاہری وچ میجر ایڈورڈز دی ڈائری مل گئی۔ ایہناں 1849ء وچ بنوں توں لے کے لاہور تائیں گھوڑے تے سفر کیتا۔ اوہ روزانہ 10 میل سفر کریندے آہن۔ ایسے سفر وچ ایہناں جھاوڑیاں دی قیام کیتا تے لکھیا جے ایہہ گاؤں فتح خان (نون) دی جاگیر اے۔

حالانکہ صورت حالت ایہہ تے جے ایہہ جاگیر فتح خان ٹوانہ دے والد ملک خاں نوں مٹھ ٹوانہ دی جاگیر دے بدلے وچ 1822ء وچ سکھاں دتی آہی اس ویلے تائیں اس دا دادا ملک فتح خان نون 1818ء وچ فوت ہو گیا آہا۔ ملک فتح خان ٹوانہ جھاوڑیاں وچ ای کوٹھے دی چھت پٹھ آ کے مویا۔ اس واسطے اس جاگیر دا ملک صاحب نوں ٹپلا لگا۔

پاکستان دی سیاست وچ نوناں دا حصہ

پنجاب دی پہلی کابینہ وچ دولتانہ تے ممدوٹ دی رسہ کشی شروع ہو گئی۔ 1951ء دے انتخابات دے پچھے ملک فیروز خان داناں بطور وزیر اعلیٰ لوکاں دی زبانان تے آہ کہ ملک فیروز خان ای پنجاب دا وزیر اعلیٰ بنسی۔ پر ملک صاحب نوں مشرقی پاکستان دا گورنر بنا کے کھل دتا گیا۔ ممتاز دولتانہ وزیر اعلیٰ بن گئے پر احمدی تحریک دی وجہ توں ممتاز دولتانہ نوں ہٹا کے فیروز خان نون نوں وزیر اعلیٰ پنجاب بنا دتا گیا۔ ممتاز دولتانہ نوں ایہہ گل پسند نہ آئی۔ آخر 22 مئی 1955ء ایہناں دی حکومت ختم ہو گئی۔

سیاسی رسہ کشی

ملک صاحب دی اس توں پچھے مسلم لیگ نال نہ نبھ سگی تے ایہناں اپنا وکھرا گروپ بناؤنا شروع کر دتا۔ چودھری محمد علی نے نون گروپ نوں مسلم لیگ ڈائلٹ ای نہ دتا۔ الزام ایہہ لایا جے ایہناں پارٹی دے خلاف ورزی کیتی اے۔ اس طرحاں ایہناں نوں 5 سال واسطے مسلم لیگ توں کڈھ دتا گیا۔ ایہناں دی قسمت پلٹا کھاد۔ ون یونٹ بن گیا تے نون صاحب ریپبلکن پارٹی وچ رل گئے۔ سہروردی دی کابینہ وچ وزیر خارجہ بن گئے۔ چندریگر جد حکومت نہ چلا سکے تے فیروز خان نون نوں 13 دسمبر 1957ء نوں وزیر اعظم بنا دتا گیا۔ اکتوبر 1958ء نوں ایوب خان مارشل لاء لا دتا تے ایہہ زبردستی ریٹائر کر دتے گئے۔ 31 دسمبر 1966ء نوں جد ایوب خان جبری ریٹائر کرن دا منصوبہ بنایا تاں ملک صاحب 31 دسمبر 1966ء نوں رضا کارانہ طور تے سیاست توں ریٹائر ہو گئے۔

ملک فیروز خان تے سرگودھا

ملک فیروز خان نون ہوراں اپنی سیاست دے دوران سرگودھا دی تاریخ وچ وڈے کم کیتے۔ ایہناں تحریک پاکستان وچ بھرپور حصہ لیا۔ 1946ء دے انتخاب وچ خضر حیات خان دے خلاف انتخابی جلسے کر کے مسلم لیگ وچ جان پائی۔ ملک ممتاز خان دی انتخابی مہم چلائی۔ ملک صاحب کھدر دی پیٹ تے کھدر دی بوٹرٹ پاندے آہن۔ اتھے ایہناں دے نال شوکت حیات نے

وی کم کیتا۔ فیروز خان 1918ء وچ سرگودھا بار دے ممبر بنے۔ اس وقت سرگودھے بار دے ممبراں دی کل تعداد 35 آہی۔ سرگودھے وچ جد مسلم لیگ دا دور شروع ہويا تے ایتھوں دی زبان وچ لوک اس نوں مسلم لیگ آدھے آہن۔ لیگ دے معنی ”لکیر“۔ دیہاتیاں نوں ایہہ دسیا گیا کہ ایہہ اسلام دی لکیر اے۔ اس دے ہک پاسے مسلم لیگ تے اسلام اے تے دوجے پاسے کفر اے۔ اس واسطے مسلم لیگ نوں ووٹ دیو۔ اوہ زمانہ وڈا سادا تے سدھا سادھا آہا۔ لوکاں ایسے گل نوں سچ سمجھ کے مسلم لیگ نوں ووٹ دتے۔

ملک صاحب دا ایہہ لطیفہ وی وڈا مشہور ہويا۔ جلسے نوں جد خطاب کرنا شروع کریندے تے لوکاں نوں آدھے درود شریف پڑھوتے آپ زور نال لا اِله الا اللہ یعنی کلمہ شریف پڑھدے ساری عمر وڈے عہدیاں اُتے رہن دے سببوں ایہناں دی وجہ نال سرگودھے دی سیاست اُتے کافی اثر پیا تے مسلم لیگ نوں طاقت ملی۔

گوادردا مسئلہ تے فیروز خان

پاکستان دا 2400 مربع میل دا علاقہ سلطان مسقط دے قبضے وچ آہا۔ اس دی کہانی کجھ انج اے جے 1781ء وچ مسقط دے کسے شہزادے قلات دے حکمران کول پناہ لئی۔ قلات دا حکمران اس ویلے خود مختار بادشاہ آہا۔ اس بادشاہ نے گوادردا علاقہ جس دی سالانہ آمدنی 84 روپے آہی۔ شہزادے دے گزارے واسطے دے دتا۔ جد ایہہ شہزادہ مسقط دا بادشاہ بنیا تے وت وی

اس اتھے قبضہ برقرار رکھیا۔ 1839ء وچ برطانیہ نے قلات فتح کر لیا تے وت وی گواردر مسقط کول ای رہیا۔ 1861ء وچ وائی قلات نے اس دی واپسی دا مطالبہ کیتا پر برطانیہ نے بچ بچاؤ کر کے معاملہ ٹھڈھا کر چھوڑیا۔ 1947ء وچ پاکستان بن گیا حکومت ہک واری وت مسئلہ اٹھایا۔ پر کجھ نہ بنیا۔ 1956ء وچ جد ملک فیروز خان وزیر خارجہ ہوئے تے ایہناں گواردر دا سارا کیس منگوا کے برطانیہ دے ذریعے کوشش کیتی لیکن کوئی گل سرے نہ چڑھی۔

1957ء وچ جد ملک صاحب وزیر اعظم بنے تے ایہناں پہلی واری ایہہ قانونی نکتہ اٹھایا کہ گواردر دی حیثیت ہک جاگیر توں ودھ نہیں۔ اس نوں ہک شخص نوں اس واسطے دتا گیا کہ اوہ اوتھوں ٹیکس وصول کر کے اپنا گزارہ چلائے۔ یا اس رقم نوں اپنی تنخواہ خیال کرے۔ اس طرح دی امداد دینے نال اقتدار اعلیٰ دے ملن دا سوال ای پیدا نہیں ہوندا۔ ہُن باقی جاگیراں جیہڑیاں برطانیہ توں خدمات دے صلے وچ ملیاں ہوئیاں آہن یا دوجی سیاسی اسباب دے پاروں ملیاں ہوئیاں آہن۔ اوہ ساریاں جاگیراں منسوخ ہو گئیاں آہن۔ اس واسطے ہُن اس جاگیر دا وی کوئی جواز نہیں۔ ایہہ ہک قانونی نکتہ آہا جیہڑا ساڈے کم آیا تے وڈی خوشی نال سلطان مسقط پاکستان منتقل کرن اُتے تیار ہو گیا۔ 1958ء وچ جد ملک صاحب لندن گئے تے پاکستانی ہائی کمشنر مسٹر اکرام اللہ نے ملک فیروز خان نوں جد اوہ دستخط شدہ دستاویز جیہڑی گواردر دی منتقلی دے بارے وچ آہی دکھائی تے ملک صاحب خوشی نال پھل گئے۔ پنڈت نہرو نے ملک صاحب نوں دلی وچ خصوصی طور تے پچھیا کہ گواردر تاں

تساں لے لئی اے تے اتھے ہندوواں دا کیہ بنسی۔ ملک صاحب نے دسیا کہ اوہ پاکستان دے شہری نیں تے ایہناں نوں کوئی خوف نہیں ہونا چاہیدا۔ ایہہ خوشی دی گل اے کہ اوہ ہُن تائیں پاکستان وچ ای رہ پئے نیں۔ ایہناں دی تعداد اس ویلے 300 اہی۔ گوادر سمگلراں دی جنت آہی۔ گوادر دے بدلے پاکستان نے مسقط نوں رقم ادا کیتی پر اوہ ساری رقم محصول نال کئی گنا زیادہ وصول ہو گئی اے۔ سلطان نال وی حالات دوستانہ نیں۔ پاکستان ایہہ ضرور احتیاط کیتی کہ گوادر دی منتقلی دا کوئی جشن نہ منایا گیا۔ کیوں جے اس طرح سلطان دے جذبات نوں ٹھیس پہنچن دا ڈر آہا۔

سرگودھا کالج وچ آمد

ملک صاحب 1955ء وچ وزیر اعلیٰ پنجاب بنے تے اوہ ہک دیہاڑے بغیر دسے ڈی۔ سی۔ بشیر تارڑ صاحب دے نال کالج آ گئے۔ ایس ویلے کالج پی۔ اے۔ ایف والی بلڈنگ وچ آہا۔ پہلاں ایہناں نے کارتوں اُتر کے طالب علماں نال گپ شپ لائی تے گلاں گلاں وچ پچھیا کہ اتھے بی ایس سی دیاں کلاساں اہن جداساں دسیا جے کوئی نہیں تے اتھے ای کالج دے گیٹ تے کلاساں دی منظوری دا اعلان کر کے چلے گئے۔ ہال دے اندر امتحان ہو رہیا آہ۔

گورنمنٹ ہائی سکول بھیرہ وچ

ملک صاحب نے کجھ عرصہ گورنمنٹ ہائی سکول بھیرہ وچ وی پڑھیا

تے اس دا ذکر اپنی کتاب چشم وید وچ کیتا اے۔ کہ اوہ 1904ء وچ اپنے بھرا علی دے نال داخل ہوئے تے ایس ویلے سکول وچ بورڈنگ دارواج نہ۔ ایسے واسطے ایہناں نوں ہک پرائیویٹ مکان وچ رہنا پیا۔ ایسے سکول دے ہک ماسٹر صاحب دا قصہ وی لکھیا اے جے ایہناں نوں کرسی اُتے بہہ کے ٹنگاں میز دے اُتے رکھ جھوٹے لین دی عادت آہی۔ ہک دن خدا دا کرنا ایہہ ہويا جے ماسٹر صاحب لما جھوٹا لے بیٹھے تے ایہناں دیاں ٹنگاں اسمان الے پاسے تے سر زمیں والے پاسے ہو گیا۔ ساری جماعت اس اچانک ڈرامے توں وڈی خوش ہوئی۔ استاد صاحب سر اُتے ہمیشہ پگڑی بندھ کے رکھدے آہن۔ ایس مجبوری دا تہ پتہ لگا جد ایہناں دی پگڑی سرے توں لیہہ کے پرانہہ ونج پئی تے پتہ لگا کہ ایہناں دے سرتے وال ای کوئی نہیں۔ آخر دو طالب علماں مسے استاد صاحب نوں کڈھیا تے اس توں کچھ ایہناں انجے ہار جھوٹے لین توں توبہ کر لئی۔

وزارت عظمیٰ توں چھٹی

سکندر مرزا جد سپین دے دورے توں واپس آئے تے اتھے جنرل فرانکو دی ڈکٹیٹر شپ ایہناں نوں وڈی پسند آئی تے اتھے آ کے اوہ جمہوریت دے خلاف ہو گئے۔ سکندر مرزا نے آئین منسوخ کر کے وزیر اعظم فیروز خان نوں نوں جیہڑا خط لکھیا اوہ کجھ اس طرح دا محبت دا لکھیا گیا۔ پر بعد وچ ایوب خان نے اس دی ڈکٹیٹر بنن دی حسرت پوری نہ ہون دتی تے سارے اختیارات اُتے قابض ہو گیا۔ خط ایہہ سی۔

ایوان صدر کراچی

7 اکتوبر 1958ء

مائی ڈیر سرفیروز

میں وڈے غور تے فکر نال اپنے گوڑ دے مطابق اس نتیجے اُتے
اڑیاں واں کہ اس ملک دا استحکام اس ویلے تائیں پیدا نہیں ہو سگدا جد تائیں
ایہہ ذمہ داریاں میں آپ نہ سنبھال لیواں تے انتظامیہ دے سارے اختیارات
اپنے ہتھ وچ نہ لے لیواں۔ 3 مارچ دا آئین نہ صرف ناقابل عمل اے۔ بلکہ
پاکستان دی سلامتی واسطے خطرناک وی اے۔ اگر اسی ایس دے مطابق عمل
کریندے رہے تے ہک دیہاڑے پاکستان توں وی ہتھ دھو بہہ ساں۔

میں ایہہ فیصلہ کیتا اے کہ آئین منسوخ کر کے سارے اختیارات
آپ سنبھال لیں۔ اسمبلیاں، مرکزی پارلیمنٹ۔ مرکزی تے صوبائی کابینہ نوں
تروڑ دیواں۔ مینوں ایس گل دا افسوس اے کہ ایہہ فیصلہ تہاڈی وزارت دے
زمانے وچ کرنا پیا۔ جس وقت تہانوں ایہہ خط مجلسی اس ویلے ملک وچ مارشل
لاء لگ گیا ہو سی۔ جنرل ایوب جس نوں میں مارشل لاء دا ناظم اعلیٰ مقرر کیتا
اے اپنے اختیارات سنبھال چکے ہون گے۔

تہاڈے واسطے ذاتی طور تے میرے دل وچ وڈا احترام اے۔ تہاڈی خوشی
تے فائدے واسطے جو کجھ وی ضروری ہو یا میں بغیر کسی جیل و حجت دے کر لیاں۔

تہاڈا مخلص

سکندر مرزا

ایہہ خط رات 11 بجے وزیراعظم دی کوٹھی تے گھلیا گیا۔ سکندر مرزا دیاں ساریاں حسرتاں دل وچ رہ گئیاں جد صدر ایوب نے استتوں سارے اختیارات لے کے ملک وچوں ای کڈھ دتا۔ تے اوہ وت پرت کے پاکستان نہ آیا۔ مر کے وی پاکستان دی بجائے ایران وچ دفن ہو یا۔

ریٹائرمنٹ دے بعد ملک صاحب دی مصروفیات

ملک صاحب نے وزارت توں کچھے ایہہ چنگا کیتا جے اپنی یاداشتاں لکھ کے اس کتاب دی شکل وچ لے آئے تے اس دناں ”چشم دید“ رکھیا تے ایہہ کتاب فیروز سنز نے چھاپی۔ اس کتاب وچ اس زمانے دے ضلع سرگودھا دیاں بہوں ساریاں گلاں آ گئیاں جیہڑیاں آؤن والیاں واسطے کافی فائدہ مند ہوسن۔ کیونکہ ملک صاحب دی ساری حیاتی۔ انگریزاں دا زمانہ ویکھ کے ایہناں دے خلاف آزادی دی جنگ لڑی اس توں کچھے آزادی حاصل کر کے پاکستان دے وڈے وڈے عہدیاں تے رہے۔ ایہناں دی ایہہ کتاب ایہناں دے تجربات دا نچوڑ اے۔

کاش کوئی کتاب خضر حیات وی لکھ ویندا پر افسوس باقی حیاتی اپنی غلطی دا احساس بری طرحاں کوسدا رہیا تے اس بھل کے وی سیاست والے پاسے قدم نہ رکھیا۔ آخری عمر گمنامی وچ گزار کے ٹردا ہو یا۔

فیروز خان توں بعد نون سیاست

فیروز خان توں کچھے 1964ء وچ جد ایوب خان کنونشن مسلم لیگ

دی بنیاد رکھی تے فیروز خان داپٹر نور حیات قومی اسمبلی دا رکن منتخب ہويا۔
 1977ء وچ پیپلز پارٹی دے ٹکٹ اُتے جت کے وزیر بن گئے۔ 1985ء
 وچ وی منتخب ہوئے۔ 1988ء تے 1990ء وچ ایہہ خاندان ممبری واسطے کھلا
 ای نہیں ہويا انج ایہہ خاندان 100 سال دی قیادت توں محروم ہو گیا۔ ایہہ
 ای حال اس ویلے ٹوانہ خاندان دا اے۔ 1997ء وچ ایہناں دا کوئی
 امیدوار کامیاب نہیں ہويا۔

ٹوانہ خاندان دیاں ہور شناخاں

ٹوانہ خاندان ہُن تائیں کافی علاقے وچ ودھ کے کھلر گیا اے۔ اس
 خاندان ہک شاخ حسناں اے جس دا اصل مرکز ہموکا (حسن آباد) اے۔ خدا
 بخش ٹوانہ تے فتح محمد ٹوانہ اس داپٹر انور ٹوانہ اسمبلیاں دے ممبر رہے۔ خدا
 بخش ٹوانہ تے کافی عرصہ وزیر رہیا تے خوشاب دی سیٹ توں ہمیشہ جتدار رہیا۔
 پر مسلم لیگ نال گڑبڑ دی وجہ نال اس واری کوئی سیٹ وی نہیں لے سکے۔
 ایسے خاندان دی ہک شاخ خواجہ آباد آہی جتھے ملک خدا بخش نے
 ریاست دی بنیاد رکھی اوہ افغانستان وچ ہندوستان دے سفیر وی رہے۔ ایہناں
 داپٹر جس داناں اللہ بخش آہ۔ کافی اثر رسوخ دا مالک آہ۔ سیاست وچ کافی اثر
 رکھدا آہ۔ خضر حیات دا حمایتی تے مشیر آہ۔ پاکستان بن توں کچھے خضر حیات
 دی طرح دڑ وٹ کے وقت گزاریا۔ چونکہ ایہناں داپٹر کوئی نہ اس کر کے ادھی
 جائیداد اس دی دھی لے گئی تے ادھی دا وارث فتح خان ٹوانہ بنیا۔ کچھ مربے

اپنے بیلیاں وچ وی وٹ گیا۔

مظفر آباد شاخ وی ہک وڈی شاخ اے۔ اس دا بانی مظفر خان آہا۔
اس دا پتر احمد یار خان تے اس توں کچھ خالق یار تے قادر یار پتر ہوئے۔ پر
ایہہ خاندان سیاست وچ نہ چمک سکيا۔

سرگودھے دے پراچے

ضلع سرگودھا وچ پراچے دو شہراں دے وچ وڈی مدت دے
وسدے پئے نیں۔ ہک بھیرہ تے دو جا شاہ پور شہر۔ ایہہ دوہیں شہر دریا جہلم
دے کنارے تے آباد نیں۔ پراچے تاجر پیشہ قوم اے۔ بھیرے دے
پراچیاں سیاست وچ وی چنگا حصہ لیا۔ پر شاہ پور دے پراچے۔ تاجر پیشہ ای
رہے تے ایہناں دے کاروبار عراق تک پھیلایا ہویا اے۔ کجھ پراچے خوشاب
تے کالا باغ وچ دی ہن۔ ایہناں اوہناں شہراں نوں مرکز بنایا جیہڑے
دریاواں دے کنارے آباد آہن کیوں جے پرانے زمانے وچ دریا ای آن
جان دا ذریعہ آہن۔ سڑکاں نہ ہونے دے برابر آہن تے ایہہ شہر تجارتی
منڈیاں ہوندیاں آہن۔

پراچہ قوم دے جد امجد حضرت عزیز یحییٰ آہن۔ جیہڑے حضور اکرم
صلی اللہ علیہ وآلہ وسلم دے صحابی آہے۔ ایہناں دے ذمے فرش تے بیہن
اٹھین دا انتظام آہ۔ اس واسطے اوہ فراش اکھواندے آہن۔ ایہہ لقب ایہناں
دے خاندان بلکہ قبیلہ وچ مشہور ہویا۔ ایہناں دے پتر حضرت ابو العاصؓ لشکر

اسلام دے یمنی دستے دے امیر مقرر ہو گئے۔ خلافت فاروقی دے زمانے وچ جد لشکر اسلام ایران فتح کرن واسطے گھلیا گیا۔ اس لشکر وچ حضرت ابو العاصؓ وی آہن۔ ایہہ ایران ای رہ پئے تے اتھے ای شادی کر لئی تے فراشہ ای مشہور ہوئے۔

کابل دی فتح دے ویلے ہک عرب سردار امیر مہلب فراشہ مشہور ہوئے۔ ایہناں کجھ لشکر دریا سندھ دے کنارے ڈھکھوٹ دے مقام تے آباد ہو گیا۔ اتھے پراچے کجھ مدت حکمران وی رہے۔ ایہہ جاہ ضلع بنوں وچ اے۔ اس توں بعد ایہہ کجھ کالا باغ وچ آباد ہو گئے۔ ہمایوں نے آہندے نیں ایہناں توں مدد منگی پر ایہناں دوہاں پاسے مسلمان ہونے دا عذر کردتا تے مدد نہ کیتی جد ہمایوں واپس آیا تے ایہناں دے خلاف ہو یا تے ایہہ ایہتھوں نس گئے۔

پراچے قالین تے کپڑا وچن دی وجہ توں۔ قالین دی نسبت نال فراش تے کپڑا دی نسبت نال پراچہ اکھواندے رہے۔ جیہڑے ہولی ہولی وگڑ کے پراچہ بن گیا۔ فراش عربی وچ قالین یا دری گھتن والے نوں آہندے نیں۔ ایس نسبت نال بغداد دے نیڑے ہک گاؤں فراشہ نال دا اے۔

شیخ فضل الہی پراچہ

سرگودھے وچ جیہڑا بندہ سب توں پہلاں سیاست وچ چمکیا اوہ شیخ فضل الہی پراچہ آہا۔ اوہ علی گڑھ یونیورسٹی توں فارغ التحصیل آہن۔ 1934ء

توں 1947ء تائیں لگاتار مرکزی مجلس قانون ساز دے رکن رہے۔ انگریزوں نے ایہناں نوں نہ صرف جاگیر دتی بلکہ خان بہادر دا خطاب وی دتا۔ قائد اعظم نے جد خطابات واپس کرن واسطے آکھیا تے ایہناں واپس کر دتا۔

پاکستان بن توں کچھ شیخ صاحب نے عملی سیاست وچ حصہ لیا۔ سیاست وچ آون توں پہلاں اوہ ہندوستان تے پاکستان وچ کافی عہدیاں تے کم کر دے رہے۔ 1951ء وچ اوہ نوکری توں ریٹائر ہو گئے تے مسلم لیگ وچ شامل ہو گئے۔ اسے سال اوہ پنجاب اسمبلی دے ممبر چنے گئے۔ دولتانہ تے عبدالمعید دتی دیاں اعلیٰ وزارتیں وچ وزیر رہے۔

شیخ فضل حق پراچہ

شیخ فضل الہی دے بھرا شیخ فضل حق وی سیاست وچ حصہ لیندے رہے۔ 1946ء وچ سرگودھے وچ اوہ مسلم لیگ دی طرفوں کامیاب ہوئے۔ ایہناں دے پتر شیخ احسان الحق 1970ء وچ کونسل مسلم لیگ دی طرفوں صوبائی اسمبلی دے ممبر بنے۔ حنیف رامے دی وزارت دے زمانے وچ جد سینٹ دے انتخاب دی واری آئی تے کونسل مسلم لیگ دے کئی ممبر پیپلز پارٹی وچ شامل ہو گئے۔ اس ویلے احسان الحق پراچہ وی کونسل مسلم لیگ چھوڑ کے پیپلز پارٹی وچ رل گئے۔ اس دے صلے وچ ایہناں دا چاچا شیخ فضل الہی پراچہ سینٹ دا ممبر بنا دتا گیا۔

1977ء دے انتخابات وچ احسان الحق پنجاب اسمبلی دے ممبر بن

گئے۔ کچھ چر صوبائی کابینہ دے رکن وی رہے۔ 1981ء وچ ایہناں دا نکا بھرا
شیخ انوار الحق مجلس شوریٰ دارکن بن گیا۔

1985ء وچ احسان الحق آپ تاں نہ کھلوتے تے ایہناں دا نکا بھرا
انوار الحق پنجاب اسمبلی دا ممبر بن گیا۔ احسان الحق صاحب نے سینٹ دا انتخاب
لڑیا تے ممبر بن گئے۔ 1988ء وچ نگران حکومت پنجاب وچ ٹرانسپورٹ دے
وزیر بن گئے۔ 1988ء وچ دوہاں بھراواں انتخاب لڑیا۔ احسان الحق جت گیا
تے دوجا بھرا کامیاب نہ ہوسکیا۔ بے نظیر دے دور وچ وزیر خزانہ رہے۔

1990ء وچ دوہاں بھراواں پی ڈی اے دے ٹکٹ اُتے الیکشن لڑیا
تے دوہیں جت گئے۔ اس واری احسان صاحب مرکزی سیٹ اُتے جتے
انوار صاحب صوبائی سیٹ اُتے اپریل 1993ء وچ بلخ شیر مزاری دی نگران
کابینہ وچ احسان الحق پراچہ صاحب وزیر تجارت بنائے گئے۔ 1993ء وچ وی
الیکشن لڑیا پر دوویں کامیاب نہ ہوئے۔ 1994ء وچ احسان الحق سینٹ دی
سیٹ تے کامیاب ہو گئے۔



انگریزی حکومت دا اجمالی خاکہ

انگریزاں دانتھے آؤناتے وینا

کمشنر سرگودھا ڈویژن

سرگودھا دیاں جاگیردار قوماں

انگریزی حکومت دا اجمالی خاکہ

برصغیر وچ انگریزاں دا آونا

سب توں پہلاں جیہڑی یورپی قوم برصغیر وچ آئی اوہ پرتگالی آہن۔
ایہناں اتھے سولھویں صدی آرام نال گزاری۔ ستارھویں صدی دے شروع وچ
ای انگریز ولندیز (ہالینڈ دے لوک) تے فرانسیسی وی اتھے ایہناں دی ویکھا
ویکھی اپڑ پئے۔ پرتگالیاں نے اتھے لٹ مچائی سوداگراں دے جہاز لٹے
لوکاں نوں تنگ کیتا۔ اس کر کے دوجیاں قوماں دے آون نال ایہناں جدا اپنی
دال نہ گلدی ڈٹھی تے ایتھوں ولندیز تے پرتگیز کھسک گئے۔ ولندیزیاں اتھوں
نکل کے ملایا تے انڈونیشیا اُتے قبضہ کر لیا۔ آخر فرانسیسی تے انگریز میدان وچ
رہ گئے۔ لیکن کلائیو دے آون نال فرانسیسیاں دا کم گڑ بڑ ہو گیا اُتے ملک تے
قبضہ کرنے وچ کامیاب نہ ہو سکے۔ ایہناں دیاں آپس وچ لڑائیاں وی
ہوئیاں جہناں وچ اوہ مات کھا گئے۔ تے انگریز ہکے میدان وچ رہ گئے تے
ہولی ہولی اوہ بنگال والے پاسیوں لڑدے لڑدے سارے ملک اُتے قابض ہو

گئے۔ آخری صوبہ پنجاب آبا جس دے اُتے ایہناں 1849ء وچ سکھاں نوں شکست دے کے قبضہ کیتا۔ انگریزاں دے اتھے کامیابی دی سب توں وڈی وجہ دو جیاں یورپیاں قوماں دے مقابلے وچ سمندری فوج دی طاقت آہی۔ جس دا دو جیاں قوماں مقابلہ نہ کر سکیاں۔ تے میدان انگریزاں نوں دے کے ایتھوں ہمیشہ دے واسطے ٹر گئیاں۔

انگریزاں سب توں پہلاں بنگال اُتے قبضہ کیتا۔ اس حکومت دی بنیاد کلائیو نے رکھی۔ اس نے نواب سراج الدولہ نوں شکست دے کے قبضہ کیتا۔ اس توں کچھ 1774ء وچ وارن سینگز آیا۔ اس نے 1774ء تا 1785ء حکومت کیتی اس دے زمانے وچ میسور دیاں جنگاں دی ابتداء ہوئی۔ اس دے زمانے پچھوں میسور تری جنگ سلطان ٹیپو نال ہوئی۔ اس توں کچھ سر جان شور آیا۔ ایہہ 1793ء توں 1798ء تک رہیا۔ اس دے جان تے لارڈ ولزلی آیا۔ ایہہ 1797ء توں 1805ء تائیں اتھے رہیا۔ اس دے زمانے وچ میسور دی چوتھی جنگ ہوئی تے انگریزاں میسور اُتے قبضہ کر لیا۔ اس دے نال ای اس نے مرہٹیاں دی طاقت وی ختم کر دتی۔ اس نے اپنی پالیسی دی بدولت انگریزی حکومت دے برصغیر وچ قدم جما دتے اس واسطے اس نوں انگریزی حکومت دا برصغیر وچ حقیقی بانی آکھیا ویندا اے۔

ولزلی توں کچھ لارڈ کارنوالس آیا پر اوہ ترے مہینے توں کچھ مر گیا۔ اس دی جاء تے سر جان بارلو 1805ء توں 1807ء تک رہے اس توں بعد لارڈ منٹو نے 1807ء توں 1813ء حکومت کیتی۔ اس دے زمانے وچ

رنجیت سنگھ نے اپنی طاقت ودھا کے سارے پنجاب اُتے قبضہ کر لیا۔ تے ستلج تک اپڑ گیا۔ انگریزاں ایس نوں ڈکن واسطے 1809 وچ امرتسر دے مقام اُتے معاہدہ کیتا جس وچ دریائے ستلج نوں دوہاں دے وچکار حد منیا گیا۔

وارن ہیسٹنگز 1813ء وچ آیا تے ایہہ 1823ء تک رہیا۔ اس دے زمانے وچ مرہٹاں دی تری جنگ ہوئی اس توں کچھ لارڈ ایمرسٹ 1823ء وچ اتھے آیا 1828ء تائیں اتھے رہیا۔ اس دے زمانے وچ برما دی جنگ ہوئی تے شملہ گرمائی دارالحکومت بنیا اس توں کچھ لارڈ پینٹنگ آیا ایہہ 1828ء توں 1835ء تائیں رہے تے اس دا زمانہ اصلاحات دی وجہ نال مشہور اے۔ اس توں کچھ لارڈ آک لینڈ 1835ء وچ آیا تے اس دے زمانے وچ افغانستان نال پہلی جنگ ہوئی۔ ایہہ 1842ء تائیں رہیا تے اس توں کچھ کمانڈر ایلن برا آیا اس دا زمانہ 1842ء توں 1844ء تائیں اے تے اس دے زمانے وچ 1843ء دے سال سندھ فتح ہويا تے انگریزی سلطنت دا حصہ بن گیا۔ اس توں بعد لارڈ ہارڈنگ 1844ء توں 1848ء تائیں رہیا اس دے زمانے وچ سکھاں نال پہلی جنگ ہوئی تے پنجاب دے فتح دامڈھ بجھ گیا۔

انگریز حالی تائیں ساڈے علاقے اُتے قابض نہیں ہوئے آہن۔ اس توں پہلاں دے جہناں حکمراناں دے حوالے دتے گئے نیں۔ اوہ صرف تسلسل رکھن واسطے ہے۔ ویسے ایہناں دا ساڈے پنجاب تے سرگودھے دی تاریخ نال کوئی تعلق نہیں۔ حالے تائیں سکھاں دی حکومت رہی پر اوہ ہُن آخری ساہاں

تے خانہ جنگی دی وجہ توں اپڑ گئی آہی۔

لارڈ ڈلہوزی 1848ء تاں 1856ء اسے زمانے وچ سکھاں دی حکومت پنجاب وچوں مک گئی تے انگریز اتھے حاکم بن گئے۔ ایسے زمانے وچ سکھاں نال چیلیاں آ لے آخری لڑائی ہوئی اے۔ جس وچ سکھاں نوں شکست فاش ہوئی تے انگریز پنجاب اُتے قابض ہوئے۔ ایہتھوں انگریزاں دی حکومت دامدھ بچھدا اے۔ ایسے دے زمانے وچ مواصلات نوں وڈی ترقی ہوئی۔ ڈاک ریل تے تار دا نظام جاری ہويا۔

لارڈ کینگ ایہہ 1856ء تاں 1857ء بطور گورنر جنرل دے کم کردا رہیا تے اس دے زمانے وچ جنگ آزادی لڑی گئی۔ 1857ء تا 1862ء ایہہ بطور وائسرائے کم کردا رہیا۔ کمپنی دی حکومت ختم ہو گئی تے ملک ملکہ وکٹوریہ دے ماتحت ہو گیا۔ ایسے زمانے وچ ساڈے ملک وچ جاگیردار طبقہ پیدا ہويا۔ مٹھ ٹوانے دے شیش محل تے 1857ء دی تحریر موجود اے۔ اس توں بعد لارڈ الگن 1862ء تا 1864ء وائسرائے بن کے آیا اس توں کچھ لارڈ لارنس دا زمانہ آیا اوہ 1864ء توں 1869ء تائیں رہیا اس توں کچھ لارڈ میو آیا جیہڑا 1871ء وچ جزائر، انڈیمان دے دورے تے شیر علی رمضان دے ہتھوں قتل ہو گیا۔ لاہور دا میو ہسپتال اس دی یادگار اے۔

لارڈ نارتھ بروک لارڈ میو توں کچھ آیا۔ ایہہ 1872ء تا 1876ء رہیا اس توں کچھ لارڈ لٹن آیا۔ اس دے زمانے وچ علی گڑھ یونیورسٹی دی بنیاد رکھی گئی۔ لاہور وچ لٹن روڈ ایسے دے ناں تے رہی ایہہ 1876ء تا

1880ء رہیا۔ اس توں پچھے لارڈ رپن آیا اس دا زمانہ 1880 تا 1884ء اے۔ اس زمانے وچ لوکل سیلف گورنمنٹ دی بنیاد رکھی گئی تے شہراں وچ ڈسٹرکٹ بورڈ میونسپل کمیٹیاں دی ابتدا ہوئی۔ اس توں پچھے لارڈ ڈفرن آیا تے اس دا زمانہ 1884ء تا 1888ء اے۔ ایس توں پچھے لارڈ لینٹرن 1888 تا 1894ء رہیا اس توں بعد لارڈ ایلگن آیا اس دے زمانے وچ کال تے طاؤن پھیلی۔ اس دا عہد 1894ء تا 1899ء اے۔ اس توں پچھے لارڈ کرزن آیا اس دا زمانہ 1899 تا 1905ء اے اس دے زمانے وچ محکمہ آثار قدیمہ دی بنیاد رکھی گئی۔

لارڈ منٹو 1905ء تا 1910ء تک اتھتھے وائسرائے رہیا اس دے زمانے وچ مسلم لیگ دی بنیاد 1904ء وچ رکھی گئی۔ لارڈ ہارڈنگ 1910ء تا 1914ء رہیا اس دے زمانے وچ پہلی عالمی جنگ چھڑ گئی دوجی گل ایہہ ہوئی جے کلکتہ دی بجائے دہلی نوں دارالحکومت بنایا گیا۔ اس دی تحریک عمر حیات ٹوانے نے کیتی آہی، اس توں پچھے لارڈ چیمسفورڈ اس دا زمانہ 1914 توں 1921ء تک اے اس دے زمانے وچ جنگ ختم ہو گئی تے دنیا سکھ دا ساہ لیا۔

اس توں پچھے لارڈ ریڈنگ آیا اس نے 1921 توں 1925ء تک حکومت کیتی۔ اس رولٹ ایکٹ منسوخ کردتا۔

لارڈ ارون (1925 توں 1931) اس دے زمانے وچ سائمن کشمن بنیا اس دے استعفیے دے پچھے لارڈ ولنگٹن (1931 تا 1936) گورنر

جنرل بن کے آیا ایس دے زمانے وچ جارج پنجم مرگیا تے ایڈورڈ ہشتم بادشاہ بن کے دستبردار ہو گیا تے جارج ششم بادشہ بن گیا۔ لارڈ لنتھگو (1931 توں 1936) اس دے زمانے وچ دوجی وڈی لام لگی۔ لارڈ ویول (1936 توں 1947) جنگ دا خاتمہ۔ شملہ کانفرنس، آخری وائسرائے لارڈ ماؤنٹ بیٹن 1947ء اس دے زمانے وچ برصغیر آزاد ہو کے پاکستان تے بھارت بن گیا۔

فہرست ڈپٹی کمشنر ضلع شاہ پور / سرگودھا

نمبر شمار	ناں	عرصہ
1	میجر ڈبلیو سی بریج	25 دسمبر 1852
2	جی ای ہو لنگو	6 جنوری 1853ء توں 30 مئی 1860ء
3	گوراہلی	31 مئی 1856ء توں 6 مارچ 1860ء
4	دی سی میکناپ	10 مارچ 1860ء تا 20 اگست 1861ء
5	کپتان جے بی سملی	21 اگست 1961ء تا 25 دسمبر 1861ء
6	کپتان ایچ جے ہاؤس	26 دسمبر 1961ء تا 25 جولائی 1862ء
7	کپتان جی ڈیوس	26 جولائی 1862ء تا 11 دسمبر 1867ء
8	کپتان ڈبلیو جی ایچ جانسن	12 دسمبر 1867ء تا 16 مئی 1870ء
9	کپتان ای پی گورڈن	27 مئی 1870ء توں 10 نومبر 1870ء
10	کپتان ای سی کاربائن	11 ستمبر 1870ء توں 8 مارچ 1872ء
11	کپتان آر پی نسبت	9 مارچ 1872ء توں یکم دسمبر 1872ء
12	کرل ایچ اے ڈائر	2 دسمبر 1872ء توں 26 مارچ 1876ء

13	کپتان ای سی کار بائین	27 مارچ 1876ء توں 9 ستمبر 1879ء
14	جے فریزل	13 دسمبر 1879ء توں 15 جنوری 1882ء
15	لیفٹنٹ کرنل ای سی کار بائین	16 جنوری 1882ء توں 25 فروری 1884ء
16	جے ڈبلیو گارڈینز	26 فروری 1884ء توں 21 اکتوبر 1886ء
17	جے ولسن	22 اکتوبر 1886ء توں 18 جولائی 1888ء
18	ایم ایف اوڈائر	19 جولائی 1888ء توں 17 دسمبر 1888ء
19	جے ولسن	18 دسمبر 1888ء تا 13 اپریل 1890ء
20	کپتان ایف ڈبلیو ایچرٹن	14 اپریل 1890ء توں 28 اکتوبر 1890ء
21	جے ولسن	29 اکتوبر 1890ء توں 30 نومبر 1893ء
22	اے برجز	یکم دسمبر 1893ء توں 19 اپریل 1896ء
23	لیفٹینٹ پی ایس ایم پرسٹن	20 اپریل 1896ء توں 4 اگست 1896ء
24	اے برجز	5 اگست 1896ء توں 9 جنوری 1897ء
25	ٹی جی لوریر	20 جنوری 1897ء توں 5 مارچ 1897ء
26	لیفٹینٹ کرنل ایچ پی پی اے	23-7-1897 توں 6-3-1897
27	لیفٹینٹ اے سی الیٹ	14-11-1897 توں 2-7-1897
28	ای سی سٹڈمین	28-2-1898 توں 17-11-1897
29	جی ایل ڈنڈاس	25-5-1899 توں 1-3-1898
30	ایم ایس ڈی ٹیلر	28-8-1899 توں 30-5-1899
31	جی ایل ڈنڈاس	1-10-1901 توں 29-8-1899
32	کیو کیو ہرکونیس	3-12-1901 توں 2-10-1901
33	جے آر ڈرمینڈ	17-6-1902 توں 4-12-1901
34	بی ایچ برڈ	28-7-1902 توں 18-6-1902
35	جے آر ڈرمینڈ	18-6-1903 توں 29-7-1902

29-7-1903 توں 19-6-1903	بی این یاسورتھ سمٹھ	36
6-9-1903 توں 30-7-1903	جے آر ڈرمینڈ	37
23-11-1903 توں 7-9-1903	بی این یاسورتھ سمٹھ	38
8-11-1905 توں 24-11-1903	سی ایچ ایٹکنز	39
9-12-1905 توں 9-11-1905	لالہ لکھپت رائے	40
18-6-1908 توں 20-12-1905	پی ایل یارکر	41
30-10-1908 توں 19-2-1908	کپتان جے سی سی اینگو	42
18-1-1910 توں 31-10-1908	ایل فرینچ	43
24-2-1910 توں 19-1-1910	وی کونے	44
2-4-1910 توں 25-02-1910	پی ڈی ایگلو	45
12-4-1912 توں 3-4-1910	ایچ ای اے ویکفیلڈ	46
14-12-1912 توں 13-4-1912	میجر اے جے او برائین	47
1-1-1913 توں 15-12-1912	سی ایف سٹرکلینڈ	48
17-2-1913 توں 2-1-1913	میجر اے جے او برائین	49
23-1-1914 توں 18-2-1913	سی ایچ اٹکنز	50
31-3-1914 توں 24-1-1914	جے اے فرگوسن	51
28-2-1917 توں 1-4-1914	بی ٹی کلسن	52
18-8-1917 توں 1-3-1917	ایچ اے سی بلاسکر	53
28-2-1919 توں 1-1-1918	بی ٹی گلین	54
23-2-1922 توں 1-3-1919	ایچ ایچ جکنز	55
30-6-1923 توں 24-2-1922	سی ایم جی اوگلو	56
11-6-1927 توں 18-12-23	اے سی میکناہ	57
10-2-31 توں 12-6-1927	ایچ ڈی بھٹا	58

2-2-1933 توں 11-2-31	آئی ای جیمز	59
10-4-1933 توں 3-2-1933	خان بہادر سید بنیاد حسین	60
2-5-1936 توں 11-4-1933	جیمز ریڈ	61
16-10-1936 توں 16-5-1936	جی معین الدین	62
13-4-1937 توں 17-10-1936	جیمز ریڈ	63
17-4-1937 توں 14-4-1937	ایس این ہسکر	64
28-6-1937 توں 18-4-1937	جی معین الدین	65
22-11-1937 توں 1-7-1937	ایس این ہسکر	66
25-2-1939 توں 23-11-1937	کے وی ایف مارٹن	67
8-10-1939 توں 26-2-1939	انجی عبدالمجید	68
12-4-1941 توں 9-10-1939	ایم امین الدین	69
15-4-1941 توں 13-4-1941	ہری ونش لال کھٹتا	70
1-6-1942 توں 15-4-1941	ایم ایس اے بیگ	71
11-3-1942 توں 2-2-1942	ظفر الاحسن	72
16-4-1944 توں 12-3-1944	ایم ایم احمد	73
9-9-1945 توں 15-4-1942	ایم ناصر احمد	74
23-10-1945 توں 10-9-1945	سر وپ کرشن	75
31-4-1946 توں 24-10-1945	ایم ناصر احمد	76
31-5-1947 توں 22-4-1946	کیول سنگھ چودھری	77
15-8-1947 توں 1-6-1947	خان بہادر چودھری غلام احمد	78
14-11-1948 توں 16-8-1947	خان بہادر سردار غلام حسین خان لغاری	79
26-1-1951 توں 15-11-1948	نیاز احمد	80
2-10-1951 توں 27-1-1951	سید غلام حیدر شاہ	81

2-1-1952 توں 3-10-1951	ایم زیڈ خان	82
2-2-1952 توں 31-2-1956	ظہور الدین اظہر	83
24-11-1953 توں 3-2-1952	چودھری عبدالحمید خان	84
4-2-1955 توں 25-11-1953	چودھری بشیر احمد تارڑ	85
4-11-1956 توں 5-2-1955	نیاز احمد	86
4-11-1956 توں 5-11-1956	میاں محمد شفیع	87
18-7-1957 توں 18-6-1957	اجلال حسین	88
21-12-1957 توں 19-7-1957	ایم اے کے بیگ	89
12-5-1960 توں 22-12-1957	علاء الدین احمد	90
23-7-1962 توں 13-5-1960	ایم اے باجوہ	91
27-4-1963 توں 24-7-1962	عبداللطیف انور	92
29-5-1963 توں 28-4-1963	اکرم حسن خان	93
22-7-1964 توں 30-5-1963	محمد یوسف	94
1-2-1966 توں 3-8-1964	مسعود الرؤف	95
23-3-1969 توں 15-2-1966	محمد ارشد ملک	96
15-2-1971 توں 23-3-1969	کپتان جمشید برکی	97
12-4-1972 توں 16-2-1971	محبوب احمد	98
13-4-1973 توں 13-4-1972	شیم احمد خان	99
13-2-1975 توں 27-3-1973	چودھری محمد اسحاق	100
3-2-1975 توں 14-4-1973	اے زیڈ کے شیردل	101
24-1-1977 توں 9-1-1975	حسن رضا پاشا	102
9-4-1977 توں 25-1-1977	غلام باقر علی خان	103
9-8-1979 توں 18-4-1977	محمد محبوب عباسی	104

12-12-1982 توں 10-8-1979	ملک عبدالماجد	105
6-2-1984 توں 12-12-1982	شہزاد حسن پرویز	106
28-8-1987 توں 7-2-1984	عبدالحکیم	107
3-10-1989 توں 22-8-1987	میاں محمد جمیل	108
6-8-1990 توں 3-10-1989	چودھری محمد صادق	109
18-6-1991 توں 7-8-1990	توقیر احمد رفیق	110
11-4-1992 توں 18-6-1991	انور سلیم احمد	111
3-5-1992 توں 12-4-1992	محمد اختر	112
31-7-1993 توں 3-5-1992	عارف اعظم	113
15-9-1996 توں 1-8-1993	مظہر علی خان	114
27-11-1997 توں 15-9-1996	حامد علی خان	115
26-11-1997 توں 30-10-1997	میجر شکیل احمد	116
2-3-1998 توں 27-11-1997	حامد علی خان	117
2-1-1999 توں 3-3-1998	محمد علی شہزادہ	118
31-12-99 توں 3-1-1999	ندیم احسن آصف	119
23-10-2000 توں 31-12-1999	صاحبزادہ سعید	120
2001 توں 23-10-2000	نسیم یوسف کھوکھر	121
2001 توں 2001	ملک غلام صابر	122
17-9-2001 توں 14-8-2001	جاوید اسلم	123
15-12-2001 توں 22-9-2001	ظفر اقبال	124
12-8-2004 توں 22-2-2002	احسن اقبال	125
18-11-2005 توں 17-8-2004	عبید ربانی قریشی	126
28-10-2006 توں 18-11-2005	ڈاکٹر ساجد یوسفانی	127

10-04-2008 توں 4-11-2006	حمید امجد وڑائچ	128
28-01-2009 توں 17-04-2008	شہر یار سلطان	129
03-04-2009 توں 07-03-2009	محمد امیر جان	130
01-11-2010 توں 09-04-2009	ذوالفقار علی شاہ	131
01-11-2010 توں تاحال	عظمت محمود	132

ملک غلام صابر اس سلسلے دے آخری ڈپٹی کمشنر آہن۔ اس توں کچھے
ایہہ عہدہ نویں نظام دے نال ختم ہو گیا۔ اے اج کل ضلع افسر ”ڈی سی“ دی
بجائے ڈی سی او آکھویندا اے۔

کمشنر سرگودھا ڈویژن

نمبر شمار	ناں	عرصہ
1	چودھری نیاز احمد	15-4-1961 توں 9-12-1960
2	افضل آغا	18-7-1961 توں 16-4-1961
3	حماد رضا	31-3-1966 توں 19-7-1962
4	رفعت پاشا شیخ	23-6-1966 توں 1-4-1966
5	شیخ محمد حسین	28-2-1967 توں 24-6-1966
6	خان احمد رضا خان	22-7-1968 توں 1-3-1967
7	محمد قاسم رضوی	1-5-1969 توں 23-7-1967
8	رفیق عنایت مرزا	1-5-1969 توں 23-7-1968
9	محمد اسلم باجوہ	8-5-1971 توں 3-7-1969
10	محمد محسن	3-6-1972 توں 9-5-1971
11	صفدر حسین	9-10-1974 توں 4-6-1972

22-11-1975	10-10-1974	کپتان رضا علی	12
9-4-1976	23-11-1975	صفدر حسین	13
10-8-1977	10-6-1976	حاجی محمد اکرم	14
6-4-1980	18-8-1977	محبوب احمد	15
5-12-1980	6-4-1980	ایچ آر پاشا	16
28-5-1984	5-12-1980	میاں محمد اظہر	17
8-11-1985	28-5-1984	مہر جیون خان	18
8-11-1986	13-11-1985	ایم نوید احسن	19
14-9-1988	8-11-1986	ملک جہانگیر خان	20
10-9-1991	16-9-1988	نذیر احمد چودھری	21
20-2-1994	18-9-1991	عبدالرشید خان	22
5-8-1996	21-2-1994	سید تجل عباس	23
5-3-1997	21-8-1996	سید محمد انیس صادق	24
29-9-2000	6-3-1997	سعید احمد خان	25
13-08-2001	02-10-2001	جاوید اسلم	26
29-04-2010	04-11-2008	رائے اعجاز علی ضغیم	27
08-07-2011	28-06-2010	جواد رفیق ملک	28
	11-07-2001	شوکت علی	29

اسلم جاوید صاحب آخری کمشنر آہن اس توں کچھ اوہ نویں نظام دے
تحت ڈی سی او بنا دتے گئے۔ تے ضلع ناظم ملک امجد علی نون بن گئے آہن۔
خوشاب وچ ملک احسان اللہ ٹوانہ ناظم بن گئے آہن۔ پر 2008 توں و
کمشنر دا عہدہ بحال ہو گیا۔

سرگودھا ڈویژن دے ڈی آئی جی پولیس

نمبر شمار	ناں	عرصہ
1	سعید احمد خان	26-2-62 توں 7-10-60
2	خلیل الرحمن	1-6-1965 توں 26-2-62
3	چودھری فضل حق	12-2-66 توں 7-6-65
4	محمد اکرم شیخ	18-3-67 توں 15-6-66
5	سید آفتاب علی	22-5-67 توں 19-3-67
6	ایم اے کے چودھری	16-7-67 توں 22-5-67
7	محمد اکرم شیخ	13-8-69 توں 16-7-67
8	چودھری فضل حق	16-9-69 توں 25-8-69
9	کنور ایم اے آر عارف	20-11-70 توں 18-9-69
10	ایس حسن مصطفیٰ	8-7-71 توں 23-11-70
11	ایم اسلم حیات	25-10-72 توں 8-8-71
12	عبدالقیوم	20-8-74 توں 25-10-72
13	بشیر احمد ملک	1-2-76 توں 10-10-74
14	عبدالقیوم	20-8-76 توں 3-2-76
15	افتخار احمد خان	11-4-77 توں 14-9-76
16	عبدالحمید باجوہ	18-8-77 توں 11-4-77
17	سروش رؤف علوی	23-6-79 توں 20-8-77
18	علی عرفان ملہی	18-10-81 توں 24-6-79
19	سردار انور الہی لغاری	28-8-82 توں 19-10-81

8-1-83 توں 28-8-82	خالد لطیف	20
22-2-84 توں 8-1-83	سردار علی شیخ	21
5-5-84 توں 23-2-84	عبدالرؤف ملک	22
1-6-85 توں 5-5-84	سعد شریف	23
28-6-86 توں 1-6-85	شاہد حسن	24
13-6-86 توں 28-2-86	سردار محمد چودھری	25
21-1-88 توں 8-7-86	عبدالزاق	26
8-7-89 توں 22-1-88	میجر مشتاق احمد	27
4-5-93 توں 9-7-89	احمد نسیم	28
1-6-93 توں 6-5-93	میجر محمد اکرم	29
29-1-96 توں 13-6-93	اسرار احمد	30
29-1-96 توں 2-8-93	محمد وسیم	31
31-7-96 توں 29-1-94	محمد ارشد سعید	32
7-3-96 توں 1-8-96	سمیع الرحمن	33
15-4-98 توں 11-3-97	محمد علی	34
20-10-2000 توں 15-4-98	محمد یعقوب	35
21-10-2000	آفتاب سلطان	36

پنجاب دے انگریز گورنر

نمبر شمار	ناں	عرصہ
1	چارلس گرانویل	1853--1849
2	سرجان لارنس	1859--1853

1865--1859	سر رابرٹ منگمری	3
1870--1865	سر ڈائل میکلوڈ	4
1871--1870	سر ہنری میرین ڈیونڈر	5
1877--1871	سر رابرٹ ہنری ڈیویس	6
1886--1877	سر رابرٹ اگلز ایچرن	7
1887--1886	سر چارلس امفرسٹن آتھکسن	8
1892--1887	سر جیمز	9
1897--1896	سر ڈی فٹریئرک	10
1906--1897	سر ڈبلیو ایم نیگ	11
1905--1902	سر ای ایم ریواز	12
1905--1905	سر ڈی سی جے اینٹین	13
1907--1905	سر ای ایم ریواز	14
1907--1905	سر ڈی سی جے اینٹین	15
1907--1907 قائم مقام	ٹی بی ورکر	16
1908 قائم مقام	سر ٹی جے ورکر	17
1908--1907	سر ڈی سی جے اینٹین	18
1911--1908	سر ایل ڈبلیو زین	19
1911 قائم مقام	جے لیک زونی	20
1913--1911	سر ایل ڈبلیو ڈین	21
1919--1913	ایم ایف اڈوائز	22
1924--1919	مسز ای ڈی میکلیکن	23
1928--1924	ڈبلیو ایم ہیلی	24
1934--1928	جی ایف ڈی موٹورنی	25

1938--1934	مسز اچ ڈبلیو ایمرن	26
1942--1938	سر ہنری کریک	27
1946--1942	سر گلینی	28
1947--1946	سر جکینز	29



ضلع سرگودھا دے ہور جاگیردار

ضلع سرگودھا وچ انگریزاں دے آون نال ای ایہہ کم شروع ہو گیا۔ ایہناں نوں ہر ضلع وچ اپنے مطلب دے بندے چاہیدے آہن۔ جہناں اُتے اوہ اعتبار کر سگن تے باقی رعایا نوں وی قابو وچ رکھ سگن۔ اس طرح مختلف قبیلیاں نوں ایہناں دی فوجی خدمات دے صلے وچ کافی زمیناں ملیاں۔ جہاں دی تفصیل پٹھاں دتی گئی اے۔

ٹوانہ خاندان

ٹوانہ خاندان ضلع سرگودھا دے جاگیرداراں دا وڈا خاندان اے۔ اس خاندان دا اصلی وطن مٹھ ٹوانہ اے پر جیوں جیوں ایہناں نوں جاگیراں ملدیاں گئیاں ایہہ ایٹھوں رُ کے اپنیاں جاگیراں اُتے آ گئے۔

مٹھ ٹوانے وچ ملک فتح خان موتیاں آلے دے پوترے ملک شیر دی کافی جاگیر آہی اس دے دو پتر آہن شہادت خان تے فیروز خان۔ شہادت خان نے اپنی ساری جائداد ”مال مفت ولے بے رحم“ دے اکھان دے موجب ساری زمی وچ کے عیاشی کیتی۔ ہُن اس دی اولاد ملازمت کرن اُتے مجبور اے۔ فیروز دی زمی حالی تائیں اس دی اولاد کول اے تے ایہناں دی بھین دا حصہ ملک شیر احمد گھیبہ دے حصے وچ آیا۔

ملک شیر محمد کول دو پنڈاں دی جاگیر مالیت 4788 روپیاں دی
آہی۔ خان بہادر ملک شیر محمد خان دے کچھے اس دے دو پتر آہن ہک داناں
غلام جیلانی تے دوجے داناں دوست محمد آہا۔ ملک دوست محمد نوں 7411
روپیاں دی مالیت دی جاگیر ملی تے ایس دے بھراواں دریا جہلم دے کنارے
1500 ایکڑ زمین ملی۔ ملک شیر محمد ایہناں دا پیو ملک صاحب خان دا بھتریا
تے قادر بخش دا پتر آہ۔

ملک صاحب خان

خان بہادر ملک صاحب خان 18709 ایکڑ زمی کالرا وچ ملی۔ جیہڑی
اس وڈی محنت نال اپنی پرائیویٹ نہراں نال آباد کیتی۔ تے سالانہ پیداوار
لکھاں روپے دین لگ پئی۔ اس دے علاوہ انعام تے درباری کرسی وی دتی
گئی۔

ملک عالم شیر

ایہہ ملک فتح خان موتیاں آلے دا پتر آہا تے اس نوں 2081
روپیاں دی جاگیر ملی تے درباری کرسی دا وی حق دار بنایا گیا۔ اس دا بھرا ملک
شیر بہادر منصف بنایا گیا تے اس دا پتر ملک خان محمد آف شاہپور نوں 1286
روپے مالیت دی جاگیر ملی تے درباری کرسی دا مستحق ہويا۔ اس دا ہک ہور بھر
الملک احمد خان ایکسٹراسٹنٹ کمشنر بنیا درباری سیٹ ملی تے 1499 روپیاں

دی مالیت دی جاگیر وی ملی۔

کوٹ حاکم شاخ

ملک جہان خان نے دیوان ساون مل دے پیٹھ بطور کاردار کم کیتا
تے ملتان دی گڑ بڑ ختم کرن وچ انگریزاں دی مدد کیتی تے ایس دے پتر جس
دا ناں ملک محمد خان آہا نے وی اس دا ہتھ وٹھایا اس خدمت دے صلے وچ
511 ایکڑ زمی شاہپور دے ڈکھن آلے پاسے ملی تے اتھے ایہناں کوٹ محمد
خان آباد کیتا تے ایہناں نوں درباری کرسی وی ملی۔ اس نے بطور سب رجسٹرار
تخصیص شاہپور وی کم کیتا۔

منظر آبادی شاخ

ملک فتح خان وی ملک صاحب دا بھرا آہا۔ اس نے وی انگریزاں
دی جنگی خدمت کیتی تے خان بہادر دا خطاب حاصل کیتا۔ اس دے پتر ملک
منظر خان نے وی پیوتوں ودھ کے انگریز سرکار دی خدمت کیتی تے انگریزی
سرکار نے ہک ہزار ایکڑ زمی انعام دتی۔ نالے درباری کرسی دا وی حق دار بنایا۔

ہموکا شاخ

ہموکا دریا جہلم دے سجے پاسے تے اے اج کل اس داناں حسن پور
رکھیا گیا اے۔ ملک سلطان محمود نے ملتان دے محاصرے دے ویلے انگریزاں

دی مدد کیتی ایہہ کئی سال ضلع شاہپور دا پولیس کپتان رہیا اس دے پتر ملک خدا بخش خان ایکسٹرا اسسٹنٹ کمشنر رہیا۔ تے افغانستان وچ سفیر وی رہیا۔ کجھ چر گجرات دا ڈپٹی کمشنر وی رہیا۔

خواجه آباد شاخ

ملک خدا بخش دی وفات توں کچھ فٹ محمد اس دا واٹ ہويا اس کول 2266 ایکڑ زمین ایہی اس توں وکھری 1500 ایکڑ زمی آہی جیہڑی ایہناں دی پرائیویٹ نہر نال پیوائی ویدی آہی۔

جہان آبادی شاخ

ملک جہان خان ہڈالی شاخ نال تعلق رکھدا آہا تے اس نوں فوجی خدمات دے سلسلے وچ جہان آباد دی جاگیر ملی اس دے دو پتر آہن نواب مبارز خان تے نواب ممتاز خان ایہناں 3000 ایکڑ مالیہ معاف زمی ملی تے 1400 ایکڑ زمی پٹے تے ملی تے درباری کرسی وی دتی گئی۔

ہڈالی شاخ

ملک فتح خان وڈھل نوں فوجی خدمات دے صلے وچ 505 ایکڑ زمی شاہپور دے ڈکھن آلے پاسے دتی گئی۔

نون خاندان

ملک حاکم خان تے ملک محمد حیات دوویں پتریر آہن تے دوہاں نون
درباری کرسی دتی گئی۔ اسنوں وی فوجی خدمات دے صلے وچ 1500 ایکڑ
کوٹ حاکم خان دے کول 811 ایکڑ پٹے تے دتی گئی تے اعزازی مجسٹریٹ
وی بنایا گیا۔

ملک محمد حیات 3500 ایکڑ قیمتی زمی نور پور نون وچ دتی گئی نوناں
دی زمی وی ایہناں دی پرائیویٹ نہر نال پیوائی ویندی آہی۔ ایسے محمد حیات دا
پُتر فیروز خان نون وزیراعظم پاکستان بنیا۔

ساہیوال دے بلوچ

رنجیت سنگھ نے ساہیوال اُتے حملہ کر کے لنگر خان دے پو فتح خان
نون قید کر کے لاہور لے گیا۔ کجھ چر پچھے اس نون جھنگ وچ جاگیر دتی بعد
وچ بھیرے دے سامنے دریاؤ پار احمد آباد وچ جاگیر دتی۔ پر فتح خان نون
دربار وچ لاہور ای رکھیا۔ کجھ چر پچھے اس نواب منکیرہ تون مدد لے کے اپنی
ساہیوال دی جاگیر واپس لین دی کوشش کرن دا سوچیا پر کامیابی نہ ہون دی
صورت وچ بہاولپور وچ چلا گیا تے اتھے ای 1819 وچ فوت ہو گیا۔

لنگر خان دی اس ویلے عمر صرف 14 سال آہی ایہہ بہاولپور وچ
1822ء تائیں رہیا۔ رنجیت سنگھ جد 1822 وچ ملتان گیا تے اس نون جد
پتہ لگا کہ فتح خان مر گیا اے تے اس نے لنگر خان نون بلا کے دو ہزار روپے

دی جاگیر دتی تے نالے ترے روپے روک دیہاڑ دا روزینہ مقرر کیتا۔ بعد وچ ایہہ جاگیر ودھا کے ترے ہزار سالانہ دی کر دتی گئی۔

سکھاں دے زوال توں کچھ لنگر خان نے انگریزاں دی خدمت کیتی۔ کابل دی مہم وچ وی حصہ لیا۔ ملتان دی بغاوت وچ انگریزاں دی مدد کیتی۔ انگریزاں نے ایہناں خدمات دے بدلے وچ 3000 روپے مالیت سالانہ دی جاگیر بخشی تے نالے 1200 روپے دی پنشن وی منظور کیتی۔ ایہہ 1853ء وچ اللہ نوں پیار اہو گیا تے اس دا پتر محمد حیات وارث بنیا۔ اس توں کچھ اس دا بھرا سردار مبارک خان وارث بنیا۔ اس توں کچھ سردار محمد چراغ وارث ہويا تے نہراں دا داروغہ وی رہیا۔ محمد چراغ اس دا بھرا فتح خان تے چاچا لشکر خان کول بیچ گراواں دی جاگیر آہی جس دی اس ویلے قیمت 3874ء روپے آہی۔ اس توں وکھری وی ایہناں دے کول گروٹ وچ دی جاگیر آہی۔ پر ایہہ خاندان جاگیر توں کوئی خاص فائدہ نہ چک سکيا۔ سردار چراغ درباری کرسی دا حقدار آہا۔

خوشاب دے بلوچ

احمد شاہ ابدالی دے حملے دے ویلے اتھھے لال خان دی سرداری آہی۔ اس دے بھرا مبارک علی خان نے اس نوں قتل کر کے بہاولپور پناہ لئی پر لال خان دے پتر فتح خان نے اس نوں قتل کر کے بدلہ لے لیا۔ فتح خان سکھاں دا خراجی بن گیا تے ٹوانیاں دے خلاف ایہناں دی مدد وی کیتی۔ تے

جھنگ وچ جاگیر ملی۔ اس توں کچھ لنگر خان اس دے پتر انگریزاں نال رل
کے افغانستان دی جنگ وچ حصہ لے کے جاگیراں حاصل کیتیاں۔

شاہ پوریئے سید

رنجیت سنگھ دے قبضے توں پہلاں شاہپور سیداں دے قبضے وچ آہا تے
اس دے نال نال گراواں تے وی ایہناں دا قبضہ آہا۔ فتح شاہ کول 372
روپیاں دی جاگیر بونگا اچھراں تے شاہپور دا ادھ اس کول آہا۔ اس توں کچھ
سلطان محمود شاہ قبیلے دا سردار بنیا۔ جس نوں درباری کرسی وی دتی گئی۔

بھیرے دے دیوان

ایہناں وی سکھاں دے ماتحت کم کیتا اخیر چیلیاں آ لے دی شکست
توں کچھ ایہناں وی انگریزاں نال تعلق پیدا کر لیا۔ ایہناں نوں 1700 ایکڑ ملکیتی
تے 1800 ایکڑ پٹے تے زمی دتی گئی اس خاندان دا سردار دیوان جواہر مل آہا
جس نوں درباری کرسی دتی گئی تے اعزازی مجسٹریٹ وی بنایا گیا۔ اس دے
نال اس نوں بھیرہ تحصیل دا رجسٹرار وی بنایا گیا۔ اس توں بعد کالہہ دا منیجر وی
بنایا گیا۔ اس بدلے وچ اس نوں چناب نہر کول زمین انعام دتی گئی۔ اس دا بھرا
دیوان لکھمی داس دا پتریر دیوان کرپا رام آہا۔ ونڈ توں کچھ ایہہ خاندان ہندوستان
ٹر گیا تے اوہ دیوان چمن لال پارلیمنٹ دا ممبر تے ترکی وچ ہندوستان دا
سفیر وی رہیا۔ اوہ پنڈت جواہر لال نہرو نال ولایت پڑھدار رہیا آہا۔

خاندان لانا

سردار ہری سنگھ تے گیان سنگھ نوں نوشہرے 4457 روپے دی جاگیر
دتی گئی۔

خاگوانی

نواب عطا محمد خان خاگوانی آف ڈیرہ اسماعیل خان۔ کابل وچ
انگریزی ایجنٹ رہیا تے اس خدمت دے بدلے وچ 2000 ایکڑ زمی اس
نوں سردار پور وچ ملی تے 3000 ایکڑ نواب پور جیہڑا دیگوال دے نیڑے
اے ملی تے اس زمی نوں ایہہ پرائیویٹ نہرنال پیوندا آہ۔
تارا سنگھ والے سردار تارا سنگھ جس دا تعلق راولپنڈی نال آہ تے اوہ
ہک انگریز دے نال یار قدمشن تے گیا تا کہ ایہتھوں دے سیاسی حالات معلوم
کر کے انگریزاں نوں صورت حال توں آگاہ کرن جے مسلمان ہندوستان تے
روس نال مل کے حملے دی تاں نہیں سوچ رہے۔ اس خدمت دے صلے وچ اس
نوں 1000 ایکڑ زمی بھیرے دے نیڑے ملی اتھتھے ایس اپنا گراں وساکے
اس داناں تارا سنگھ والا رکھیا۔

جلپانہ جاگیر

عبدالرحمن خان تے محمد نواز خان عیسیٰ خیلوی نوں 4475 ایکڑ دی
قیمتی زمی جلپانہ دی گئی۔ جلپانہ شاہپور دے نیڑے مظفر آباد دے کول اے

ایہہ وی ایہناں دی اپنی نہر نال پیچیدی اے۔

سلیم آباد دی جاگیر

خان محمد سلیم خان تے ایس دا پتر محمد امین خان جہناں دا تعلق پشاور
نال آہا۔ ایہناں نوں فوجی خدمات دے صلے وچ سلیم آباد تے امین آباد دیاں
جاگیراں دتیاں گئیاں۔

شہزاد پور دی جاگیر

شاہ افغانستان شاہ شجاع دے پوتریاں نوں شاہپور دے ڈکھن آلے
پاسے جہان آباد تے شاہپور دے وچکار 1200 ایکڑ دی جاگیر دتی گئی۔ ایہہ
خاندان ہُن تک فارسی بولدا اے تے شہزادے اکھواندے اے۔

گورو بخش پورہ دی جاگیر

لدھیانے دے رائے بہادر ارنیل سنگھ نوں فوجی خدمات دے صلے
وچ بھیرے دے نیڑے گورو بخش سنگھ وچ جاگیر دتی گئی۔

رامپور دی جاگیر

ایہہ جاگیر رائے بہادر رادھا کشن جیہڑا اسٹنٹ سرجن آہا تے
گروٹ دارہن آلا آہا اس نوں رامپور تحصیل شاہپور وچ جاگیر دتی گئی۔

حکم پوری جاگیر

ایہہ جاگیر سردار حکم سنگھ والا سردار دیر سنگھ نوں فوجی خدمات دے
بدلے وچ ملی ایہہ جلال دے گوڑھ دے نیڑے جہان آباد دے راہ دے بچ
پاسے اے۔ نالے ایہہ کرسی نشین وی آہن ایہہ سکھ دے پند دے نال
مشہور اے۔

ہری پوری دی جاگیر

ایہہ جاگیر دی فوجی خدمات دے بدلے وچ دتی گئی۔ ایہہ ہری سنگھ
دلگردت سنگھ نوں دتی گئی ایہہ پنڈ سکھنی دے پنڈ دے نال مشہور اے۔
سرکاری نال ہری پور اے۔ ایہہ وی تحصیل شاہ پور وچ حکم پور دے نیڑے اے
تے ایہناں دی اپنی نہر آہی جیہڑی سکھنی دی نالی دے نال مشہور آہی۔
ایہناں جاگیراں توں وکھرا صابو وال دے قریشی۔ رانجھے پہلے وی
کافی جائداد دے مالک آہن۔ پر اج کل ایہناں جاگیرداراں دے اوہ رعب
تے دبدے نہیں رہے جیہڑے برطانیہ دی حکومت دے زمانے وچ اہی ہن
زمانہ ہور اے تے اوہ زمانہ ہور آہا۔ نوناں نے کارخانے لاکے اپنی کافی آمدنی
ودھائی اے۔

کھتری تے اروڑیاں دیاں جاگیراں

مسلماناں دے نال کھتریاں دے کول وی کافی زمین آہی جس دی

تفصیل کچھ انج اے کہ ایہناں کول ترے علاقے تحصیل بھیرہ وچ آہن تے 5 تحصیل شاہپور وچ آہن ایہناں دے کول تقریباً 17000 ایکڑ زمی آہی تے ایہناں داسب توں وڈا مرکز چک رامداس آہا جس دا ہنگلا مالک رامداس آہا۔
اروڑیاں کول چھ علاقے آہن ایہہ تحصیل شاہپور وچ آہن تے 3790 ایکڑ دے رقبے تے مشتمل آہن ایہناں دے کول اس علاقے دا ودھیا رقبہ آہا تے ایہہ وی کرسی نشین آہن۔

بھائیہ جاگیر

اروڑیاں تے کھتریاں دے نال بھائیہ ذات دے ہندوواں کول وی 1862ء ایکڑ زمین آہی۔

سکھ جاگیر

سکھاں دے کول 8600 ایکڑ دیاں ترے جاگیراں آہن تے ایہناں دیاں وی اپنی پرائیویٹ نہراں آہن۔ مثال دے طور تے سکھنی آلی نہر۔


نوٹ

مسلمان جاگیرداراں دیاں سرگودھے وچ اوہ حالت نہیں رہی کافی زمیاں ایوب خاں دی زرعی اصلاحات دے سبب مزارعیاں وچ ونڈیاں

گئیاں۔ کافی ایہناں وچ چھوڑیاں۔ بچیاں کھچیاں خاندان دے ودھن نال دی
ٹکڑے ٹکڑے ہو گئیاں۔ ایہناں دیاں سرگودھے وچ کوٹھیاں دی وک گئیاں
آہن۔ جہناں نوں ویکھ کے دنیا دی بے ثباتی سامنے آ ویندی اے۔ اللہ دی
شان اوہ خاندان ای باعث عبرت بنے جہناں پاکستان بن دی مخالفت کیتی۔



تحریک پاکستان تے سرگودھا



تحریک پاکستان تے سرگودھا پاکستانی دور

ضلع سرگودھا دی تاریخ وچ مسلم لیگ د تعارف 1938ء وچ ہويا۔ ملک مولا بخش صاحب ایڈووکیٹ اس دے ایتھے بانی آہن۔ اوہ میانی دے رہن آ لے آہن۔ مسلم لیگ دا پہلا جلسہ جامع مسجد وچ ہويا۔ ایہہ جلسہ کانگریس دے خلاف تے مسلم لیگ دے تعارف دے طور تے ہويا اس جلسے وچ کانگریس دیاں وزارتیں دے خلاف مسلمانان نوں دسیا گیا۔ اس جلسے وچ شیخ عبدالغنی ایڈووکیٹ تے مولا بخش صاحب نے تقریریں کر کے مسلمانان نوں سیاسی طور تے جاگن تے زور دتا گیا۔ اس جلسے وچ دو علی گڑھ دے طالب علم وی آئے ہوئے آہن۔ 1939ء وچ ہک ہور جلسہ ہويا۔ ایہہ کسے مسیت دی بجائے سرکاری کوارٹراں آلی گراؤنڈ وچ ہويا۔ جتھے اج کل مولا بخش ہسپتال تے مسجد شہدا پریس کلب دیاں عمارتاں بن گئیاں آہن۔ اس جلسے وچ سوتے دی نماز پچھے مولانا ظفر علی خان نے زبردست تقریر کیتی۔ کاش سرگودھا دے افسر اس

تاریخی گراؤنڈ نوں یادگار دے طور تے قائم رکھدے۔ تاکہ آون والیاں نسلاں نوں اس تحریک دی کہانی دا پتہ لگدا۔

ملک مولا بخش صاحب 1940 وچ میانوالی ٹرگئے تے وت ول کے نہ آئے۔ ایہناں توں کچھ نواب محمد حیات قریشی ہوراں نے مسلم لیگ دی ذمہ داری سنبھالی۔ قریشی صاحب صابوالت تحصیل شاہ پور دے رہن آ لے آہن بعد وچ رادھن اپنی رہائش رکھ لئی۔ 1938ء وچ قریشی صاحب دا مقابلہ نواب اللہ بخش ٹوانے دے نال ہويا تے قریشی صاحب اس مقابلے وچ ہار گئے آہن۔ اس ویلے توں قریشی صاحب ٹوانیاں دے سیاسی حریف بن گئے آہن۔ اس توں علاوہ ہک دوئی وجہ وی ہو گئی آہی۔ قریشی صاحب دے پتر محمد سعید دی شادی میاں ممتاز دولتانہ دی بھین نال ہو گئی۔ اس وجہ نال وی محمد حیات قریشی ہوری مسلم لیگ دے دھڑی بن گئے آہن۔ کیوں جے نواب اللہ بخش نے خضر حیات دی ہکا دھڑ بن گئی آہی۔

قریشی صاحب توں دکھ مسلم لیگ دے ہراول دستے دے طور تے ایہتھوں دیاں وکیلاں وڈا کم کیتا۔ قریشی دے صدر ہوون دے پاروں ساری کارروائی ایہناں دی کوٹھی تے ہوندی آہی۔ اس ویلے شروع وچ چودھری حمید احمد ایڈووکیٹ مسلم لیگ دے سیکرٹری تے چودھری نصیر احمد اس دے جوائنٹ سیکریٹری چنے گئے۔ ایہناں دے ایہناں ہور سنگی ایہہ حضرات آہن۔ میاں محمد پراچہ، قریشی محمد عبداللہ شاہ، میاں ظہور الدین بار ایٹ لاء، چودھری فیض احمد، قاضی صادق حسین، صاحبان تے کچھ ہور حضرات مسلم لیگ واسطے کم کریندے

آہن۔ پر حالے تائیں مسلم لیگ دی آواز شہراں توں باہر ناہی نکلی۔
 خضر حیات دی صلاح نال نواب اللہ بخش نے ہک نویں مسلم لیگ بنا
 لئی۔ جد سکندر حیات نوں پتہ لگاتے اس 1942ء وچ نواب محمد حیات قریشی
 ہوراں نوں شملے بلایا نے اس گل اُتے راضی کیتا کہ دوہاں مسلم لیگاں نوں اکٹھا
 کر دتا ونجے۔

تے اس دے دوہیں صدر ہٹا کے پیر قمر الدین سجادہ نشین سیال نوں
 صدر بنا دتا ونجے۔ دوہیں پرانے صدر پیر صاحب دے مُرید ہوون دے سبب
 انکاری نہ ہو سکے۔ تے انج پیر صاحب صدر بن گئے تے اوہ پاکستان بننے
 تائیں صدر رہے۔

عید میلاد النبیؐ دے جلوس دی ابتداء

سرگودھا شہر وچ 90 فی صد آبادی غیر مسلم دی اہی اس واسطے ایتھوں
 دی سیاست تے اوہ چھائے ہوئے آہن۔ سچی گل ایہہ ہے کہ مسلماناں وچ
 سیاسی شعور ای کوئی نہ ایتھے کانگریس دے جلسے ہوندے۔ ہندو تے سکھ اپنے
 اپنے تہواراں تے جلوس کڈھدے۔ اکالی ہر سال جلسہ تے جلوس کڈھدے۔
 ہندوواں دے تے سکھاں دے مقامی لیڈر باپو پیارے لال، ملک برج لال،
 ماسٹر گوری لال تے ڈاکٹر لہنا سنگھ آہن۔ جن سنگھیاں دی ڈنڈا پریڈ وی ہوندی
 آہی۔ سکھاں دے دلپ سنگھ ایتھے وڈے رُردے پھر دے لیڈر آہن۔ یونائیٹڈ
 بس دے مالک ہرکشن سنگھ ایہناں دی مالی مدد کریندے آہن۔

میاں امین الدین صاحب اس ویلے ایتھے ڈپٹی کمشنر آہن ایہناں جد مسلماناں دی بے حسی دیکھی تے ایہناں مشورہ دتا کہ مسلمان وی اپنے آپ نوں مناون کان کجھ نہ کجھ کیتا کرن۔ ایہناں دے مشورے نال انجمن اسلامیہ ولوں ہر سال عید میلاد النبیؐ تے جلسے جلوس دا سلسلہ شروع ہويا۔ تے غیر مسلمان نوں ایہہ پتہ لگا کہ اس جلوس دے کچھے مسلمان ڈی سی دا ہتھ اے تے ایہناں تبادلہ کروا دتا۔ پر جیہڑا اوہ بی سٹ گئے آہن اس دا وڈا فائدہ ہويا تے مسلمان وی ودھ ودھ کے جلسیاں جلوساں وچ حصہ لین لگ پئے۔

غیر مسلم ایتھے سرگودھا شہر نوں اپنا شہر سمجھدے آہن کیوں کہ ایتھے نوے فیصد آبادی ایہناں دی آہی۔ تجارت تے دو بے کاروبار ایہناں دے ہتھ وچ آہن۔ سکھ آباد کار تھانہ کڑانہ تے تھانہ سلانوالی وچ چنگے کھاندے پیندے لوک آہن تے ایہناں دے سارے چک ہک دو بے نال ججیر دیاں کڑیاں ہار ملے ہوئے آہن۔ باقی ضلع وچ مسلمان اکثریت وچ ہون دے باوجود بہو سارے دنیا توں پچھے آہن۔ ہر شے تے ہندو دا کنٹرول آہا۔ نکلے ٹھٹھیاں دے ہندو دوکاندار دا مسلمان کسے طرح مقابلہ نہ کر سگدا۔ اوہ مالی طور تے ہندو دا محتاج آہا۔ مسلماناں دا کم صرف جان مار کے جو کجھ کمایا اور کراڑاں اگے آ کے رکھ دینا رہ گیا آہا۔ قرضے لے لے کے ایہناں دی مٹی پلٹ ہو گئی آہی۔

خضر حیات دے خلاف قرارداد

4 جولائی نوں ہک میٹنگ ہوئی جس وچ ایہہ فیصلہ کیتا گیا کہ

ملک خضر حیات خان جیہڑے اس ویلے پنجاب دے وزیر اعلیٰ آہن اپنی وزارت توں مستعفی ہو وین کیوں جے اوہ مسلماناں دے نمائندے نہیں رہے تے قائد اعظمؒ نے اوہنوں مسلم لیگ وچوں کڈھ دتا۔ کافی بحث توں بعد ایہہ فیصلہ ہويا جے قرار داد ضرور جلسے وچ پیش کیتی ونجے جلسہ اس توں دو جے دیہاڑے ست جولائی 1945 نوں ہونا آہا۔ حالی اس جلسے دی قرار داد وی شاہی ناہی سکی جے اس جلسے دے چار بزرگ سدھے ڈی سی میاں نصیر احمد دے کول گئے تے ایہناں نوں ساری گل بات دس دتی۔ ملک نصیر خضر حیات دا وڈا بھروسے آلا افسر آہاتے اسے واسطے اس نوں چُن کے سرگودھے لایا گیا آہاتے اوہ الیکشن 1946ء تک اتھتے رہیا۔

دو جے دیہاڑے جد ملک محمد اقبال ہوریں جیہڑے سیکرٹری آہن۔ قرار داد دا مسودہ لے کے کمپنی باغ اپڑے تے ڈی سی ایہناں دی اڈیک وچ اتھتے کھلا اہا۔ ایہناں نوں کول بلا کے پچھیا کہ تسیں انجمن اسلامیہ دے سیکرٹری ہو۔ جد ایہناں جواب ہاں وچ دتا تے اس دسیا کہ ہُن دفعہ 144 لگ گیا اے تے ہُن کوئی جلوس نہیں نکل سگدا۔ حالاں ڈی سی ملک اقبال صاحب نال متھا مریندا پیا آہا جے اتنے تاںیں مولانا ظفر علی خان تے نواب محمد حیات قریشی ہوریں جلسے وچ اپڑ گئے۔ جد ایہناں نوں دفعہ 144 دسیا گیا پہلے تے ایہناں آکھیا جے دوویں گلاں ہوسن بعد وچ صرف جلسے تے اتفاق ہو گیا تے جلوس نہ کڈھیا گیا۔

خضر حیات تے مسلم لیگ

خضر حیات سرگودھے دا آپ ہون دا کر کے اپنی ساری طاقت اس اُتے لا دتی کہ مسلم لیگ اتھے جڑ نہ پھدھ سکے۔ اس ایہہ کم کرن واسطے اپنے سارے سرکاری تے غیر سرکاری رچھ ازمائے۔ ایہناں لوکاں نوں لالچ وی دتے سب توں پہلاں وار اوس مسلم لیگ دے عہدے داراں اُتے کیتا۔ چودھری عبدالحمد ایڈووکیٹ نوں سرگودھا میونسپل کمیٹی دا ایگزیکٹو افسر بنا دتا۔ چودھری نصیر احمد چیمہ ہوراں نوں سرکاری وکیل بنا کے جھنگ گھل دتا۔ پھر پاکستان بنے توں پچھے ایہہ دوویں برطرف کر دتے گئے۔ چودھری حمید توں پچھے چودھری فیض احمد ایڈووکیٹ جنرل سیکرٹری مقرر ہوئے تے ملک محمد اقبال ایڈووکیٹ ہوری جوائنٹ سیکرٹری مقرر ہوئے۔ میاں عبدالعزیز صاحب پروپیگنڈہ سیکرٹری مقرر ہوئے۔ صدارت پیر قمر الدین صاحب کول ای رہی۔ دو نائب صدر وی چنے گئے سینئر نائب صدر قریشی محمد عبداللہ شاہ صاحب تے دوجے چودھری فضل احمد چک 93 شمالی چنے گئے۔

مسلم لیگ دا دفتر اس ویلے بلاک نمبر 4 وچ بنایا گیا۔ اس مکان وچ کدیں منوہر پریس کم کردا رہیا سی۔ اس مکان وچ ملک اقبال صاحب جوائنٹ سیکرٹری رہندے آہن۔ اتھے دفتر دا بورڈ تے مسلم لیگ دا جھنڈا وی لا دتا گیا۔ میاں ممتاز دولتانہ اس ویلے صوبائی مسلم لیگ دے جنرل سیکرٹری آہن نے نواب مدوٹ مسلم لیگ دے صوبائی صدر آہن۔ ضلع دے ایہناں حضرات نے

دورے کر کر کے مسلم لیگ دیاں شاخاں قائم کیتیاں۔ کجھ ممبر جہناں دی اکثریت وکلاء حضرات دی آہی ہک یا دو روپے مہینے دا چندہ دیندے آہن۔ 1944ء دے اخیر تے نواب محمد حیات قریشی ہوراں 100 روپے مہینہ دینا شروع کیتا۔

اس دفتر وچ کجھ کرسیاں تے پنج رکھ چھوڑے۔ پر ایہہ ناں دا فرنیچر آہا۔ کجھ اخبار تے قائد اعظم دے بارے وچ کتاباں وی رکھ چھوڑیاں آہن۔ اس دفتر نوں دیکھ کے اکالی لیڈر سردار دلپ سنگھ مخول دے طور تے اس نوں پاکستان ہاؤس ادھا آہا۔

سرگودھا مسلم لیگ دا پہلا جلسہ

مسلم لیگ دی تحریک دی ابتداء جامع مسجد سرگودھا توں ہوئی۔ مولانا محمد شفیع اتھے خطیب آہن۔ ایہناں نوں جمعے توں بعد مسلم لیگ دے جلسے دا مسیت دالاؤڈ سپیکر تے اعلان کرن واسطے آکھیا گیا۔ آخر من گئے تے جمعے دی نماز توں کچھ ایہناں نوں صدر بنا کے قریشی محمد عبداللہ شاہ صاحب تے ملک محمد اقبال صاحب نے تقریراں کیتیاں۔ اس توں کچھ تحریک وچ جان پوندی گئی۔

ہک پاسے مسلم لیگ اپنی تحریک نوں اگانہہ ودھان دی کوشش کر رہی آہی تے دوجے پاسے 1946 وچ یونینسٹ پارٹی دی لوکاں نوں نال رلاوون کان زمیناں تے خطابات وٹڈے شروع کر دتے۔ دہ 10 بندیاں نوں ہک ہک

مربع زمین دتی گئی۔ ایہناں بندیاں دے ناں ایہہ نیں۔

نوبہار شاہ سکنہ پیل، مظفر علی ولد امیر حیدر کفری، ملک اللہ یار اچھالی، قاضی مظہر قیوم نوشہرہ، ملک شاہ محمد کھبکی، سردار احمد شیر بلوچ جمالی، راجہ محمد نواز سگھر وال، مہر لال خان جھاوری، مہر محمد یار سکسیر بار، ایہناں وچ صرف دو جھاوریاں تے سکسیر بار دے نواب اللہ بخش ٹوانے دے حلقے آہن باقی اٹھ دا تعلق تحصیل خوشاب نال آہا۔ ایہہ تحصیل خضر حیات دا انتخابی حلقہ آہی۔ اس توں علاوہ بہوں ساریاں لوکاں نوں، خان بہادر دا خطاب وی دتا گیا۔ ایہناں لوکاں دی اکثریت دا تعلق وی خوشاب نال آہا۔

ضلع سرگودھا وچ انتخابی دھڑے

ضلع سرگودھا وچ مسلم لیگ تے یونینسٹ پارٹی دی ٹکڑ ہون دی وجہ کر کے وڈے وڈے خاندان وی آپس وچ وٹدی گئے تے ہر اک نے دوجے نوں ہراون دی سر دھڑ دی بازی لا دتی۔ اس ویلے سرگودھا وچ چار تحصیلاں سر دھڑ دی بازی لا دتی۔ اس ویلے سرگودھا وچ چار تحصیلاں آہیاں اس واسطے تحصیل وار ایہناں دھڑیاں دا ذکر کیتا ویندا اے۔

تحصیل شاہپور

اس تحصیل وچ ٹوانے، قریشی، سید تے میکن برادریاں دا زور آہا۔ ٹوانیاں وچوں نواب ممتاز خان آف جہان آباد تے اس دی رعیت مسلم لیگ

نال تے دو جے پاسے خضر حیات آف کالہرہ تے نواب اللہ بخش آف خواجہ آباد یونینسٹ پارٹی نال۔ قریشی خاندان آف صابو وال مسلم لیگ نال سلطان علی نگیانہ آف جلاپور یونینسٹ پارٹی نال۔ سید قلندر حسین شاہ نوازش علی شاہ آف جہانیاں شاہ مسلم لیگ نال محمد خان لاہڑی تے گل محمد کلیار مسلم لیگ نال تے کوٹ پہلوواں دی ساری میکن برادری یونینسٹ پارٹی نال تے کوٹ بھائی دی میکن برادری کچھ مسلم لیگ نال تے کچھ یونینسٹ نال سردار امیر خان میکن جس نواب افتخار ممدوٹ نوں سونے دا ہار پایا آہا میکن برادری دا آہا۔ ایہہ 1945ء دی گل اے۔

تخصیل خوشاب

تخصیل خوشاب سبھ توں وڈی تخصیل آہی تے اتھے ای سبھ توں وڈا سیاسی جوڑ آہا یعنی خضر حیات ٹوانے تے نواب ممتاز دا۔ ایہہ تخصیل دو حصیاں وچ تقسیم اے۔ تھل تے مہاڑ تے سون دا علاقہ۔ اتھے وی وڈیرے تاں خضر حیات نال آہن تے عام لوک جنہاں وچ بساں دے ڈرائیور مسلم لیگ نال آہن۔ پیر قمر الدین آف سیال شریف دے اس علاقے وچ کافی مرید ہونے دی وجہ نال وی کافی لوک مسلم لیگ نال آہن۔ پدھراڑ وچ مولا بخش تے اس دا پتر مسلم لیگی آہن۔ مولا بخش ہوراں ملک کرم بخش اعوان دے والد آہن تے باقی برادری دو جے پاسے آہی۔ نوشہرہ وچ ملک محمد سرور آہن۔ ملک اللہ یار، ملک سلطان مسلم لیگی آہن۔ انگہ وچ احمد ندیم قاسمی دا سارا خاندان مسلم

لیگی آہا۔ نوشہرے وچ ایہناں منظوم خطبہ استقبالیہ پیش کیتا آہا۔ خوشاب وچ
ذیلدار الطاف حسین بلوچ تھل وچ نور محمد بکھور رنگپور۔ پیلو وینس دے فتح محمد
سیال وی مسلم لیگی آہن۔

تحصیل بھلوال

مہر محمد یار لک، مہر خدا داد لک دے والد۔ ایہناں نوں خضر حیات مربع
زمی تے خان بہادری دا خطاب دتا اس واسطے ایہہ پکے خضر حیات دے سنگی
آہن۔ نون خاندان فیروز خان دی وجہ نال مسلم لیگی آہن۔ مڈھ رانجھے وچ
مخدوم نور احمد ایڈووکیٹ چودھری محمد حیات، محمد علی رانجھا، محمد نذیر بدرانہ تھانہ
کوٹ مومن دا قاسم میلہ بھیرے دی پراچہ برادری، افضل جوش پراچہ، فضل حق
پراچہ، حاجی محمد عبداللہ پراچہ دے ناں خاص طور تے مشہور نیں۔ مولوی ظہور احمد
بگوی مسلم لیگ دے وڈے حمایتی آہن پراوہ پاکستان بن توں پہلاں ای اللہ
نوں پیارے ہو گئے۔

تحصیل سرگودھا

اس تحصیل وچ وی ایہہ حالت آہی جے سرگودھا شہر وچ نوے فی صد
آبادی ہندو آہی۔ سلاوالی تے ایس دے آس پاس دے چکاں وچ سکھاں دا
زور آہا پر مسلماناں دیاں ہمدردیاں مسلم لیگ دے نال آہن۔ دھرم دے
میاں قادر بخش بنگیانہ نمبردار ہوون دے باوجود مسلم لیگ دے نال آہن چک

86 شمالی دے چودھری عبدالملک، چک 93 شمالی دے چودھری سردار خان مسلم لیگی آہن۔ وکیلاں توں علاوہ حکیم عبدالرزاق المعروف کابلی شاہ۔ حکیم عبدالرحمن، ماسٹر احمد دین تے ماسٹر عبدالحکیم ایہہ سارے حضرات مسلم لیگ دے کارکن تے معاون آہن۔

الیکشن 1946 دی تیاری

ضلع سرگودھا دے وچ خضر حیات دی ساری سرکاری مشینری دی مخالفت دے باوجود ایہہ لوکاں دے جذبے نوں نہ دبا سکے۔ جیوں جیوں وقت نیڑے آوندا گیا۔ ایہہ جذبہ ودھدا ای گیا۔ اس دی تیاری واسطے اس علاقے وچ سردار شوکت حیات نے وڈا کم کیتا۔ پاکستان بن توں کچھے باغ سیتا رام ایہناں نوں الاٹ ہویا تے اج کل مقام حیات دے ناں نال کالونی ایہناں دے ناں تے ای اے۔ ملک فیروز خان نوں، پیر صاحب سیال شریف، نواب ممتاز خان تے نواب محمد حیات قریشی ہوراں وی اتھے چٹ کے مسلم لیگ واسطے کم کیتا لوکاں نوں مسلم لیگ وچ آون دے فائدے دے تے پاکستان نہ بن دے نقصان دے۔ اس ویلے داعرہ آہا مسلم ہے تو مسلم لیگ وچ آ۔ قاضی مرید احمد، قریشی عبداللہ شاہ ہوراں وی جلسے کر کے وڈا ناں کمایا۔

الیکشن وچ علی گڑھ دے طلباء دا حصہ

1946ء دے الیکشن واسطے قوم نوں جگاؤن دا کم ایہناں طالب

علماں وڈا کیتا۔ اس ویلے لاؤڈ سپیکر کرائے اُتے لے کے ٹانگے دے
 خاکدان تے ہک دا مونہہ اگانہہ تے دوجے دا پچھانہہ کر کے بنھ دتا ویندا
 آہا۔ ٹانگے اُتے بہہ کے ایہہ سارے علاقے وچ پھرے کدائیں کدائیں
 لوکاں ایہناں دی مخالفت وی کیتی پر ایہناں اس کم نوں اپنا تے قومی فرض سمجھ
 کے کیتا حالانکہ ایہناں نوں پتہ آہا کہ علی گڑھ وی ہندوستان وچ رہ وینا اے۔
 وت وی اتھوں دیاں مسلماناں نوں جگاؤن دی خدمت کر کے اپنے ادارے دا
 ناں روشن کر گئے اس واسطے قائد اعظمؒ نے اپنی جائداد دا تریجا حصہ علی گڑھ
 یونیورسٹی نوں دے دتا۔

ایکشن 1946ء

ایہہ ایکشن جتن کان دونہاں پارٹیاں سر دھڑ دی بازی لا دتی۔ خضر
 حیات دا ایہہ پیدائشی ضلع آہا تے دوجا اوہ صوبے دا وزیر اعلیٰ وی آہا۔ دوجے
 پاسے مسلم لیگ اس نوں قوم دی حیاتی تے موت دا مسئلہ بنا کے میدان وچ
 آئی ہوئی آہی۔ ایہہ حقیقت اے جیہڑے اس ویلے قوم دے جذبات مسلم
 لیگ واسطے آہن اوہ وت کدی نہیں ہو سگدے۔ سارے دے سارے نکلے
 توں لے کے وڈے کارکن تائیں جذبہ خدمت نال بھریا ہویا آہا۔ اس دے
 واسطے لوکاں جیلاں دی ہوا کھادی پولیس دی مار کھادی۔ حاجی اللہ یار سکھ
 کھوڑہ ہمیشہ جلوس دے اگے اگے ہوندے جد پولیس ڈنڈے مریندی تے ایہہ
 بجلی دے کھبے نوں پھدھ کے مار کھاندے تے ”اللہ اکبر اللہ اکبر“ دا ذکر

کر دے۔ رسولِ نافرمانی دی وجہ نال نواب محمد حیات قریشی پیر خواجہ قمر الدین سیالوی۔ نوبزادہ عزیز اللہ شیخ فضل حق پراچہ۔ میاں عبدالعزیز ایڈووکیٹ میاں ظہور الدین بار ایٹ لاء، شیخ محمد ابراہیم، حکیم عبدالرزاق کابلی شاہ تے حکیم عبدالرحمن نوں پہلے ای پھدھ کے ڈک چھوڑیا آہنے۔ راولپنڈی ڈویژن وچ مسلماناں دی ہک سیٹ آہی اس تے فیروز خان جت گئے۔ ایہناں دے مقابلے وچ محمد عالم لوٹا ہار گیا۔ لوٹا یونینسٹ اُمیدوار آہا۔ سرگودھا دیاں چار تحصیلاں آہن تے ایہناں دے وچ تحصیل خوشاب وڈی تحصیل آہی تے اتھے مقابلہ نواب ممتاز تے خضر حیات دا آہا۔ تحصیل شاہپور وچ نواب محمد حیات قریشی تے سلطان علی تنکیانہ دا مقابلہ آہا تحصیل سرگودھا وچ قلندر حسین شاہ دا مقابلہ اللہ بخش ٹوانہ نال آہا بھلوال وچ شیخ فضل حق پراچہ دا مقابلہ میاں سلطان احمد رانجھا نال آہا تے صرف فضل حق پراچہ مسلم لیگ دی طرفوں کامیاب قرار دتے گئے۔ باقی تنیاں تے خضر حیات سلطان علی تے اللہ بخش جتائے گئے۔ دھاندلی بقول محمد اقبال صاحب ایڈووکیٹ سرگودھے دے ہک پونگ سٹیشن تے ایہناں ویکھیا جے ہک افسر شیخ منظور علی نے پٹواریاں نوں حکم دتا کہ ووٹراں دا انتظار نہ کرو۔ پرچیاں اُتے اللہ بخش ٹوانے دے ناں دے سامنے مہراں لا کے پادیو۔ ملک اقبال صاحب آپ پرچیاں اکٹھیاں کر کے اُتے لیٹ گئے تے افسر دو جا حکم دتا کہ اس نوں پھدھ کے ہک پاسے کر کے اپنا کم چالو رکھو۔

پریس نے نوائے وقت تے زمیندار دی شکل وچ مسلم لیگ دا بھرپور

ساتھ دتا۔ نواب اللہ بخش ٹوانہ نوائے وقت توں اتنا ڈر دا آہا جے۔ الیکشن دے نیڑے اس دیاں ساریاں کاپیاں خرید کے ساڑ دیندا آہا تاکہ مسلم لیگ نوں فائدہ نہ ہووے۔ اسے نواب اللہ بخش نے جہاں افسراں نے اسنوں جتایا ایہناں نوں مر بے دتے۔ 4 مر بے چوہری بشیر احمد تارڑ افسر آبادی نوں دتے۔ 2 مر بے چوہری ثار احمد نائب تحصیلدار نوں دتے۔

سارے پنجاب وچ 79 مسلم لیگی کامیاب ہوئے۔ سارے مسلم لیگی ممبر کالی اچکن سفید شلووار جناح کیپ پا کے اجلاس وچ بیہندے۔ خضر نے سکھاں نال مل کے مارچ 1946ء وچ مسلم لیگ توں وکھری وزارت بنائی کانگریس دا صدر بھییم سین سچرنوں وزارت ملی تے لوکاں خضر دی خ تے سچر دی وچ ملا کے اس وزارت دا ناں خچر وزارت رکھ دتا۔

تحریک سول نافرمانی

26 جنوری 1947ء نوں نواب ممدوٹ دولتانہ، شوکت حیات، فیروز خان نوں دے گرفتار کر لین دی خبر نال سارے پنجاب وچ اگ لگ گئی لوک دھڑا دھڑ قید ہون لگ پئے سرگودھے دے وی سرکردہ بزرگ قید کر لئے گئے۔ جہناں دا ذکر پہلے کیتا گیا اے۔ آخر خضر وزارت 2 مارچ 1947ء نوں مستعفی ہو گئی۔ قائد اعظم نے وی اس گل نوں پسند کیتا۔ سکھاں تے ہندوواں فساد پا کے مسلم لیگ دی حکومت نہ بن دتی۔ گورنر راج شروع ہويا۔ تے فساد دی دفعہ ہو گئے تے پاکستان بن گیا۔

آزادی توں کچھ داسیسی حال

14 اگست 1947ء نوں اللہ تعالیٰ دی طرفوں مسلماناں نوں ہک ملک پاکستان دا تحفہ ڈھیا۔ قائد اعظم ہار کوئی ہو ر مخلص لیڈر نہ جمیا 1948ء وچ ایہہ اللہ نوں پیارے ہو گئے تے خواجہ ناظم الدین گورنر جنرل بن گئے۔ 1951ء وچ لیاقت علی خان ہوراں نوں گولی مار کے شہید کر دتا گیا تے خواجہ صاحب وزیر اعظم بن گئے تے ملک غلام محمد گورنر جنرل بن گئے۔ 1953ء وچ مرزیاں دے خلاف تحریک چلی تے خواجہ صاحب دی حکومت نوں غلام محمد ختم کر دتا۔ تے ایہناں دی جاء تے محمد علی بوگرا آئے تے ایہناں نوں ہٹا کے چودھری محمد علی نوں لے آندا گیا ایہناں نے 1954ء دا آئین بنایا پر ایہناں نوں وی زیادہ دیر ٹکنا نصیب نہ ہويا تے ایہناں دی جائی حسین شہید سہروردی نوں لے آندا گیا۔ ایہہ چنگے سیاست دان آہن پر ایہہ وزارت وی محلاتی سازشاں دا شکار ہو گئی۔ ایہناں دی تھاویں مسٹر چندر گپتا آئے ایہناں نوں وی دو مہینے کچھ چھٹی کرنی پئی۔ 14 اکتوبر 1957ء نوں ضلع سرگودھا دے ملک فیروز خان نون نوں وزیر اعظم مقرر کیتا گیا۔ ایہناں گوادر دا علاقہ خرید کے پاکستان نال رلایا۔ ایہہ متحدہ پاکستان دے ستویں تے آخری وزیر اعظم آہن اس توں کچھ ایوب خان نے اقتدار اُتے قبضہ کر لیا تے صدارتی نظام نوں چالو کیتا تے بنیادی جمہوریت چلائی۔ ایوب دے آون توں پہلاں غلام محمد گورنر جنرل دی بیماری دی وجہ نال اس دی جاء تے سکندر مرزا قابض ہو گیا۔ ایسے نے ای 7

اکتوبر 1957ء نوں ایوب خان توں مارشل لاء لوائیا۔ پر ایوب خان نے اس دی سیاست چلن نہ دتی تے اس نوں ملک توں ای بھا دتا تے آپ صدر بن گیا ایوب خان نے صدارتی نظام چلایا ایہہ 1957ء توں 1969ء تک اقتدار تے قابض رہیا۔ 1969ء وچ ایہہ اقتدار توں الگ ہو کے یحییٰ خان دے سپرد کر گئے۔ یحییٰ خان نے 1970ء وچ انتخابات کرائے۔ مشرقی پاکستان وچ عوامی لیگ ساریاں سیٹاں لے گئی تے مغربی پاکستان وچ بھٹو صاحب دی نویں جماعت پیپلز پارٹی جت گئی۔ پر سیٹاں عوامی لیگ کول بہوں ہونے دی وجہ نال بھٹو صاحب اقتدار توں محروم ہوون دے خطرے دے پیش ایہناں دے نال متفق نہ ہوئے تے ہندوستانی سیاست کامیاب ہو گئی تے پاکستان بنگلہ دیش بن گیا۔ مشرقی پاکستان دے وکھرا ہوون نال اتھے بھٹو صاحب دی حکومت بن گئی۔ پر ملک دے وچ حالات نہ سدھرے تے اخیر 1977ء وچ ضیاء الحق صاحب نے مارشل لاء لاکے بھٹو صاحب دی سیاست ختم کر دتی۔ ایہناں دے زمانے وچ محمد خان جوینجو وزیراعظم بنے پر وٹ ہٹا دتا گئے۔ اخیر ضیاء صاحب 17 اگست 1988 نوں حادثے وچ فوت ہو گئے۔ ایہناں دی جائی اسحاق خان آ گئے۔ ایہہ 1988 توں 1993ء تک صدر رہے۔ ایہناں بے نظیر تے نواز شریف دی حکومت برطرف کیتی ایہناں توں کچھ فاروق لغاری صاحب صدر بنے تے نواز شریف وزیراعظم بنے آخر لغاری صاحب نوں وی وینا پیا۔ بعد وچ محمد رفیق تارڑ صاحب صدر تے میاں نواز شریف صاحب وزیراعظم

بنے۔ نواز شریف دی حکومت 12 اکتوبر 1999 نوں ختم کر کے جنرل پرویز مشرف صاحب نے بطور چیف ایگزیکٹو حکومت سنبھال لی۔ 2008ء وچ نوں انتخابات ہوئے مشرف چلا گیا تے زرداری صدر بن گیا۔

1951ء دے انتخابات دے نتائج، پاکستان دے پہلے الیکشن

(1) صالح محمد (2) میاں محمد بخش (3) فضل الہی پراچہ (4) قاضی مرید احمد (5) ملک فتح محمد ٹوانہ (6) ملک حبیب اللہ ٹوانہ (7) نوابزادہ سعید قریشی (8) احمد یار ملک (9) فیض احمد (10) امیر عبداللہ (11) خورشید احمد (مسلم لیگی مہاجر) باقی سارے مسلم اہن مقام۔ اس توں کچھ 1956ء وچ ون یونٹ دے انتخاب ہوئے جس وچ ایہہ حضرات چنے گئے۔ (1) چودھری فیض محمد (2) ملک فتح محمد ٹوانہ (3) شیخ فضل الہی پراچہ (4) مہر خدا داد لک (5) محمد سعید قریشی (6) میاں خورشید احمد قریشی (7) قاضی مرید احمد (8) صالح محمد۔

1946ء

وچ ایوب خان دی بی ڈی سسٹم دے نال ایہہ ترے بندے چنے گئے۔ (1) مہر خدا داد لک (2) نور حیات نون (3) محمد ذاکر قریشی۔

1965ء

وچ کنوٹن لیگ دی طرفوں ایہہ حضرات چنے گئے۔ (1) ملک محمد اسلم

(2) محمد حیات تنکیانہ (3) میاں خان کلیار (4) محمد قاسم میلہ (5) محمد حیات۔

1970ء

اس وچ ون یونٹ ترٹ گیا تے صوبائی تے قومی دے وکھرے
وکھرے انتخابات ہوئے تے ایس ویلے پیپلز پارٹی مسلم لیگ دے مقابلے وچ
آ گئی۔ قومی (1) انور علی نون (2) حفیظ اللہ چیمہ (پیپلز پارٹی) (1) بابو کرم
بخش (2) میاں محمد ذاکر قریشی پنجاب پیپلز پارٹی (1) ملک مختار احمد (2) سردار
صغیر احمد (3) غلام احمد (4) محمد صادق (5) محمد اعظم (6) محمد اکرم (کونسل
مسلم لیگ) (1) احسان الحق پراچہ (2) نواز علی شاہ (3) خالق داد (4) محمد
بخش (آزاد)

1977ء

دے وچ قومی تے صوبائی دوواں وچ ساری دیاں ساریاں سیٹاں
پیپلز پارٹی لے گئی لوک اوہ ای آہن پارٹی بدل گئے۔ (1) ملک دوست محمد
اعوان (2) ملک میاں سلطان اعوان (3) ملک محمد اعظم (4) ملک محمد انور ٹوانہ
(5) سردار سکندر حیات (6) خالد امیر خان (7) ممتاز احمد کابلوں (8) سید
مسعود زیدی (9) ظفر علی ملک (10) احسان الحق پراچہ (11) سردار صغیر احمد
(12) نذیر احمد رانجھا (13) محمد بخش مخدوم۔ ایہہ سارے صوبائی اسمبلی دے
ہین۔ قومی اسمبلی (1) کرم بخش اعوان (2) نسیم احمد آہیر (3) میاں محمد ذاکر

قریشی (4) مہر خدا داد لک (5) حفیظ اللہ چیمہ (6) نور حیات نون (7) ملک
انور علی نون۔

1985ء

دے انتخابات ضیاء الحق دے زمانے وچ غیر جماعتی ہوئے۔ پر جد
مسلم لیگ دی طرف اشارہ ہویا تے سارے لیگی بن گئے۔
قومی اسمبلی (1) نسیم احمد آہیر (2) ملک محمد نعیم خان اعوان (3)
نصرت علی شاہ (4) محمد اسلم کھیلو (5) انور علی چیمہ (6) امان اللہ (7) نور
حیات نون۔

پنجاب اسمبلی (1) شجاع محمد خان (2) ملک مختار احمد اعوان (3) خدا
بخش ٹوانہ (4) احمد اقبال ٹوانہ (5) صاحبزادہ غلام نصیر الدین (6) جاوید
اقبال چیمہ (7) غلام دستگیر لک (8) فرخ جاوید گھمن (9) انوار الحق پراچہ
(10) ریاض امیر عرف عبدالحق (11) مناظر علی رانجھا (12) شاہنواز رانجھا
(13) محمد خان جیپال۔

1988ء

قومی اسمبلی (1) چودھری انور علی چیمہ (2) حاجی محمد جاوید اقبال چیمہ
(3) شیخ احسان الحق پراچہ (4) کرنل قادر بخش میلہ (5) ملک نعیم اعوان
(6) خدا بخش ٹوانہ۔

صوبائی اسمبلی (1) مہر غلام دستگیر لگ (2) چودھری محمد خان جہاں
 (3) میاں محمد اسلم رانجھا (4) میاں سیف احمد رانجھا (5) صاحبزادہ غلام نصیر
 الدین (6) سکندر حیات میکن (7) میاں محمد اشرف کلیار (8) عامر سلطان
 چیمہ (9) چودھری عبدالحمید (10) مختار احمد اعوان (11) غلام محمد ٹوانہ۔

1997ء

قومی اسمبلی (1) چودھری انور علی چیمہ (2) چودھری عبدالحمید
 (3) چودھری غیاث احمد میلہ (4) ملک عدنان حیات نون (5) ملک محمد اسلم
 اعوان (6) طارق سی قیصر۔

صوبائی اسمبلی (1) چودھری عامر سلطان چیمہ (2) میاں محمد منیر قریشی
 (3) انور حیات لک (4) چودھری شاہنواز رانجھا (5) حاجی احمد خان ہرل
 (6) محمد الیاس قریشی (7) حاجی اللہ یار انصاری (8) میاں محمد اشرف کلیار
 (9) میاں احمد شیر رانجھا (10) سید محمد محسن شاہ (11) شیخ احسان الحق پراچہ
 سینئر۔ 12 اکتوبر 1999ء نوں ایہہ اسمبلیاں ختم کر کے جنرل پرویز مشرف
 نے نوں بلدیاتی نظام دا اعلان کیتا۔ ہُن ضلع دا سربراہ ڈی سی دی بجائے ناظم
 ہوسی تے اوہ ووٹاں راہیں چُنیا ویسی۔ پہلا ناظم امجد علی نون بنیا تے اوس توں
 بعد انعام الحق پرچہ بنیا 2008ء وچ صدر زرداری دی حکومت نے ایہہ نظام
 ختم کر دتا۔

سرگودھے دے شاہیناں دے تاریخی کارنامے

6 ستمبر 1965ء دی کالی رات وچ ہندوستان نے بغیر کسے اعلان دے پاکستان اُتے حملہ کر دتا۔ اس دیاں فوجاں نے لاہور اُتے قبضہ کرن لئی وڈی تیزی نال ودھنا شروع کر دتا۔ سرحدی غریب عوام نوں شہید کر کے ایہہ سمجھ لیا جے پاکستان وچ مقابلے دی ہمت ای نہیں۔ ہندوستان دیاں فوجاں دے کمانڈر نے ایہہ اعلان وی کیتا جے اوہ لاہور فیلٹی ہوٹل وچ ونج کے چاء پیسن۔

پاکستان دیاں مجاہد فوجاں نوں جد دشمن دے اس ناپاک ارادے دا پتہ لگاتے اوہ فوراً ملکی دفاع واسطے میدان وچ آ گئیاں۔ ایہناں حالات وچ زمینی فوج دی بہادری دے باوجود اس نوں سنبھلنے واسطے تھوڑا بہت وقت چاہیدا آہ۔ اس نے اپنی مدد واسطے دشمن نوں ڈکن کان پاکستان دے شاہین صفت ہوائی فوج نوں مدد واسطے آکھیا۔

پاکستان دی ہوائی فوج نے کوئی وقت ضائع کیتے بغیر فوراً برکی تے واہگہ سیکٹر پہنچ کے دشمن اُتے بمباریاں دا مینہ وسادتا۔ تے دشمن دا اگانہہ ودھنا رُک گیا تے پاکستانی زمینی فوج وی سنبھل گئی تے اس نے ایہناں محاذاں تے اپڑ کے دشمن نوں ڈک لیا۔ ساڈی ہوائی فوج نے زمینی فوج دی مدد کرن دے نال نال اگانہہ ودھ کے دشمن دے ملک وچ ونج کے اُدم پور، ہلواڑہ، پٹھان کوٹ

دے ہوائی اڈیاں اُتے حملے کر کے ایہناں نوں تباہ کر دتا۔

6 تے 7 ستمبر دی وچکاری رات توں ای سارے پاکستان وچ بلیک آؤٹ کر دتا گیا تے کرفیو وی لا دتا گیا۔ اس رات نوں سرگودھے نے پہلی واری بلیک آؤٹ دا تجربہ کیتا۔ سرگودھے آلیاں نوں اس توں پہلاں کدی ہوائی جنگ دا تماشا ویکھن دا اتفاق نہ ہویا اوہ انتظار کریندے رہے۔ 4 بجے خطرے دے گھگھو وگے پر جلدی ای وت گھگھو وگیا کہ خطرہ ٹل گیا اے۔ پر اے لوک سویلے دی نماز پڑھ کے مسیتاں وچوں نکل ای رہے آہن بے گھگھو وگن لگ پئے تے نالے توپاں دے گولیاں دی آتشبازی نے سارے سرگودھے نوں کج لیا۔ سرگودھے آلیاں ایہہ سمجھیا کہ فوجی مشقاں کر رہے نیں کیونکہ سائرین وگیا۔ حالانکہ ایہہ مشق ناہی بلکہ سرگودھے اُتے اچاک بھارتی حملے دا جواب دتا جا رہیا ہا۔ سارا آسمان دھوں نال بھری گیا۔ دہ پندھراں منٹاں بعد پتہ لگا کہ بھارتی ہوائی جہاز کافی اُچائی تے آہن تے اگے پاکستانی ہوا بازوں نوں تیار ویکھ کے بھیج گئے نیں۔ جد لوکاں توں پتہ لگا تے لوک گلیاں سڑکاں میداناں وچ جمع ہو کے متحد ہو کے دشمن دا مقابلہ کرن دی تدبیراں سوچن لگ پئے۔ نالے ایہہ وی ادھے آہن بے حیاتی تے موت صرف اللہ دے ہتھ وچ اے بے موت لکھی اے تے گھر بیٹھیاں وی آ وینی اے۔ حالی لوک اس قسم دے پروگرام بنا ای رہے آہن بے 10 بجے دے نیڑے بھارتی ہوائی جہازاں سرگودھا تے وت زبردست حملہ کر دتا۔ خطرے دا سائرین سُن دیاں نال ای لوک پناہ گاہواں وچ بھیج گئے۔ اڈے تے توپاں نے گولے وگولے شروع

کر دتے تے اُڈ کے دشمن دا انتظار کرن لگے۔ لوکاں ویکھیا جے بھارت دے ترے جہاز پٹھاں آ کے گولہ باری کرن دی کوشش کر رہے نیں تے پاکستان دا ہک سیر جیٹ جہاز ایہناں اُتے بے جگری نال حملے کر رہیا اے۔ ویدھیاں ویدھیاں بھارت دے ہک جہاز نوں اک لگ گئی تے اوہ پرتالیاں لیدھا ہویاں زمین اُتے ڈھاندا ہویا ویکھیا گیا۔ اس توں کچھے دوجا وی گولی دا شکار ہو کے زمی تے آ رہیا۔ اس توں کچھے تے تریجا وی اک دی نذر ہو گیا پاکستانی پائلٹ دوجیاں نوں ڈھوڈھن لگے رہے پر اوہ نس گئے تے حملہ ٹل گیا۔ اس وقت توپاں نے وی گولے وسا کے سارے ہوائی اڈے تے گولیاں دی چھاں کر دتی۔ جس دی وجہ نال کسے بھارتی جہاز نوں نیڑے آون دی ہمت نہ ہوئی۔ اس دے تقریباً پون گھنٹہ کچھے وت خطرے دا سائرن وجیا۔ تے اس دے نال ای پنج بھارتی جہاز اُڈ دے ہوئے نظر آئے تے اوہ سرگودھا شہر دے بچے پاسے مڑے ای آہن جے دو پاکستانی جہاز ایہناں دے کچھے اُڈ دے ہوئے نظر آئے۔ آسمان اُتے کل ست جہاز ہو گئے۔ وڈے وڈے دھماکے ہون نال وڈے خوف دی حالت طاری ہو گئی۔ پنجاں وچوں ترے جہاز غائب ہو گئے۔ پاکستانیاں ایہناں دا پچھا کیتا پر اوہ سارے دے سارے نس گئے۔ سارا دیہوں تھوڑی تھوڑی ڈھل توں کچھے سائرن وگدے رہے۔ تے بھارتی جہاز آ آ کے فنا ہوندے رہے۔ اس دیہاڑے باوی جہازاں وچوں نو جہاز تباہ ہو گئے۔


دوجے پاسے پاکستان دے شاہین صفت ہوا بازاں دے سکاڈرن لیڈر محمد محمود عالم (ایم ایم عالم) نے صرف تریہہ سکنڈاں یعنی ادھے منٹ دے

اندر بھارت دے پنج جہاز مار ڈھائے۔ اس طرح دنیا دی تاریخ وچ اتنے تھوڑے وقت وچ پنج طیارے ڈھانا ہک شاندار ریکارڈ اے۔ اس دیہاڑے توں کچھ بھارت نوں کدی وی دن دیہاڑے سرگودھے آون دی جرات نہیں ہوئی۔ جد بھارت دی ہوائی طاقت دی کنڈ ترٹ گئی تے اس توں کچھ چن دی چانی وچ اوہدے تے بم اُدے اُدے وگا کے نس وین وچ ای اپنی خیریت سمجھدے۔ سول ڈیفنس دے رضا کار سیٹی دی آواز نال لوکاں نوں خطرات توں ہوشیار تے خود اپنے بچاؤ دی تیاریاں وچ دیہوں رات جٹے رہے سول ڈیفنس پوسٹ جیہڑی ہوائی اڈے دے نیڑے آہی پوری طرحاں چوکس رہی اس دے سارے رضا کار دیہاڑی تاں اپنے اپنے کماں وچ لگے رہندے پر رات نوں سول ڈیفنس دی ہدایت دے مطابق علاقے وچ گشت کریندے۔

ایہناں ستارہاں دیہاڑاں دی جنگ وچ ہندوستان نے 59 حملے سرگودھے اُتے کیے۔ ایہناں حملیاں وچ ایہناں کل 287 بمب سٹے۔ ایہہ بمب ہزار ہزار پونڈ وزن دے آہن۔ بہوں سارے بمب کئی اہم جاہیں تے ڈھٹھے پر اللہ دے فضل نال اوہ نہ پاٹ سکے۔ چک نمبر 48 شمالی تے چک نمبر 101 شمالی وچ ایہناں حملیاں نال 24 پاکستانی شہید ہوئے۔ بہوں سارے ونگر مر گئے تے مکان تباہ ہو گئے تے فصلاں برباد ہو گئیاں۔ ایہناں ستاراں دیہاڑیاں وچ بھارت دے 111 جہاز بالکل تباہ ہو گئے 9 ناکارہ ہو گئے۔ ایہناں وچوں صرف سرگودھے وچ 22 جہاز ڈھائے گئے۔ ایہہ گل اللہ پاک دے خاص فضل دا ہک ادنیٰ نمونہ اے کہ دشمن اتنی طاقت تے تیاری دے

باوجود سرگودھے دے ہوائی اڈے دے کسے شے نوں کوئی نقصان نہ پہنچا سکے۔
اس جنگ وچ پوری قوم تے خاص کر سرگودھے دے شہریاں دی
ہمت دی داد دینی پوندی اے جے ایہناں ہر طرحاں پوری چوکسی نال دن رات
اپنے اپنے فرائض سرانجام دتے۔ ابھی وجہ اے جے لوکاں دے حوصلے بلند
رہے۔ کسے قسم دی کوئی کوتاہی نہ ہوئی۔ ساڈے شاہین صفت ہوا باز ودھ ودھ
کے حملے کریندے رہے جس دی وجہ نال سرگودھا انہاندی ہمت دی وجہ نال
پوری دنیا وچ مشہور ہو گیا۔

اہل سرگودھا دی ایہناں قربانیاں نوں ویکھ کے اس وقت دے صدر محمد
ایوب خان نے سرگودھا شہر نوں پرچم ہلال استقلال عنایت کیتا۔ اس پرچم نوں
ہر سال خاص تقریب منا کے تبدیل کیتا ویندا اے تاکہ اوہ جذبہ تے ولولہ زندہ
رہوے۔



تاریخ میلہ جشن سرگودھا

تعارف

ضلع کنسل سرگودھا دے تحت ہک وڈے عرصے توں سالانہ میلہ اسپاں ومویشیاں دے نال تے لگدا رہیا اے۔ ایہہ ضلع دی تعمیر تے ترقی دا ہک وڈا معیار اے۔ ایہہ میلہ نہ صرف سرگودھا ضلع وچ مشہور اے بلکہ صوبے وچ وی اس دے مقابلے دا کوئی نہیں۔ 1983ء وچ اس داناں میلہ اسپاں ومویشیاں توں بدل کے جشن سرگودھا رکھ دتا گیا۔ اس دے نال اس دی اہمیت ہور زیادہ ودھ گئی اے۔

ایہہ ضلع چونکہ ہک زرعی علاقے وچ اے اس کر کے ایٹھوں دے بہوں لوکاں دا تذکرہ کھیتی باڑی نال وابستہ اے۔ اس واسطے اس میلے وچ زرعی تے صنعتی نمائش دے نال زمینداراں نوں زراعت دے نویں نویں طریقے تے تجربے دے ویندے نیں۔ اس دے نال نویاں نویاں مشیناں نوں ورتن دے فائدے وی دے ویندے نیں۔ صنعت و حرفت دے لحاظ نال حالی ایہہ ضلع دو جیاں ضلعیاں توں بہوں کچھے اے۔

جشن سرگودھا دا مقصد

اس میلے دا اصل مقصد لوکاں نوں اپنے ڈنگراں وچ دلچسپی لین کیوں

جے ایہناں نال ای ملک دی ترقی دا انحصار اے لوکاں نوں وافر دودھ ملسی تاں اوہ صحتمند رہسن۔ پاکستان دی معیشت زراعت نال وابستہ اے۔ 70 فیصد آبادی دیہاتاں وچ رہندی اے۔ اس واسطے ایہناں نوں دسن واسطے کہ کیوں آج کل نسل کشی حیوانات دے نویں طریقے آ گئے آہن۔ جہناں نوں ورت کے اوہ وی اپنے مال ڈنگر نوں چنگا کر سگدے نیں۔ اس میلے تے دیہاتی کارگراں نوں وی اپنیاں اپنیاں کارگراں دیاں شینیاں بنا کے اتھے لوکاں نوں دسن دا موقع ملدا اے۔ اس توں علاوہ اتھے پٹھاں دتے گئے فائدے وی ہوندے نیں۔

(1) ڈنگراں دی منڈی

(2) لوکاں لئی تفریح

(3) کھڈکاراں نوں جوہر دکھاؤنے دا موقع

(4) کھیڈاں دا ودھا

تاریخ میلہ

شاہپور گزیٹری رو نال اس میلے دی ابتدا صدی دے اخیر وچ ہوئی۔ 1904ء توں پہلاں ایہہ میلہ اسپاں شاہپور صدر وچ لگدا آہ۔ کیونکہ اس ویلے ضلع شاہپور ای ہوندا آہا۔ ایہہ میلہ محکمہ سول وٹرنری دی نگرانی وچ ڈسٹرکٹ بورڈ شاہپور دے تحت لگدا رہیا۔ 1904ء توں کچھ نہر لوئر جہلم دی کالونی دے علاقے وچ گھوڑیاں دی نسل ودھان کان ہک ہور میلہ سرگودھے وچ وی لگن

دی منظوری مل گئی۔ ایہہ دوویں میلے 1909ء تائیں آرمی ریماؤنٹ ڈپو دی نگرانی وچ لگدے رہے۔ پر شاہپور دا میلہ برائے نام رہ گیا سارا زور سرگودھا ول ای آ گیا۔ اس واسطے 1910ء وچ حسب ہدایت سپرنٹنڈنٹ سول وٹرنری ڈیپارٹمنٹ و آرمی ریماؤنٹ ڈپو شاہپور دے میلے نوں سرگودھے دے میلے نال ملا دتا گیا۔ لیکن 1911ء وچ گھوڑی پالاں دے رولے دی وجہ نال اس نوں وت وکھرا کر دتا گیا۔ 1914ء وچ وت بند ہو گیا۔ تے ایہہ ہک کھیڈ بن گئی۔ 1914ء وچ وت وکھرا لگا۔ آخر 1918ء وچ وت بند ہو گیا تے سرگودھے دا ای کامیاب ہو گیا۔

1904ء دے ریکارڈ دے مطابق شاہپور تے سرگودھا دوواں میلیاں وچ 1721ء گھوڑے آئے۔ تے ہزار روپیہ انعام ونڈیا گیا۔ اس دے انتظامی خرچ دا بھار ڈسٹرکٹ بورڈ دے ذمے رہیا۔ پہلے صرف گھوڑے آوندے آہن اس نوں کچھے اس دا ناں اسپاں و مویشیاں رکھیا گیا۔ نال نال زرعی نمائش وی رکھی گئی۔ انگریزی حکومت وچ میلے دے اخیر اُتے ہک خصوصی دربار لایا ویندا آہا۔ جس دے وچ انگریز دے خطاب یافتہ اپنے درجے دے مطابق بہندے۔ اس وچ حکومت محکمہ ریماؤنٹ ڈپو تے سول وٹرنری ڈیپارٹمنٹ دی طرفوں سندات، تعریفی سرٹیفکیٹ ایہناں لوکاں نوں دتے ویندے۔ جیہڑے ضلع وچ نسل کشی اسپاں و حیوانات وچ کوئی خصوصی کارنامہ سرانجام دیندے۔ ایہہ دربار 1947ء دے کچھے ختم کر دتا گیا۔ پاکستان بنن توں کچھے اس میلے دی اہمیت دے پیش نظر اس وچ صدر مملکت صوبے دے گورنر وزیر تے ملک دے ہور

وڈے بندے اتھے آ کے حاضری دیندے نیں۔ اس میلے دی وجہ نال لوکاں دا کاروبار خوب چمکدا اے۔ سرگودھے دے زمیندار اپنے گھوڑیاں نوں سونے دے گہنے ریشمی شال۔ رنگ برنگی واگاں تے سازاں نوں خوب سجا کے میدان وچ نچاؤن کان لے آوندے نیں۔

1963ء تک ایہہ میلہ اپنے ضلع دے عوام تک ای محدود آہا۔ جد ایہہ ڈویژنل ہیڈ کوارٹر بن گیا تے اس جشن دی اہمیت ودھ گئی تے اس دے وچ وادھا کرن واسطے وڈے پیمانے اُتے صنعتی زراعتی نمائش دے نال ثقافتی پروگراماں دا وی وادھا کیتا گیا۔ ایہہ میلہ موسم بہار وچ لگن دی وجہ نال اس دا ناں وی جشن بہاراں سرگودھا رکھ دتا گیا۔ جشن بہاراں سرگودھا دے واسطے ہک ثقافتی تہوار بن گیا اے۔ ضلع دا ہر بندہ سارا سال اس میلے دا انتظار کریندا اے۔ ایہہ میلہ پورا ہک ہفتہ لوکاں وچ خوشیاں ونڈ کے ختم ہوندا اے۔ سرگودھا آرٹس کونسل دے ماتحت جناح ہال وچ ڈرامے دا اہتمام وی کیتا ویندا اے۔ اتھے ای ملک بھر دے شعراء ہک مشاعرے وچ شریک ہوندے نیں۔ حسن قرات دے مقابلے وی کرائے ویندے نیں۔ اس دے نال نال پی ٹی شو لوک فنکاراں دے پروگرام وی ہوندے نیں۔ جہناں نوں ویکھ کے لوک خوش ہوندے نیں۔

تاریخ ضلع کنسل سرگودھا

ضلع کنسل سرگودھا دی تاریخ 14 جون 1884ء توں شروع ہوندى اے۔ شروع وچ ڈپٹی کمشنر اس دا چیئرمین ہوندا آہا 1947ء وچ پاکستان بنن تے پہلی واری غیر سرکاری ممبراں وچوں ہک رکن نوں چیئرمین چنیا گیا۔ اس ویلے ڈسٹرکٹ بورڈ دے ممبراں دی تعداد 54 ایہی پر 1904ء وچ ڈسٹرکٹ بورڈ ختم کر دتا گیا۔ اس دا انتظام سرکار دے مقرر کردہ افسر دے سپرد کر دتا گیا۔ 1940ء وچ وت بنیادی جمہوریتاں پاروں بحال ہويا۔ ڈپٹی کمشنر اس دے چیئرمین بنائے گئے۔ ممبراں دی تعداد 35 اے موجودہ ڈسٹرکٹ کنسل اختیارات دے لحاظ نال ڈسٹرکٹ بورڈ نالوں زیادہ اختیارات دی مالک اے۔ ڈسٹرکٹ بورڈ دا عمل دخل صرف دیہات تک محدود آہا جد کہ ڈسٹرکٹ کنسل دا اثر دیہات تے شہر دوہاں تے اے۔ ڈسٹرکٹ بورڈ دے کم مقامی سطح دے آہن۔ ضلع دے عام نظم و نسق نال اس دا کوئی واسطہ نہ۔ ضلع کنسل صرف لوکل گورنمنٹ دا ہک ادارہ نہیں بلکہ سرکار دا ہک اہم جزو اے۔ ضلع دی ساری ترقی دی ذمہ داری ایسے تے ہے۔ ہر مہینے اس دے دو اجلاس ہوندے نیں۔ جس وچ ضلع دے مسائل تے ترقیاتی کماں دا جائزہ لیا ویندا اے۔ اس دی اہمیت دا اندازہ اس گل توں لایا ویندا اے۔

1886ء وچ ڈسٹرکٹ بورڈ دی کل آمدنی 71538 تے خرچ

60404 روپے آہا۔ 1947-48ء وچ اس دی آمدنی 172227 تے خرچ
 1697247 روپے ہو گیا اس طرحاں 1962-63ء وچ آمدن
 3688102 تے خرچ 2301011 روپے آہا۔ انجے ہارے 1966-67ء
 وچ آمدن 3512000 تے اخراجات 40 لکھ تک اپڑ گئے۔

1960ء وچ ہک نواں ترقیاتی فنڈ قائم کیتا گیا۔ جس نال یونین
 کونسلوں دے ترقیاتی منصوبے مکمل کرن واسطے چھ لکھ روپے رکھے گئے۔ ضلع
 کونسل اپنی آمدنی دا کافی حصہ رفاہی کماں اُتے خرچ کریندی اے۔

ضلع کونسل کول ہک ہزار تریہہ میل لمباں سڑکاں آہن ایہناں دی
 مرمت اُتے تقریباً ڈھائی لکھ روپیہ سالانہ خرچ ہوندا اے۔ اپنے خرچے پورا
 کرن واسطے اپنے ٹیکس ودھا کے پورے کریندی اے۔ اس ویلے ڈسٹرکٹ
 کونسل کول 30 شفاخانہ حیوانات 4 مراکز زچہ و بچہ 54 ویکسی نیشن سنٹر۔ 54
 یونانی حکیم، 45 شفاخانہ حیوانات 10 پھانگ مویشیاں ہین۔ اس وقت ضلع
 کونسل دے ملازمین دی تعداد 800 سے زائد اے۔ اس طرح 800 خاندان
 کی پرورش اس دے زمے اے پونے تن سو ریٹائرڈ ملازمین نوں پنشن وی دتی
 جا رہی اے۔ اس مد اُتے کافی رقم خرچ ہو رہی اے۔ اس توں علاوہ دھرم
 چک 104 شمالی جوڑا سکیسر فروکہ چک 66 وچ واٹر سپلائی دیاں سکیمیاں مکمل
 کیتیاں گئیاں نیں۔ ایہناں سکیمیاں نوں چالو رکھن تے چار لکھ روپیہ سالانہ
 خرچ ہو رہیا اے۔ اس دے نال ضلع کونسل حسب روایت غریب طالب علمان
 نوں وظیفے وی دیندی اے۔ وظائف کمیٹی نوں پنجاہ ہزار روپے دتے گئے۔

گنکیاں تے ڈوریاں انھیاں دے سکولاں دے اپوا دے سکول نوں مجموعی طور
تے ڈھائی لکھ روپے دے عطیے دتے گئے۔

1964ء توں پہلاں سارے تعلیمی ادارے پرائمری مڈل ہائی ضلع
کونسل دے کنٹرول وچ رہے۔ دسمبر 1964ء وچ ایہہ گورنمنٹ کول چلے
گئے۔ جولائی 1970ء وچ ہائی سکول وی گورنمنٹ نے لے لئے پر اُستاداں
دیاں پشٹناں ڈسٹرکٹ کونسل دے ذمے ای رہیاں۔ ضلع کونسل نوں گورنمنٹ
دی طرفوں کوئی گرانٹ نہیں ملدی۔ ایہہ سارے خرچے اپنی آمدنی ویکھ کے
کریندی اے۔

انتظامی اختیارات چیئرمین صاحب کول ہین وائس چیئرمین صاحب
چیئرمین دے دتے ہوئے اختیارات استعمال کرسگدا اے۔ چیف افسر سارے
دفتر دا انچارج ہوندا اے۔ اجلاس وچ بطور سیکرٹری کم کردا اے اس دے ماتحت
ترے پرنسپل افسر ہوندے نیں (ڈسٹرکٹ انجینئر، کاؤنٹس، افسر۔)

سرگودھے دی تاریخ دا اجمالی خاکہ

ضلع سرگودھا دی تاریخ اتنی ای پرانی اے جتنی خود انسان دی اپنی تاریخ اے۔ جد ایسی تاریخ نوں پڑھدے آں تاں بھیرہ خوشاب چنیوٹ تے شاہپور دا ذکر ملدا اے۔ پر سرگودھے دا کوئی ذکر نہیں کیوں جے سرگودھے دا سو سال پہلے وجود ای کوئی نہ آہا۔ جیہڑی جاہ سرگودھا شہر اے ایہہ پہلاں بار ہوندی آہی۔ تے چک ساہنو جیہڑا وسدا اے اج اس دا کوئی ناں نہیں لیندا۔ کسے شے اُتے وی وقت کھو جھیا نہیں رہندا۔ ہر کمال نوں زوال اے تے زوال نوں کمال اے۔ ایہہ مورخین دا کم اے کہ اوہ ایہناں ماضی دیاں گڑیاں نوں تلاش کر کے عوام نوں دسن کیوں جے ایہناں سلسلیاں وچ ساڈی تہذیب و ثقافت دبی پئی اے۔ ایہناں نوں پٹ کے محفوظ کر لینا ہک وڈا کم اے۔ نہیں تاں اج دے مشینی دور وچ ایہہ تاریخی بے وڈی تیزی نال ختم ہو رہے نیں تے ایہناں وچوں جے کجھ ملدا اے اوس نوں سانجھ کے نہ رکھیا تے آون والے ایہناں گڑیاں توں محروم ہو ویسن۔ تاریخ وچ جتنا ناں بھیرہ خوشاب دا آوندا اے لہور دا نہیں آوندا۔

ایہہ حقیقت اے کہ سرزمین سرگودھا کئی تہذیبیاں دا مرکز تے امین رہی۔ ایہہ دو دریاواں دے وچکار ہون دی وجہ کر کے پنجاب دا مرکز رہی۔ دریا جہلم تے چھاں آبی گزرگا ہواں آہن۔ ایہناں دے ذریعے اج کل دی موٹر

وے دی طرح سفر ہون دا ذریعہ آہن۔ درہ خیبر توں آون والے سارے حملہ آور ایہتھوں ای ہو کے گزر دے آہن۔ اس واسطے ساڈے علاقے دی تاریخ اتنی ای پرانی اے جتنی برصغیر دی اے۔

قدیم وسیب

بار دے زمانے دا وسیب وڈا سادہ ہوندا آہا۔ لوک یا تاں اجڑ رکھدے آہن تے ایہناں نال اپنیاں ضرورتاں پوریاں کر لیندے آہن یا کجھ لوک کھیتی باڑی کریندے آہن تے باقی لوک ایہناں دی مدد کریندے آہن جہاں نوں کمی آکھیا ویندا اے۔ ساڈے علاقے وچ مسلماناں وچ دوکانداری تے تجارت دا رواج بالکل نہ۔ سبھ توں پہلاں کھوجیاں تے پراچیاں نے تجارت دے میدان وچ ہندوواں دا مقابلہ کیتا۔ پاکستان بنن توں پہلے تائیں لوک دکانداری نوں بہوں گھٹیا سمجھدے آہن۔

بیماریاں

مرد تے عورتاں عام طور تے وڈے سختی ہوندیاں آہن۔ دو نویں دیہوں رات کم کر کے روزی دا سامان اکٹھا کریندے آہن ایس زمانے وچ صرف دو بیماریاں لوکاں نوں تنگ کریندیاں آہن۔ ہک ملیریا تے دوجی ہیضہ۔ کدی کدی طاعون وی آویندی آہی جیہڑی رہی کھئی کسر کڈھ دیندی آہی۔ ایہہ بیماری وڈی خطرناک آہی اللہ دا شکر اے جے ہُن ایہہ ختم ہو گئی اے۔

ٹھڈھیاں (چیچک) دی ہک مرض اہی جس نال بندے دے پنڈے اُتے چُٹ (داغ) پے ویندے آہن ہن ایہہ بیماری وی ختم ہوگئی اے۔ سادہ زندگی دے سبب ہُن دیاں نویاں بیماریاں کوئی نہ جاندا۔ مثلاً ڈیپریشن، ہارٹ اٹیک، ایڈز، بلڈ پریشر وغیرہ۔

مختلف قبیلے

اس ضلع وچ وڈے وڈے وِسن والے قبیلے تے قوماں ایہہ نیں۔
 (1) ٹوانے، نون، بلوچ، تنگیا، قریشی، راجپوت اس ضلع دے ایہہ وڈے قبیلے کاشتکار آہن۔ زرعی معیشت ایہناں دے قبضے وچ رہی۔ ایہناں دی آبادی دریاواں دی کدھیاں اُتے رہی ایہہ خاندان تحصیل شاہپور تے بھلوال وچ ای آہن باقی سارا ضلع بے آباد آہا۔ ایہہ قبیلے ایہناں علاقیاں دے وچ حکومت وی کریندے آہن۔ ایہناں دے رقبے ہک قسم دیاں ریاستاں ہوندیاں آہن۔

دوجے قبیلے

ایہناں وڈیاں قبیلیاں توں وکھ ہو کر کاشت کار قبیلے وی آہن جہناں دے کول گزارے دی زمی ہوندی آہی۔ چاچڑ، پوہلے، بکھر، اعوان، جھاوڑی، کنڈان، بھسین، کمبہ، لائی، لاہڑی، ہنجر، جے، بوسال، گوندل، چدھڑ، ہرل، ارائیں، پڑھیار، کھل، مخدوم، میانے، سپرا، اجرا، کلیار، بھٹی،

بلوچ، بیرے، بجن، بھلوانے، چھینے، ماہل، قطبی، کلوٹ، ہرگن، ریحان،
 کہوٹ، ہتار، چڈو، ناڑو، تھابل، نسوانے، گدوانے، بالی، بھوچرے،
 گورائے، کھارے، کُے، چوہے، نیول، ککڑ، لاہوری، پنختھے، لالی، کچھیلے،
 میلے، بچے، بھٹوانے، سید، سیال، بالے، بدین، گجر، نانچ، ساہی، نیکے، کھچی،
 بھاگت، مانگٹ، گھنجیرے، جوئے، سگھوال، جپال، مڑانے، ڈال، سنگھے،
 دھریانے، راجے، بھرت، ماس، منہاس، جوہی، مجو کے، نھو کے، جفرانے،
 بکرانے، ملانے، لڈیانے، تارڑ وغیرہ۔



مغلاں دا آخری دور

محمد شاہ دے آخری زمانے وچ بھیرے اُتے راجہ سلامت رائے جیہڑا آئند قبیلے نال تعلق رکھدا آہا بطور گورنر کم کر رہیا آہ۔ خوشاب اس ویلے نواب احمد یار بلوچ دے قبضے وچ آہ۔ شاہپورتوں ڈکھن چھاں تائیں گورنر ملتان مہاراجہ کوڑا مل دے ماتحت آہا۔ باقی تھل دا علاقہ ڈیرے دے بلوچاں دے ماتحت آہا۔ اس ویلے سارے علاقے وچ افراتفری دا دور آہ۔ مغلاں دی کمزوری نوں دیکھ کے سارے پنجاب اُتے حملیاں دا ہک سلسلہ شروع ہو گیا۔ 1757ء وچ احمد شاہ ابدالی نے اپنے پتر تیمور دی مدد واسطے نور الدین بامزئی نوں بطور جرنیل گھلیا۔ تاکہ اوہ مرہٹاں نوں خوشاب توں جہلم ٹپن توں روکے۔ پر نور الدین نے اس علاقے نوں مختلف بہانیاں نال انج لٹیا۔ جے شہراں دے شہر غرق کر چھوڑے چک ساہنوں، بھیرہ میانی تے ہور جیہڑے پنڈ (کھنڈر) انج نظر آوندے نیں سارے اسے جرنیل دے اگ تے تلوار دے ادنی نشانی نیں۔

نواب احمد یار دی وفات توں کچھ خوشاب وی راجہ سلامت رائے دے قبضے وچ آ گیا۔ پر اس نوں بہوں چر حکومت کرنی نصیب نہ ہوئی۔ کیوں جے عباس خاں خٹک جیہڑا احمد شاہ پاروں پنڈ دادخان تے ونہار دا حاکم آہ تے اس نوں دھوکے نال قتل کر کے حکومت اُتے قبضہ کر لیا۔ عباس خاں نے

بھیرے اُتے قبضہ تال کر لیا پر اس نوں ایہہ حکومت مہکھی پئی۔ کیوں جے راجہ سلامت رائے دی بیوہ نے چاؤہ دے قلعے وچ بہہ کے اس دا مقابلہ کیتا تے سلامت رائے دے بھترے فتح سنگھ نے فتح گڑھ دے قلعے وچ عباس خان دا مقابلہ کیتا۔ آخر کار عباس خان قید ہو گیا تے فتح سنگھ نوں سلامت رائے دا وارث بنا کے بھیرہ شاہپور تے خوشاب دا گورنر بنا دتا گیا تے جہلم پار دا علاقہ عباس خان دے پتر محمد نواز خان نوں سونپ دتا گیا۔

1767ء وچ پورے سون دے پہاڑی علاقے تے چتر سنگھ نے جیہڑا سکر چکیہ مثل وچوں آہا قبضہ کر لیا۔ اس توں کچھ کڑانہ ساہیوال تے چنہاں دے کنارے تائیں دا علاقہ بھنگی مثل دے قبضے وچ آ گیا۔ مڈھ تے موسیٰ چوہا قادر آباد اُتے گنڈا سنگھ تے جھنڈا سنگھ نے قبضہ کر لیا۔ میانی تے تارا سنگھ دا قبضہ ہو گیا۔ بھیرہ تے احمد آباد مہان سنگھ دے قبضے وچ آ گئے بعد وچ دھنا سنگھ تے چتر سنگھ وی حصے دار بن گئے۔

شاہپور دے ڈکھن آلے پاسے ساہیوال دے بلوچ سکھاں دی بھنگی مثل دے گھیرے وچ آوندے ویندے آہن محمد خان رئیس ساہیوال دی ریاست دا کافی حصہ سکھاں دے قبضے وچ آ گیا ہویا آہ۔ ایس دے پتر فتح خان نے ہمت کر کے سکھاں توں کجھ علاقے کھولنے پر دریا جہلم دے پار شیخوال تے کجھ دوجے لوک وی ٹوانیاں دے قبضے وچ لگے گئے۔ ملک شیر خان ٹوانے نے خوشاب تے وی قبضہ کرن دی کوشش کیتی۔ پر لال خان نے جان دی بازی لا کے اس نوں بچا لیا۔ اس توں کچھ اس دا پتر جعفر خان خوشاب دا

حاکم بنیا۔

شاہپور دا علاقہ سیداں کول رہیا۔ تھو شاہ تے اسدے پُتر غلام شاہ دے کول شاہپور تے تھوالاتے اس دے آس پاس دا علاقہ رہیا۔ کالوال دا علاقہ عزت بخش ریحان دے کول آہ ایہناں حالات وچ مہاں سنگھ تے استوں کچھے اس دے پُتر رنجیت سنگھ نے ہولی ہولی ایہناں ساریاں علاقیاں اُتے ایہناں دی نا اتفاقی توں فائدہ چک کے قبضہ کر لیا۔

سردار جھنڈا سنگھ تے سردار گنڈا سنگھ دے مرن توں کچھے بھنگی مثل دا کوئی سردار نہ رہیا تے مہاں سنگھ نے کنہیا مثل دے نال رل کے 1761ء وچ مڈھ رانجھا اُتے قبضہ کر لیا۔ اس توں کچھے اس میانی وی تارا سنگھ توں لے لئی۔ جیہڑا بھنگی مثل دا سردار آہا۔

رنجیت سنگھ

1790ء وچ اپنے پیو دے مرن تے رنجیت سنگھ دہ سال دی عمر وچ سکر چکیہ مثل دا سردار بن گیا تے اس دی ماں تے ہون والی سس سدا کورتے دیوان لکھپت رائے نے اس دی وڈی مدد کیتی۔ اس طرحاں رنجیت سنگھ ترقی کریندیاں ہوياں سارے پنجاب سرحد تے کشمیر اُتے قابض ہو گیا۔

دھنا سنگھ توں کچھے اس دا پُتر جودھ سنگھ وارث بنیا پر ایہہ چنگا حاکم ثابت ہويا رنجیت سنگھ نے 1803ء وچ حملہ کر کے میانی بھیرہ تے جھاوڑیاں تائیں دریا دے دوہاں پاسے قبضہ کر لیا۔ 1804ء وچ رنجیت سنگھ نے ساہیوال

تے خوشاب دیاں بلوچ ریاستاں اُتے قبضہ کرن کان مالیہ ودھا دتا جد ایہہ نہ دے سکے تے بہانہ بنا کے 1809ء وچ ساہیوال اُتے حملہ کرن دی نیت تے ٹر پیا۔ مانگوال اپڑ کے سردار عطر سنگھ نوں بلوچ سردار فتح خاں نوں لے آون کان گھلیا۔ فتح خاں اپنے تجربے دی بناتے اس دا ارادہ سمجھ گیا تے رنجیت سنگھ نوں ملن توں ڈھل مٹھ کیتی آخر سردار عطر سنگھ دی سہوں وساہ تے اپنا پُتر لنگر خان نوں گھلن اُتے تیار ہو گیا۔ رنجیت سنگھ نے فتح خاں دے تحفے وڈی خوشدلی نال قبول کیتے تے اس دے پُتر نوں وی وڈا پیار کیتا تے اس دے ہتھ اپنی طرفوں تحفے گھلے تے اس نوں دوستی دا یقین دوا یا کہ اوہ بے فکر ہو ونجے۔ ایسے گل اُتے فتح خاں نے اپنی فوج نوں گھراں نوں دین دی اجازت دے دتی۔ جد رنجیت سنگھ نوں پتہ لگا کہ اوہ اس دے جال وچ آ گیا اے تے فوراً خوشاب دی فتح توں کچھ ساہیوال اپڑ کے فتح خاں نوں قید کر کے نال لاہور لے گیا تے ایہہ جاگیر اپنے پُتر کھڑک سنگھ نوں دے دتی۔ اس توں کچھ بدھ سنگھ بھنگی کولوں بکھر تے سیداں کولوں شاہپور وی کھس کے اپنی سلطنت وچ شامل کر لئے۔ اس توں کچھ فاروقہ تے کالووال وی قبضے وچ آ گئے۔ 1814ء وچ مٹھ ٹوانے اُتے وی قبضہ ہو گیا۔ باقی تفصیل ٹوانیاں دے حالات وچ لکھی گئی اے۔

عقیدت مندی


سرگودھے دے لوک بزرگاں دے بہوں عقیدت مند
آہن۔ پورا ضلع بزرگاں دیاں خانگاہیں نال بھریا ہویا اے۔ اس ضلع
دی سبھ توں وڈی گدی سیال شریف اے۔ بھیرہ تے گولڑہ شریف دیاں
گدیاں ایہناں بزرگاں دیاں ای لڑیاں ہن۔ ایتھوں دے لوک
سیداں دی وڈی عزت کریندے ہن۔ ایتھے ایہناں نوں شاہ جی آکھیا
ویندا اے پیری مریدی دا وی کافی رواج اے۔ سید بادشاہ دی منجی
اُتے باہنا بے ادبی سمجھی ویندی اے۔ کدائیں انج میں ڈٹھا اے جے پیر
صاحب آئے ہوون تے مرید پٹھیاں منجیاں کر کے بہنے نوں سعادت
سمجھدے آہن تے پیر دے مقابلے وچ سدھی منجی تے بہنا گستاخی سمجھیا
ویندا اے۔ پیر صاحب نوں جد ملدے آہن تے جھک کے ایہناں دے
گوڈیاں نوں ہتھ لیندے آہن تے وت ایہناں دے ہتھ وی چم لیندے
آہن۔ جے پیر صاحب دورے اُتے آون تے ایہناں دی خدمت کرنا
سعادت سمجھی ویندی اے تے ویندی واری ایہناں دی نذر وی پیش کیتی
ویندی اے۔

وفات پا گئے بزرگاں دیاں مزاراں اُتے منتاں مٹیاں ویندیاں
آہن۔ منت پوری ہوون تے دربار تے ونج کے سوانیاں مٹھے روٹ تے

☆☆☆



مذہبی تے روحانی بزرگ



سید احمد شاہ المعروف میراں صاحبؒ
حضرت خدا بخش المعروف جہلی شاہؒ
ماہرین فن

مذہبی تے روحانی بزرگ

سید احمد شاہ المعروف میراں صاحب

آپ 979ھ وچ بیجا پور جے آپ کلیاں ہوندیاں دے ای وڈے
بچاں آ لے بزرگ آہن۔ شروع وچ علم اپنے والد بزرگوار توں پڑھیا۔ 12
سال دی عمر وچ اپنے والد دے نال دلی آ گئے۔ اتھے ایہناں ظاہری علوم دی
تعلیم حاصل کیتی۔ اتھے آپ نے حضرت غلام یسین دے ہتھ اُتے بیعت
کیتی۔ اتھے دلی وچ آپ دی بزرگی دی مشہوری دور دور تیک ہو گئی تے
ہوندیاں ہوندیاں جہانگیر دے دربار وچ وی اپڑ گئی۔ آپ نوں جہانگیر نے
قاضی القضاۃ مقرر کر دتا۔ جد سجدہ تعظیمی دا مسئلہ چھڑیا تے آپ نے حضرت
مجدد الف ثانی دی پیروی وچ دربار توں کنارہ کش ہو گئے تے استعفیٰ دے کے
دلی چھوڑ دتی۔

دلی چھوڑ کے آپ سدھے اجمیر شریف آ گئے اتھے چلہ کشی کر کے
بغداد تشریف لے گئے۔ اتھے حضرت پیران پیر دی مسیت وچ ہک سال درس

دیندے رہے۔ اس توں کچھ مدینہ شریف حاضری دتی تے اتھے تیرہ سال گزارے تے حضور پاک صلی اللہ علیہ وسلم دی خواب وچ زیارت ہوئی تے آپؐ نے فرمایا کہ پنجاب ونج کے تبلیغ کرو۔ آپ پنجاب وچ آ کے سبھ توں پہلاں انکے وادی سون سکسر وچ ڈیرہ لایا۔ کجھ چر کچھ موضع کلیال دے نیڑے ہک پہاڑی اُتے ڈیرہ لایا۔ جس داناں حیات المیر مشہور ہويا۔ استوں کچھ گروٹ کجھ چرکان گئے تے وت بیربل شریف چلے گئے۔ اتھے گلاب شاہ دے کول اپنے ایتھوں دیاں لوکاں آ کے ہک شیر دے بارے وچ دسیا کہ اوہ کافی نقصان کر رہیا اے تے لوک پریشان ہو کے آپ دے کول آئے تے مصیبت توں چھٹکارا دینے دی درخواست کیتی۔ آپ نے لوکاں توں پچھیا جے کدی ایہناں شیر نوں سُتیاں پیاں وی دیکھیا اے تے ایہناں دسیا کئی واری رُکھاں پٹھ تے جھاڑیاں وچ سُتا پیا ڈٹھا اے۔ آپ نے ہک مٹی دے بھانڈے دی پھمیری منگوائی تے اس اُتے پڑھ کے لوکاں نوں سمجھایا جے شیر سُتا ہویا ہووے تے اس پھمیری نوں انج کر کے اُس آ لے پاسے دگاؤناں جے ایہہ پھمیری شیر دے جسم نوں ضرور ہولی جیہی لگے۔ لوکاں انجے عمل کیتا تے شیر اوسے ویلے بھج کے اجیہا غائب ہویا جے وت اس نوں کسے نہ دیکھیا تے نہ ای کسے دا وت نقصان ہویا۔

بھیرے تشریف لے آؤنا

بیربل شریف توں کچھ اپ بھیرے تشریف لے آئے تے کجھ چر

حکیموں دی مسیتی رہے تے استوں کچھ پراچیاں دے محلے تشریف لے آئے۔
 اتھے آپ نے اعلائے کلمۃ الحق شروع کیتا۔ تے آپ دی شہرت سُن کے
 لوک جوق در جوق آون لگ پئے۔ آپ دے روحانی فیض نال بھیرہ مالا مال
 ہو گیا۔ اتھے آپ نے پیر قمر الدین سیالوی دے بزرگ حافظ محمد شریف نوں
 بعیت وی کیتا تے خلافت وی دتی۔ آپ جد تک اس دنیا وچ رہے دوروں
 نیڑیوں بزرگ ہستیاں زیارت واسطے آوندیاں رہیاں تے جد آپ اس فانی
 دنیا توں کوچ کر گئے تے وی آپ دا دربار اسی طرح مرجع خلّاق بنیا ہویا اے۔
 زائرین دی وڈی تعداد آپ دے مزار اُتے عقیدت دے پھل رکھن کان
 حاضری دیندے نیں۔

فضائل و مناقب

حضرت میراں ظاہر باطنی علوم دے ہک سمندر آہن۔ زہد تقویٰ تے
 کمال اتباع شریعت و سنت دی سختی نال پابندی کریندے آہن۔ تصوف و سلوک
 وچ عمل و قول دے اعتبار نال وحید العصر اکھواندے آہن۔
 ہک صوفی باعمل دا عالم ہونا تے ہک عالم باعمل دا صوفی ہونا لازم و
 ملزوم اے۔ حضرت میراں ایہناں دوہاں مرتبیاں اُتے فائز نظر آوندے نیں۔
 آپ فقیراں تے مسکیناں کان سخاوت دا سمندر آہن۔ آپ غیر مسلماناں نال
 وی چنگا سلوک کریندے آہن۔ آپ نے ہزاراں ہندوواں نوں کلمہ پڑھا کے
 مومن بنا دتا۔

حضرت میاں شیر محمد شریقی نے فرمایا کہ:-
”بھیرے وچ میراں صاحب حکومت کر رہے نیں۔

معمولات

آپ ادھ رات توں کچھے جاگ ویندے آہن تے وضو کر کے ذکر
الہی وچ لگ ویندے فجر دی نماز جماعت نال پڑھ کے اشراق تے چاشت
تائیں مسیتی رہندے تے استوں کچھے لوکاں نوں ملدے۔

وصال

آپ دا وصال 113 سال دی عمر وچ 18 رمضان المبارک
1096ھ وچ ہويا۔ آپ دا دربار پراچیاں دے محلے وچ اے تے لوح مزار
اُتے ایہہ شعر لکھیا ہويا اے جہاں توں تاریخ وصال وی نکلی اے۔

بفضل اللہ تو خواہ ہر آنچہ خواہی

کہ بکشانندہ ہر مشکل فرار است

چرانہ آید دریں درگاہ ہر کس

کہ ایں دربار فخر روز گار است

اگر پرش کے سال وصالش

بگو پُر فیض بس ایں یاد گار است

1092ھ

میلہ

چیتز دے مہینے ہر اتوار میلہ لگدا اے جس وچ لوک آ کے رت
کڈھیندے نیں تے سمجھدے نیں کہ اوہ سارا سال تندرست رہسن ۔

حضرت خواجہ شمس الدین سیالوی

حضرت خواجہ شمس الدین سیالوی 1214ھ وچ سیال شریف جے۔
سیال شریف ہک اچھا زمین دا ٹکڑا اے جس دے اُتے ضلع سرگودھا نوں فخر
اے۔ ایہہ زمی وڈے وڈے اولیا اللہ دی روحانی تجلیات نال چمکدی پئی اے۔
ایہہ جاہ راہ حق دے مسافراں واسطے روشنی دا منارہ بنی ہوئی اے۔

حضرت خواجہ شمس الدین سلسلہ چشتیہ دے ہک بہوں وڈے بزرگ
آہن۔ ایہناں جیہڑی علم و عرفان دی شمع روشن کیتی آہی۔ اس توں ساری دنیا
منور ہوئی۔ تے انشاء اللہ قیامت تک ایہناں دا ایہہ فیض جاری رہسی۔
انیسویں صدی وچ پنجاب دے جہناں لوکاں نے دین دی عظمت دے بلند
کرن کان کوشش کیتی ایہناں ہستیاں وچ حضرت خواجہ شمس الدین داناں سبھ
توں اُچا اے۔

ایہناں دا زمانہ مسلماناں واسطے وڈا اوکھا وقت آہا کیونکہ جے اتھے
سکھاں دی حکومت آہی جیہڑے مسلماناں دے دشمن این ایہناں حالات وچ
حضرت خواجہ شاہ محمد سلیمان تونسوی تے ایہناں دے مرید خاص شمس الدین
سیالوی دا وجود مسلماناں واسطے وڈے حوصلے تے دلجمعی دا سبب بنیا۔

حضرت سیالوئی دی حیاتی سنت نبویؐ دا پورا نمونہ آہی۔ آپ دی زبان مبارک وچوں نکلیا ہویا ہر لفظ قرآن و سنت دے عین مطابق ہوندا آہا۔ آپ دے فرمودات پڑھ کے بندے دے دل وچ اللہ تعالیٰ تے اس دے محبوب حضرت محمد رسول اللہ صلی اللہ علیہ وآلہ وسلم دی محبت نال بھری ویندے۔ آپ دی محبت سالکاں نوں راہ حق دکھیندی تے عارفاں نوں عرفان دی منزل روشنی دا منارہ بن کے نظر آوندی۔

حضرت خواجہ سیالوئی بے حد عبادت گزار ہر وقت اللہ تعالیٰ دی یاد وچ مست رہندے ہک واری ایہناں دے مرید خاص سید محمد سعید شاہ صاحب پچھیا کہ ایہہ کیہ گل اے کہ صوفیائے کرام کھاؤن پیون دی حاجت نہیں رہندی۔ آپ نے جواب دتا کہ اللہ تعالیٰ اس اُتے قادر اے کہ کھائے پئے توں وکھرا کسے شے نوں زندہ رکھے۔ باقی کھاؤن پین دی حاجت خاکی وجود نال اے۔ خدا دے جیہڑے بندے بشیریت دی منزل توں نکل کے فنا دی منزل وچ اپڑ ویندے ایہناں نوں کھاؤن پیون دی حاجت نہیں رہندی۔

ہک واری آپ تونہ شریف اپنے شیخ دی زیارت واسطے جا رہے آہن۔ ہک جنگل وچ ہک بزرگ نال ملاقات ہوئی تے ایہناں فرمایا کہ درود کبریت احمر پڑھیا کرو ایہناں آکھیا جے میرے مُرشد دا فرمان میرے واسطے کافی اے۔ جد ایہہ مُرشد دے کول اپڑے تے ایہناں فرمایا کہ اوہ بزرگ حضرت غوث الاعظم آہن اس واسطے ایہناں جیہڑا وظیفہ دسیا اے اوہ وی پڑھیا کرو۔ اس توں پچھے ایہہ درود کبریت احمر طریقہ چشتیہ وچ ملا دتا گیا۔ اس توں

پہلاں ایہہ شامل نہ۔ پیر سیال دی برکت نال ایہہ دولت سلسلہ چشتیہ نوں نصیب ہوئی۔

آپ دا وصال 1300ھ وچ ہويا۔ ساڈے علاقے دے خلفائے عظام ایہہ نیں۔ کل تعداد 7136۔ (1) مخدوم فضل الدین چاچڑ شریف (2) خواجہ معظم الدین مرولیاں والا (معظم آباد) (3) پیر امیر شاہ صاحب بھیرہ (4) شیخ عبدالحلیم صاحب شاہپور مولوی سلطان محمود ناڑی (5) مولوی محمد علی کوٹ کالا (6) حضرت خواجہ محمد دین سیالوی۔

آپ دی وفات دے بعد آپ دے صاحبزادے خواجہ محمد دین مسند آرائے سیال شریف ہوئے۔ حضرت خواجہ شمس العارفین فرمیدے نیں۔ کہ دنیا صرف تریں دیہاڑیاں دا ناں اے۔ ہک دیہاڑا اوہ جیہڑا گزر گیا۔ دوجا اوہ جیہڑا حالی آدنا اے۔ تریجا اوہ جیہڑا اس ویلے گزردا پیا اے۔ گزری ہوئی دیہاڑ کدی واپسی پرت کے نہیں آسکدی بھادیں اس واسطے کروڑاں روپے خرچ وی کر چھوڑیے تے آؤن والی دیہاڑ دا کوئی یقین نہیں کہ آوے یا نہ آوے۔ باقی رہ گئی اوہ دیہاڑ جیہڑی تہاڈے کول اے اس نوں ضائع نہ کرو۔

حضرت سید خدا بخش المعروف جھلی شاہ

آپ دا مزار مبارک ٹڈھ رانجھ دے نیڑے نواں کوٹ وچ اے۔ آپ دے اپنے زمانے دے بہو وڈے بزرگ آہن۔ آپ دے متعلق ایہہ گل مشہور اے کہ آپ اپنی گودڑی جس نوں پنجابی وچ جھلی ادھے نیں۔ دریا

پار کرن واسطے استنوں بیڑی داکم لیندے آہن۔ اسے واسطے جھلی شاہ آکھین
 لگ پئے۔ آپ دا خاندان ترے صدیاں توں اتھے دین دی خدمت کر رہیا
 اے۔ اج کل ایہناں دی پنجویں پیڑی وچوں صاحبزادہ منظور علی ہاشمی ہو رہی
 ایہناں دے سجادہ نشین آہن۔ ایہہ پنجابی دے منے پرونے شاعر وی آہن۔
 ہک واری پیر جھلی شاہ ہوراں کول حضرت رائے پوری دے بزرگ کسے
 مصیبت دے دور کراؤن دی دعا واسطے حاضر ہوئے تے اللہ تعالیٰ نے ایہناں
 دے دشمنان نوں زیر کر دتا۔ اس کر کے ایہناں دی عقیدت ودھ گئی۔



حکیم مولوی شاہ محمد

حکیم ہوں ادا تعلق شیخوپوریاں دے حکماء دے خاندان نال آہ۔ حکیم صاحب نوں قدرت نے حکمت دا وافر حصہ دتا ہويا آہ۔ حکیم صاحب واقعی بابائے حکمت آہن۔ روزانہ سینکڑوں لوک ہتھ دکھاؤن واسطے بھیرہ آوندے۔ حکیم صاحب اپنے زمانے دے بہوں وڈے نباض آہن۔ اس دے نال نال اوہ وڈے منطقی وی آہن۔ حکیم صاحب اپنا منطقی ذہن ہمیشہ مذہب دے حق وچ استعمال کریندے آہن۔ ایہناں نوں علم و ادب نال وی کافی تعلق رہیا۔ حکیم صاحب نے اپنی حیاتی وچ لکھاں بندیاں دا علاج کیتا۔ آپ دا حکمت خانہ مولوی شاہ محمد دی بیٹھک دے ناں نال مشہور آہی۔ بیٹھک ہر ویلے لوکاں نال بھری رہندی آہی۔ ایہناں دے کول ہر ویلے حکمت دے نال نال مذہبی بحث مباحثے وی چلدے رہندے۔ حکیم صاحب اس گل دی تاک وچ رہندے کہ کدو دو مخالف فرقیاں دے مولوی یا لوک اکٹھے ہوں۔ جیہڑے ویلے کجھ لوک مختلف فرقیاں دے لوک آویندے تے حکیم صاحب پہلے کسے اختلافی مسئلے دا دانہ سٹیندے۔ اس نال دوہاں نوں اپنے اپنے مسلک دیاں دلیلاں دینے کان آدھے۔ ہر آون والے دی مدد کریندے تے انج مجلس وچ نویں نویں پہلو سامنے آوندے۔ حکیم صاحب اس گل دا وی خاص خیال

رکھدے کہ مجلس بدمزگی دا شکار نہ ہووے۔ خاتے تے ہر کوئی مطمئن ہو کے آئندہ تیار ہو کے آون دا جذبہ لے کے آوے۔ ایہناں دی خوش خلقی نال دلاں وچ خوشی دی لہر آویندی۔ ہر ہک نوں خوش رکھن دی کوشش کریندے۔ اسے واسطے ہر قسم تے مختلف مزاج لوک خوشی خوشی حکیم صاحب دے کول آوندے۔ کدی کدائیں سیاست وچ وی ٹنگ اڑیندے آہن۔ 1930 وچ ہک واری بلدیہ دے وائس چیئرمین بنے۔ حکیم صاحب وڈے بندے ہون دے باوجود ہمیشہ پوتی (کھدر) دے کپڑے پیندے۔ شیخ پورتوں بھیرہ تائیں پیدل آوندے ویندے۔ کرسی کدی استعمال نہ کیتی ہمیشہ منجی تے بیٹھے رہندے۔ ٹیک واسطے تکیہ استعمال کریندے آہن۔ پین دی جائے ہمیشہ قلم دوات تے کالی شاہی وردے رہے۔ حکیم صاحب صرف نسخہ لکھ کے دیندے آہن۔ اس نسخے نوں صرف ایہناں دی دوکان والے ای پڑھ کے دوائی دے سکدے آہن۔ بھیرے وچ ہووے کوئی بندہ اس نوں نہ پڑھ سکدا۔ راقم المعروف تے ایس بیٹھک دیاں رونقاں اپنی ملازمت دے سلسلے وچ بھیرے ویکھیاں آہن پر ایہناں توں کچھ ہُن ہر شے اجڑی ہوئی لگدی آہی۔ ہُن انہاں دے پوترے نے وت رونق لا دتی اے۔



سماجی تے سیاسی لوک



سماجی تے سیاسی لوک

چودھری انور علی چیمہ


ایہہ ضلع سرگودھا دی وڈی ہر دل عزیز شخصیت آہن۔ ایہناں بی اے تک تعلیم حاصل کیتی۔ کجھ چرسول سروس وچ رہے تے اس توں کچھ سیاست دے میدان وچ آگئے۔ آپ دے والد چودھری سلطان علی چیمہ صاحب مرحوم وی پرانے سیاست دان آہن۔ اوہ مرکزی کونسل بھاگٹا نوالہ دے چیئرمین تے ڈسٹرکٹ کونسل دے ممبر رہے۔

چودھری انور علی چیمہ صاحب وڈیاں صلاحیتاں دے مالک آہن۔ آپ علاقے دے عوام دی بھلائی واسطے دیہوں رات لگے ہوئے آہن۔ ایہہ جنوری 1981ء توں جون 1984ء تائیں ضلع کونسل دے وائس چیئرمین رہے۔ 1983ء وچ جد انتخابات ہوئے تے ایہہ دوجی واری وائس چیئرمین چنے گئے۔ 10 جون 1984ء تائیں ایس عہدے اُتے رہے 11 جون 1984ء نوں چیئرمین چنے گئے۔

ایہناں نے دن رات عوام دی فلاح بہبود واسطے دیہاتاں وچ بجلی،
 واٹر سپلائی، خاص طور تے تعلیم تے آون تے جاون دے ذرائع آ لے پاسے
 خاص توجہ دتی۔ ایہناں دی ایہناں کوششاں نال ضلع وچ ہر پاسے سڑکاں دا
 جال وچھ گیا اے۔ ایہناں بحیثیت چیئر مین ضلع کونسل تے پراجیکٹ ڈائریکٹر
 دیہی ترقی دی حیثیت نال اپنے اختیارات نوں ورت کے عوام نوں ممکنہ حد
 تاں سوکھ دکھایا اے۔

ایہہ عوام وچ ہر دل عزیز ہون دی وجہ نال کئی واری اسمبلیاں دے
 ممبر چنے گئے۔ ایہناں دے صاحبزادے عامر سلطان چیمہ وی صوبائی اسمبلی دا
 ممبر اے تے وزیر وی رہ چکیا اے۔ ایہناں دی بہو تنزیلہ عامر چیمہ ضلع کونسل
 دی چیئر پرسن آہن۔ 12 اکتوبر 1999ء نوں فوجی حکومت دے آون نال
 ایڈمنسٹریٹر مقرر کر دتے گئے آہن۔

☆☆☆





ثقافت

ثقافت تے تاریخ

دو جے علم ہار ساڈے اس ضلع وچ وی تاریخ، آثار قدیمہ۔ انسانی
نسلاں تے زمین اُتے کوئی خاص تحقیق نہیں کیتی گئی۔ پتھر زمانے دے جے
کدائیں آثار لدھے نیں تے اوہ وی قدرتی لہ پئے نیں۔ کسے ایہناں واسطے
کوئی خاص پدھ نہیں کیتا۔ ایہہ آثار سون سکسروچ کئی جائیں کھلے پئے
نیں۔ سرگودھے کول کڑانے دی پہاڑی وی اپنے اندر بہوں کجھ رکھدی اے۔ پر
ہُن اوہ فوج دے قبضے وچ ہوون دے سبب محقق دی پہنچ توں دور ہو گئی اے۔
ایسے سلسلے دیاں پہاڑیاں جیہڑیاں دریا چھھاں دے کنارے تے آہن۔ ایہناں
دے اندر وی وڈے وڈے تاریخی راز آہن۔ پر اوہ پتھر بھن آلیاں مشیناں تباہ
کر چھوڑیاں نیں۔ حالی وی کڑانہ دیاں پہاڑیاں اُتے بہوں ساریاں کھٹیاں
ہوئیاں پتھراں اُتے مورتاں اہن۔ جنہاں دا زمانہ قبل مسیح دسیا گیا اے۔ اس دا
مطلب ایہہ ہو یا جے اتھے وی بندے وڈی مدت توں وس رہے نیں۔

سلطان محمود غزنوی تے محمد غوری دے اگے کچھے جتنے حملہ آور
افغانستان دی راہ آئے۔ اوہ اٹک دے ڈکھن آ لے پاسیوں لنگھ کے نمک دا
پھاڑ پار کر کے دریائے جہلم توں گزر کے شاہپور (سرگودھا) دے میداناں وچ
اڑ کے ایٹھوں ملتان آ لے پاسے یا لاہور والے پاسے مونہہ کریندے آہن۔
ایہہ والپسی لئی وی ایہا راہ لیندے آہن۔ ضلع سرگودھا دیاں ایہناں میداناں۔
وڈے وڈے سورے ایٹھوں لنگھدے ویکھے۔ ایس تے تحقیق کر کے اسی اپنی
تاریخی کھڑائیاں ہونیاں کڑیاں نوں ملاون دی کوشش کر سگدے آں۔

انسانی ترقی دی کہانی

انسان نے ہُن تائیں ترقی دیاں وڈیاں منزلاں طے کر لیاں نیں۔
شروع توں لے کے ہُن تائیں وی ترقی دی کہانی وڈی لمی اے۔ پراتنا
سارے اسی جان دے آں شروع دے انسان دی حیاتی تے رہن سہن دوجے
جانوراں دے نال ملد اجلدا آہا۔ جیوں جیوں زمانہ اگے ودھدا گیا انسان وی
ترقی کردا گیا۔ اج دے تے زمانہ قدیم دے انسان وچ زمین آسمان دا فرق
ہون دے باوجود اسیں ایہناں وچکار لیاں کڑیاں نوں چھوڑ نہیں سگدے۔ ایہہ
کڑیاں ای پرانے وقتاں دیاں گلاں دسیندے ہن اُتے ہن اسیں پڑھ کے
حیران ہوندے آں کہ انج وی انسان رہندا آہ۔ انسان تے خوشی تے غمی دا
وقت وی آوندا رہیا اے۔ ایس ہُن دیاں رسماں تاں ویدھے رہندے آں پر
پچھلے زمانے دیاں گلاں پڑھ کے اندازہ کر لیندے آں کہ انسان کیویں اگا نہہ

ترقی کریندا رہیا۔

ہر علاقے وچ وکھرے وکھرے قبلیاں دے لوک وسدے رہے۔
ہُن ایہناں دے رہن سہن بولی، چال چلن دوجیاں علاقیاں نالوں وکھرا ہوندا
اے۔ اسیں اتھے ضلع سرگودھا دے لوکاں دے بارے وچ دس دی کوشش
کریندے پے آں کہ ساڈے بزرگاں اتھے کناں حالات وچ اپنی اپنی حیاتی
دے ڈنگ پورے کیتے۔

مشینی دور دے اثرات

ہُن دا دور مشینی دور اے ہر شے مشین دی محتاج اے۔ شروع وچ
انسان سارے دے سارے کم ہتھ نال کریندا آہا۔ وٹ کجھ ہتھیار بنا کے کم لین
لگ پیا تے ہوندیاں ہوندیاں وی ویس صدی وچ اپڑ کے اتنی تیزی نال مشینی
دور آیا کہ انسان آپ حیران ہو گیا۔ اُنویں صدی تائیں بودو باش وچ کجھ بہو
وادھا نہ ہویا تسی انج اندازہ لا سگدے او جے نلکے، بایسکل، لائین، کپڑے
سینے آلی مشین ویہویں صدی دے شروع تائیں ساڈے ضلع وچ ناہی آئی۔
ترقی دی رفتار دی تیزی آون وُجھن دیاں سہولتاں نال ہوئی تے ایہہ تیزی
زندگی دے ہر شعبے وچ آئی۔

حملیاں دے اثرات

ضلع پرانے زمانے دیاں دھاڑاں دے راہ وچ ہون کارن امن دا

مونہہ نہیں ویکھیا۔ ایتھوں دے لوکاں کول جیہڑا کجھ ہوندا آہا۔ اوہ لٹ کے لے
ویندے آہن اسے واسطے ہک اکھان وی بنیا کہ:-

کھادا پیتا لاہے دا

باقی احمد شاہے دا

ایہناں دھاڑاں دے سبوں ایتھے ون سونی بولی اکٹھی ہو گئی تے
ایہناں مختلف نسل دے لوکاں دے ملن نال ایتھے ساڈی تہذیب تے ثقافت دا
ہک نواں گلدستہ بنیا۔ جس دا ہور کوئی ثانی نہیں۔ سرگودھے دا ضلع حملے والیاں
دی راہ وچ پہلا میدانی ضلع وے۔ ایتھوں ای حملہ آور بعد وچ ملتان یا لاہور
تے دلی دا راہ لیندے آہن۔

ہندو تے مسلم تہذیب دے اثرات

ایہناں حملہ آوراں توں وکھرا ایتھے دو تہذیبیاں وی رہیاں۔ ہک ہندو
تہذیب تے دوجی مسلم تہذیب۔ ایہناں دیاں تہذیباں نے وی ہک دوجے تے
اثر کیتا ایسے واسطے ساڈے بہوں سارے رسم و رواج ہک دوجے نال ملدے
نیں۔ ایہہ رواج تے رسماں اتنیاں پکیاں ہو گئیاں آہن جے ہندوواں دے
65 سال وینے توں بعد وی ایسے طرحاں چل رہیاں آہن تے ایہہ پتہ کرنا
وڈا اوکھا اے کہ ایہہ رسماں ہندوواں دیاں ہن۔ یا کتھوں آیاں۔ ہندو وی
ایتھوں ونج کے انجے ہار کر رہے نیں۔ کیوں جے رسماں توں چھوڑنا وڈا اوکھا کم
اے۔ جد کسے نوں کوئی مت آکھن کان آکھے وی تاں جواب ملدا اے کہ

جے میں چھوڑاں تاں نک کپیندا اے۔ ایہناں رسماں دا کسے مذہب نال دی کوئی تعلق نہیں۔ صرف مذہبی رسماں وکھریاں وکھریاں ہوندیاں نیں۔ باقی شادی ویاہ مرن دیاں رسماں وچ بہوں گھٹ فرق ہوند اے۔ مثال دے طور تے ویاہ دی آخری رسم نکاح توں پہلے دیاں ساریاں رسماں سبھ وچ ہکا جیہاں نیں۔ گھڑولی، سہرا، گانا، کھارا، مایوں، لوہے دی کھونڈی، چھٹی سارے پنجابی کریندے نیں۔ چاہے اوہ ہندوستان دے ہوون تے چاہے پاکستان دے ہوون۔

جیہڑے لوگ مذہب دے بہوں نیڑے لگ ویندے تے اوہ ایس دی ٹوہ کریندے نیں کہ ایہہ رسم شرعی طور تے جائز اے کہ نہیں جے عالم اس نوں دس دیوے کہ نہیں تے اوہ بالکل نہیں کریندے چاہیے برادری چنگا جانے یا نہ جانے۔ کیونکہ اوہ ہر حال وچ شریعت دی پیروی کرنا ای ضروری سمجھدے نیں۔ بعض فضول رسماں جہاں وچ نہ دین دا فائدہ تے نہ دنیا دا۔ ”گھر پھوک تماشا ویکھنا“ کوئی چنگی گل وی نہیں۔ ہُن تاں کئی رسماں اُتے گورنمنٹ نے وی پابندی لا دتی اے۔ جے لوک فضول خرچی نہ کرن۔ کوئی ساریاں رسماں خراب وی نہیں ہوندیاں۔ اسی کوشش کرساں کہ ایہناں رسماں دے سارے پہلوں پڑھن والیاں نوں دس دیئے۔

آخر نتیجہ ایہناں اُتے چھوڑ دیندے آں۔ جیہڑیاں چنگیاں لگن ایہناں نوں چلائی رکھن تے جیہڑیاں ماڑیاں لگن اوہ چھوڑ دین۔ کئی گلاں اجیہیاں وی ہن جیہڑیاں توہم پرستی دیاں نشانیاں آہن اوہ گلاں جیوں جیوں

تعلیم دی روشنی ہوندی ویندی اے۔ اوہ آپو آپ ای مکدیاں ویندیاں آہن۔
ساڈے زمانے وچ کئی گلاں ایہہ آہن۔

توہم پرستی

(1) بدھ آلے دیہاڑے کوئی پیسہ خرچ نہ کرنا تے ایہہ خیال کرنا کے انج
برکت نہیں رہندی۔ (2) کوٹھے تے کاں بولے تے سمجھنا کہ پروہنا آوسی۔
(3) پنچھ آوے تاں سمجھنا کہ کسے یاد کیتا ہوسی۔ (4) کسے سُتے پئے یا بیٹھے
دے اوتوں ٹپن نال سمجھنا جے جس توں ٹپیا گیا اے اس دا قد مدھرا رہ ویسی۔
(5) آٹا گنھدیاں آٹا اڈ کے باہر ڈگ پوے تے سمجھنا کہ مہمان آوسی۔
(6) پیر بھاری رن دے کولوں سپ لگھے تاں اس دی آواز سننے تے اوہ اٹھا
ہو ویندا اے۔ (7) جمعرات نوں جھڑی لگے تاں پورا ہفتہ مینہ وسدا اے۔
(8) زچہ دے کول چھری رکھی ویندی اے جے جن نہ تنگ کرن۔ (9) جے
کسے داکم نہ ہووے تے آدھے کوئی بھیڑا بندہ متھے لگا۔ (10) جیہڑا بال گلاں
نہ کرے اس نوں کاں دا جوٹھا پیوندے آہن۔

بچہ جمن دیاں رسماں

جد کسے گھر اُمیدواری ہووے تے اجیہی سوانی دی پہلے نالوں خاطر
بہوں کیتی ویندی تے جس شے اُتے اُسدا دل ہووے اوہ اوس نوں لے کے دتی
ویندی۔ بچہ جمن دے نیڑے کدائیں کدائیں ایہہ وی رواج اے جے پیکے کچھ

دانے، گڑ تے دھی دے ترے کپڑے پُتر آ لے گھر گھل چھڑیندے آہن تے
 پترے آ لے ایہناں داناں نوں چکی تے دل کے اسدا بھت بنا کے کمینائی دے
 ہتھ محلے تے رشتے داراں وچ ونڈ دیندے آہن۔ بچے دے جمن دے ویلے
 توں پہلاں پیکے پہلی واری گھر لے آوندے آہن تاکہ اس دی ماں اس دی چنگی
 طرح دیکھ بھال کر سکے تے اس کم واسطے محلے دی دائی جیہڑیاں بہوں تاں
 مچھانیاں ہوندیاں آہن۔ ایہناں نوں بلا کے وڈے ویلے تے نمائی لتاڑن دی
 خدمت لا دتی ویندی۔ اس دا ایہہ وی فائدہ ہوندا اے جے دائی نوں پتہ لگدا
 رہوے کہ بچہ کدوں تائیں جمن دی اُمید اے۔ جد بچے دے جمن دیاں نشانیاں
 شروع ہو ویندیاں تے دائی بلا لئی ویندی تے اس دے واسطے کچھی صابن رکھیا
 ویندا۔ جد بچہ پیدا ہو ویندا تے دائی اس دی تسلی کریندی کہ دھی اے یا پُتر
 اے۔ پتر دی بہوں خوشی ہوندی اے تے دائی نوں وی کافی مزدوری ملن دی
 اُمید ہوندی اے۔ تے دھی دی مزدوری ادھی ہوندی اے۔ پرانے زمانے وچ
 دایاں صفائی دا خیال نہن کریندیاں۔ گندی چھری نال ناڑکپن نال بچے نوں
 ٹیٹنس دی بیماری ہو ویندی آہی۔ کئی بچیاں دی دُھنی پک ویندی تے رت
 واہندی اس دا وی اس دائی کول کوئی خاص علاج نہ۔ بچے نوں جمن توں کچھ نہوا
 دھوا کے کپڑے وچ لھیٹ کے ماں دے حوالے کردتا ویندا تے بانگ واسطے
 مولوی صاحب یا محلے دا کوئی پرہیزگار بندہ بلا کے بانگ اکھوائی ویندی اے۔
 اس توں کچھ کسے نیڑے دے رشتہ دار یا نیک بندے توں گھٹی لوائی ویندی۔
 گھٹی کسے نیک بندے توں اس واسطے لوائی ویندی کہ بچہ نیک تے لائق

ہووے۔ کیونکہ ایہہ عام بندیاں دا خیال اے کہ گھٹی دا اثر بندے دی ساری حیاتی وچ رہندا اے۔ اس دیاں عاداتاں اس بندے تے ضرور ہوندیاں آہن۔ بچے نوں عام طور تے پیڑھی اُتے لٹایا ویندا آہا تے اس دی ماں کول چھری یا چاقو لوہے دی کوئی شے رکھ بنا کے رکھی ویندی۔ تاکہ جن بھوت نیڑے نہ آوے۔ قرآن حکیم کسے اُچی جائی یا چھت نال لٹکایا ویندا تاکہ برکت رہوے۔ ایہہ رکھاں چالھی دیہاڑے تک رہندیاں اس توں کچھے ختم کر دتیاں ویندیاں۔ ایہناں چالھی دیہاڑیاں دے وچ ڈیوا وی زچہ دے اوڈھر رکھیا ویندا اے تاکہ اوگیل نہ پوس۔ بچے دے باہیں نال ہنگ بدھی ویندی تاکہ جن بھوت نیڑے نہ آوے۔ بچے دے جمن دے پہلے ست دیہاڑے دھمان تے باقی نوں چھلہ آدھے آہن۔ دھمان وچ باہر دیاں سوانیاں زچہ دے کول وینے توں منع کیتا ویندا۔ کیوں جے اس نوں کسی غیر سوانی دی نظر لگن دا ڈر ہوندا اے۔

گرو ونڈنا

پُتر دے جمن تے مبارک دین آلیاں نوں گرو دتا ویندا تے اُنج وی خوشی تے بچیاں وچ ونڈیا ویندا اے۔ اس دی مقدار ہر بندے دی اپنی ہستی دے مطابق ہوندی کئی لوگ گرو دی جائی پتا سے وی وینڈے آہن۔

سر بہاؤناں

بچے دے سرنو ہتھاں دیاں تلیاں نال منڈ منڈ کے گول کیتا ویندا

جے گول نہ ہووے تے لوک مہنے ویندے جے ماؤ سروی نہیا بہایا۔ سرے پٹھ
پتھر رکھیا ویندا اے۔

دھاؤن

ستویں دیہاڑے جمن توں پچھے بچے دی جھنڈ لہائی ویندی اے تے
اس داناں وی رکھیا ویندا اے۔ ہر رشتہ دار دے گھر سیر سیر گڑ ویندے اوہ بچے
دے کپڑے وی لے آون تاں دوسیر گڑ دیندے۔ جھنڈ لہاؤن دے ویلے نائی
تے نائین دوویں آوندے آہن نائی بچے دے وال استرے نال مَن کے روڈ
کر دیندا اے تے اوہ وال سنبھال کے رکھے ویندے نیں۔ تے ایہناں نال
چاندی تول کے خیرات کر دتی ویندی اے۔ نائین کپڑا گھت کے بہہ رہندی
اے تے بچے دے رشتہ دار اس کپڑے اُتے دانے پا دیندے نیں تے گھر
آ لے ایہناں تھالیاں وچ گڑ پا دیندے نیں۔ پرانے زمانے وچ نائی دی ضرور
ہک روپیہ تے نانکے کپڑے دیندے آہن۔ ستویں دیہاڑے بچے داناں وی
رکھیا ویندا اے۔

مبارکھ (مبارک)

جد پلٹھی دا بچہ ہوندا تے نائی یا مراٹھی دور تے نیڑے دیاں رشتہ
داراں نوں جا کے مبارک دیندے تے اوہ ایہناں نوں روپیہ دیندے۔
بچی دے جمن دے ستویں دیہاڑے جھنڈ لہا کے اس دے کن وی

سیتے ویندے نیں۔ کنناں وچ ہک توں لے کے پندرہ تک مورییاں کیتیاں
 ویندیاں تے ایہناں مورییاں وچ کالا دھاگا پا دتا ویندا اے تاکہ سورخ مل نہ
 وین۔ کن چھٹن توں کچھے ایہناں وچ چاندی دیاں والیاں پا دتیاں ویندیاں جد
 بچی ٹرن پھرن والی ہو ویندی۔ اس دے کنناں وچ چاندی دے بُندے پادتے
 ویندے آہن۔ ایہہ اس ویلے تک رہندے آہن۔ جد تاں اس دی شادی نہ
 ہو ونجے۔ ایہہ ہک قسم دی کوارے پن دی نشانی وی اے۔ پراج کل بُندیاں دا
 رواج تقریباً ختم ہو گیا اے۔

دُر نشانی مگنی

دُر دی شکل بُندے ہار ای ہوندی۔ دوہاں کنناں وچ ہک ہک جد بچی
 دی مگنی ہو ویندی تے اس دے سوہرے اس نوں سونے دے دُر پواندے
 آہن۔ اس دا مطلب ایہہ ہوندا دُراں آلی جیہڑی اے اس دی مگنی ہو گئی
 اے۔ کسے توں کچھن دی لوڑ وی نہیں پوندی تے جس دے کنناں وچ بندے
 نہ ہندے اس دا مطلب ایہہ لیا ویندا کہ اوہ شادی بُندہ اے۔ اج کل ایہہ
 سارے نشان تقریباً ختم ہو گئے آہن۔ ہُن تاں کنناں نوں سواؤن دا رواج وی
 نہیں رہیا۔

ڈھووا

ڈھووا (تحفہ) کاریگر لوک مثال دے طور تے ترکھان بچے واسطے

پنگھوڑا بنا کے لے آوندا۔ سنار اس واسطے چاندی دا چھکننا لے آوندا۔ جے ذرا وڈا ہوندا تے موچی جُتی بنا کے لے آوندا تے ایہناں ساریاں نوں حسبِ توفیق انعام دتا ويندا۔ جیہڑا اس دی اصل قیمت توں بہوں زیادہ ہوندا۔

گھگھوٹی

ایہہ کپڑے دا ہک قسم دا پنگھوڑا ہوندا۔ جس نوں منجی دے سگھیاں نال بنھ کے تے وچ بچے نوں لٹا دتا ويندا۔ بچہ گھگھوٹی وچ ترکھا سین ویندا اے تے ماں اس نوں اس ویلے تائیں جھوٹے دیندی رہندی جد تک اوہ گھوک سین نہ ونجے۔ کدی جاگ کے رو پوے تے وت دو چار جھوٹے دے کے اس نوں سنوا دتا ويندا اے۔ ماں بچے نوں جھوٹے دین دے نال نال ہک لوری وی گاؤندی رہندی۔ جس نوں سُن کے بچہ اطمینان نال سین پوندا اے۔

سُنٹاں

بچیاں دیاں سُنٹاں ہک سال توں پنج سال دی عمر تک کیتیاں ویندیاں آہن۔ جیہڑے بچے وڈیاں ہسپتالاں وچ جمدے نیں تے ایہناں دیاں سُنٹاں ناڑ کپن نال ای کر دتیاں ویندیاں آہن۔ تے ہسپتالاں والے بچیاں دی کوئی رسم نہیں کیتی ویندی۔ سُنٹاں دے ویلے نائی گھل کے دور نزدیک دے رشتہ داراں نوں اطلاع دے دتی ویندی کہ فلاں تاریخ نوں سُنٹاں نیں۔ سُنٹ دی رسم ڈیگر ویلے کیتی ویندی نالے ایہہ وی کوشش کر کے

دھیان رکھیا ویندا بے سنتاں مئی جون دے سخت موسم وچ ہوون کیوں بے ایس
موسم وچ پھٹ ترکھا چھٹ ویندا اے۔ سیالے وچ پھٹ کپڑے لپھ نال ڈکھن
دا خطرہ ہوندا اے۔ تے انہالے ننگا وی پیار ہوئے تے کوئی حرج نہیں مکھی توں
بچاون کان لملل دا کپڑا اُتے پادتا ویندا اے تے ہفتے دے اندر اندر پھٹ
چھٹ ویندا اے۔

سُنتی بہاؤ نے کان ساڈے علاقے وچ ایہ کم پرہائیں کریندے نیں۔
کدائیں نائی وی کر لیندے نیں۔ بچے نوں بلا کے صحنک اُٹھئی رکھ کے اس
دے اتے بہا دتا ویندا تے اس دیاں ٹنگاں دے پیٹھوں اسدیاں باہیں لگھا کے
ہک دوجا بندہ پھدھ رکھدا اے۔ سُنتی بہاون والا بچے نال دوستی دیاں گلاں
شروع کر دیندا۔ اس داناں پچھدا تے وچ بچے نوں بے دھیان کر کے اپنا کم
کریندا۔ اس توں پچھے ہک پٹی کسی ملہم وچ تر کر کے پھٹ تے ولھیت
ویندے۔ ہفتے توں پچھے زخم ٹھیک ہو ویندا۔ پٹی نوں گھلونے کان کسے نہر دی
نالی تے وچ کے نویندے تے ہولی ہولی پٹی وی لہن دی کوشش کر کے لہہ
لیندے اس طرح ایہہ مرحلہ طے ہو ویندا اے۔

سُنتی بہاون والے نوں ہک روپیہ تے اوہ دانے دتے ویندے
جیہڑے رشتہ دار سوانیاں لے آوندیاں۔ ایہناں تھالیاں وچ گڑ دے کے گھلیاں
ویندیاں تے اتھتھے موجود ہر اک نوں روڑی روڑی گڑے دی دتی ویندی۔
قریبی رشتہ دار کپڑے لے آوندے تے بدلے وچ ایہناں نوں وی کپڑے
دے دتے ویندے۔

ہجڑے

ہجڑے ضروری نہیں کہ ایسے شہر دے ہوون اوہ جتھے وی رہندے
ہوون ایہناں دا ایہہ کم ہوندا اے کہ ایہناں علاقے ونڈے ہوئے ہوندے
نیں۔ سال وچ ہک دو چکر پنڈاں وچ ضرور لیندے۔ ایہناں دے نال
ہک دو طبلے کھڑکون والے ہوندے۔ محلے وچ وڑھ کے کچھدے کہ ”دسوں
نی کس دامنڈا ہویا اے۔“ ایہہ سوال اوہ بچیاں توں کچھدے کیوں جے
بچے خوش ہو کے دس دے دیندے نیں کہ فلاں دے گھر کا کا ہویا تے
نالے آپ وی ناچ تے گوناں نوں سنن واسطے ایہناں دے کچھے کچھے تڑ
پوندے۔ پرانے زمانے وچ ایہناں دا لاگ ہک روپیہ ہوندا آہاتے انجے
ہار ایہہ سارے پنڈ وچوں پھر کے تے ڈھول وگا کے تڑ ویندے آہن۔
ایہناں نوں نیڑے دے رشتے دار ویلاں وی دیندے انجے ایہناں دے
کافی پیسے بن ویندے آہن۔

پگڑی بننے دی رسم

جس ویلے جاتک پگڑی بنن دی عمر نوں اپڑ وینداتے اس ویلے اس
نوں پہلی پگڑی بنن دی رسم کیٹی ویندی۔ پہلی پگڑی نانکے گھر دی ہوندی تے
برکت واسطے قریبی رشتہ داراں دی موجودگی وچ مولوی صاحب بندھے۔ اس
توں کچھے دعا خیر کرائی ویندی۔

نکے منکيوے

بچہ جمداياں اى ماؤ پيونون بچے دى شادى دى فکر هو ويندى۔ اپنے
نيڑے دے رشتہ داراں دے گھر کسے بچے بچی تے ہتھ رکھ دتا ويندا کہ ايہہ ہُن
ساڈا يا ساڈى ہوگئی۔ بچے دے ماں پيووى اعتراض بالکل نہیں کريندے بلکہ
خوش ہوندے آہن چلو مسئلہ حل ہوگيا۔ اوہ زمانہ سادگى دا آہا۔ رشتہ دار
سارے تقريباً اکٹھے رہندے آہن۔ ہور دے کدائیں باہروں رشتہ دى تلاش
چنگا نہ سمجھيا ويندا تے ايہہ آکھيا ويندا آہا کہ ساڈے اپنے گھر جد ساک
(رشتہ) موجود آہن تاں باہر وينے دى کيہڑى لوڑاے۔ صرف پُر آ لے بچی
نون نگنیاں پوا ديندے آہن۔ انجے ہار بہوں شادياں ”وتولئى“ دياں ہوندياں
آہن وتولئى دا مطلب ساک دے کے اس دے بدلے وچ لینا۔ پر ايہہ
جيہياں شادياں کجھ گھٹ اى توڑ چڑھدياں۔ گھراں وچ فساد پيا رہندا۔ ہک دا
جنا ناراض هو کے بيوى نوں مارے تے اوہ رُس کے جد پکے آوندى تے
کارروائى سنيندى تے اس دا بھرا وسدى رسدى اپنى سوانى نوں مارگٹ انجے ہار
گھروں کڈھ ديندا۔ اس نال چار گھرتے ايہناں دے جاتک پریشان رہندے
نیں۔ ماواں دے رُس نال بچياں دى تربيت دا کم ختم هو ويندا اے۔ اج کل
اس قسم دياں شادياں دا رواج گھٹدا ويندا اے تے انج دى پڑھيا لکھيا طبقہ
نيڑے دى شادى نوں طبعى لحاظ نال وى چنگا نہیں سمجھدا کيوں جے اس نال
ڈاکٹراں دے بقول کئی موروثى بیماریاں هو ويندياں نیں۔

اپنے رشتہ داراں وچ شادی کرن ویلے امیری غریبی نوں بالکل نہ
 ویکھیا ویندا۔ ایہہ آکھیا ویندا کہ دھی پُتر نے اپنے متھے دا مکسوم کھانا اے۔ ایہہ
 گل وی دسی ویندی جے اسی ایس غریب نوں رشتہ نہ دیواں تے ایہناں نوں
 کون دیسی۔ اس دے وچ ہک راز ایہہ ہوندا کہ جوان ساڈی وی خدمت
 کر لسی تے دھی نوں وی خوش رکھسی۔ اس دے برخلاف امیراں دے گھر
 ساک کیتا تے ایہناں دی خوشامد کرنی پوسی۔

منگنی دی رسم

پرانے زمانے وچ کیاں دے ذریعے وی شادیاں ہونیاں آہن۔
 اس وچ مرثی تے نائی اصل وڈے کردار ہوندے آہن لڑکے دا والد ایہناں
 دے ذریعے رشتہ منگدا۔ جے لڑکی دا پیو راضی ہو ویندا تے اوہ واپس آ کے
 دیندا کہ اوہ راضی اے یا نہیں جے جواب ہاں وچ ہوندا تاں وت ونج کے
 دعائے خیر دی رسم کیتی ویندی۔ اس دا مطلب کہ رشتہ منظور ہو گیا۔ منگنی دی رسم
 دے ویلے لڑکے دی بھین یا کوئی قریبی سوانی لڑکی نوں ترے کپڑے تے جتی
 وی پیوندے۔ اس دے کنناں وچ سونے دے دُر پا دتے ویندے جس دا
 مطلب کہ ایہہ ہُن منگنی گئی اے دُر لڑکے دا والد لے آوندا۔ اس دے بدلے
 وچ کدائیں کدائیں لڑکے نوں وی چھلا پوایا ویندا۔ پر بہوں تاں لڑکی نوں ای
 چھلا پواون دا رواج آہا۔ ایہہ منگوے دا سلسلہ کافی لمبا ہوندا تے پُتر والے ہر
 عید تے لڑکی دی نکلی تے اس دے کپڑے دے ویندے۔

کدائیں ایہہ وی رواج ایہہ جے منگیندے توں کسے رشتے دار دے
 گھر بلا کے سالیاں اس نوں کھاؤن واسطے چوری گٹ کے کھویندیاں تے اوہ
 اس دے بدلے چھلے پراندے تحفے دے طور تے دیندا۔ بعض اوقات ساری
 ساری رات گاوندیاں تے کھیڈ دیاں گزر ویندی۔ سالیاں ون پونے مخول
 کریندیاں تے تنگ کریندیاں عید دے موقع اُتے سالیاں نوں پیگھن واسطے
 پیگھ دا رسہ وی لے کے دیندا۔ ایہہ پیگھ شہروں باہر کسے رُکھ نال بنھ کے ہور
 سہیلیاں دے نال عید آ لے دیہاڑے جھوٹے لئے ویندے۔ اسے دے نال
 بنڈی وی ہوندی آہی۔

رنگ سٹنا

رنگ سٹنا منگیوے تے ضروری ہوندا اے اس توں وکھرا منگیوے دا
 تصور ای نہیں بندا۔ رنگ کئی قسم دا ہوندا مثال دے طور تے سدا، پیلا، نیلا،
 وکھرے وکھرے بھانڈیاں وچ گھول کے پتر آ لے پاسیوں آون والیاں دے
 کپڑیاں تے وگایا ویندا۔ جد اوہ واپس ہوندے تے پتہ لگدا کہ کدائیں منگیو
 ہو یا اے۔

رنگ توں کچھے دُعا خیر آکھی ویندی تے پتا سے ونڈے ویندے آہن۔
 منگنی توں کچھے جلدی شادی کرن دا رواج کوئی نہ۔ کئی کئی سال بعد شادی ہوندی
 آہی کدی دھی آ لے آدھے کہ اسی نہ اپڑ سگدے کدی پتر آ لے نہ اپڑن دا
 بہانہ کریندے۔ کیوں جے شادی تے برادری دے کھانے تے وی کافی خرچا

ہوندا اے۔ زیور بھانڈے بہوں کچھ بناؤن دیاں رسماں مسے مر کے پوریاں
ہوندیاں۔ بہوتاں شادی دی وجہ نال مقروض رہندے۔

شادی دی تاریخ تے گڈھ

اج کل دے زمانے وچ دھیاں والیاں دے مسئلے بہو ودھ گئے نیں۔
پہلے زمانے وچ عورتاں دی نسبت مرد ڈھیر آہن تے دھیاں آ لے ایہناں
دیاں تاریخ دین تے جتیاں گھسا چھڑیندے آہن تذکرائیں ونج کے ہاں
ہوندی۔ اس وچ کچھ مجبوریاں وی ہوندیاں آہن۔ دوہاں پاسیاں دے بندے
مل کے دھی آ لے گھر ونج کے تاریخ رکھدے آہن۔ تاریخ عام طور تے چن دی
رکھی ویندی آہی تے نال انگریزی مہینے دی تاریخ وی لکھ دتی ویندی آہی۔
تاریخ رکھین توں پچھے اپنے دور دے تے نیڑے دے رشتے داراں دا کمی
ٹورے ویندے تے ایہناں نوں ایہہ وی دسیا ویندا کہ ایہناں نوں آکھنا کہ
فلانے دن نماشا دی روٹی اتھے آ کے کھاؤنی اس نوں گڈھ گھلنا آکھیا ویندا
اے۔ جس کول کمی ونجے اوہ اس نوں کچھ نہ کچھ اپنی ہستی دے مطابق روپے
دیندا اے۔ واپسی تے ایہہ کمی پر بھانوں آ کے دسد اے۔ ایہہ گڈھ دھی
تے پتر آ لے دوویں گھلیندے آہن۔

شادی دی تیاری

گڈھ ٹورن توں پچھے شادی واسطے سامان خریدیا ویندا بجا جی آ لے

کولوں کپڑا تے بھانڈیاں آلیاں دی ہٹی توں ضروری بھانڈے خرید کیتے
ویدنے۔ اکثر ایہہ کم عورتاں کریندیاں آہن مرد راشن پانی دے انتظام وچ
لگ ویندے۔

بالن ہک دوجے کولوں منگ کے اکٹھا کیتا ویندا۔ پکاؤن دا سارا
سامان نائی پکاؤن والے دے ذمے ہوندا آہا۔ عام طور تے دو قسماں دا کھانا
ہوندا اے۔ یا تاں گوشت، روٹی، یا حلوہ روٹی، یا گڑ دے چول۔

سامان کراکری

گوشت اس زمانے وچ اج کل دی طرحاں دیگاں وچ نہیں پکدا۔
بلکہ اس واسطے وڈے وڈے مٹی دے گئے ہوندے آہن۔ ایہہ گئے کبھار دے
ذمے ہوندے آہن۔ کئے دا روہا ہویا لون بہوں سوادی ہوندا آہا۔ حلوہ یا
گوشت پا کے کھونے کان مٹی دیاں پھیلیاں ہوندیاں آہن۔ ایہناں وچ پا کے
ہر کوئی کھاندا اہا۔ ایہہ وی کبھار دیندا آہا۔ اس واسطے کبھار نوں پہلے دسیاں ویندا
آہا تاکہ اوہ بنا کے تے پکا کسے وقت تے دے سکے۔ اس ویلے سارے مٹھے
کھانے چاول تے حلوہ گڑ دے ای ہوندے آہن۔ سفید چینی دا رواج حالی نہ
ہویا۔ اس ویلے سارے کھاؤن پین دے بھانڈے مٹی دے ای ہوندے آہن۔

دانے چھڑنے

جد تارخ مقرر ہو ونجے آہ تے اس دے نیڑے حساب کر کے اپنے

نیڑے دے قبیلے دیاں سوانزیاں نوں بلایا ویندا آہا۔ اوہ سارے دانے چھڑ
ویندیاں آہن۔ اج کل تاں آٹے دیاں مشیناں دا زمانہ اے۔ مشیناں
توں پہلے ایہہ دانے سارے قبیلے دیاں سوانیاں ہتھ آلیاں چکیاں اُتے پیسہ کے
لے آوندیاں ہر کوئی ایہہ کم خوشی خوشی کریندا آہا۔

ججے دی مکی

ہر بندہ اپنی ہستی دے مطابق مکی دیندا آہا۔ پُترے آ لے دوٹکیاں دھیو
آ لے ہک دیندے آہن۔ پُترے آ لے پہلے دیہاڑے میلواں دے آون کے
گوشت تے حلوا پکیندے دو جے دیہاڑے جج دھیو آ لے گھر ڈھک کے
کھاندی۔ اس ویلے راتی دیاں جنجاں ہوندیاں آہن تے رات دھی آ لے گھر جج
رہندی آہی تے دو جے دیہاڑے ڈولی واپس آوندی آہی۔ دھیو آ لے صرف
حلوہ روٹی، یا گڑ دے چاول کھویندے آہن۔ ایہہ رسم آہی جیہو جیہا برادری دا
کھادا ہویا ہووے اوہ جیہا کھوایا ویندا آہا۔ برادری بہہ کے ایہہ فیصلہ کریندی
آہی کہ ایہو جیہا کریئے جیہڑا غریب امیر ہر کوئی دے سکے۔ جے کوئی امیر اپنی
عزت واسطے زردہ پلاء کھویندا تے باقیاں واسطے ایہہ مثال ناہی ہوندی۔ پہلے
پتر دی شادی اُتے ساری برادری وکھری مکی گھر سردی دتی ویندی کیوں جے
پہلے اس لے کے کھادی ہوئی ہوندی اے۔ جے روٹی نہ گھلے تے اگلے منگ
کے دی لے لیندے۔ جیہڑی بندے سرسیر حلوہ تے ترے بوہلے ہوندی آہی
گھر دے جتنے جی ہوندے اسے حساب نال مکی ملدی۔

چکی چنگ

جس ویلے دانے صاف ہو ویندے تے چُن کے ست سہاگناں
ترے، پنج یعنی طاق بک لے کے دانے پیہنے دی بسم اللہ کریندیاں اس نوں
چکی چنگ آکھیا ویندا اے۔

نانک والی

دھی دی شادی اُتے نانکے پلگھ پیڑھاتے ہک لیف، تلائی، اپنی
دوہتری نوں شادی اُتے دیندے آہن جے نانکے امیر ہوں تے اوہ ست
بسترے ست منجیاں ست بھانڈے گھننے تے مجھ یا گاں لیاری وی دے
دیندے آہن۔ پر ایہہ نہجے دیاں گلاں آہن۔

مانیاں بہنا

شادی ترنخ رکھین توں کچھ نڈھاتے کڑی کپڑے میلے کڑی پائی
رکھدے آہن۔ ایہہ خیال کیتا ویندا اہا انج رہن نال شادی تے چنگا تے چوکھا
روپ چڑھسی۔ ایہہ شادی تک میلے رہندے۔ ایہناں توں علاوہ کوئی بندہ میلے
کپڑیاں والا ملدا تے کچھیا ویندا کہ مانیاں بیٹھا ہویا این۔

گون بہاؤنا

نڈھے دے گھر والے جج چڑھن توں ترے دیہاڑے پہلے رات نوں

گون بہاون دا انتظام کریندے۔ اس واسطے محلے تے رشتہ داراں وچ مران یا نائین بھنوائی ویدی کہ فلانے گھراج گون بہنے نیں۔ اس واسطے آوتاں سوانیاں نوں محلے وچ شغل لبھ ویندا تے گھڑا تھالی لے کے ساری رات جٹیاں رہندیاں آہن۔ ایہناں وچ کجھ سُر آلیاں وی ہوندیاں آہن تے اوہ رونق بنا دیندیاں۔ گھڑا وگون کان کسے پرانے جتی دا تھلا ہوندا تے تھالی واسطے چھلے کم دے ویندے۔

جج دی تیاری

دھیو تے پترے والے اپنی اپنی برادری نوں بلا کے پروگرام دیندے تے نالے ایہہ وی آدھے کہ کم نوں اپنا کم سمجھ کر کرنا ایہہ ساڈی ساری برادری دی عزت دا سوال اے۔ کھانا پکاؤنا ایہہ سارا انتظام برادری دے ہتھ وچ ہوندا۔ اس وچ دھی تے پتر آلے دا کوئی دخل نہ ہوندا۔ اس کم واسطے سمجھدار بندے چن کے ایہناں دے ذمے کم دتا ویندا۔ جیہڑا سارے کم دا مختار بنایا ویندا۔ اس نوں وی ایہہ خیال ہوندا کہ کسے قسم دی کمی بیشی دا اوہ ذمہ داری دا ایناں احساس ہوندا جے ایہہ اس وقت تک آپ نہیں کھاندے جد تاں سارے کھانہ لین۔ کیوں جے خدا خواستہ کھانا تھڑ پووے تے ایہناں دی بدنامی ہوسی۔

گھڑولی

جج آلے دیہاڑے گھجھاری سبھ توں پہلاں گھڑولی بنا کے لے آوندی۔ گھڑولی گھڑے اُتے کاغذ دے پھل بنا کے لائے ویندے تاکہ ایہہ

گھڑا سوہنا لگے۔ اس کم دا ایس نوں اپنا لاگ مل ویندا پرانے زمانے وچ لاگ
 روپیہ ہوندا آہا۔ ڈیگر ویلے نڈھے (دولہا) دی بھر جائی، چاچی، ماسی محلے دیاں
 سوانیاں تے میلو عورتاں نوں لیکے سر اُتے اُو رکھ کے گھڑولی چالیندی تے
 ایہناں دے اگے مراٹھی ڈھول وگیندا ویندا۔ ایہہ ساریاں گویندیاں تے نچدیاں
 کھوہ اُتے اپڑ ویندیاں تے اتھوں پانی بھر کے گھر آویندیاں والپسی وی اونجے
 ہار ہوندی۔ کدائیں کدائیں رڑے تے سہی وی مریندیاں تے مراٹھی نوں روپیہ
 روپیہ ویل وی دتی ویندی۔ ایہہ جنہاں گھراں دے کولوں لنگھدیاں ایہناں
 دے جنیاں دے ناں لے لے کے سٹھنیاں دیندیاں ویندیاں تے دوجیاں
 ہس ہس کے مودھیاں پے ویندیاں۔

سٹھنیاں

کیوں چرکا چڑھیوں وے نڈھیا لال اُچیا
 میں چرکا چڑیوس نی کھارے ڈھل پئی
 میں چرکا چڑیوس نی ماں میری اُدھل گئی
 اساں گلایاں بھجھ ونجایاں نڈھیا لال اُچیا
 تیریاں بھیناں نچدیاں آیاں نڈھیا لال اُچیا

کھارا

نڈھے نوں نہوانے کان کانیاں دی بنی ہوئی کھاری مُصلّی لے کے

آوندا۔ اس نوں آ پٹھا رکھ کے نڈھے نوں اس دے اُتے بہایا ویندا۔ نائی دہی
 لے کے اونداس وچ رشتے دار کجھ نہ کجھ نقدی دی صورت وچ سٹ
 دیندے۔ چوانی اٹھانی وغیرہ۔ نڈھے (دولہا) دا پیو روپیہ سٹیندا۔ نائی پیسے کڈھ
 کے نڈھے دے سرتے دہی ملیندا۔ اس توں کچھ اس نوں نہوایا ویندا۔ نہواؤن
 ویلے اس دے اُتے کپڑا تانیا ویندا جیہڑا گھڑولی دے اتے رکھ کے پانی بھرن
 گنیاں آہن۔ اس کپڑے دیاں چار گٹھاں چار بندے انج پھدھ کے کھلونڈے
 جے نڈھے دے اُتے تنی ونجے۔ سہا ہلا لوہے دی کھونڈی جیہڑی کبھار دے گھرو
 آوندی نال اوچکاروں چوک دے کے اُتانہہ کر رکھدا۔ کھارے تے ای نائی
 نڈھے نوں کپڑے پونیندا تے لتھے ہوئے کپڑے آپ لے لیندا دو جے پونے
 آ لے کپڑے دی ممولی ہونڈے کیوں جے سوہرے گھروت نوں کپڑے پا کے
 ایہہ وی نائی نوں دینے پوندے نیں۔

کپڑے پوا کے نائی نڈھے نوں چکیو ملیندا۔ چکیو جواں دا آٹا سرہیوں
 داتیل تے ہروہل رلا کے بنایا ویندا اے۔ اس دے نال نڈھے دے مونہہ
 اُتے کجھ رونق آ ویندی اے۔

چھوٹی بھننا

جد نڈھا کھاری توں لہندا اے تے اس دے اگے گھڑولی الی چھوٹی
 رکھی ویندی اے۔ اس نوں اس تے پیر مار کے بھننی ہونڈی اے۔ اس نوں
 سوہرے دی ہک قسم بھننی چاہیدی اے۔ اصل وچ نڈھے دی طاقت دا اندازہ لاؤنا

ہوندا اے کہ چھوٹی بھن سگدا اے کہ نہیں۔ جے نڈھا کمزور ہووے تے کبھار
تیلی جہی چھوٹی اگے رکھ دیندے جیہڑے پیر دھرن نال ای ٹوٹے ہو ویندی۔
جے وت وی نہ بھجے تے نال دے سنگی جلدی بھن کے اعلان کرن دیندے کہ
چھوٹی بھج گئی۔

کھارے دے لاگے

رشتے دار تے یلی ساتھی نڈھے نوں حسب توفیق نیوندر دے طور تے
رقم دیندے یا کوئی جانور گاں مجھ وی دیندا۔ برادری دے پیسے کسی کاپی تے
لکھے ویندے کیوں جے وت ایہناں دی شادی اُتے دینے پوندے نیں۔ جس
ویلے نڈھا نہا دھو کے کپڑے پا کے تیار ہو ویندا اے تے اس نوں سہرا بنیا
ویندا۔ چاہے اوہ بازاری ہووے یاں پھلاں دا ہووے جیہڑا وی ہووے مونہہ
دے سامنے بدھا ویندا۔ مالن پھلاں دا سہرا لیا کے لاگ لیندی اے۔ اس
طرح نڈھا تیار ہو ویندا۔ گھوڑے اُتے سوار ہو ویندا جداوہ گھوڑے اُتے سوار
ہوندا اے بھین اس دی واگ پھدھ کے گھوڑے نوں دانا کھویندی تے اس نوں
نڈھا واگ پھدھائی دے لاگ دیندا۔ تے انجے ہار گھرتوں تیاری دا آخری
مرحلہ طے ہو ویندا۔ سہرا بدھے ہوئے نڈھے نوں مہاراج آدھے آہن۔

جج چڑھنا

جج عام طور تے رات دے وقت سوہرے دے گھر ڈکھن کان ویندی

آہی۔ چاننے واسطے نائی ڈھیر ساریاں مشالاں بنا کے لے آوندا اہا۔ مشال
(مشعل) لکڑی دا ہک ڈنڈا ہوندا اہا تے اسدے سرے تے ڈھیر ساریاں
تھکڑیاں لھئییاں ہونیاں ہوندیاں آہن۔ ایہناں دے اُتے تیل ایس طرح پایا
ویندا جیہڑا ہک کپے دے وچ ہوندا۔ جیہڑا اُٹھ دی کھل دا بنیا ہویا ہوندا۔
سارے جانجیاں کول مشالاں ہوندیاں آہن تے جد اوہ نکھن تے آونجے آہ
تے نائی توں وت تیل پوالیندے آہن۔ انج ایہہ جج وڈی مزیدار ہو ویندی
آہی۔ اس ویلے گلیاں دے وچ ہنیرا ہوندا آہا تے اس واسطے وی جج بہوں
چنگی لگدی آہی۔ راہ دے وچ عورتاں نڈھے نوں دُدھ پویندیاں تے گون
گوندیاں۔ ایہہ رات سارے شہر دی خوشی دی رات ہوندی آہی۔ شاید ای کوئی
جنا سوانی یا جاتک اجیہا ہووے جیہڑا جج دی رونق ویکھن توں رہ گیا ہووے۔

جج تے لوک فنکار

شادیاں تے مذہبی طبقہ کھیل تماشے باقی غیر ضروری رسماں توں بچیا
رہندا۔ پردوجے پاسے دنیا دار طبقہ اپنی دولت نوں لٹانے دی کوئی کمی نہ
چھڑیندا۔ شادیاں تے کلال، بھنڈ، کنجریاں، نقلی، قوال، بلائے ویندے۔
ایہناں نوں اڑی تڑی تے ویلاں دتیاں ویندیاں۔ ایہہ سارے فنکار اپنے
اپنے کم دے ماہر ہوندے تے اجیہیاں گلاں کریندے کہ سارے جانجی ہس
ہس کے دوہرے ہو ویندے تے فنکار اپنا اُلو سدھا کریندے۔ ایہہ فنکار
وڈے حاضر دماغ ہوندے آہن۔ ہک جج نال دو نقلی بلائے گئے تے جد اوہ

اپنے فن دا مظاہرہ کر رہے آہن۔ تے ہک رئیس نے خوش ہو کے دو شالہ انعام وچ دتا۔ نقلیٰ اس نوں ویکھ کے سمجھ گیا کہ دو شالہ پرانا اے۔ ایس اس نوں اس ویلے انج کھلاریا جیویں اوہ اس توں کوئی شے پڑھ رہیا ہووے۔ دو جے پچھیا کہ کیہ لکھیا ہو یا اے اس دسیا کہ لا الہ لکھیا ہو یا اے۔ اس وت پچھیا کہ اگانہہ کیہ لکھیا ہو یا اے دو جے جواب دتا کجھ نہیں۔ کیونکہ جے ایہہ حضور اکرم دے آون توں پہلے دا اے۔ اس واسطے اس تے محمد الرسول اللہ نہیں لکھیا ہو یا۔ رئیس وڈا پکی پیا تے ایہناں دا گھر پورا کر دتا۔ نقلیاں دی ایہہ وی عادت آہی جے اپنے میزبان دی نقل ضرور کریندے کدی اس دی ذات اُتے کدی صفات تے جستوں لوک وڈے خوش ہوندے۔ ایہہ لوک گلاں ای گلاں وچ اس طرحاں وڈے وڈے حل طلب سرکاری مسئلیاں دی طرف اشارے کر ویندے۔ مطلب ایہہ ہوندا کہ لوکاں نوں اپنیاں کمزوریاں تے تنبیہ کیتی ونجے۔ ایہناں گلاں نوں کوئی وی برا نہ منیندا۔

ہک واری کسے شادی تے مشہور قوال دھی آ لے گھر بلائے جنہاں قوالی دے وچ ہک اردو دی نظم دھی آلیاں دے حسب حال پڑھی تے اس ویلے کوئی اچھی اکھ ناہی جیہڑی نہ رو رہی ہووے آہ۔

بیٹیوں کو اپنے گھر سے کیوں جدا کرتے ہو تم
 زندگی بھر پال کر پھر الوداع کہتے ہو تم
 زندگی کے گرم صحراؤں میں ہم کو پھینک کر
 ”خوش رہو تا حشر“ والی کیوں دعا کرتے ہو تم

مداری

ہک واری ہک مداری تماشا ویکھون آیا تے اس ہک جوان نوں اندر بلایا۔ جد اوہ آ گیا تے اس اس نوں آکھیا کہ اپنے ہتھ ہک دوجے دے اُتے رکھ کے ڈھڈھ توں فٹ ہک پچھانہ رکھے۔ اس توں پچھے اس مداری جوان نوں آکھیا کہ میری اکھ نال اکھ ملا کے ویکھے۔ اس دی نظر ملاون دی ڈھل آ ہی جے اس دی مداری ہار ہتھ بھوانے شروع کر دتے مداری ہتھ بھوونے بند کر دیندا تے اوہ وی بند کر دیندا۔ لوکاں دا ہس ہس کے برا حال ہو یا کنیاں نے نو جوان نوں آکھیا کہ اوہ کہ ہتھ چھوڑ دیوے یا پھیرنے بند کر دیوے پر اس اُتے کوئی اثر ای نہ ہوندا۔ نڈھے نوں کوڑ چڑھی تے اوہ گیا پر اوہ وی انجے کرن لگ پیا۔ بس اس طرحاں دے تماشے تے شغل وی شادی دے نال ضروری سمجھے ویندے آہن۔ مطلب ایہہ ہوندا کہ بھائی شادی دا مطلب خوشی ہوندا تے لوکاں نوں خوش کیتا ونجے۔

بینڈ واچے وگونے

غریباں دی شادی اُتے صرف ہکی ڈھول نال وی کم چل ویندا۔ پر پیسے آ لے ہکی ڈھول تے ای بس نہن کریندے۔ سرگودھے شہر وچ پلس دا بینڈ منگوا یا ویندا۔ جے ایہہ نہ ملے تے مراٹیاں دی بینڈ پارٹیاں نوں بلا کے بینڈ وگوا یا ویندا۔ ایہہ بینڈ پارٹیاں وی پلس بینڈ دی طرز تے بنیاں ہو یاں ہونداں۔ فرسٹ کلاس وردی تے سامان اپنے مثال آپ ہوندا۔ لوک ویکھ کے

خوش ہوندے تے ویلاں دا مینہ وسا دیندے۔ اس توں علاوہ فوجی بینڈ وی ہوندا پر اس دے پیسے بہوں ہوندے نیں۔ ہر کوئی نہیں منگوا سکدا۔ جے کسے فوجی افسر دی شادی ہووے اُتے اس نوں اجازت ہوندی کہ اوہ شادی تے سرکاری طور تے بینڈ منگوا سکدا اے۔

آتش بازی

امیر لوک آتش بازی دا وی وڈا زبردست مظاہرہ کریندے۔ پر ایہہ کافی فضول خرچی وچ آندا اے۔ ہر وڈے پنڈ وچ گولے تے شوکنیاں مقامی طور تے داروکت (آتش باز) تیار کر دیندے۔ ایہناں دی دکان شہر توں باہر ہوندی کیوں جے بارود خطرناک شے سمجھی ویندی اے۔ عام آدمی شادی تے گولے ضرور وگویندا۔ گولے سیڑھاں نال بدھا ہو یا بارود ہوندا اے۔ جیہڑا کافی زور نال پھٹدا اے تے پتہ لگدا کہ کدائیں شادی اے۔ جج دے راہ تے گولے وگدے رہندے آہن تے ڈھکن لگیاں باقی دے واری واری وگا کے ختم کر دتے ویندے نیں۔

ناچے

جج دے نال ناچیاں دے ناچ دا وی رواج کدائیں کدائیں ہو گیا اے۔ ناچا گھگھر وپیراں نال بنھ کے جج دے اگے نچدا ویندا لوک اس نوں وی ویلاں دیندے ناچے عام طور تے جوان چھوڑ ہوندے اُتے اپنے فن دے ماہر

ہوندے۔ لوک ایہناں دی سہی دھریس ویکھ کے خوش ہوندے۔

ویڈیو فلم

اج کل دے دور وچ جنج دی پوری فلم بناون دا وی وڈا رواج پے گیا
اے۔ فلم بناؤن والا جنج دے اگے اگے کسی کار تے بہہ کے فلم بندی کریندا ویندا
اے تے جنج توں کچھ گھر بہہ کے پرانی یاداں دی فلم چلا کے خوش ہوندے۔
ہُن تاں اس دی فلم بندی کڑی کول ونج کے دی ہوون لگ پئی اے۔ جیہڑے
ایہہ نہیں کر سگدے اوہ فوٹو بنا کے کسر پوری کریندے نیں۔

کنجریاں دا مجرا

جیہڑے بہوں امیر ہوندے اوہ کنج تے گون آلیاں سوانیاں بلیندے
اس نوں سرگودھے وچ کنجری آکھیا ویندا۔ گون والی سریلی دے نال شکل
شباہت والی ہوندی تے لوک ویلاں دے دے کے کملے ہو ویندے۔ ویلاں
کان پیسے مک ویندے تے ادھارے لے کے وی تک اُچی رکھن دی کوشش
کیتی ویندی۔ مجرا دور دور توں لوک ویکھن آوندے۔

ہڑا

جد جنج پھر پھرا کے سوہریاں دے گھر دے کول اپڑدی تے مصلیٰ رسہ
لے کے جنج دا راہ بند کردیندا کہ اگانہہ اوہ لاگ دتے بناں نہیں ونج

سگدی۔ چنانچہ جج آلے ایہہ لاگ دے کے کڑی آلے گھراپڑ ویندے تے
 اتھے ایہناں دے بہاؤن دا انتظام محلے وچوں ڈھیر ساریاں منجیاں منگ کے
 کیتا ویندا تے اوہ اتھے بہہ رہندے۔ سب توں پہلاں روٹی کھوائی ویندی۔

چوکی بہنا

جج دی روٹی کھون والی ٹولی نوں چوکی آدھے نیں۔ مثال دے طور تے
 آکھیا ویندا حالی پہلی چوکی بیٹھی اے۔ ہُن دوئی بیٹھی اے۔ وت آخری چوکی
 ہوندی۔ جد لوک چوکی بہ کے کھون لگدے آہن تے چھوہریں وی اپنے بھاجی
 انج کر کے منگدیاں آہن۔

باجرے دا ٹانڈا نسر گیا
 چھوہریں دا بھانڈا وسر گیا
 باجرے دا ٹانڈا کڑک گیا
 چھوہریں دا بھانڈا لڑک گیا

انج آکھن نال چھوہریں وی اپنا حصہ لے لیندیاں نیں۔ دو جیاں
 فنکاراں ہارگوون والیاں وی وڈی آفت دیاں پرکالیاں ہوندیاں آہن۔ مجلس
 نوں ناز ادا نال قابو کرن دا ڈھنگ جان دیاں آہن۔ کدائیں کدائیں اپنی
 دولت دی مشہوری کان لوک ایہناں نوں اپنیاں پیاریاں دی خوشی تے یا شادی
 ویاہ تے کنجریاں دا مجرا کرویندے۔ ایہہ مجرے آلی گاندی وی ہے تے نالے
 نچدی وی اے ہر فن مولا ہوندى آہی۔ حالانکہ اس زمانے وچ ایہناں نوں بلا

کے نچاؤناں کوئی چنگی گل ناہی سمجھی ویندی۔ پر عام لوک مجرے دا سُن کے وڈی دوروں دوروں آوندے تے ساری رات شغل رہندا۔ ایہناں نوں جانجی تاں ویلاں دیندے ای آہن کیونکہ رواج اہا۔ پر تماشبین وی گھروں ویلاں دینے دی تیاری کر کے آوندے۔ ایہہ کنجریاں وڈیاں تیز تے ایہناں جاہی جاہی دا پانی پیتا ہوندا آہ۔ اپنیاں حرکتاں توں لوکاں دے دل قابو کر لیندیاں تے ایہناں دے ہتھ مجبوراً چپے آ لے پاسے ویلاں دین تے مجبور ہو ویندے۔ کسے نوں اکھ دے اشارے نال کسے نوں ہتھ دے اشارے نال قابو کریندیاں۔ کئی واری تے اتنیاں ویلاں ہوندیاں کہ جیویں روپیاں دا مینہ وس پیا ہووے۔ ایہناں دا لٹن دا طریقہ ایہہ وی ہوندا جیہڑا ویل دیندا اس دے کول آ کے اس مونہہ ول کر کے ٹچدی تے گوندی۔ جد کوئی ہور ویل دیندا تے اس پاسے لگی ویندی ایس گل تے مقابلہ شروع ہو ویندا تے ایہناں دی موج ہو ویندی۔

ایہہ صرف نچن گاؤن والیاں ای نہیں ہوندیاں بلکہ وڈیاں حاضر جواب وی ہوندیاں۔ ہک واری دو وڈیاں سوہنیاں نچن والیاں آہن۔ کسے مذاق دے طور تے آکھیا کہ ”وڈی سوہنی جوڑی اے“۔ اس دا مطلب گھوڑیاں دی جوڑی وی ہو سگدا اے۔ فوراً ہکی آکھیا سائیس دے پُتر نے خوب سیاتا اے نالے ای آکھن آ لے ول گھور کے تے ناراض ہو کے ویکھیا۔ کیوں گھور کے ویدھی پئی ایں انجے لگدا اے جے کھاؤن لگی ایں۔“ اس فٹ جواب دتا۔

”ساڈے مذہب وچ سور کھاؤنا حرام اتے ایہہ سُن کے اوہ بندہ وڈا پچی پیا۔ اس توں کچھ اوہ ہولی ہولی تُو دی ایس دے کول گئی تے اس نوں اکھیوس۔

”بھیناں نال گُوڑ نہیں رکھندی۔ مینوں اپنی نکی بھین سمجھ کے غصہ تھک سٹ۔“
چودھری تاں شرم دے مارے اتنا پگی پیا جے کجھ نہ پکھو تے لوک
ہس ہس کے دوہرے ہو گئے۔

عجیب رسماں

پنجاب وچ عام طور تے نڈھے (دولہا) نوں خصم آکھیا ویندا اے۔
خصم دے معنی فارسی زبان وچ دشمن دے ہوندے۔ جیہڑے ویلے ایہہ جج لیکے
ڈھکدا تے اس نوں دشمن فوج دا سالار تے جانجی حملہ کرن والے فوجی سمجھے
ویندے آہن تے جد ایہہ دھی آلیاں دے گھر دے نیڑے اپڑدے تے
ایہناں دی پرانی جُٹیاں گوہے دی تھاپیاں نال حملہ کیتا ویندا۔ زبانی اجیہیاں
اجیہیاں سٹھیاں سنائیاں ویندیاں جے توبہ ای بھلی۔ اس رسم دا پس منظر نیاز فتح
پوری ہووے دسدے نیں کہ زمانہ جاہلیت وچ اسلام توں پہلاں ایہہ رسم
عرباں وچ آہی تے اوہ مخالف قبیلے دیاں دھیاں حملہ کر کے لے ویندے تے
الیس نوں اتھے لونڈی بنا کے رکھیا ویندا۔ تے اسے رسم نوں اج وی کسے نہ
کسے رنگ وچ زندہ رکھیا گیا اے۔ ہتھاں دے کنگن ہتھکڑی پیراں وچ بیڑی
پنجیب پازیب نک دی نکیل نتھ پا کے ویناں شکست دا اعتراف اے۔

اج کل دیاں جنجاں تے دیہاڑی دیہاڑی دیاں ہو گئیاں آہن
پرانے زمانے وچ دو دو ترے ترے دیہاڑے جج رکھن دا رواج آہا۔ اج کل
سرکاری طور تے وی ایہہ رواج ختم ہو گئے آہن۔ ہُن تاں رات دی شادی دا

رواج ختم ہو گیا اے۔ دیہاڑی دیہاڑی کھلیاں کھلیاں نکاح پڑھایا تے گھر آ گئے۔ اس وچ دھی آلے نوں کافی بچت ہو گئی اے۔

بھٹھ جھلکا

ایہہ رسم تنور وچ جھلکا پونے دی رسم نڈھا تنور وچ آگ لا کے ایہہ رسم پوری کریندا۔ اس توں کچھ کھانا دتا ویندا۔ ایہہ رسم پتہ نہیں آتش پرستاں توں آئی اے۔ کیوں کہ اوہ سارے کماں توں پہلاں آگ بالن دا کم کریندے۔ ایسے داناں ہک ہور رسم وی ایہہ جے نڈھے نوں آگ بالن واسطے آکھیا ویندا جے اوہ نہ بال سکے تے جرمانہ ماچھن نوں دیندا۔

سٹھنیاں

ہک قسم دا فحش مذاق جہدے نال برائیاں تے نڈھے دے قریبی رشتہ داراں نوں خوب خوب سنائیاں ویندیاں تے نالے ایہہ وی آکھیا ویندا کہ سٹھنیاں دا برا نہیں منایا ویندا آہا۔ پر دھی والے اوہ ساری کسر کڈھ دیندے جیہڑا بعد وچ ایہناں دے نال ہونے والا آہا۔

پھلاں بھری چنگیر جوٹا چھلیاں دا
اساں نہ معلوم نڈھا پتر مصلیاں دا
پھلاں بھری چنگیر وچوں مٹھ بھر وے
سالیان بلایا ای حرامیاں چپ کروے

انجے ہار جد جج ٹکی کھون لگدی تے اس ویلے وی اسے قسم دیاں
سٹھنیاں شروع ہوویندیاں:

ہتھ چھلا نہیں

اُتے پلا نہیں

پریں کھلا نہیں

پیرو واہنا ایوں مہاراج وے

اساں کے جناں وے ساوے ساوے ڈوڈے

نڈھے دا پیو کھاؤن لگا کڈھ بیٹھا گوڈے

اساں کے جناں وے ساوی ساوی پلی

نڈھے دا پیو کھاؤن لگا جھجھی داڑھی ہئی

تھوڑا تھوڑا کھاؤ

ساڈیاں گلیاں نہ ترکاؤ

نکے نکے مونہہ

ڈھڈھ نیں کھوہ

مہندی دی رسم

ہتھ دھو کے پنج چھٹا کی مہندی گھول کے نیڑے دیاں سیر (رشتہ دار)
آلیاں ماسی۔ چاچی مامی وغیرہ کڑی نوں لیندیاں آہن۔ ایہہ شادی دی رات
نوں نڈھے دے گھرتوں آوندیاں۔ مراٹی ڈھول وگیندا تے سوانیاں نچدیاں
گوندیاں کڑی دے گھراپڑ ویندیاں۔

مہندی بھیرے دی رنگین رنگ لینے
چڑھ کے سمیے لوے کڑیے بان دی اے
مہندی تھوڑی آندی آ
کڑی تاں لائی بیٹھی سہہ باہلی رہندی آ
انجے ہار دے گون گا کے تے ہاسے مذاق کر کے گھر لگھ ویندیاں۔

لال جگاؤن

جد ساری جج ٹگر روٹی کھا بہندی تے نڈھے نوں ہک نال دے گھر
وچ لے ویندے تے اُتھے کڑی دیاں نیڑے دیاں سوانیاں آ کے نڈھے نوں
ساری رات جگائی رکھدیاں تے آپ گون گوندیاں رہندیاں۔ اس رسم نوں
لال جگاؤناں آدھے نیں۔ اس قسم دے گون گوندیاں:

اٹھی جاگ وے لالہ
لگی بھاگ وے شالا



اسی آئیاں وے
اسی آئیاں تے گلیاں سہایاں وے



کجھ بھیناں تے کجھ بھرجائیاں وے
اُٹھی جاگ وے لگنی بھاگ وے



اسی کیمڑے ویلے دیاں کھلیاں
لگ سکنیاں پیراں دیاں تلیاں



اُچی ماڑی لالے دی داتری وے
اسی آئیاں لالے دی خاطر وے



اُچی ماڑی لالے دا ڈیرہ وے
سس پچھدی جوئی میرا کیمڑا وے



اُچی ماڑی لالے دی تھئی تھئی وے
نڈھا سوہنا سہ بالا پٹی پٹی وے



ہولے ٹر نڈھیا تیرے نال ٹرن بھرا
جیوے بھائی پر تیں عزتاں نال



خوشیاں دا چن چڑھیا
انج پر نیاں بھاگے بھریا



بیڑا گھوڑی

ایہہ رسم وی ہک شغل میلہ ہوندا آہ۔ جد سالیان لال جگوانے دی رسم
پوری کریندیاں نیں تے اس توں کچھے ایہہ رسم شروع کیتی ویندی۔ نائین اپنے
لاگ لینے کان نڈھے دے نیڑے دے رشتہ داراں دے آٹے دے بُت بنا کے
کسے بھانڈے وچ رکھ کے لے آوندی اے تے نڈھے دے سامنے رکھ کے
ایہناں دے ناں لیکے انہاں دی بے عزتی کریندی اے تے نڈھا اس نازک
حالت توں جلدی خلاصی پاؤن کان لاگ دے کے جان چھڑالیندا اے:-

تیری ماں موئی تاں میں رو سساں
اندر وڑ کے مونہہ چا دھو سساں

وری سوہی

نڈھا اپنے پیو تے رشتہ داراں دے نال سہورا لاگ لے ویندا اے۔

جس وچ کپڑے گہنے تے شربتی پھل وغیرہ ہوندے نیں۔

میڈھی کھولنا

سویرے دیہوں ابھرنے دے نیڑے گڑی نوں کھارے چاڑھیا ویندا
آہا۔ نائین کپڑے بدلویندی آہی تے لتھے ہوئے کپڑے اس دے ہوندے
آہن۔ میڈھی ہک خاص قسم دی والاں دی طرز بنائی ویندی تے اس نوں
کھارے توں پہلاں کھولیاں ویندا۔ میڈھی کھولنے دے ویلے گون گائے
ویندے۔

میری مڈھی نہ کھولونی
زور کیتا بھر جائیاں
اماں میرا لالو جگ دا اے

اساں جے آکھیا بُندے نہ لاہو
زور کیتا سنیا رے

داج

گڑی نوں جیہڑا مال پیکے سہرے پاسیوں ڈھیندا اس نوں منجیاں گھت
کے اتے رکھیا ویندا۔ تے لوک اس نوں دیکھن آوندے۔ اس ویلے مراٹی داج
ہو کیندا جس دے وچ ساریاں ہٹیاں دے ناں لیندا۔ جیہڑیاں اس دے وچ

موجود ہوندیاں۔

داج ہوکنا

مراثی کوٹھے اُتے چڑھ کے زور نال داج ہوکیندا:-

بسم اللہ حرف سہیوے

شرعی صفتاں دا ذکر کریوے

مائی صاحب خاتون دا داج بکیوے

کوزہ تسلہ حاضر تھیوے

مصلیٰ مسواک ڈھیوے

چادر دی پوشاک بنھیوے

دھیاں آلے دلوں نمائے، جہنوں فکر اندر بھلائی دا

گھتو داج تے کرو تیاری

تے دیکھن سب لوکائی دا

دھر تھالاں وچ گاہنے آئے

چام کلی کٹ مالا سومائے

دھیاں آلے دلوں نمائے، جہناں فکر اندر بھلائی دا

کڈھ پیڑا داج وچھایا

ریشم پشم بانٹے آیا

زری عظیم روپہ منگایا

لیف تلالی لال سرہانہ سوہنا رنگ رضائی دا
 دیگاں چھنی تھال
 چلھے کروے توے
 بھکھن پیہڑے پلنگ
 آدم تنکن گھروں رزق لائی دا
 واہ ہزار گاہے
 چھ سروپا پکی اکیھیں
 قدرت ویکھ خیال ربانے
 شرع نبی دی قائم ٹکانے ویکھے گل لکائی دا
 رو رو مامے پھپھیاں مامیاں
 بھین بھرا عزیز قبیلہ
 رو رو کے وداع کریسن
 جو کجھ لکھیا جھولی پسین مولا کرم کمائی دا
 صدا مبارک نوشہ پاندے جو ویکھے سبھ لوکائی دا
 شہر جھاوریاں طور امیراں
 مدد کیتی اے نیچے پیراں
 شان وڈا اس جائی دا
 پڑھ کے میاں محمد داج سناوے جے دان ڈھیوے دعائی دا

رسم نکاح

نکاح دی رسم شریعت دے مطابق ہوندی اے۔ مرد وکھرے بیٹھے ہوندے نیں تے ایس ویلے مولوی صاحب دو گواہاں نوں کڑی کول اجازت لین واسطے گھلیندے نیں۔ اجازت مل وین تے مولوی صاحب نڈھے توں چھ ککے، پچھدے۔ اس زمانے وچ ہر نوں ککے آوندے آہن۔ اس توں کچھ مولوی صاحب خطبہ پڑھدے تے ایجاب و قبول ہوندی۔ دعائے خیر منگی ویندی تے چھوہارے ونڈے ویندے۔ اس توں کچھ نڈھے نوں مبارک دتی ویندی۔ نائی نڈھے نوں نویں کپڑے پوندا سر اُتے چیرا (ریشمی پگڑی) بنویندا اُتے اخیر تے اس نوں شیشہ دکھا کے لاگ لیندا۔

ڈولی

ماچھیاں دے گھر ڈولی بنی بنائی رکھی ہوئی ہوندی۔ ایس دے وچ کڑی نوں پایا ویندا تے اس نوں اسدے محرم چا کے اس دے سوہرے گھر اپڑا آوندے۔ جس ویلے ڈولی چائی ویندی اس توں پہلاں گڑی سارے گھر آلیاں دے گائے لگ کے روندی کیونکہ ایہہ اس گھر توں وداع ہو کے نویں گھر ویندی پئی ہوندی اے۔ جس ویلے ڈولی وچ بہہ راہندی تے ڈھول آ لے ڈھول وگاؤنا شروع کر دیندے گولے وگائے ویندے تے راہ تے ڈولی تے پیسے وارے ویندے تماشین خوشی نال پیسے چند دے ایہہ ہک قسم دا صدقہ ہوندا۔ جد کڑی سوہرے گھر اپڑ ویندی تے اوہ سوہری مہاٹھ پھدھ کے کھلو رہندی۔

سوہرا اس نوں کچھ نقد یا زیور دا وعدہ کر کے مہاٹھ چھڑیندا۔ اس توں پچھے گڑی نوں کڑے تے بہایا ویندا جیہڑا مصلیٰ سردا بنا کے لے آوندا شاید ایہہ رسم قبل از تاریخ توں آ رہی اے پر ہُن تاں شاید ختم ہو گئی اے۔

اس توں پچھے مولوی صاحب دی بیوی قرآن حکیم نوں اگانہہ کر کے بوسہ دیوندى تے لاگ لیندی اس توں پچھے کوئی خوش قسمت بچہ اس دی جھولی وچ بہایا ویندا تاکہ اللہ تعالیٰ نے اس دی جھولی وچ اولاد دی نعمت پاوے تے اس بچے نوں وی لاگ ملدا۔ اس توں پچھے مونہہ دکھالی دی رسم شروع ہوندى تے کڑی نوں مونہہ دکھالی دے لاگ ملدے۔

تل و تیرے کھیڈنا

آٹا گھیو تے گڑ آپس وچ ملا کے وڈی ساری صحنک وچ رکھے دیندے۔ کڑی تے نڈھا بک بھر بھر کے ہک دوجے نوں دیندے۔ جیہڑا لے کے دوجے بھانڈے وچ رکھیندا ویندا۔ ایہہ کڑی نڈھے دی پہلی ملاقات دا طریقہ آہا۔ اخیر اُتے جیہڑا بک بھر لیندا اوہ جتیا ہو یا سمجھیا ویندا۔ اس گڑ گھیو تے آٹے دیاں روٹیاں پکا کے ونڈ چھوڑیندیاں آہن۔

بیودھا

دوجے دیہاڑے کڑی دا بھرا بھین نوں گھر لے ویندا۔ اس توں پچھے نڈھا سوہرے گھر آ کے کڑی نوں واپس لے ویندا اس نوں بیودھا آدھے۔

پہلا ہفتہ نائین باقاعدگی نال سویلے آ کے گڑی دی میڈھی کریندی وال بنیدی
تے لاگ لیندی۔ مان پھل لے آوندی تے لاگ لیندی۔

پہلی عید

پہلی عید اُتے گڑی دے پیکے گڑی نوں جوڑا کپڑے من دانے حلوہ
پرات گھلیندے۔ انجے ہار ایہہ رسماں ہر کوئی اپنی اپنی ہستی دے مطابق پوریاں
کریندا اے تے کریندا راہسی۔

بیمار نوں پچھنا

جد کوئی بندہ بہوں بیمار ہو ویندا تے اسنوں رشتے دار بلی سگی ضرور
پچھن آوندے نیں۔ اسدی کوئی خدمت ہوندی تے خوشی نال کریندے تے
ویندی واری اس نوں پچھنی دا روپیہ دے کے ویندے۔ انج اس دی خدمت وی
ہو ویندی۔

مرنے تے ایس دیاں رسماں

مرنے تے آکھیا ویندا کہ مرنا ہر ہک دا سا جھا اے۔ جد کوئی بندہ رضا
الہی نال مرویندا تے اس دے گھر آ لے کمی گھل کے سارے قبیلے نوں اطلاع
دیندے۔ اج کل مسیتاں وچ اعلان کرن دا رواج ہو گیا اے۔ قبیلے دے لوک
سن کے کم کار چھوڑ دیندے تے سدھے اس دے گھر آوندے تے اس دی قبر

دی تیاری تے کفن دفن دا انتظام کرن لگ پوندے۔ جد جنازہ تیار ہو ویندا تے باہر جنازہ گاہ تے یا گھلی جائی تے پڑھایا ویندا۔ سوانیاں پہلاں جنازے تائیں نال رہندیاں آہن۔ ہُن رواج ویندا رہندا اے۔ پہلے قبر کھٹن کان سمجھدار رشتے دار ویندے آہن۔ ہُن ایہہ کم موچی کریندے نیں۔ شہراں دے وچ قبرستان وچ ای گورکن مل ویندے نیں۔ کوشش ایہہ کیتی ویندی جے قبر اپنے رشتہ داراں دی قبریں نال ای ہووے۔ گستاں وچ ہر قبیلے دیاں وکھریاں قبریں ہوندیاں نیں۔ جویں شہراں وچ محلے ہوندے نیں۔ شہراں وچ الگ قبریں رکھنیاں بہوں مشکل کم اے۔ دیہاتاں وچ سوکھا اے۔

غسل تے جنازہ

عام طور تے غسل کراؤن والے نوں مخیم آدھے نیں۔ اس داکم ای مُردیاں نوں غسل دینا ہوندا۔ اے ہن تاں کدائیں مولوی صاحب مرداں نوں تے مولویانی صاحبہ عورتاں نوں غسل دیندے نیں۔ ایہناں نوں وی لاگ دتے ویدے۔ جنازے تے ہک چادر وچھائی ویندی جس تے کجھ قرآنی آیات لکھیاں ہونیاں ہوندیاں نیں ایہہ منگ کے پائی ویندی اے۔ تے مردے نوں سامی وچ رکھ کے ایہہ اوتھوں لائی ویندی اے۔ اس توں وکھرا ہک ہور کپڑے ویہوندا جیہڑا کمی آپس وچ ونڈ لیندے آہن۔ جے اٹاں دی لوڑ پوے تے کبھار لے آوندا اے۔ اس توں پچھے ماچھی کنڈے لے آکے قبر نوں کنڈیاں نال ڈھک دیندا تاکہ کوئی جانور مردے نوں نقصان نہ پہنچائے۔ پہلاں رات

نوں اگ وی بالی ویندی آہی جس نوں دھواں آدھے آہن۔ اس دا وی مطلب جانوراں توں حفاظت اہی۔ ایہہ خیال کیتا ویندا آہا کہ بجو آ کے مُردے کڈھ لیندا اے۔ پراج کل بجو الی گل وی پرانی ہوگئی۔ قبر بند ہوون توں کچھے کمیتاں نوں لاگ دتے ویندے نیں تے گھر آ کے بھورا گھتیا ویندا اے۔ جیہڑا بہوں تاں داریاں اتے گھت لیا ویندا اے۔ عورتاں پھوڑی گھت لیندیاں نیں۔ ہر آون والی عورت گاٹے لگ کے روندی اے۔ دیہاتاں وچ اُچا اُچا روون دا رواج اے۔ اس نوں وین آدھے نیں۔ روندیاں ہویاں مرنے اے داناں لے کے اوس دیاں صفتاں دسیاں ویندیاں نیں اس توں کچھے دے آون آ لے حالات دی پیشن گوئی کیتی ویندی۔

کوڑا وٹ

مرنے آ لے دے رشتے دار مرن والے دے گھر کھانا پکا کے گھلیندے ایس نوں کوڑا وٹا آدھے نیں۔ ایہہ ہک سنت طریقہ اے۔ ترے دیہاڑے میت آ لے گھر کوئی شے نہ پکدی بلکہ ایہہ ذمہ داری رشتہ داراں دی ہوندی۔ اوہ دال تے روٹیاں پکا کے مسیت وی گھلیندے۔ انج کل الٹ رواج ہو گیا اے۔ مرن والے گھر پکا کے گھلن دی بجائے ایس دے گھر توں کھاون دی کوشش کیتی ویندی۔ مرن آلا حالی گھرای ہوندا اے جے دیگاں کھڑکن لگ پوندیاں نیں۔ انج مرن والے دے گھر دا جیج نالوں وی بہو خرچ ہو ویندا اے۔

قُل

ترتیب دیہاڑے مسیتی ونج کے قُل پڑھایا ویندا۔ قُل دی رسم وی مختلف علاقیاں ونج مختلف اے۔ اعلان کردتا ویندا اے تے سارے مسجد ونج ونج کے کلمے شریف دا پہلاں لکھ پڑھدے تے اس توں پچھے مولوی صاحب دے حوالے کیتا ویندا تے مولوی صاحب دعائے خیر ادھے۔ لوکاں ونج کجھ دانے تے پھل ونڈن دا رواج وی کدائیں اے تے مولوی صاحب نوں وی قُل تے لاگ دتے ویندے جے مرنے آلا بزرگ ہووے تے مولوی صاحب وڈے پُتر نوں پگ وی نبھیندے۔ مرن توں پچھے قُل تائیں بھورے اُتے آون دا رواج عام اے کدائیں ست دیہاڑے تائیں وی اے شرعاً ترے دناں توں پچھے منع اے۔ اس توں پچھے کدائیں جمعرات کرن دا رواج اے۔ جمعرات تے حلوہ پکایا ویندا اے۔ کدائیں چالھواں دی وی رواج اے۔ اس اُتے سارے رشتہ داروت اکٹھے ہوندے نیں تے کھان پین دا وی کافی انتظام کرنا پوندا اے۔

وداگی

مرن الا بزرگ جنا ہووے یا سوانی ہووے اس دے مرن تے قریبی رشتہ داراں نوں کپڑے دتے ویندے نیں۔ اس رسم نوں وداگی آکھدے نیں۔ ایہہ وی داج ہار دکھائے ویندے نیں۔ استوں پچھے پہلی عید تے وت ماتم ہوندا اے تے لوک افسوس کرن آوندے تے قریبی رشتہ دار عید تے کوئی

مٹھی شے نہن پکیندے تے نویں کپڑے وی نہن پیندے۔ انج کر کے ایہہ دسیا
ویندا آیا کہ سن عید دی خوشی نہیں ہوئی بلکہ حالی تائیں مرن آ لے دا افسوس
اے۔

برسی

ہر سال مرن آ لے دی مرن آلی ترخ اُتے اس دی برسی منائی ویندی
اے۔ ایس واسطے قرآن خوانی کیتی ویندی اے تے کجھ خیرات وی کیتی ویندی
پر ایہہ رسم کوئی کوئی کرویندا اے۔

عجیب رسم

مرن آ لے مردنوں خفن (کفن) سوہرے پیندے نیں۔ تے
جاتکاں نوں وی نانکے دھی نوں وی پیکے۔ اپنے گھروں نصیب ایہہ نہ ہووے تا
نانکیاں تے چٹی اے۔ جیویں پر نیوے اُتے نانکے لاہن اس نالوں ودھ کے
مرن اُتے وی نانکے لا آہن ایس دا خلاصہ ایہہ ہو یا جے دھی آ لے گھر دا کفن
دفن وی سارا نانکا ہوندا اے۔ اصل وچ ایہناں ساریاں لاواں دا مطلب ایہہ
ہوندا اہا جے سارا قبیلہ لوڑی دے وقت سارا کم آپس دے وچ ونڈ لین تاکہ
دو جے تے بھار نہ پوے پر ہوندیاں ہوندیاں ایہہ رسماں انج پکیاں ہو گئیاں
آہن۔ چاہے کوئی نبھدا اے یا نہیں رسم ضرور پوری کرنی ہوندی اے۔ حالانکہ
اسلام سادگی نال سارے کتماں دی تبلیغ کریندا اے۔ ساڈیاں بہو رسماں شادی

تے مرنے اُتے فضول خرچی دیاں ہو گئیاں نیں۔ ایہناں ساریاں رسماں دے
بانی مہانی یار لوک ہوندے نیں۔ جہاں دا کم غلط مت دینی تے کھا پی کے
انگ ہو بہناں اے۔

اج کل گورنمنٹ نے وی ایہناں کھاؤن پین دیاں فضول رسماں اُتے
پابندی لا دتی اے۔ اس طرحاں ہُن غریب لوکاں کجھ سکھ داساہ لیا اے۔ نہیں
تاں پہلاں تاں چاہے گھر وچ آٹا نہیں جج دی روٹی کئی کھانیاں نال ضروری
کرنی پوندی آہی۔ انجے ہار مرن آلے دے گھر وی، مرن تے، قل تے،
جمعرات، چالھجے اُتے اتنا خرچ ہو ویندا اے جے کجھ نہ پچھو۔ اصل وچ ہر کوئی
اپنی امارت وکھونی چاہندا اے۔ پہلے زمانے وچ ایہہ رواج بالکل نہ۔


خواجہ احسان الحق مثالی نیک افسر

خواجہ احسان الحق سرگودھا خوشاب توں علاوہ وی کئی ہور ضلعیاں وچ
وی سیشن جج رہے۔ اج کل دے معمولی افسراں کول سرکاری تے غیر سرکاری
کاراں دی کٹ چڑھی ہوئی ہوندی اے۔ پر اوہ اللہ دا بندہ انہاں ساریاں
دنیاوی کروفتوں بے نیاز آہ۔ اوہناں دے کول سواری واسطے شاید سائیکل وی
ناہی۔ اوہ پیدل ای کچھری اوندے ویندے۔ چڑاسی وی کدی نال نہ ویکھیا۔
لیکن جتھوں تائیں انصاف دا تقاضا ہوندا پوری پوری چھان بین کریندے۔ حتی
کہ ایس علاقے وچ ونج کے مسجد دے نمازیاں توں قتل دی پوری تفصیل معلوم
کر کے فیصلہ کریندے تے ہمیشہ درست فیصلے دی حقیقت تائیں اپڑ ویندے۔

خود حافظ قرآن اہن۔ بعض اوقات مولوی صاحب دی غیر حاضری وچ جماعت
وی کرا دیندے۔ کدی کدی ایہ تھے ای مسجد وچ علیحدہ چار پائی تے فیصلہ خود ای
لکھ دیندے اہن۔ واقعی اوہ اللہ دے نڈر انسان اہن۔ ریٹائرمنٹ دے بعد
باقی زندگی تبلیغ دین واسطے وقف کر چھوڑی ہن اللہ نوں پیارے ہو گئے اہن۔
اللہ تعالیٰ اوہناں نوں آخرت وچ اعلیٰ مقام عطا کرے۔

☆☆☆





کھیڈاں

بچیاں دیاں کھیڈاں

دیہاتاں وچ بے شمار کھیڈاں نیں جہناں نوں بچے جوان تے بڈھے سارے کھیڈ دے نیں۔ پر ہُن تے اگلے ویلیاں دیاں کھیڈاں وچ مڈھلا فرق ایہہ ہے جے ہُن دیاں کھیڈاں پیسے دیاں کھیڈاں نیں تے اگلے زمانے دیاں کھیڈاں بغیر پیسے دے ہوندیاں آہن۔ جس شے دی لوڑ ہووے آہا اوہ خود بنا لئی جاندی آہی۔ کسے کولوں مل لین دی ضرورت ناہی ہوندی۔

کھیڈ دیہاتاں دے وچ ہک وڈی مزے دی شے ہے۔ بچیاں توں لے کے وڈیاں تائیں سارے ای پسند کریں دے آہن۔ بچے تاں ہک جھٹ وی آرام نال نہیں بہہ سکدا۔ ماواں وی تنگ پے کے آدھیاں ونجو باہر کھیڈ آؤ۔ انجے بچے دی صحت دی بندی اے تے معاشرے وچ رہن سہن دے طور وی سکھدے۔

پکنا

پکنا کھڈکاراں دے آپس وچ ونڈن کان جیہڑا طریقہ ورتیا ویندا اے

اس نوں پکنا آ کھیا ویندا اے۔ ایہہ طریقہ تقریباً ہر پاسے ای ہے۔
 دو وڈے کھڈکاراں وچوں دو معتبر بن ویندے جیویں اج کل ٹیم دے
 کپتان ہوندے آہن۔ ایہہ دوہیں ہک پاسے کھلو ویندے آہن تے باقی دے
 جاتک دو دو دی جوڑی بن کے بکن واسطے اپنے نویں ناں رکھ کے اپنے
 سرداراں کول آو ویندے نیں۔ ایہناں نویاں کپتاناں (سرداراں) نوں وی
 ایہناں دے خفیہ ناواں دا پتہ نہیں ہوندا۔ جیہڑے ویلے اوہ آ کے آ کھدے
 آہن۔ کہ اساں ہک کے آ گئے آں تے اوہ ناں پچھدے نیں تے اوہ شعر
 وچ جواب دیندا اے۔

کوٹھے تے کتاب
 کوئی لئے میم تے کوئی لے صاحب
 جس کپتان دی چننے دی واری ہووے اوہ میم فرض کیتا منگدا اے تے
 دو جا جیہڑا صاحب بنیا ہو یا اے۔ دو جے پاسے لگا ویسی انجے ہار جتنے کھڈکاراں
 دی لوڑ ہووے کپتان واری واری چنندے لگے ویندے نیں۔ جد ٹیم مکمل ہو
 ونجے تاں پاسا ملنے واسطے ٹاس دی لوڑ پوندی اے۔ اس دے کئی طریقے نیں۔
 پھیری تے تھک لا کے اتانہہ سُٹی جس دا پاسا ملیا ہو یا اتے آ ونجے
 اوہ ٹاس جت گیا۔ کسی سکے نوں وگا کے۔ الغرض اس طرحاں دی چونڑ وڈی
 انصاف آلی ہوندی اے تے کسے نوں اعتراض دا موقع نہیں دتا ویندا۔

ایہہ جیہڑیاں کھیڈاں دا اساں ذکرنا ایں اوہ ساریاں پنڈاں دے
 لوکاں دیاں نیں شہراں دیاں کھیڈاں ہور ہوندیاں نیں۔ تے اوہ پیسے آ لے ای

کھیڈ سگدے نیں۔ ایہہ کھیڈ کرکٹ، ہاکی، فٹ بال والی بال باسکٹ بال ٹینس، پنگ پانگ، پولو، شطرنج وغیرہ۔ ایہناں کھیڈاں دا حال احوال لکھن دی اتھتے لوڑ نہیں۔ اساں صرف اوہ کھیڈاں دسناں نے جہناں دا تعلق دیہات تے ساڈی ثقافت نال اے۔

کھدو نال کھیڈاں

کھدو، اصل وچ گیند دا بدل اے کیوں جے دیہاتی ایہہ ماگھے گیند خرید نہیں سگدے اس دا حل ایہناں ایہہ کڈھیا جے پرانیاں لیراں لے کے ایہناں نوں ولھیٹ لیا تے اس نوں پکا کرن واسطے اُتے پکے دھاگے دی جالی بنائی ویندی اے۔ انج کھدو پکا ہو ویندا اے تے لیراں نوں قابو رکھدا اے۔

گھیر گھمڈا

ایہہ چھوراں دی کھیڈ اے۔ ایہہ کھیڈ ہاکی ہار بنایاں ہوئیاں کھوٹیاں نال کھیڈی ویندی اے۔ اس دا طریقہ ایہہ اے کہ وچکار ہک وڈا سارا ٹوہا ہوندا تے اس دے آس پاس گول چکر دی شکل وچ نکلیاں ٹوہیاں بنائیاں ویندیاں نیں۔ ہرنگی ٹوہی تے ہک چھورا اپنی سوٹی وچ رکھ کے کھلوتا ہوندا اے۔ باہر آلا ایہہ کوشش کریندا اے۔ جے میں وڈے ٹوہے وچ کھدو پا دیواں پر جیہڑے پاسیوں اوہ سٹن دی کوشش کریندا ساہمنے آ لے اس نوں نہیں پان دیندے تے ایہناں دی منشا ایہہ ہوندی اے جے سٹ مار کے اس نوں دور سٹے

اسے مقابلے وچ مقابلہ کرن آ لے دی خالی کھتی یا ٹوہی وچ باہر الا اپنی سوٹی رکھ لے تاں کھتی آ لے تے وار آ ویسی۔ ایسے طرحاں ایہہ مقابلہ چلدا رہندا اے۔ جے باہر آلا وڈے ٹوہے وچ کھدوسٹ لے تاں ساریاں چھوراں واسطے ضروری اے کہ اگلی کھتی تے لگا ونجے اس طرحاں سارے نویاں کھتیاں تے لگے ویندے آہن۔ باہر آلا کسے دی سُستی توں فائدہ چُک کے اس توں پہلاں خالی کھتی وچ سوٹی رکھ لے تاں وی اوہ جت گیا تے جیہڑا کھتی توں وکھرا رہ گیا اوہ ہر گیا تے وار اس اُتے آ گئی۔ اس کھیڈ واسطے ضروری اے کہ سارے کھداری حاضر ہوں۔ مثال دے طور تے 11 کھتیاں بنائیاں ہوئیاں ہین تے 11 کھدار ہو سن تے کھیڈ ہوسی۔ نہیں تاں ہوائی نہیں سگدی کیوں جے کوئی کھتی خالی نہیں رہ سگدی۔ کھداریاں دی تعداد وی مقرر نہیں ضرورت دے مطابق رکھے ویندے نہیں تے کھتیاں بنائیاں ویندیاں آہن۔

کھدو نال کھیڈن دیاں ہور وی بہوں ساریاں رسماں تے طریقے ہین جیہڑے کھیڈن آلیاں دی مرضی تے ہے چاہے تاں فٹ بال بنا کے کھیڈن لگ پون چاہے تاں والی بال بنا کے کھیڈن یا طبیعت کرکٹ دے نال ملدے جلدے کھیڈ کھیڈناں چاہن تے ایہہ وی کھیڈ سگدے ہن۔ ایہہ چھوراں دی نِت نِت تجربے نال کھیڈاں تیار ہوندیاں رہندیاں آہن۔

ایٹی ڈنڈا

ایہہ کھیڈ دو چھوہر ہک وقت وچ کھیڈ سگدے ہن۔ ایٹی کچھ دو

انگلیاں موٹی لکڑی دی ہوندی اے تے کوئی چھ انگلیاں لمی ہوندی اے۔ اس دے سرے گھڑ کے نوکدار بنائے ویندے آہن۔ ڈنڈا کوئی دو فٹ لماتے کوئی دو انگلیاں موٹا ہوندا اے۔ ایٹی زمی تے رکھیے تاں اس دیاں دوہاں پاسے دیاں گھڑیاں ہوياں پنجباں زمی توں اُتاتانہہ اُٹھیاں ہوندیاں آہن۔ انج اس نوں ڈنڈے نال سٹ لوئی سوکھی ہو ویندی اے۔ سٹ لگن نال ایہہ زمی توں ٹپ کے اُتاتانہہ اُپھلدی اے تے کھیڈن آلا اس نوں سٹ مار کے دور سٹن دی کوشش کریندا اے۔ جیہڑا کھڈاری بہو دور سٹے اوہ کامیاب کھڈار سمجھیا ویندا اے۔

بارہ مار

ایہہ چھوراں دی کھیڈ اے۔ اس وچ دو کھڈاری حصہ لیندے نیں۔ ایہہ بہوتاں آجڑی اپنے ویلھے ویلے ہک دو جے نال کھیڈدے نیں۔ اس وچ صرف دو کھڈاری ہوندے نیں تے دوہاں پاسے بارہ بارہ گوٹیاں ہوندیاں آہن۔ اس دے کھیڈنے واسطے پھیری یا کولے نال زمی تے اس شکل دے مطابق لکیراں لا کے کھیڈدے نیں۔ اس وچ ہر کھڈاری کول 12 گوٹیاں ہوندیاں آہن۔ کل 25 خانے ہوندے نیں صرف ہک خانہ خالی ہوندا اے۔ ایہہ شطرنج دی طرز دی ہک کھیڈ اے کھڈاری نوں اپنی گوٹیاں بچاؤن واسطے وڈا سوچ کے چلنا پوندا اے۔ اپنیاں گیٹیاں نوں اگانہہ پچھانہہ سچے کھبے کر کے خالی اگلے خانے وچ رکھیا ویندا اے۔ جے نال آلی گوٹی مخالف وی ہووے جے اس توں اگلی جاہ خالی ہوئے تاں اوہ

گوٹی ماری ویسی انجے ہار جد ساریاں گوٹیاں ختم ہو ویسن تاں جس ماریاں
نے اوہ کھیڈ جت ویندا اے۔

نوبھر چر

ایہہ کھیڈ وی چھوراں دی اے۔ اس کھیڈ دی شکل ہو اے۔
اس وچ نو نو گوٹیاں ہوندیاں نیں۔ دوواں کھڈاریاں دیاں گوٹیاں مختلف
جنس دیاں بنایاں ویندیاں نیں۔ کوئی مستقل طرز نہیں جو شے مل جائے
اس نوں گوٹی بنا لیا ویندا اے۔ مثلاً ہک ساتھی نے پھیریاں رکھیاں آہن
تے دو جا پتھر رکھ لیندا اے۔ اس دی وی چال چلنے دا تے ساڑنے دا
طریقہ بارہ مار دی طرح ای اے۔ ایہہ کھیڈ بارہ مار نالوں جلدی مک
ویندی اے۔

بنٹے کھیڈنا

ایہہ چھوہراں دی کھیڈ اے۔ پہلے زمانے وچ کالیاں ریٹھے دیاں
گولیاں ہوندیاں آہن۔ جدوں دے شیشے دے بنٹے آئے گولیاں دا رواج ختم
ہو گیا۔ ہک کھیڈ بنٹے کھیتی وچ پونا ہوندی اے جس دی وار ہووے اوہ بنٹے
کھیتی الے پاسے سٹیندا اے جیہڑے ٹوٹی یا کھیتی وچ ونج پون اوہ اس دے ہو
ویندے نیں تے باقیاں وچوں کسے نوں نشانہ بنا لے تاں سارے بنٹے جت
لیندا اے۔ جے نشانہ نہ لگے تاں دو جا واری لیندا اے۔

گولی پلا

دوجی ہک ہور کھیڈ وی بنٹیاں نال کھیڈی ویندی اے۔ جس توں گولی پلا آدھے آہن۔ ایہہ کھیڈ انج کھیڈی ویندی اے جے کھڈاری گولیاں یاں بننے ٹوٹی آلے پاسے سٹیندا اے تے وت ہر اک نوں چوٹ چوٹ کے گتی جاندا اے جے چوٹ نشانے تے نہ لگے تاں دوجا واری لیندا اے۔

مڈھیاں چوٹیاں

ایہہ کھیڈن آلیاں واسطے ضروری اے جے اس دے کول ڈنگیاں پھڑنگیاں لکڑیاں ہوں ایہہ کھیڈ کھیڈن آلے دو لکیراں مار کے ہک لکیر توں دوجی لکیر تے پی مڈھی نوں اپنی مڈھی نال مار کے لکیر توں باہر کڈھن دی کوشش کیتی ویندی آہی جے اوہ پار کرا دیوے تاں اوہ جت گیا نہیں تاں دوجا کوشش کریندا آہا جتن آلا اپنی چلھی دا بالن بنا لیندا آہا۔ ایہہ بنٹیاں اخروٹاں دی طرحاں جوئے دی ہک شکل آہی۔

دھرک

اس کھیڈ دا انگریزی ناں لانگ جمپ اے تے ہن وی کھیڈی ویندی اے۔ اس واسطے کہی نال زمین نرم کر لئی ویندی اے جے کھڈاری نوں سٹ نہ لگے۔ اس کھیڈ اچ کھڈاری دوروں بھج کے آوندا اے تے جتی توں اُپھل کے اگانہہ دھرک مریندا اے۔ جیہڑا سب توں اگے چھال مارے اوہ

اول نمبر تے جیہڑا اخیر تے رہ ونجے اوہ کمزور سمجھیا ويندا اے۔

کوکلا چھپا کی

ایہہ کھیڈ چھوہریں تے چھوہر دوویں کھیڈ دے آہن۔ اس دا طریقہ ایہہ اے سارے کھڈاری ہک گول دائرہ بنا کے بہہ ويندے نیں۔ تے جس تے وار ہووے اوہ ہک کپڑے دی وٹ کے کھنڈوری بنالیندا اے تے دائرے پچھے چکر لیندا اے چھوہراں دا مونہہ دائرے دے اندر لے پاسے ہوندا اے تے کسے جاتک توں پچھوں تنکے دی اجازت نہیں ہوندی۔ پھرنے والا پھردیاں ہویاں آدھا اے ”کوکلا چھپا کی جمعرات آئی اے جیہڑا پچھوں ویکھے اس دی شامت آئی اے۔“ تے اس طرحاں پھردیاں اوہ کسے جاتک دے پچھے کھنڈوری رکھ دیندا اے جے اس نوں پتہ نہ لگے تے اوہ چا کے اس دی اس نال مرمت شروع کر دیندا اے جد تائیں اوہ بھیج کے اپنی جاہ تے نہ اپڑ ونجے یا جے بیٹھے ہوئے نوں پتہ لگ ونجے جے کھنڈوری اس دے پچھے رکھی ہوئی اے تے اوہ رکھن آ لے نوں اس نال ماردا اے۔

چینی

ایہہ چھوراں تے چھوہریں دوہاں دی کھیڈ اے۔ اس وچ ہک پھمیری دا گول کیتا ہویا ٹکڑا ہوندا اے جس نوں تھیتھوں آدھے نیں۔ کھیڈن واسطے زمی تے ہک مستطیل شکل بنا کے اس وچ مختلف خانے بنائے ويندے جیہڑے

کچھ انجیئرس ہار ہوندے نیں۔ مثلاً پہل، دوج، تریج، چینی، ساہو، ٹاپو۔ اس دے کھیڈن دا طریقہ ایہہ اے کہ اس کھیڈ وچ کھڈاری ہکی لت تے تھیتھوں نوں پہلے خانے وچ سٹ کے اس نوں انگوٹھے دے زور واپس باہر سٹ مار کے کڈھ دتا ویندا اے تے انجے ہاروت دوجے خانے تریجے تے اگانہہ چینی ایہہ کوئی چھ انچ چوڑا خانہ ہوندا ہے اس نوں دی وت کھڈنا اوکھا کم اے۔ جے دوجا پیر لگ ونجے تے کھڈار کھیڈ ہار ویندا اے جے لکیر اُتے تھتھوں کھلو ونجے تاں وی کھڈاری سڑ ویندا اے۔ سڑنا مطلب ہارنا ہوندا اے۔ اگانہہ ساہو وچ دوہیں پیر رکھ کے ساہ کڈھ سگدا اے۔ ٹاپو وچ لت نہیں رکھ سگدا۔ اس نوں ہکی لت تے ٹپ کے پار کرنا پوندا اے۔ اس توں بعد کھوئی ہوندی اے اس وچوں وی کڈھ کے چینی دے راہ باہر کڈھنا اوکھا کم ہوندا اے۔

اس کھیڈ دا مقصد ایہہ ہے جے کہ کھڈاری نوں حیاتی وچ ہمت تے حوصلے دا سبق ملدا اے۔ اس نوں زندگی وچ کئی اوکھے سوکھے کماں نال واسطہ پوندا اے ہوشیار تے طاقت ای حوصلے نال درجہ بدرجہ ساریاں مشکلاں تے قابو پالیندا اے۔

چوہریاں دیاں کھیڈاں

چوہراں ہار چھوہریں دی کھیڈاں ہوندیاں نیں تے ادھ وی وڈے شوق نال کھیڈ دیاں نیں۔ سب توں پہلاں ایہہ وی چھوہراں ہار پکیندیاں نیں۔

پکن دا طریقہ

پکن توں پہلاں ہک لوک گیت دوہرایا ویندا اے۔ ایہہ لوک گیت
مسلماناں تے ہندوواں دے وکھو وکھ ہوندے آہن۔ جیہڑے کجھ انج آہن۔

مسلمان چھوراں دے پکن دا گیت

اڈنگ بڑنگ ستارے ٹنگ

جھجھی بکری جھجھے کن

پہلاں پیٹھ بہائی جنج

جنجوں پچھیا کیہڑا راہ

ڈھول وگے ڈھمکا وگے

پیر بہادر شاہ

جس چھورتے پیر بہادر شاہ آوے اوہ پگ ویندا۔

ہندو چھوراں دا گیت:-

اینک پینکن تلی تلکین

ساوا لاٹو پیلی ڈور

اڈونج کاواں جالاہور

لاہور و آئے تتر مور

تتراں موراں پائی لڑائی

چام چٹھی چھڑاون آئی

چام چٹھی دے سروچ ڈنڈا
نکل آوے توں رام چندا
جس تے رام چندا آوے آہ اوہ پگ ویندایا ویندی آہی۔

چھوہریاں دیاں کھیڈاں

چھوہریاں دیاں گھریلو قسم دیاں کھیڈاں ہوندیاں آہن۔ جھڑیاں اوہ
اپنے کماں کاراں توں ویلا ہو کے کھیڈ دیاں ایں۔ کھیڈن توں پہلاں اپنیاں
سہیلیاں توں گھراں وچوں انج کر کے بلیندیاں آہن
1۔ اک دی لکڑی کڑک داتیل، آؤنی چھوہری اوکھیڈنے داویل
2۔ ساریاں چھوہریں ستھ وچ
عاشی ماں دی کچھ وچ
آجا عاشو کھیڈیے
ایہہ آواز سُن کے ماں دی اجازت نال بھج کے سہیلیاں وچ رل
ویندیاں جد ساریاں آویندیاں تے اپنی مرضی نال کوئی کھیڈ چن کے کھیڈن
لگ پوندیاں۔
چھوہریاں دیاں وڈیاں کھیڈاں ایہہ نیں:-
ہراسمندر، گڈیاں پٹولے، گڈی گڈے دی جج، ککلی، رسی پٹنا، وارو
وار، تھیتھوں نال کھیڈنا۔

رسی پٹنا

چھوہریں اپنے قد نالوں دوہری رسی لے کے اپنے سراں توں الار
کے پیراں پٹھوں کڈھدیاں آہن جے ہک رسی ہووے تے پٹن آلیاں بہوں
ہوون تاں دو چھوہریں وارو واری رسی دے سرے پھدھ کے کھلو رہندیاں
آہن تے اوہ رسی توں الریندیاں آہن تے باقی اُس توں ٹہدیاں رہندیاں
آہن اس دے نال وی کافی ورزش ہوویندی اے۔

گڈیاں پٹولھے

امور خانہ داری دی مشق کرن دی کھیڈ اے اس وچ اوہ ساریاں
رسمائ کیتیاں ویندیاں نیں جیہڑیاں شادی ویاہ تے ہوندیاں نیں۔ اس وچ
گڈی گڈے دی شادی وی شامل ہوندی اے۔ ایہہ وڈی رونق تے ویکھن
والی کھیڈ ہوندی اے۔ جس ماں پیو دی لوہندیاں دی دھی ہووے تاں اوہ
اونہوں خوش کرن واسطے بہوں سارا خرچہ کر کے پوری جج دا نقشہ بنھ
دیندے نیں۔

ایہہ ساریاں کھیڈاں ساڈی ثقافت دا حصہ آہن پرہن نویں ثقافت
نے ایہہ کھیڈاں ختم کر دتیاں آہن۔

گھول

ساری دنیا وچ گھول یا گشتی دا اے تائیں رواج اے۔ اس دے وچ

دو پہلوان اک دوجے نال طاقت تے پیچ لا کے مقابلہ کریندے نیں۔ ہر ہک دی ایہہ کوشش ہوندی اے جے دوجے دے کنڈ زمی تے لائے دوجا بچاون دی کوشش کریندا اے۔ پر جیہڑا ڈاڈھا ہووے اوہ کنڈ لا ویندا اے۔ ساڈے کول ایہہ گھول حالی تائیں روائتی کھیڈ دی روح دے مطابق ہوندے نیں کسے نوں جسمانی نقصان نہیں پہنچایا دیندا۔ اس دے الٹ یورپ وچ تے ہُن انج وحشیانہ طریقے نال جیہڑی شے مار کے لہولہان کر دین تاں وی کوئی نہیں پچھدا۔ بے ہوش دے جسم تے دھرک مارن توں وی نہیں جھکدے۔ اس قسم دیاں کھیڈاں نوں انسانی کھیڈاں نہیں آکھ سگدے۔

پھلوچے کھیڈناں

ایہہ کھیڈ اصل وچ ڈنگر چوگون آلے چھیڑوان دی اے۔ اس دا طریقہ ایہہ اے جے جد دہی ککر اُتے پھلیاں دودھ نال بھر لی ویندیاں نیں تے ایہناں نوں تروڑ کے تے ایہناں دے مونہہ اُتے ککر دے دوترے کھنڈے پرو دتے ویندے نیں ایس توں بعد اسنی مٹی یا گوبر لے کے اس دے اُتے پھلچے نوں کنڈیاں دے زور کھلوا دیویندا اے۔ دوجا کھڈاری اس پھلوچے نوں اپنے پھلوچے نال چوٹ لیندا اے۔ اس دے کنڈے اس وچ کھبھ ویندے نیں تے جے اوہ اس نوں اُتاتنہ پٹ لے تے اوہ جت گیا تے اوہ پھلوچا اسدا ہو گیا۔ ایہہ وقت گزارن دی کھیڈ اے۔ گھراں وچ وی بچے کھیڈ لیندے نیں۔

وینی پھدھنا

گھرو اپنی اپنی طاقت تے جوانی دا زور وکھان واسطے دو جے گھرو نوں
مقابلہ کرن واسطے ونگار دے آہے۔ اس دا طریقہ ایہہ ہوندا آہا جے دوہیں جے
آمنے سامنے بہہ کے پیاں دے بھار ہو ویندے آہن اس توں پچھے ہک گھرو
دو جے دی گئی کولوں کھبی بانہہ زور نال گھٹ کے پھدھ لیندا آہ۔ تے دوجا جانا
سجے تھہ دے ہکی زور نال اس توں بانہہ چھڑانے دی کوشش کریندا آہا جے اوہ
چھڑا لے تے جت گیا۔ انجے ہار ترے واری گھٹو گھٹ اس نوں کرنا پوندا آہا
جے ترے واریں ای جت وے تے اس نوں جتیا ہو یا من لیندے آہن۔
دو جے نوں وی انجے ہار بانہہ پھدھن دا موقع دتا ویندا آہا۔ پر جیہڑا طاقت وچ
زبرا ہوندا آہا اوہ ای ایہہ وی جت دا آہا۔ کمزور تاں وینی نہیں چھڑا سگدا۔

منگلیاں تے مگدر

ایہہ وی گھرواں دی طاقت ویکھن دا ہک طریقہ آہا منگلیاں لکڑی
دیاں ہونداں آہن تے بھار ودھونے کان لوہے دے کڑے وی پوا چھڑیندے
آہن۔ جیہڑا ودھ توں ودھ پھیر لیندا آہا اس نوں سہن نیا ویندا آہا۔ اسی
طرحاں مگدر لکڑی تے پتھر دے ہوندے آہن۔ ایہناں توں جیہڑا سرتوں اُتا نہہ
چا کے لے ویندا آہا اس نوں واقعی طاقتور نیا ویندا آہا۔ ایہہ کسے زمانے داریاں
تے وی رکھے ویندے آہن۔ کوئی گھرو باہر دا آ وے تے اس نوں چون
دی دعوت دیندے کہ انجے ہار چھٹ چونی دی اک کھیڈ آہی۔

اخروٹ کھیڈنا

اخروٹاں دیاں دو قسماں ہوندیاں آہن۔ ہک کھاؤن آ لے جس نوں
کاگتی اخروٹ آدھے نیں تے دوجے کاٹھے جیہڑے صرف چھوہراں دے
کھیڈن دے کم آوندے نیں۔ ایہناں وچ بہوں تھوڑی گری ہوندی اے۔
ایہناں دے کھیڈن دا طریقہ ایہہ تے ہر کھڈاری کول کجھ اخروٹ
تے ہک سٹ ہوندی اے۔ جیہڑی ہک وڈے اخروٹ توں بنائی ویندی اے
تے اس نال اخروٹ نوں پٹیندے آہن۔ کھیڈن دا طریقہ ایہہ ہے مثلاً ترے
ساتھی کھیڈ رہے نیں۔ ایہناں دو دو اخروٹاں دی میر پائی تے کل چھ اخروٹ
ہو گئے۔ جس دی واری اے اوہ ایہناں نوں اڈھے تے کھلو کے ٹوئی (کھٹی)
تے انج کر کے سٹیندا اے جے سارے دے سارے ای ٹوئی وچ ونج پون
جیہڑے باہر رہ جان اوہیہناں نوں سٹ نال چوننا پوندا اے۔ جس دا نشانہ چنگا
ہووے اوہو سارے ای جت سگدا اے۔ جیہڑے بچ جان دوجا واری لیندا
اے۔ جے سارے ای جت لے جاوے تے نویں سمندی میراں پا کے کھیڈ
چلائی رکھیندی اے۔ جیہڑے دے اخروٹ ختم ہو وئجن اوہ ہر جاندا اے تے
باقی چلدے رہندے نیں۔ آخر کار کوئی نہ کوئی ایہناں دے وچوں سارے
دے سارے اخروٹ گت لیندا اے تے اپنا بوجھا بھر کے خوشی خوشی گھر جاندا
اے۔ ایہناں اخروٹاں وچوں جے دوجا خریدنا چاہے تے وچ وی دیندا اے۔
انج اس دے پیسے بنا لیندا اے۔

وارو واری

لُگ چھپ، اس کھیڈ وچ کھیڈن آ لے جس تے وار ہووے اس
دیاں اکھاں ہک ہو رکھاری بند کر رکھا اے۔ باقی سارے کھڑاری ادے
آدے لُگ ویندے نیں۔ اس توں بعد اس دیاں اکھیاں توں ہتھ ہٹا لیا ویندا
اے تے اوہ اپنے اندازے تے اپنے بیلیاں نوں ڈھوڈھیندا اے۔ جے وار
دین آلا کسی نوں پھدھ لے تاں اُسے واری آ ویندی اے۔ جیہڑا بھج کے
اڈھے تے آونجے اوہ بک ویندا اے۔ اکھیں بند کرن آلا اپنے ساتھیاں
نوں ہوشیار کرن واسطے وار آ لے دے پچھے داڑ آئی داڑ آئی دی آواز دیندا
اے۔ تاکہ لُگن آ لے ہوشیار ہو جاوے جد داڑ اگا نہہ نکل ویندی تے اوہ موقع پا
کے بھج کے اڈھے تے اپڑ کے تھوکرٹا سٹیندا اے۔ تھوکرٹا اس تھک نوں اڈھے
جیہڑی کھڑاری اڈھے تے اپڑ کے سٹیندا اے اوہ اس گل دی نشانی اے جے اوہ
کامیاب ہو گیا اے۔

کدائیں انج وی کھیڈ دے نیں جے کھڑاری لُگ کے آواز دیندے
نیں تے وار الا اس نوں سُن کے انداز لا لیندا اے تے اپنی ہوشیاری تے
چالاکی نال لکن آلیاں نوں ڈھوڈھ کے نپ لیندا اے۔ صرف ہکی نوں ای
پھدھنا ہوندا اے۔ جیہڑے پسی ونجے وت اوہ وار دیندا اے۔

ایہہ کھیڈ رات نوں کھیڈی ویندی اے کیونکہ انھیرے وچ لُگن دے
زیادہ موقع ہوندے نیں۔ کھڑاری، پولیاں دیاں کھڈیاں وچ کبھاراں دے

دوکاناں وچ رُکھاں کھولیاں وچ۔ ہر اس جاہ تے پچھے جتھے بندہ نظر نہ آوے۔
اس کھیڈ وچ اوہ کھڈاری سمجھدار سمجھیا ویندا اے۔ جیہڑا اندازے نال جلدی اپنا
شکار پھدھ لے۔

گڈی گڈا

ایہہ چھوہریں دی کھیڈ اے۔ اس کھیڈ نال چھوہریں شادی ویاہ دی
ساریاں رسماں توں واقف ہو ویندیاں نیں۔ حقیقت وچ ایہہ کھیڈ جوانی توں
پہلاں شادی دی ہک مشق اے۔ اس وچ سارے اوہ کم کیتے ویندے جیہڑے
اصلی شادی تے ہوندے نیں۔ ایہہ وڈی مزیدار کھیڈ اے۔ کدی کوئی لوہندیاں
دی چھوہر ہووے تے اس دے ماتے پیو اس شادی عملی شادی دارنگ دین دی
کوشش کردے۔ مثلاً منگیوا، جج، نکاح، رخصتی وغیرہ۔ بچے اس کھیڈ تے وڈے
خوش ہوندے۔

دھی دھی کھیڈنا

ایہہ کھیڈ چھوہراں دی اے تے اس جائی ہوندی جتھے نہر نالا وگدا
ہووے۔ کیوں جے ایہہ پانی دی کھیڈ اے۔ اس دے کھیڈن دا طریقہ وی
شروع توں اخیر تائیں وڈا مزیدار اے سب توں پہلاں سارے کھڈاری پانی
وچ ہک دو بے دا ہتھ نپ کے ہک گول دائرہ بنا لیندے نیں۔ اس توں بعد
سارے دے سارے اپنے اپنے ہک ہتھ دی تلی اُتے دوجا ہتھ رکھدے نیں۔

مثلاً سدرھے ہتھ آ لے بہوں ہوں تاں اوہ سارے پگ گے اسی طرحاں باقی دی کریندیاں کریندیاں اخیر تے ترے باقی رہ ویندے ایہناں وچوں جیہڑا ہکلا رہ ونجے اس نوں دھی بننا پے ویندا اے۔ اس داکم ایہہ اے کہ اوہ باقیاں وچوں کسے نوں ہتھ لالے تے جت ویندا اے۔ پر دو جے کھڈاری، ترکے، ٹہکی لا کے استوں بھج دے نیں جس نوں ہتھ لگ ونجے وت اوہ وار ویندا اے۔ ایہہ کھیڈ کافی دلچسپ ہو ویندے نیں تے ورزش وی کافی ہو ویندی اے۔

باڈی

ایہہ چھوہراں دی کھیڈ اے تے اس وچ وڈی چستی تے چالاکی دی ضرورت ہوندی اے ڈھلا بند اس وچ نہیں چل سکدا۔ ایہہ کھیڈ زمی اُتے مستطیل شکل دی ہک شے بنا دتی ویندی اے تے اس دے وچ ہور ضرورت دے مطابق شکل وچ جویں لکیراں چھکیاں گیاں آہن انجیں ہار بنا کے کھیڈیا ویندا اے۔ جتنے خانے ہوسن اتنے ای کھڈاری اندر تے اتنے ای باہر ہو سگدے نیں۔ مثلاً اس شکل وچ چار + ہک پنچ خانے بنائے جس اُتے اتھے اوہ چھوہر کھیڈ سگدے نیں۔ کھیڈن دا طریقہ ایہہ تے جو پنچ کھڈاری اندر یعنی چار پہلے خانے آ لے سچے کعبے پاسے پھر سگدے نیں تے وچکار لے خانے آلا اپنے اس راہ تے شروع توں لے کے اخیر تائیں ونج سگدا اے۔ باہر آ لے ہر کھڈاری دی کوشش ہوندی اے جے اوہ بغیر ہتھ لگے ہک واری ساریاں خانیاں وچوں پار ونج کے واپس خیریت نال اپنے اڈھے تے ایہناں پنجاں توں پنچ

کے نکل ونجے ہر خانے الا اسدا شکاری ہوندا اے جے کسے ہکی نوں وی ہتھ لگ ونجے تے پوری ٹیم سڑ ویندی اے۔ اس توں کچھ اوہ اندر تے اندر آ لے باہر۔ کھیڈ شروع کرن دا طریقہ ایہہ اے جے دوہاں پاسیاں دے کپتان آمنے سامنے آکے ہتھ تے ہتھ مریندے نیں تے کھیڈ شروع ہو ویندی اے۔ ڈھلا کھڑاری تے ہک خانہ وی نہیں ٹپ سگدا۔ کدائیں نہ کدائیں ہتھ لوانی باہندا اے۔

پڑ کوڈی

پڑ کوڈی ضلع سرگودھا دی ہک مقبول عام کھیڈاں وچوں کھیڈ اے۔ اس کھیڈ دے قانوناں وچ وقت دے نال نال دو جیاں کھیڈاں ہار تبدیلیاں ہوندیاں رہندیاں نیں۔ اسیں اس دے موٹے موٹے کھیڈن دے قانون پٹھاں لکھدے آں:

- (1) مقابلہ ضلع واریا علاقہ واریاں دی بناتے ہوندا اے۔
- (2) ہک جوڑی نوں دوئی جوڑی دے مقابلے واسطے چنندے واری اس دی رفتار جسمانی طاقت تے پچھلے کھیڈن دے ریکارڈ سامنے رکھیندا اے۔
- (3) کھڑاری عام طور تے دو ترے درجیاں وچ چن لیندے نیں۔ مثال دے طور تے پہلے دو جے تے ترتبے درجیاں دے وچ اتنا فرق ہونا چاہیدا اے۔ پہلے درجے دے کھڑار دو جے درجے دے کھڑاراں توں اتنے اگانہہ ہوون کہ دو جے درجے آ لے نوں کدی وی اپنے تے اُتے آ لیاں توں جتن داکوئی امکان

نہ ہووے۔ انجے ہار فرق دو جے تے ترتجے درجے وچ دی ہونا چاہیدا اے۔
 ترتجے درجے دے کھڈاری عام تے معمولی قسم دے ہوں۔ البتہ ایہہ جوڑیاں
 وچ اپنی جماعت نالوں چنگا کھیڈن تاں وت اُتلے درجے وچ کھیڈن دے
 حقدار ہو سگدے نیں۔

(4) ہک پاسے دیاں ساریاں جوڑیاں اپنے درجہ دی مقابلے دیاں جوڑیاں
 نال کھیڈن واسطے نامزد کیتیاں ویں۔ دوہاں نوں وکھرا وکھرا کرن واسطے
 کھڈاریاں دی گنتی لینی چاہیدی اے۔ باہر دے کھڈاری جج صاحبان آ لے
 پاسے تے ایہناں دے مقابلے آ لے اندر دیاں جوڑیاں ایہناں دے کجے
 پاسے ہوویناں چاہیدیاں نیں۔ اس توں کچھ اس گل دا خاص خیال رکھیا ونجے
 جے ایہہ وت ہک دو جے وچ مل کے گڑ بڑ نہ کرن تے کھیڈ وچ کسے قسم دا
 خلل نہ پوے۔

(5) عام طور تے کھیڈ سبھ توں پٹھلی جوڑی توں شروع کیتا ونجے تے اعلیٰ
 جوڑیاں نوں پچھے کھڈایا ونجے۔ تاکہ دیکھن آ لے چنگے کھڈاریاں دے دیکھن
 دے لالچ وچ اخیر تک بیٹھے رہن۔ وقت تھوڑا ہووے تاں معمولی جوڑیاں دی
 کھیڈ ختم وی کیتی جا سگدی اے۔ انج ودھیا کھڈاریاں نوں موقع دے کے
 مقررہ وقت تے کھیڈ ختم کر سکیسی۔

(6) جد جوڑیاں تے انہاں دے مقابلے دے کھڈاری مقرر ہووین تاں ہک
 پاسے دی سبھ توں ودھیا تے دو جے پاسے دی جوڑی قرعہ اندازی کر کے قرعہ
 جتن آلی نوں ایہہ اختیار اے کہ ایہناں دی طرفوں جوڑی بطور باہری دے یا

اندر دی دے کھیڈن۔ اس توں پچھے فہرست دے مطابق باہری بلونے واسطے پڑ وچ نکلسن۔ اگر ممکن ہووے تے فیرستاں انج کر کے بنائیاں وین کہ جوڑیاں توں ”آ گی“ یعنی کہ کھبے پاسے کھلون آلا کھلاڑی تے کچھی کھلاڑی بے پاسے کھلون آلا کھڈار توں پچھ کے آ گی داناں اُتے تے اس دے پٹھاں کچھی داناں لکھیا ونجے۔ تا کہ کچھی کھڈاری آ گوں پہلاں نکلے۔ اس طرح تاں لکھن دا ایہہ فائدہ ہوسی۔ کہ کئی کھڈار جان بچھ کے لمے فاصلے واسطے بچا کے اپنے مقابلے آ لے نوں تھکا دین وچ کامیاب نہ ہو سکے تے ایہناں دا بہترین نمبر لین آلا سگی تھکی ہوئی جوڑی توں نمبر حاصل نہ کر سکے۔

(7) جد ہک باہری اپنی واری ختم کرے تاں دوجی جوڑی باہر بلاؤن کان پڑ وچ نکلسی۔ جد تاں پہلے دوجے تے ترتبے درجے دے کھڈاری اپنی اپنی واریاں ختم کریں تے ایہہ ایہناں واریاں دا پہلا کواٹر اکھو لسی۔ جس وچ ساریاں جوڑیاں دا ہک کچھی اپنی پہلی واری ختم کر لسی۔

دوجا کواٹر اسی جوڑی دے دوجے کھڈاری یعنی آ گی توں شروع ہوسی۔ اس نال اس طرح باہری کھڈاری دا ادھا حصہ کھیڈ دا ختم ہو ویسی۔ کھیڈ دا دوجا حصہ وی اسے ویلے کھیڈیا ویسی۔ جد سارا باہری کھیڈ ختم ہو ویسی تے پاسا بدن واسطے کھڈاری جج صاحبان دے سامنے توں لنگھن۔ اس توں پچھے کھیڈ اونجے ہار شروع ہو ویسی۔ پر اس ویلے باہری اندرے تے اندر لے باہر کھڈاری سمجھے ویسن۔

(8) جے دو دیہاڑے لگاتار کھیڈ کراؤن دا خیال ہووے تاں ہر کھڈار دو واری

بلونے کان پڑ وچ نکلسی۔ پر ہکی دیہاڑے کھیڈ وچ ہر کھڈاری ترے واری بلا سگدا اے۔ شرط ایہہ ہے جے بلونے دی واریاں دی تعداد پہلے توں مقرر نہ کیٹی گئی ہووے۔

(9) بلون آ لے دا فرض اے کہ اوہ اپنے کچھے آون والیاں وچوں ہکی یا دوہاں نوں ہتھ مار کے نکل تے اس نوں اپنے کچھے آون والے کھڈاری دے وچکاروں بھل کے وی نہیں گذرنا چاہی دا۔ جد تائیں کہ اس دوہاں نوں ہک ہک ہتھ نہ مار لیا ہووے۔ جے اوہ ہکی نوں ہتھ مار کے جان بچھ کے تے بلا وجہ ایہناں دے وچکاروں لنگھن تے اس نوں کوئی نمبر نہ دتا ویسی۔ نالے جج صاحبان نوں اختیار ہوسی کہ اس دی واری ختم کر دین یا چاہن تے اسنوں اسے ویلے میدان وچ بلونے کان گھلن تا کہ اوہ اپنی واری نوں پورا کرن۔

(10) پیچھا کرن آلی جوڑی دی کھڈاری ایسی غلط طریقے ورتن جہاں دے نال بلونے آ لے اُتے حملہ کرن تے پھدھن دی بجائے۔ اتنی دور تائیں اس نوں بھجان کہ باہری نوں مجبوراً یا میدان توں باہر نکلنا پوے یا دوہاں دے وچوں گزرنا پوے۔ ایہہ گل ایہناں دے خلاف سمجھی ویسی بلکہ باہری نوں ہک نمبر ملسی۔ اگر باہری بہوں تیز بھجن آلا ہووے جے اوہ پیچھا کرن آ لے دے سامنے توں لنگھ ونجے تے اس نوں دو نمبر ملسن۔

(11) جے باہری کئی واری دوہاں کولوں و ت و ت نکل ونجے یا ایہناں نوں ڈھاہ کے نکل ونجے پر ایہناں دوہاں دے وچوں نہ گزرے تاں اس نوں چار نمبراں دا حقدار سمجھیا ویسی۔

(12) جے باہری ہک نوں مار کے نکل ونجے تاں اس نوں ترے نمبر ملسن۔
 (13) باہری واسطے مگیاں نال مارنا منع اے۔ پر پچھا کرن آلی جوڑی نوں اختیار اے کہ اوہ پچھا کرن دی حالت وچ باہری نوں دھون اُتے مار سکے۔
 (14) ہر اوہ کھڈار جیہڑا جج صاحبان دی ہدایت اُتے عمل نہ کریسی باہر کڈھ دتا ویسی۔

(15) جج صاحبان دا ہر فیصلہ قطعی تے نالے آخری ہوسی۔
 (16) جے اندری کھڈاراں وچوں کوئی زخمی ہو ونجے تے اس دی جاہ تے دوجا کھڈاری کھیڈ سگدا اے۔ جے اوہ باہری کھڈاری دے طور تے زخمی ہووے۔ تاں اس دے سگئی اس دی جاہی بلونے دا حق حاصل ہوسی۔ لیکن دوجا کھڈاری اس وقت تائیں اس دی جاہی نہیں کھیڈ سگدا جد تائیں اوہ اپنی جوڑی وچ وی اپنے کھیڈن دا فرض ادا کرن دا وعدہ نہ کر لے۔

(17) جے کوئی کھڈاری ایہناں قواعداں اُتے عمل نہ کریسی یا کھیڈن واسطے پڑ وچ نہ ملسی تے اس دی جوڑی دے خلاف ہار وین دا فیصلہ کیتا ویسی۔

(18) جے کھیڈ دو دیہاڑیاں واسطے ہووے تے دو جے دیہاڑے وی اوہ ای جوڑیاں آپس وچ کھیڈن۔ پر شرط ایہہ اے کہ ایہناں وچوں کسے جوڑی پہلے دیہاڑے دی کھیڈ وچ ودھ نمبر نہ لے ہوون۔ چنگی گل ایہہ اے جے کھڈاریاں دیاں جوڑیاں نویں سرے توں ترتیب دتیاں وُجھن تے ایہناں دے مقابلے دیاں جوڑیاں اسے درجے دیاں یا اس درجے توں گھٹ کھڈاریاں وچوں جنہاں اپنے توں اُتلے درجے وچ کھیڈن دی مہارت حاصل کر لئی

ہووے مقرر کیتے ویسن۔ ایہہ کوشس وی کرن جے پہلے دیہاڑے دیاں جوڑیاں نال نہ کھیڈن تاکہ ویکھن آلیاں نوں ہک نوی کھیڈ ویکھن دا موقع ملے۔

(19) ڈھٹھے ہوئے کھڈاری نوں گوڑیاں نال منڈنایا مکیاں نال مارنا یا اس نوں دھڑو کنا منع اے۔ اس قسم دی خلاف ورزی کرن والے نوں جج صاحبان تنبیہ کر سگدے نیں۔ جے اوہ وت وی باز نہ آوے تے اس نوں ہاریا ہو یا سمجھیا ویسی۔ جج صاحبان نوں ایہہ اختیار اے جے اوہ مناسب سمجھن تے اوس دا ناں کٹ دین۔

(20) جے کوئی کھیڈن آلا زمی اُتے گر جائے تے یا اس دے جسم دا کوئی حصہ گوڑیاں توں اُتتا نہ زمی نال لگ ونجے تاں پھدھیا ہو یا سمجھیا ویسی۔

(21) دوہاں پاسیاں واسطے ہک ہک امدادی افسر مقرر کیتا ویسی۔ یعنی ہک باہری جوڑی واسطے تے دوجا اندر دی جوڑی واسطے ایہناں دا فرض ہوسی جے اوہ کھڈاریاں دیاں فہرستاں جج صاحبان دی فہرستاں دے مطابق اپنے کول رکھن تاکہ کھڈاریاں نوں ترتیب وار میدان وچ گھل سکن۔ جے کوئی کھڈاری زخمی ہو ونجے یا فہرست وچ کوئی تبدیلی کیتی ونجے تے ایہہ اس دا فرض ہوسی جے اوہ جج صاحبان دیاں فہرستاں دے مطابق اپنے کول رکھن تاکہ کھڈاراں نوں ترتیب دے مطابق پڑ وچ گھل سکن۔ جے کوئی کھڈاری زخمی ہو ونجے یا فہرست وچ کوئی تبدیلی کیتی ونجے تاں اس دا فرض ہوسی جے جج صاحبان نوں دسے جج صاحبان ایہناں دی اطلاع مقابلے دے افسر دی فہرست وچ درج کر

دیسن۔

(22) جے کھیڈ دا مقابلہ ضلع وار ہووے یا ہک وڈے علاقے دے وچکار ہووے تے جتن آ لے دے حق وچ اس دیاں ساریاں جوڑیاں دے نمبر خاص طور تے سرے آلیاں جوڑیاں دے نمبراں دی تعداد تے ہر قسم دیاں خوبیاں اُتے وی نظر رکھی ویسی۔ جے ضلع وار نہ ہووے تاں ایہناں جوڑیاں دی ہار جت تے فیصلہ دتا ویسی جہناں آپس وچ مقابلہ کیتا ہووے۔

(23) کھیڈ دیاں ہر قسم دیاں فحش گلاں کرنیاں منع آہن۔ امدادی افسر دا فرض اے جے اوہ ہر قسم دیاں اطلاع جج صاحبان نوں دیوے تے جج صاحبان دو جیاں افسراں دی فہرست وچ درج کرا دیسن۔

(24) امدادی افسراں دا فرض ہوسی کہ کھیڈ شروع ہوون توں پہلے کھڈاریاں توں ساریاں بے قاعدگیاں خاص طور تے قاعدہ نمبر 10 ایہناں نوں دسن۔

ساڈے بلدیاتی نظام دی تاریخ

ہُن دے زمانے وچ لوکل گورنمنٹ یا مقامی حکومت دا ناں انیویں صدی وچ سامنے آیا۔ پر برصغیر پاک و ہند وچ مقامی حکومت دا تصور تے کنیاں علاقیاں وچ اس قومی حکومت دے ہوون دیاں جڑاں تاریخ دے صفحات وچ کھلریاں پیاں نیں۔ ستارہاں سو سال قبل مسیح وچ سیگا ستھیز اپنی لکھت وچ اس دا ذکر کریندا اے۔ وادی سندھ دی ہزاراں سال پرانی تہذیب وچ وی اس قسم دے اداریاں دا تصور ملدا اے۔ ایہہ ادارے مختلف زمانیاں وچ

کسی نہ کسی شکل وچ موجود رہے۔ وقت دے نال نال اس تصور کئی روپ بدلے تے ہر دور وچ حالات دے تقاضیاں دے نال اس وچ تبدیلیاں ہوندیاں رہیاں انج کر کے مقامی حکومت دا تصور اپنے ارتقائی سفر دی اوچ نیچ توں گزر کے اج توڑیاں اپڑیا اے۔ اج ایہہ ویلے دی ہک وڈی لوڑ بن چکیا اے۔ مقامی حکومت دی ایہہ تعریف کیتی گئی اے کہ مقامی آبادی وچوں چن کے ارکان دے ذریعے اپنے مسئلے حل کرنے دا طریقہ۔ اقوام متحدہ دی روناں لوکل گورنمنٹ ہک اجیہی تنظیم اے۔ جیہڑی مقامی چون دے نال قانون دے مطابق وجود وچ آوندى اے تے اوہ مقامی وسائل نال مسئلیاں نوں حل کریندے اے تے اسنوں مقامی کماں دے حل کرن وچ کافی مہارت ہوندى اے۔ اسے نوں محصول لاؤن دا اختیار وی ہوندا اے۔ ایہہ اپنے مقصد نوں حل کرن واسطے مقامی آبادی دی مدد وی لے سگدی اے۔ اس قسم دی تنظیم نوں مقامی حکومت یا بلدیاتی نظام آکھیا ویندا اے۔ اس نظام دے نال مقامی لوکاں نوں انج کر کے منظم کیتا ویندا اے کہ اوہ اپنے علاقے دا انتظام سنبھال کے اس دے مسئلے حل کر سکن۔ دوجیاں لفظاں وچ ایہہ پٹھلی سطح تے جمہوریت دی تربیت دا موثر ذریعہ اے۔ اس وچ اپنی مدد آپ دا نظریہ پروان چڑھدا اے۔ اس دے فرائض کسی گھر دی دیکھ بھال ہار اس علاقے وچ رہن آلی آبادی دی روزانہ دی ضرورتاں دا خیال رکھنا تے ایہناں نوں اپنے وسائل نال حل کرنا ہوندا اے۔

مقامی حکومت دے اس تصور نے ترقی دیاں منزلاں تیزی نال طے

کیتیاں نہیں۔ کہ آج لہندا ہووے یا اُبھردا دنیا دے ہر ترقی یافتہ ملک وچ جتھے چاہے جمہوری حکومت ہووے یا غیر جمہوری بلدیاتی ادارے وڈی اہمیت رکھدے نیں۔ آج دنیا دے سارے مہذب ملکاں وچ بلدیاتی ادارے اپنے اپنے حالات تے تقاضیاں دے مطابق ایہتھوں دی سماجی معاشرتی تے اقتصادی زندگی وچ اہم کردار انجام دے رہے نیں۔

برصغیر وچ مقامی حکومت دا تصور نواں نہیں۔ پرانے زمانے وچ اس دی ہک شکل پنچائیت ہوندی آہی۔ جیہڑی دیہاتی تہذیب و تمدن دا ہک اہم جزو آہن۔ لوک اپنے مسئلے تے جھگڑے پنچائتاں وچ لے ویندے تے اتھے بزرگ لوک بہہ کے فیصلہ کر دیندے۔ کدائیں کدائیں ٹیکس جمع کر کے ایہہ ادارے حکومت دی مدد کریندے۔ مغلاں دے زمانے وچ ایہہ ادارے رفاہ عامہ دے کماں وچ حصہ لیندے۔ قصبیاں وچ محصول وی ایہہ وصول کریندے تے ایہہ رقماں شہراں دیاں ضرورتاں اُتے خرچ کیتیاں ویندیاں۔ ایسٹ انڈیا کمپنی نے اس قسم دیاں تنظیمیں ختم کر دتیاں۔

لارڈ ڈلہوزی نے 1850ء وچ پہلا آل انڈیا میونسپل ایکٹ منظور کیتا۔ جس دا دائرہ کراچی تک ودھایا گیا۔ ایہہ قانون رضا کارانہ بنیاد تے آہا۔ البتہ اس دے ماتحت محصول دی جاہی راہداری دا محصول وصول کیتا ویندا آہا۔ پر ایہتھوں دیاں لوکاں کوئی خاص دلچسپی نہ لئی۔ 1856 وچ چوکیداری ایکٹ بنایا گیا۔ جس دا اصل مقصد چوکیداری کرنا آہا۔ جتھے جتھے ایہہ قانون آہا اتھے وڈی سی مدد کیتی ویندی۔ ایہہ بلدیاتی ادارے دی ہک بھونڈی کوشش آہی۔ وڈی

سی پنچایت وی قائم کریندا۔ اس دا وی کم عوام توں ٹیکس لینا آہا۔

اس توں کچھ 1858ء وچ ایسٹ انڈیا کمپنی دا خاتمہ ہو گیا تے اتھے برطانیہ دی پکی حکومت قائم ہو گئی۔ اس ویلے حکومت دی مالی حالت خراب آہی تے حکومت ہند دے وزیر خزانہ جیمز ولسن نے 1869ء وچ اپنی بجٹ تقریر وچ ایہہ رائے ظاہر کیتی کہ نکلیاں نکلیاں کماں دی ذمہ داری لوکل گورنمنٹ اُتے پا دتی ونجے۔ تاکہ انج لوکاں نوں سکھایا ونجے کہ اوہ ہر کم کرن واسطے حکومت آ لے پاسے ویکھنا چھوڑ دین تے آپے حل کرن۔

1864ء وچ لارڈ لارنس دی حکومت نے ہک قانون دا ذکر کیتا کہ کئی صوبیاں وچ لوکل سیلف گورنمنٹ دے واسطے کچھ کیتا ونجے تاکہ لوک اپنے مسئلے آپے حل کرن دے قابل ہو سکن۔ اس توں کچھ لارڈ رپن دا زمانہ مقامی حکومت واسطے نمایاں زمانہ اے۔ پہلی واری مقامی حکومت دی ہک منظم طریقے نال بنیاد رکھی گئی۔

18 مئی 1884ء وچ لاہور میونسپلٹی دے ہک اجلاس نوں خطاب کریندیاں ہویاں اعلان کیتا کہ بہترین لوگ اگانہہ آ کے اپنے کم آپ کرن دی سیاسی تربیت حاصل کرن۔ اس واسطے اس کچھ اصول وی بنائے جیہڑے ہن تائیں رہنمائی دا کم دیندے پے نیں۔ 1935ء دے قانون نال مقامی حکومت دا کم صوبائی حکومت نوں سونپ دتا گیا۔ اس پنچائتاں کان قانون وی بنائے جس نال پنجاب دے 37000 پنڈاں وچوں ہک ہزار وچ مسے پنچائتاں قائم کیتیاں۔ ایہناں پنچائتاں تے سرکاری افسر غالب رہے تے ایہہ

کامیاب نہیں ہو سکیاں دوئی جنگ عظیم وچ ایہہ کم مک گیا۔ اوڑک 1947ء
 تائیں ایہہ کوئی ٹھیک طرحاں نال نہ ہو سکيا۔ آزادی دے ویلے پتہ لگا جے کوئی
 وی ادارہ ٹھیک کم نہ کریندا پیا۔ 1885ء تائیں مقامی حکومت دا کم صفر رہیا۔
 آخر 27 اکتوبر 1909ء وچ بنیادی جمہورتاں دا قانون منظور ہويا۔ اس نظام
 دے نال ہک مربوط درجہ وار ڈھانچہ بنایا گیا۔ جیہڑا یونین کونسل توں لیکے
 ڈویژنل کونسل تک آہا۔ اس توں علاوہ شہراں وچ میونسپل کمیٹیاں ٹاؤن کمیٹیاں
 تے یونین کونسلوں بنائیاں گئیاں۔ ایہناں واسطے پہلی واری 1940ء وچ ووٹ
 پئے۔

1971ء دا سال مقامی حکومتاں واسطے وڈا چنگا سال آہا۔ 1965ء
 توں کچھ پندراں سال بعد انتخابات ہوئے۔ مقامی حکومتاں دا تصور ہک واری
 وٹ لوکاں دے ذہناں وچ آیا۔ اس دی بدولت مقامی حکومت دی بنیاد رکھی
 گئی۔ اس سال پہلی واری خواتین نوں وی نمائندگی دتی گئی۔ اس توں کچھ
 بلدیاتی انتخابات 1970ء وچ ہوئے۔ ایہہ ادارے کم رہے۔ ہُن وٹ حکومت
 نیاڈمنسٹریٹر مقرر کر دتے گئے آہن۔

سرگودھے دیاں مشہور کھیڈاں چلی تے کوڈی

چلی ساڈے ضلع دی دل پسند کھیڈ اے۔ اس وچ قدیم زمانے دے
 فوجی طریقے تے شہسواری دے ودھیا نمونے دیکھن نوں ملدے نیں۔ آج
 دے مشینی دور وچ پرانے زمانے دیاں کھیڈاں جوناں تے گھوڑیاں دے

کرتب وکھ کے ہراک دا دل واہ واہ کرن لگ پوندا اے۔ جہاں لوکاں اج تائیں ایہہ روایتی کھیڈاں زندہ رکھیاں ہوئیاں آہن ایہناں نوں وی شاباش آکھن نوں دل کریندا اے۔ نہیں تاں اس زمانے وچ قیمتی گھوڑے پالنا تے آپ وقت کڈھ کے کلہ پٹن دی مشق کرنا صرف قدرتی شوق دی ای گل اے۔ کیتیاں پرانیاں گلاں اسیں چھوڑی ویندے آں۔ اس کھیڈ دے نال سن مسلمان بادشاہاں دا زمانہ یاد آ ویندا اے۔ جہاں دے سوار اتھے آ کے اپنے جنگی فن دا مظاہرہ کریندے تے دشمنان نوں ہریندے رہے۔ اج وی سوار محض کلہ نہیں پٹیندا بلکہ اس دے پچھے دشمن نوں انجے ہار نیزہ مار کے ختم کرن دا جذبہ ہوند اے۔ اس کھیڈ نال لوکاں وچ بہادری دے جوہر ابھر دے نیں تے نالے گھوڑے پالنے دا شوق تے اس نوں فوجی طرح تے تیار کرن دا موقع وی ملدا اے۔

چلی دے قانون

چلی نیزہ بازی جیویں ہر کھیڈ دے قانون تے قائدے ہوندے انجے ہار چلی دے وی قانون تے قائدے نیں۔ جہاں نوں کوئی کھڈاری نظر انداز نہیں کر سگدا۔ کھڈار آپ وی کسے دے آکھے سنے توں وکھرا ایہناں دی پابندی کریندے نیں۔

(1) چلی 9 بجے شروع ہو کے ہک بجے ختم ہوسی۔

(2) جج، منصفی دے فرائض صرف اوہ لوک دیسن جنہاں نوں چیئر مین ضلع کونسل

مقرر کر لیں تے ایہناں نوں قواعد دی نقل دے دتی ویسی۔

(3) چپلی شروع ہوون توں پہلے سوار پڑیاں تے بھاج بھج سگدے نیں۔
چکر لا سگدے نیں۔ پر چپلی شروع ہونے تے کوئی سوار پڑی تے اپنی واری
توں وکھرا نہیں آ سگدا۔ جے کوئی خلاف ورزی کرے تاں اس نوں انتظامیہ
تے جج صاحبان کھیڈن توں روک سگدے نیں۔

(4) ہر سوار نوں نیزہ بازی (چپلی) واسطے تیار کھلونا پوسی۔ اس داناں بولن توں
پچھے اس نوں ستتا بھجنا پوسی جے اوہ دو منٹ دے اندر نہ بھٹاتے اس دی واری
ختم ہو ویسی۔

(5) جیہڑا سوار اپنے نمبر توں وکھرا بھجی اس نوں اپنے نمبر تے نہ بلایا ویسی۔
تے نہ بھجن دتا ویسی۔

(6) سنگل وچ جیہڑا سوار چھ نمبر لیں اوہ فائنل وچ بھجن دا حقدار ہوسی۔

(7) کلے۔ چپلی دے کلے 14 انچ لے ڈھائی انچ چیرے تے ہک انچ موٹے
ہوسن کلے کھجور دی لکڑی دے ہوسن۔ ایہناں دی سریاں تے وچکارست انچ
تے تار لگی ہوئی ہوسی۔ آڑی کلے سوا انچ موٹا ہوسی۔ آڑی ویلے کلے موٹائی
آلے پاسیوں چوٹیاں ویندا اے۔

(8) سانگ نیزہ دی لمبائی، 10 فٹ توں گھٹ نہ ہووے۔ ایہناں دے
سرے کھورے نہ کیئے گئے ہون یا تے دندانے نہ بنے ہوئے ہون۔

(9) سنگل کوالیفائنگ راؤنڈ۔ کوالیفائنگ راؤنڈ صرف دو ہوسن۔ کوالیفائنگ
راؤنڈ سدھے کلے تے ہوسی تے فائنل تے آون والے سوار واسطے جتنے نمبر

ضروری ہوں۔ اس دے واسطے چلی شروع ہوں توں پہلے اعلان کردتا ویسی۔
تے کوالیفائنگ توں کچھے ایہناں سواراں نوں خارج کردتا ویسی جیہڑے پورے
نمبر نہ لے سگسن۔

(10) چلی، سنگل دے فائنل راؤنڈ ہر سوار نوں ترے دوڑاں دوڑنے دی
اجازت ہوسی۔ دو دوڑاں سدھے کھلے تے تربیگی آڑی کھلے تے ہوسی۔ زیادہ
تعداد سواراں دی کر کے ایہہ جج صاحبان نوں اختیار ہوسی جے اوہ ترے
دوڑاں دی بجائے دو کر دیوں کیونکہ وقت دا خیال وی رکھنا ضروری ہوندا اے۔
اس صورت وچ پہلی دوڑ یا بھاج سدھے کھلے تے دوجی بھاج آڑی کھلے تے
ہوسی تے چلی شروع ہوں توں پہلاں اس دا اعلان کردتا ویسی۔ اس توں کچھے
جس کسے سوار دے نمبر سب توں زیادہ ہوئے تاں اوہ پہلے نمبر دا سوار گنیا
ویسی۔ باقی دے برابر نمبر والیاں دا مقابلہ آڑی کھلے تے کرایا ویسی۔ اس
حالت وچ سواراں نوں ضرورت دے مطابق زیادہ بھاجاں بھجن دی اجازت ہو
سی۔ ایہہ اس وقت تائیں بھجے راسن جد تائیں ایہناں دیاں نمبراں دا فرق
پتہ نہ لگ ونجے۔

(11) نیزہ بازی سیکشن کوالیفائنگ راؤنڈ، قائدہ نمبر 4 دے مطابق عمل ہوسی۔

(12) نیزہ بازی سیکشن فائنل راؤنڈ، قائدہ نمبر 5 دے مطابق عمل ہوسی۔

(13) نمبر لونے، کلہ پٹ کے اس نوں اس لکیر توں پار لے وینا پوسی جیہڑی
کلے توں 15 گز دے فاصلے تے چھکی ہوئی ہوسی۔ اس نال سوار چار نمبراں دا
حقدار ہوسی۔ جیہڑا کلہ زمین توں صاف پٹی کے ڈھ پوے اس دے دو نمبر ہو

سن۔ کلے نوں صرف سانگ نال چھونے دا کوئی نمبر نہیں۔ کوالیفائنگ راؤنڈ تے فائنل راؤنڈ دی حالت وچ نمبر لونے تے کوئی فرق نہ ہوسی۔

(14) سانگ ڈھیہہ وینا، جے کسے سوار دی کلہ پٹیندیاں ہو یاں سانگ ڈھیہہ پوے یا کلے نوں لگ کے ٹرٹ ونبے پر کلہ اپنی جاہ توں نہ پٹیوے تاں وی کوئی نمبر نہ ملے صرف ایہہ دوڑ گنی ویسی۔

(15) کلے دی حد پار کر وینا۔ جیہڑا سنگل سوار کلے دی حد نوں پار کر ونبے پر کلے نوں سانگ نہ مار سکے تاں وی دوڑ گنی ویسی۔ جے کسے سیکشن دا ہک سوار کلے دی حد نوں پار کر ونبے تاں اوہ بھاج گنی ویسی پر اس سیکشن نوں اس راؤنڈ واسطے بھجن دا حق نہ ہوسی۔

(16) رفتار، جج صاحبان نوں ایہہ اختیار ہوسی جے کسے گھوڑے دی بھاج نوں اوہ مٹھا سمجھن تے اوہ سوار دے دو نمبر کٹ لین، سیکشن دے ویلے جے جج صاحبان کسے سوار دی ڈرینگ تے لباس نوں غیر مناسب سمجھن تے ایہناں نوں اختیار اے جے اوہ کجھ نمبر کٹ لین پر اوہ چار نمبراں توں ودھ نہ ہوں۔

(17) سیکشن دے کسے سوار دا بیمار ہونا، جے کسے سیکشن دا کوئی سوار بیمار ہو ونبے تے اس دی جائی کوئی سوار بھج سگدا اے جے اوہ کسے ہور سیکشن وچ نہ بھجدا پیا ہووے۔ اتنا ضرور اے جے اوہ بھجن توں پہلاں جج صاحبان توں اجازت لے لے۔

(18) منڈا لنگڑا گھوڑا بھجاؤنا۔ جج صاحبان نوں ایہہ اختیار اے جے اوہ کسے ایسے سوار نوں باہر کڈھ دین جیہڑا منڈا گھوڑا بھجائے یا اس نوں بھجاؤن دی

کوشش کرے۔

(19) دھوکھا کرنا، جے کوئی سنگل سوار کسی دوجے دی جاہی مطلب کسی دوجے سوار دے ناں تے بھج کے دھوکھا کرن دی کوشش کرے تے جج صاحبان نوں اختیار اے کہ اوہ دھوکھا کرن والے سوار نوں فہرست وچوں کڈھ دیں۔
(20) چپلی دا رڑا میدان چپلی واسطے اجیہا رڑا ہونا چاہیدا اے جس نوں چپلی شروع ہوون توں پہلاں کسے سوار نہ ورتیا ہووے۔

کوڈی، کبڈی

چپلی ہار کوڈی وی ساڈے علاقے دی وڈی مشہور کھیڈ اے۔ اس نوں ویکھن واسطے لوک وڈی دوروں دوروں آوندے نیں۔ چنگا کھیڈن والے نوں خوش ہو کے نوٹ دتے ویندے نیں۔ ایہہ اس کھڈکار یا کھڈیار دی حوصلہ افزائی ہوندی۔ دیہاتی اس کم وچ کدی وی کنجوسی توں کم نہیں لیندے۔ اس دے واسطے ایہہ ضروری نہیں کہ کھڈاری واقف ای ہووے۔
کوڈی دیاں ساڈے ضلع سرگودھا وچ ترے قسماں نیں۔ (1) گول دائرے آلی (2) سوچی (3) لمی۔ لمی کوڈی دا اج رواج تقریباً ختم ہو گیا اے۔
ایہہ ہک بندے دے پچھے دو کھڈار بھج دے آہن جے اوہ ایہناں دوہاں نوں ہتھ لا کے مل آونداتے اس نوں جتیا ہو یا سمجھیا ویندا۔ جے ڈھیہہ ونجے تے ہریا ہو یا سمجھیا ویندا۔ اج کل اس دا رواج نہیں اس واسطے دوجیاں دے اصول تے قائدے لکھدے آں۔

دائرے آلی کوڈی

ہر ٹیم یاراں کھڈاریاں دی ہوسی، کھیڈ دیاں ہویاں ریفری دی اجازت نال دو کھڈکار تبدیل کر سگدے نیں۔ کھیڈن دا وقت 40 منٹاں دا ہوسی جس وچ 20,20 منٹاں دے دو ہاف ہوسن جہاں دے وچکار 5 منٹاں دا وقفہ ہوسی۔ گراؤنڈ دا دائرہ 75 فٹ نصف قطر دا ہوسی۔ ایہہ دو برابر حصیاں وچ تقسیم کردتا ویسی تے پالے دا وچکار لا فاصلہ 20 فٹ ہوسی۔ ہر کھڈیار واسطے ضروری اے جے اوہ لنگوٹا یا کاسٹیوم پائے۔ کسے نوں وی اپنے جُٹے اُتے تیل گریس یا پانی لونے دی اجازت نہ ہوسی تے نہ ای اوہ کسے قسم دی جُتی پا سگدا اے۔ اس دے نال ای اوہ کوئی اجیہی شے نہ پٹی جس نال مخالف کھڈار نوں زخم لگنے دا خطرہ ہووے۔

کوڈی دی کھیڈ دا فیصلہ نمبراں تے ہوسی مطلب ایہہ ہویا جے مقرر وقت دے مُکن تے جس ٹیم دا بہو نمبر ہووے اوہ جتی ہوئی سمجھی ویسی۔ جیہڑی ٹیم ٹاس جت لے اس نوں حق اے جے اوہ اپنی مرضی دی سائڈ تے مرضی نال چاہے تے پہلاں کوڈی پائے تے دوجے ہاف دے شروع وچ اوہ ٹیم کوڈی پائے جس پہلے ہاف وچ کوڈی نہ پائی ہووے۔ ہر ٹیم واری واری پائے لیکن ہک کھڈاری دو واریں لگاتار کوڈی نہیں پاسگدا۔ کوڈی پاؤن آ لے کان ایہہ ضرور اے کہ اوہ ویہاں سکینڈاں دے اندر اندر مخالف ٹیم دے کسے کھڈاری نوں سداے اس دے جیہڑا کوڈی واپس گیا ہووے ہتھ لائے۔ جے اوہ مقررہ وقت

تے ہتھ نہ لا سکے تے ریفری اس نوں دوجی واری کوڈی پونے کان آکھسی۔
 جے اوس اس واری وی ہتھ نہ لا سکیا تے نمبر اس دے مخالف نوں دتا ویسی۔
 کوڈی پاؤن والا مخالف ٹیم دے کسے کھڈاری نوں ویہاں سکٹاں دے اندر ہتھ
 لائے تاں اس واسطے ضروری ہوسی جے اوہ پنجھیاں سکٹاں دے اندر اندر
 اپنے پاسے (حد) وچ داخل ہوونجے جے اوہ انج نہ کر سکے تے نمبر اس دے
 خلاف ہوسن۔ جد کھیڈ دے ختم ہوون وچ پنج منٹ باقی ہوون تے کوڈی پون
 آ لے کھڈاری واسطے ضروری اے کہ اوہ پہلے ای حملے وچ مخالف کھڈاری نوں
 ہتھ لائے جے اوہ نہ کر سکے تے پوائنٹ اس دے خلاف دتا ویسی۔ تے ایہی
 طریقہ زیادہ وقت وچ وی اختیار کیتا ویسی۔

کھیڈ دیاں ہویاں جے کوڈی پاؤن والا یا پکڑن والیاں وچوں کوئی
 وی پڑتوں باہر پہلے لگا ونجے تے اس دے خلاف پوائنٹ دے دتا ویسی جے
 دوہیں لگے وہین تاں فیصلہ برابر ہوسی۔



سرگودھا ویج زراعت



سرگودھا وچ زراعت

گھوڑی پال سکیم

مکڑاں دی لڑائی

ڈیری فارم واسطے ڈنگراں دا چناؤ

سرگودھا وچ زراعت

نہراں دے آون توں پہلاں واہی نیجی دا سارا دارو مدار میہنہ اُتے آہ ضلع سرگودھا وچ سب توں پہلاں 1864ء وچ ملک صاحب خان ٹوانہ نے اپنی ذاتی نہر چالو کیتی۔ نہر لوئر جہلم کدائیں 1903ء وچ چالو ہوئی۔ 1910ء وچ نہر شاہپور برانچ نوں چالو کرن دی کوشش کیتی گئی پر ٹوانیاں اس نوں چالو نہ ہون دتا۔ کیونکہ اس طرح ایہناں نوں آب پاشی دے صلے وچ جیہڑا چہارم یا چوتھ جنس دی صورت زمینداراں توں لیندے آہن اوہ ختم ہو ویندا۔ آخر 19 اپریل 1952ء وچ ایہ چالو ہوئی تے سارے پرائیویٹ راجباہ اس وچ ضم ہو گئے۔ پرائیویٹ راجباہ ایہہ آہن۔

- 1- پٹھان والا 2- میکاناں والا
- 3- صاحب خان والا 4- ملک خدا بخش والا
- 5- ملک سلطان محمود والا 6- سکھنی آلی نالی
- 7- چیل والا۔ انہاں وچوں زیادہ تر تحصیل شاہ پور وچ آہن۔

نہراں دے آون نال پیداوار وچ وڈا وادھا ہويا لوک امیر ہو گئے
گورنمنٹ نے انہاں دے واسطے چار کروڑ روپے دا سونا منگوايا تا کہ ایہناں
دیاں عورتاں زیورات بنوا کے خوش ہویں۔

گھوڑی پال سکیم

انگریزاں نے زمیناں آباد کرنے واسطے ہک سکیم بنائی جس نوں گھوڑی
پال سکیم آکھیا ویندا آہ۔ اس سکیم وچ گھوڑی سرکاری ہوندى آہی س دا پالنا زمیندار
دے ذمے آہ اس نوں اس خدمت دے بدلے 50 ایکڑ زمین ملدی آہی۔ جس
دیاں شرطیں اتنیاں سخت آہن جے زمیندار وچارہ گھوڑی دا نوکر ہو کے رہ گیا۔ یا
ریمنٹ ڈپو دے محکمے دے زرخید غلام بن کے رہ گئے۔ ہر وقت اوہ ڈراندا
رہندے کہ گھوڑی دی خدمت درست طریقے نال نہیں ہو رہی۔ تہاڈی شکایت کر
کے ذمی کسی ہور نوں دے دتے ویسی۔ زمینداراں دی اس مشکل نوں فضل حق
پراچے اسمبلی وچ بل دی صورت وچ پیش کیتا تے انج کر کے ایہناں دی خلاصی
ہوگئی۔ نہیں تاں ووٹ وی ایہناں دے اشارے اُتے دینا پوندا آہ۔

دیہاتی وسیب

دیہاتی لوگ زمانہ قدیم توں مال مویشیاں نوں پال کے اپنیاں
ضرورتاں پوریاں کر لیندے آہن۔ سالن پکاؤن دا بالکل رواج نہ۔ مریچ
نوں حالی تائیں لوک جاندے ای نہن۔ لون واسطے کری دے درخت دیاں

جڑاں نال جمیاں ہويا لون وکھرا کر کے استعمال کرن دا رواج آہ۔ گرمی دے موسم وچ پیلاں چُن کے کھا لیندے آہن۔ اس دیاں لکڑاں رات نوں دُده وچ جے کے سویرے جد اوہ پھُل ویندیاں تے وڈے شوق نال کھاندے۔ گوشت دے وڈے وڈے ٹوٹے کر کے بھن کے کھاندے آہن۔ دودھ ای بطور خوراک استعمال کیتا ویندا۔ کنک دی روٹی دا رواج وی کوئی خاص نہ۔

بیماری تے پریشانی دی صورت وچ اپنے قبیلے دے وڈے بزرگاں کول ویندے۔ اوہ بزرگ ایہناں دا اچھا علاج دسدے کہ اوہ بندہ واپسی تے یقین تے قوت ایمانی دی دولت لے کے آوندا۔ بدن دی اکثر بیماریاں دا علاج مکھن دی مالش نال کیتا ویندا۔

لوک بہوں تاں ننگے پیریں ٹرن دے عادی آہن جتھی دا رواج کوئی نہ۔ پیر چل چل کے اتنے سخت ہوویندے جے ایہناں وچ کنڈا وی نہ پڑ سکدا۔ لباس دے بارے لوک زیادہ فکر مند نہن ہوندے گرمیاں سردیاں صرف دھوتی وچ ای گزار دیندے۔ گھر بہوں تاں کانیاں دی کلی دا ہوندا۔ یا لوک ویہوں دے وقت درختاں دے پٹھ گزار دیندے تے رات نوں اُتے چڑھ ویندے کیونکہ وحشی جانوراں دا خطرہ ہوندا۔

جنگل جھاڑیاں نال اتنے پُر ہوندے کہ راستہ ای نہ ملدا۔ کوئی راستہ بھُل ویندا تے جنگل وچوں نکلتا مشکل ہو ویندا۔ لوک اپنی سہولت کان راہ وچ درختاں نال کپڑے دیاں ٹاکیاں بنھ دیندے تاکہ راہ بھُل نہ جان۔

جرم

لوک عام طور تے پر امن رہندے آہن۔ صرف جانوراں دی چوری نوں
بہادری سمجھیا ویندا۔ جیہڑا نہ کریندا اس نوں مسیتڑ آکھیا ویندا۔ جانور چوری ہوویندا تے
کھوجی دی مدد نال ڈھوڈھیا ویندا۔ پولیس وچ رپٹ دارواج نہ۔ جیہڑا بندہ چوری
دے جانور دی اطلاع دیندا اس نوں مرکھت آکھیا ویندا۔ کھوجی اتنے ماہر ہوندے کہ
چور چاہے چال بدلے یا جتنی بدلے اوہ اس دا قند تے وزن دس دیندے۔

ککڑاں دی لڑائی

دیہاتی اپنا وقت مختلف شغلاں نال ٹپندے آہن۔ جہناں وچوں ہک
ککڑاں دی لڑائی وی آہی۔ اس واسطے اصیل نسل دے ککڑ پالے ویندے آہن۔
اوہ زبردست لڑائی کریندے آہن۔ ایہہ وی آکھیا ویندا اے جے شیرشاہ سوری
نے فوجیاں دی تربیت واسطے اس دے رواج نوں ودھایا۔ اس دی ہک وجہ ایہ
وی اے کہ اصیل مرغ وچ ایہہ خصوصیت اے جے اوہ مرونجے اس دی اکھ نکل
کے دور وچ پوے پر اوہ میدان وچ جم کے لڑدا رہندا اے۔ لوک ایہناں مرغیاں
اُتے پیسے وی لاندے آہن۔ جیہڑے ہک جوئے دی شکل اے۔ مرغ توں وکھرا
مرغیاں تے ایہناں دے چوچے وی لڑلڑ کے ادھ موئے ہوویندے آہن۔

ڈیری فارمنگ

دودھ دی کمی نوں پورا کرن واسطے ڈیری فارمنگ ہک نواں پیشہ بن گیا

اے۔ اس کم واسطے سرکار دی حوصلہ افزائی کریندی اے۔ قرضے دیندی اے۔ سب توں وڈی ڈیر فارمنگ نوناں نے بھلوال وچ شروع کیتی اے۔ جیہڑی نور پور دے ناں تے مشہور اے۔ ایہہ مختلف دیہاتاں وچوں دُدھ مل لینے کان ڈپو بنا کے لیندے آہن تے وت کارخانے وچ۔ مکھن تے سکا دُدھ بنا کے وچنیدے آہن۔ میں ازبکستان ایئر ویز وچ سفر کریندیاں ہوياں ویکھیا جے اوہ وی نور پور ڈیری فارم دا مکھن ورتدے نیں۔ شاہپور ڈیری فارم جیہڑا دُدھ تے دہی سپلائی کریندا اے تے اس دیاں شاخاں خوشاب جوہر آباد وچ وی موجود آہن۔

ڈنگراں دا چناؤ۔ ڈیری فارم واسطے چنگے دودھ دین آلیاں مجھیں تے گائیں دیاں کئی نسلاں آہن جہناں وچوں نیلی بار دیاں مجھیں تے ولایتی گائیں کافی دُدھ دیندیاں آہن۔ بہوں دُدھ دین آلیاں گاواں تے مجھاں دی اگانہہ نسل ودھاوون دی کوشش کیتی ویندی اے۔ سرکار نے مشوریاں کان سرکاری ملازم رکھے ہوئے آہن جیہڑے نسل دے چناؤ توں وکھرا ایہناں دے ونڈے تے پٹھے دا وی مشورہ دیندے آہن کہ اس طرح وی دُدھ دا وادھا ہو سکدا اے۔

مگس بانی

تجارتی پیمانے تے شہد وچکن کان شہد دیاں کھیاں پالن نوں مگس بانی آکھیا ویندا اے۔





لوک فنکار

استاد علی بخش

استاد ہوراں دا پنڈ گاگا بھیرے دے نیڑے آہا۔ ایہ کلاسیکی موسیقی دا منیا ہویا استاد آہ۔ اپنی قسمت ازماؤ نواسطے بمبئی گیا۔ اتھے اس نوں وڈی شہرت ملی۔ اسے دی وجہ کر کے کامنی ناں دی ہک فلم ایکٹریس نے اس نال شادی کر لئی۔ اس وچوں اس دیاں ترے دھیاں جمیاں جہناں دے ناں مہ جمیں عرف مینا کماری حسین بی بی عرف مڈھو تے خورشید آہن۔ ایہناں فلمی دنیا وچ وڈی شہرت کمائی۔ تنّاں بھیناں بطور ہیروئن کم کیتا پر جیہڑی شہرت مینا کماری نوں ملی ہووے کسے دے حصے وچ نہ آئی اس مشہور شاعر کمال امروہی نال شادی کیتی۔ مینا آپ وی شاعرہ آہی تے ناز تخلص ورتدی آہی۔ مینا کماری طبیعت دی سادہ آہی تے کمال امروہی پیسے دا پتر ثابت ہويا۔ فلماں توں میناں نوں جیہڑا پیسہ ملدا اوہ سارے دا سارا آپ ای رکھ لیندا۔ مینا کماری جال وچ پھس گئی۔ آخر کار نہ بھسکی تے اوہ وکھری ہو گئی پر ذہنی تے جسمانی طور تے تباہ ہو کے اللہ

نوں پیاری ہو گئی۔

نیلو

فلمی دنیا دی مشہور رقاصہ تے اداکارہ 1940ء وچ بھیرے جی۔
اس دے پیو دا ناں الیگزینڈر آہ تے اس دے بھائی دا ناں انور الیگزینڈر آہ۔
اس ویلے اس خاندان دا تعلق عیسائی مذہب نال آہ۔ نیلو دا اصل ناں نسیم
الیگزینڈر رکھیا گیا۔ جد اس دی دوجی بھین جی تے ایہ بھیرے نوں چھوڑ کے
لاہور ٹر گئے۔

لاہور وچ نسیم نوں فلم وچ کم کرن دا موقع مل گیا۔ اس دی پہلی فلم
”انجام“ آہی۔ اس دا فلمی ناں نیلو رکھیا گیا۔ ماسٹر عاشق حسین ہوراں کولوں
رقص دی تربیت لئی۔ اس دی ”ناگن“ فلم اتنی کامیاب ہوئی جے اس دے اتے
ہیروئن دی مہر لگ گئی۔ کجھ چر بعد اس مشہور فلمی اداکار ریاض شاہد نال شادی کر
لئی۔ اس شادی توں پہلاں اسلام قبول کر لیا تے عابدہ ریاض بن گئی۔ اج کل
فلمی دنیا دا ہیرو شان اسے دا پتر اے۔

بلراج سہنی

اس دا وی تعلق بھیرہ نال آہ۔ ایہہ بمبئی دی فلم انڈسٹری دا کامیاب
ڈائریکٹر ہویا اے۔ فلمی دنیا دا کامیاب مزاحیہ اداکار قاضی بدر الدین فلمی نام
جان واکر اسے بلراج سہنی دی دریافت اے۔ قاضی صاحب بس دا کنڈکٹر

آہ۔ ہک واری انج ہو یا جے بلراج بس وچ سفر کر رہیا آہ تے اس ڈٹھا کہ کنڈکٹر دو جیاں کنڈکٹر اس دی عادت توں ہٹ کے ہر سواری نال ہس ہس کے ٹکٹ دین دے نال نال لطیفے تے فقرہ بازی وی کردا جا رہیا اے۔ اس نوں اس وچ گوہر نایاب نظر آیا تے اس نوں فلم وچ کم کرن دی دعوت دتی جیہڑی اس قبول کر لئی تے اس اتھے اتنی محنت کیتی جے بلراج دے اندازے توں ودھ شہرت پائی۔ جانی وا کر 2003 نوں فوت ہوئے۔ بلراج دیاں مشہور فلماں مغل اعظم، ٹیکسی ڈرائیور، چودھویں کا چاند، بہو، بیگم، آدمی اور انسان آہن۔

اس توں علاوہ زاہدہ پروین تے شاہدہ پروین دو بھیناں فلماں وچ کم کر رہیاں نیں۔ ہما اکبر دا وی تعلق سرگودھے نال اے۔ ایہہ جھوریاں دے نیڑے کد تھی دی رہن آلی اے۔

فاطمہ

مشہور لوک سنگر اے۔ اس دیاں کئی کیٹاں مارکیٹ وچ آ گئیاں آہن لوک ورثے آ لے اس نوں وڈا پسند کریندے آہن۔ اس دا تعلق وی بھیرے نال اے۔

وصی شاہ

وصی شاہ سرگودھا دا مان اے۔ اردو زبان دا ہک اُچا تے سُچا شاعر اے۔ اس دی ہک کتاب جس دا ناں ”آنکھیں بھیگ جاتی ہیں۔“ 15

دیہاڑیاں وچ دوجی واری چھاپے چڑھی۔ اس توں اس دی پسندیدگی دا پتہ لگدا اے۔ اس توں وی بہوں اس دے ٹی وی ڈرامے اس دی شہرت داوڈا سبب آہن۔ ایہناں ساریاں کامیابیاں دا سبب اوہ ماں دی دعا دا اثر سمجھدا اے۔ اس دے دو کامیاب ڈرامے دھواں اور انگار وادی آہن۔ ستاراں قسطنطنیہ اس دے ہک ڈرامے ”نمک“ تے چلیاں آہن۔ اس توں وکھ ”سمندر چاہتوں کا“ دھڑکن اور کروٹ نامی ڈرامے وی لکھ چکے نیں۔ دعا تے وڈا یقین رکھدے آہن ادارے دانان وی دعا رکھیا اے۔

عابد گوندل

طارق بھلوالی۔ وارث لدھیانوی اپنے زمانے دے منے پرونے نغمہ نگار آہن۔ اس توں علاوہ سعید دوشی وی نغمہ نگاری کر رہیا اے۔ ناصر ادیب فلم سٹوری رائٹر اے۔ اس ”مولا جٹ“ تے ”وحشی“ لکھیاں آہن۔ فضل الہی، مشرف حسین، محمد حسین کلاسیکی موسیقی دے منے ہوئے استاد آہن۔ فیض ملک ہدایت کاری کر رہے آہن۔ ریاض ملک ڈرامہ نویس اے۔ اعجاز لوہار، اللہ دتہ پنچھی، بشیر مخلص، طالب صرف اپنی اپنی گلوکاری دا لوہا منوا رہے آہن۔ نظام الدین تے فخر الدین ستار نواز آہن تے فخر الدین واکن نواز آہن۔

ظہیر الدین ظہیر

تے خورشید عالم فن خطاطی وچ مشہور آہن۔ کوثر علی جھاوریاں دے

ہک وڈے گلوکار خاندان نال تعلق رکھدا اے۔ ملک توں باہروی اپنے ملک دا
ناں روشن کر رہیا اے۔ فضل الہی مرحوم وی اسے خاندان دا زبردست گلوکار
آہ۔ پنجابی شاعر تے منیا ہویا کلاسیکی سنگر آہ۔

میاں سلطان شطرنج دا ورلڈ چیمپین آہ اس دا تعلق کھوڑہ نال آہ و ت
سرگودھے وچ زمین ملن تے ادے ای آ گیا۔ مس فاطمہ وی شطرنج دی عورتاں
دی ورلڈ چیمپین آہی۔ اس دا تعلق کالرے نال آہ۔

ریکارڈ لما قد

بھائی خان ولد جوایا بکھر جیہڑا بکھر بار دا رہن آلا اہ اس دا قد ست
فٹ توں اچا آہ اس قد بُت دا بندہ اے تائیں سرگودھے وچ نہیں جمیا۔

مشہور کھڈکار

دوڑ وچ ریکارڈ 440 گز دی دوڑ وچ ریکارڈ قائم کرن آلا چک
شہزاد دا شہزادہ قاسم آہ جیہڑا پورے برصغیر وچ اول رہیا۔ چک شہزادہ شہزادیاں
آلا چھاؤنی شاہ پور دے نیڑے اے۔ گولہ سٹن دا ایشیائی ریکارڈ ظہور خان جیہڑا
اس ویلے گورنمنٹ کالج سرگودھا دا بہترین اٹھلیٹ آہ۔ اس 52 فٹ 6.5 انچ
گولہ سٹ کے ایشیا دا ریکارڈ قائم کیتا۔ اس نوں مہاراجہ پٹیالہ لے گیا۔
میراتھن ریس وچ عابد خان تے بندرا سنگھ 26 میل لمی دوڑ وچ اول
تے دوم آئے اس ویلے ایہہ گورنمنٹ کالج شاہ پور دے طالب علم آہن۔

کرکٹ

کرکٹ وچ تقسیم توں پہلے غیر مسلماناں نے وڈا ناں کمایا جس دی تفصیل کجھ انج اے۔

بھیرے دے گورنمنٹ ہائی سکول دے سائنس ماسٹر لالہ دیوی داس دا پتر امر ناتھ تقسیم ملک توں کچھ ہندوستانی ٹیم دا کپتان بنیائے اس دے دو پتر مہندر امر ناتھ تے سرندر امر ناتھ بھارتی ٹیم دے ٹیسٹ کرکٹر آہن۔
بشن سنگھ بیدی وی جیہڑا بھارتی ٹیم دا کپتان بنیا ایس دا تعلق وی بھیرے نال اے اس دا والد کشن سنگھ بیدی شاہ پور ہسپتال وچ سول سرجن آہ۔ قادر یار ٹوانہ پولو دا بہترین کھلاڑی آہ۔

موت دا کنواں

اس وچ شہرت پاؤن آلا راجہ محمد اشرف جھاوڑیاں دا رہن آلا اے۔
ایہ دنیا دا پہلا بندہ اے۔ جس موت دے گولے تے کھوہ وچ کار چلائی۔

وڈی لمی عمر


خان احمد رانجھا پیدائش 1855 وفات 1980۔ فلک شیر اعوان جمن 1876 تے مرن 1990 اس توں علاوہ میانی دا رہن آلا احمد وی دسیا ویندا اے کہ ایہہ 1852 وچ جمیا تے حالی تائیں ٹھیک ٹھاک واہی نیجی دا کم کار کر رہیا اے۔

دوست محمد ایماندار تے مثالی تاجر

دوست محمد بھیرہ دے قریب ہک دیہات دے رہنے آلے ہن۔
انہاں دی دیانتداری دوجے ہیرا پھیری آلے تاجراں واسطے اپنی مثال آپ
اے۔ انہاں اپنا بنک کھاتہ دی کرنٹ رکھیا ہویا اے۔ انہاں لاہور آکے قسمت
ازمائی کیتی پہلاں ہک دوکان تے بطور ملازم کم کیتا بعد وچ اپنا کاروبار شروع
کیتا اس ویلے اوہ لاہور تے اسلام آباد وچ بہوں وڈے تاجر دے طور تے
مشہور اہن۔ ہن دوکاناں وی ذاتی نیں تے ہمیشہ مال نقد ادائیگی تے
متگویندے اہن۔ کدی وی کسے نال غلط مثال نہیں قائم کیتی۔ اس دا ایہہ اللہ
تعالیٰ نے صلہ دتا کہ ہن کروڑاں دا کاروبار اے تے بقول انہاندے آج کل
50 لاکھ ہر سال زکوٰۃ اللہ دی راہ وچ ونڈیندے اہن۔ کدی وی کوئی الجھن
ہووے تاں اللہ تعالیٰ غیبوں مدد کریندا اے۔



ضلع سرگودھا وچ پنجابی ادب



ضلع سرگودھا وچ پنجابی ادب

شاہپوری لہجہ

پنجابی ادب وچ شاہ پوری لہجہ ہک منیا ہویا لہجہ اے پر افسوس دی گل اے کہ اتھے وڈے وڈے لکھاری ہون دے باوجود ہُن انہاں د اکوئی پتہ نہیں۔ جتھوں تائیں شاعری دا تعلق اے اسی پیلو تے حافظ برخوردار را بھانوں پیش کر سگدے آں۔ جنہاں نے پنجابی ادب دی نینہہ رکھی تے ایہناں تے پچھے آون آلیاں نے ایہناں دی پیروی وچ اسے شاہپوری لہجے نوں اپنایا۔ ایہہ گل وی شاید بہوں گھٹ لوکاں نوں پتہ ہوسی جے حافظ برخوردار ہک اچیا بندہ اے۔ جس نے پنجابی زبان نوں پنجابی داناں دتا۔

اس ادب دی بد قسمتی ایہہ ہوئی جے ساڈی ساری آبادی دریاواں دے کنارے ہوون دی وجہ کر کے کانگاں نال جتھے مال ڈنگر لڑ ویندے آہن اتھے ادب تے لکھی ہوئی کائی شے کتھے بچدی ہوئی۔ اسے واسطے اس زمانے وچ یاد کرنے دا رواج آہ۔ اس کر کے جس نے وی کجھ اکٹھا کرنے

آلے پاسے دھیان دتا اس لوکاں توں سُن سُن کے اکٹھا کیتا۔
 افسوس اس گل دا اے کہ جدید دور وچ جد کہ ہر قسم دیاں سہولتاں دے
 باوجود اساں اس پاسے دھیان نہیں دتاتے اس دا ایہ نتیجہ ہویا کہ بہوں سارا ادب
 ضائع ہو گیا۔ میں وی اس سلسلے وچ کجھ کم کرن دا اتفاق ہویا تے معلوم ہویا کہ
 ساڈے علاقے دے مرثی وڈے کم دے بندے آہن۔ ساڈی بے فکری پاروں
 اوہ اس دنیا توں لد گئے تے باقیان نے دو جے کم سمھال لئے۔ میں کجھ تقریباً
 30 اچے شاعراں دا کلام پرانے گون والیاں کولوں توں لدھا اے جنہاں نوں
 ہُن ضعیفی کر کے بہو سارا وسر گیا اے۔ وت وی جو کجھ ملیا اے اوہ لاہے دا اے۔
 کجھ کلام ہک کاپی وچوں لدھا اے۔ ایہہ وی وڈی عجب گل اے کہ سارا کلام
 تقریباً ان پڑھ لوکاں توں لدھا اے۔ اوہ وی عمر دے اس حصے وچ اپڑ گئے آہن
 کہ ذہن اُتے زور پاؤن دے باوجود دو شعر لکھا کے تریجا بھُل ویندے۔ اس
 طرح جیہڑا کلام وی شاعراں دا ملیا اے اس توں پتہ لگدا اے کہ اوہ اپنے زمانے
 دے وڈے اُچے شاعر ہوئے آہن۔ انہاں وچوں اکثر نے لیلیٰ مجنوں، ہیر
 رانجھا، سسی پنوں دے قصیاں تے طبع آزمائی کیتی اے اوہ کون آہن کدوں
 ہوئے کوئی پتہ نہیں۔ پر ساڈا ایہہ حق بند اے کہ بقول حافظ برخوردار رانجھا:

اتے مویاں گیاں دے سخن نوں عاقل دیندے داد
 پر موئے گئے ہن حافظا نہ کسی نوں یاد
 اخیر تے میں پلینی دی یگر دے اس قول نوں نقل کرنا وی ضروری
 سمجھدا واں۔ جیہڑا انہاں نے اچے لوکاں دے بارے وچ لکھیا اے۔ اوہ

لکھدے نیں کہ:-

”میں ایہناں لوکاں نوں جیہڑے یاد رکھن دے قابل آہن ایہناں
نوں گمنامی وچوں کڈھنا وی کار خیر سمجھدا آں۔“

اسے واسطے میں وی ایہیے لوکاں دا ذکر خیر کر کے اس کار خیر وچ حصہ
لے رہیا آں۔ کجھ نہ معلوم شاعر:-

صابر، سائیں، پرویز، مختار، ظہور، حبیب، ملنگ، حفیظ، جلال، عصمت،
حسرت، طاہر، فضل، عاجز، آزاد علی، طالب، حسنین، عامر، دتہ محمد شاہ، یاسین،
حیات، سارنگ، ریاض، سائیں اختر، رگیلا، رحمت، ناصر، بشارت، تنویر، طارق، خان
فاروق، حسنین، الہی بخش، راجن شاہ، اللہ بخش، عظمت، گودڑی، خادم علی شاہ۔

صابر

ایہہ دکھ کہانی بہوں لمی سبناں کھول کھول بیان سناوے
بہو عرصے توں ودا کوش وچ میں کجھ وی سمجھ نہ آوے
جیہڑے پلدے آہن نازاں دے اندر انہاں نوں گھڑیاں وچ لکاوے
صآبر قدر دکھاں دا دکھی جانن جہاں پل بھر چین نہ آوے

سائیں

وطنوں بے وطن چا کیتا ای ایہہ تاں سبناں تیرے بھلے
آپ تاں وسنا ایں نال خوشی دے ساڈے بخت غماں وچ رلے

تخت تے بخت سلامت رہن شالا حکم حکومت چلے
سائیں دور دے ڈھول سوہاندے نیں کیہ جان لوکی جھلے

غلام حسین

عزرائیل نوں آکھے سسی کیویں یسیں تیں میری جان اے
جس روح نوں توں قبض کرنا اوتاں لے گیا کچھ دا خان اے
مویاں نوں وت مارن آیا اہ لکھیا کتھے فرمان اے
دیکھ کے حوصلہ عاشقاں دا ملک الموت ہويا حیران اے

پرویز

ہوندا ہر کوئی اے وسدیاں دا ہووے بخت تے سجن ہزاراں
جد بخت دا سایہ اٹھ ونجے ترٹ ویندے مان پیاراں
گل ہار دی زینت پھل جیہڑے اوہ بن ویندے تلواراں
پرویز نصیب دے اجرے کنیں ڈٹھے رلدے شاہ بازاراں

منیر

جداں بخت انسان دا ساتھ چھوڑیندن ربو یار وی مونہہ پرتا ویندے
جیہڑے دکھ غربت دا ورم بنیندے تن من انسان دا کھا ویندے
جداں وقت زوال دا ویہڑ ونجے چت سجن پیارے چا ویندے
چونیں پوندے نے بھار منیر سرے تے جیہڑے وچ مقصوم دے آ ویندے

مختار

توں سلطان حسن دی نگری دا کیوں ہونا یار ناراض اے
جیویں توں اکھیں میں من وینداں چن کیتا کدیں اعتراض اے
دیہوں نیویں ویکھ کے چھوڑ وینا انج کریندے نہیں ہم راز اے
مختار دا چن نہ رُسیا کہ شالا ہووی عمر دراز اے

ظہور

دل کدی کدی آدھا اے تنگیساں توں کیہ کرنا ای کملیا جی کے
تیری لکھاں دی عزت برباد ہو گئی بے درد توں نت جھڑکی کے
جیندے دم پچھے عمر ظہور ونجائی اوہ سٹ گئے نی گھبری کے
خود کشی دی موت حرام نہ ہوندی مر ونجاں آ موہرا پی کے

حبیب

قسم خدا دی دل انج آدھا اے نہ سنگت ماہی دی چھٹے
دل دیاں دل وچ نہ رہ نہ ونجن متاں مر ونجائیں رُٹھے
لوک مریندا میں نال طغیاں دے نالے ہجر تساڈے کھٹے
ایہو دعا حبیب دی اے شالا یار کسے دا نہ رُسے

ملنگ

عزرائیل نوں آکھے سسی سُن درد وندادے حالے
میں ستیاں یار کھڑائی ودی آں ٹھگی کر گئے شُتراں والے
کدیں میں مسکین تے بھلا کریندے لئی ویندے کچھ اچ نالے
آکھ ملنگ سسی بسمل ہو کے ودی کھوج اٹھاندے بھالے

حفیظ

وقت ہمیش دا ساتھی ہووی شالا بخت نہ کھانی ڈولے
کوئی کسے دا متر نہیں بندا سنگی تک کھلوندے اوہلے
کمال زوال تے عرشوں اوند کوئی نہ سمجھے دل دے بھول اے
حفیظ فتح اس دی ہو سی جیہڑا رہندا ہمیشہ کول اے

انہاں درد کشالیاں مار مکایا نہیں رہی چن دی
سکتاں تریاں تے ساجھاں مکیاں گئی بجھ تاہنگ ملن دی
ویریاں ویر مکایا لا کے بازی تن من دھن دی
سر نذرانہ کر حفیظ پیش کیتا خاطر اس سجن دی

جلال

ت تاج سوہاگ آ عشق پایا چاہڑی عشق دی عشق برات آہی
گانا عشق دا عشق دے ہتھ بدھا ملی عشق نوں عشق سوغات آہی
عشق عشق نہیں عشق دا لکھنا تے جدوں کاغذ نہ قلم دوات آہی
بناں عشق جلال کجھ ہور نہا نہ دیہو آہا نہ رات آہی

عصمت

ہری شاخ شہتوت دی لگرسی پئی وصل دی آس تے جھلدی
راتیں رات دی رانی نوں ماند کردی ذرا مونہہ دی کلی جد کھلدی
حُسن پری تے کوئی حور نہیں مثل اس کالے تیل دی
عصمت پھلاں دی سیج تے سون آلی بار دے تھلیں پئی رُلدی

حسرت

انج شادی ہوئی اے سسی دی ناہے کول کوئی ہم جولی
اس نوں آن کے کنڈیاں مہندی لائی میڈھی واولوہنیاں کھولی
پئی بجلی وانگ مثالاں بن بن چمکے بنے بدل شادی دے ڈھولی
بدھا گانا آن قضا نے حسرت بھری عزرائیل گھڑولی

طاہر

قلزم نیل دے ہڑ اُتے جد آیا بیڑا جاں دُکھیاں دا
آپے دھاپے کھاندی رہی ملکہ لگے تھپڑ جد سخت ہوا دا
اوہ لڑ پئی بھرے طوفاناں وچ کر کچج دا خاص ارادہ
سسی جمدیاں لادی دکھیاں طاہر ڈٹھا بخت نہ پیو تے مادا

فضل

نہ میں سوئی نہ گن پلے فی میں کس دا مان کر سیاں
چارے چوکاں میریاں چکڑ بھریاں میں کیہڑی مل مل دھوساں
صابن تھوڑا تے میل امیک اے میں بہہ کدھیاں تے روساں
چا فضل تے فضل کریسی آپے وت کیوں شرمندی ہوساں

عاجز

تیں دلبر دی خاطر ماہی آساں کیتے ویس ملنگ دے
ہوش حواس اڈے سبھ سارے جداں لد گئے سنگتی سنگ دے
دشمن خویش قبیلہ بیٹھا جوڑ ارادے جنگ دے
عاجز مولا بھلا کرسیں گل صدمے پے رنگ رنگ دے

آزاد علی

پہا ہی عشق محبت اندر اقراری ہو یوسے آپے
نال بے درداں نہیوں لگایا کرنے پئے سیاپے
واہ پیاں یا سنگ ٹریاں کھوٹا کھرا سہاپے
آزاد علی وس ٹھگاں پیوسے ساڈی توڑ چڑھی تاں جاپے

طالب

آدم جام دیجائی سسی آہی نازک طبع شہزادی
تھل مارو وچ ریت گرم دے پئی رل دی پیر پیادی
ہوت پُئل چا بھل کیتی ناہی تھل دے رلن دے وادی
طالب سسی درداں ماری آہی تسی دید نگاہ دی

حسین

ت ترس نہیں تیرے دل اندر مینوں مار کے کیوں وسار گئیوں
چپ چاپ اٹھ روواں ہو یوں کوئی دس نہیں خبر سار گئیوں
سی وانگ روواں پھردی پنوں وانگ کدے لد بھار گئیوں
دساں نت حسین درد کس نوں جیہڑے تیر جدائیاں دے مار گئیوں

عامر

لچال جہاں وچ گھٹ لبھدے آہن، سانگے اکثر غرضاں تائیں آہن
اُچ جھک دازری ہک فرق لگے، کمزور ہو ویندیاں باہیں آہن
جتھے دولت ہووے اج کل دے گدے وگ ویندے یار ادائیں آہن
عامر اندر بل بل کے بجھ ویندیاں اندر دیاں بھائیں آہن

دتہ

مجنوں لوک سدیندے مینوں میرے ہتھ عشق دی ترکڑی
عشق پیالہ میں بھی پیتا میں سُنک کے ہو گیا لکڑی
جس دن دا میں عاشق ہويا مل کے بیٹھاں چھپڑی
لیلیٰ چھوڑ گئی سُن اتھے نہیں کدائیوں اپڑی

محمد شاہ

الف آکھیا رانجھے ہیر تائیں سام لے مجھیں رہو آباد ہیرے
تیرے باپ نے صاف جواب دتا قول اپنا رکھ لے یاد ہیرے
بارہ ورھیں دتی تیری نوکری میں گئیاں مختناں کل برباد ہیرے
محمد شاہ ہزار یوں رُ آیا لیکے ناں تیرا رہو شاد ہیرے

بلیں

اج مک گئے جھڑے نت دے جی آیا عزرائیلا
میری درد بھری زندگانی توں بہوں تنگ آ خویش قبیلا
چھٹی جند سبناں دیاں مہنیاں توں آ بنیا یار ویلا
اج غیر دی تچ بلیں گئی نا کام گیا ہر میلا

نا معلوم

اس حال دا حال سناون کیہوں کیہڑا حال اس حال دے حل دا
ول ول تاہنگاں نہ اوہ ولے کیہڑا ول اس ول دے ول دا
گل گل دے اندر گل گل ونجے کیہڑا حل اس گل دی گل دا
بادشاہ جھل صدے جھلدے کیوں میں جھل جھلاں اس جھل دا

حیات

تھکے پے آں گھائے جھل جھل کے کر لگدے کوڑ دی حد گئے
ایہہ لوک ضعیف عقیدیاں دے اُکا مار وفا دی حد گئے
جد دیہوں چڑھدا اے رنگ ہو ویندے پہلے فیصلے پیار دے رد گئے
سجن حیات تے چنگیاں رتیں اوہ دور جہان توں لد گئے

سارنگ

چھوڑ محل وڑی وچ تھل سسی پل پل کردی سوچاں، مگر بلوچاں
شُتر مہاری جے لہجہ جاوے کھل نال لہو دے نوچاں، کرے تروچاں
جس ڈاچی میرا خان کھڑایا دسدا آوے پیر کھڑوچاں، نکلس موچاں
خان عدالت کرسی سارنگ پیا لیلی جُرم بلوچاں، کر کر سوچاں

ریاض

مینوں عام مریض نہ سمجھ طیبیا ایویں شربت عرق پلا نہیں
اوہ بدبخت مریض ہاں میں جس دی طب وچ مول دوا نہیں
ہُن ایہ گھبراہٹ جھنکاں دی میری قسمت وچ شفا نہیں
ہک صورت ریاض اے بچ سگدا پر سبناں دی منشا نہیں

سائیں اختر

مجرم قانون محب دا ہوندا مشکل نال رہا اے
ہے فیصلہ پیار دے قیدی نوں مل ویندی عمر سزا اے
وت طالب کان حسن دے شاہ دا ہوندا ہر فرمان بجا اے
سائیں اختر فنی پوندی اے محبوب دی ہر منشا اے

اختر

آج میں مسکین دے مسکن تے آئے بدل فراق دے گج کے
پا دلبر باہیں غیر دے گل وچ میرے راہ توں لنگھیا سچ کے
حیدیاں تکیاں باجھ نہ جھٹ پوندا لنگھے میں کولوں مونہہ کج کے
کیتا خون اختر دیاں خوشیاں دا آہ ڈھول بے قدرا رج کے

نا معلوم

شالا وقت زوال دا پیش نہ آوے چھڈ ویندے ما پیو جائے
یار پیارے کرن کنارے جویں لگدے لوگ پرانے
دشمن بھی ہو غالب ویندے جیہڑے ڈر کے لنگھدے آہے
وخت پیاں دا بیلی کوئی نہیں اساں سارے وقت لنگھائے

ریاض

ہر کوئی ہوندا وسدیاں دا کھڑی زندگی اجڑ گئیاں دی
مقصوم جہناں دے نیک ہوندے ہوندى قسمت وی طرف انہاں دی
کدی ریاض امن دا عادى آہ ہی جند واقف ظلماں دی
اج درداں انج مجبور کیتا رکھ سونا کفن سرہاندی

ناصر

مینوں بعد مدت دے نظری آیاں توڑے ہن تاں مکھ پرتا نہیں
اگے لگدے لڑدے رہندے آہن توں اصلوں ساجھ مُکا نہیں
تیرے باجھ گذارا نہیں ہونا میرے صبر نوں توں آزما نہیں
ایہہ حیاتی چار دیہاڑے ماہی توں ناصرناں ونجا نہیں

بشارت

آہی ملکہ حسن دی اوہ شہزادی رہی ریت گرم تے رُلدی
اس نوں عشق بلوچ بے ہوش چا کیتا گئی واٹ پنل دی ملدی
اتے مارو تھل دے ٹیاں وچ گئی رُل اوہ پھل کنول دی
بشارت ہوت قدر شناس ہوندے سسی نال پھلاں دے تل دی

تنویر

آہی ازلتوں ہار مقدریں دی ذمے غیراں دے کیوں لاواں
گئی وہڑ ہجر دی دھپ یک دم گیا پیار دا ڈھل پچھاواں
تاسوں مُڑ کے تکیا ہک واری رہیاں ملن نوں سکدیاں باہواں
تنویر لا وارث اس ویلے ہویا جداں بدلیاں ڈھول نگاہواں

اختر

تکے حسرت نال قفس دا پنچھی جداں سر توں کونجاں لنگھیاں
رہی وچ قسمت دے قید لکھی توڑے ڈھیر دعائیں منگیاں
ہوندی ساری کھیڈ مقدریں دی کدی دوس نہ دیواں سنگیاں
ہوندا ظالم ساڑ ہجر دا اختر شالا کدی نہ آون تنگیاں

میں ہسڑ کے ماہی نوں خط لکھیا زخم دے دے سی کے
تنگ ہجر فراق دی سختی کیتا تاہیں لکھ بیٹھاں گھبری کے
سکدے سک کے انج کرما گئے میری آس دے گل جھلسی کے
کدوں درد وٹھیسیں اختر دے کدوں آسیں چن پرتی کے

طارق

ہر دم عشق ماہی وچ روندیں میں بہوں سمجھاواں دل نوں
نہ کر اڑیاں مڑ جا بھلیا پیا واسطہ پانواں دل نوں
عشق سمندر غوطے کھاندا کیویں بچاواں دل نوں
طارق جے یار ہس کے بولے میں گھول گھماواں دل نوں

خان فاروق

دس ہک دیہوں سکھ دی عید کرائی ای میریاں جداں دیاں اکھیاں لڑیاں
ساری حیاتی میری سنگت دے وچ توئیں کداں کیتیاں کھریاں
وس لگدیاں اُکا نہیوں گھٹ کیتی اپنی جدوں دیاں تاراں اڑیاں
ساری عمر فاروق دی غربت تے توئیں چن پیاں کیتیاں چڑھیاں

حسین

پل پل نوں روح گھبری ویندا گل رہی نہیں اپنے وس دی
اس دے سر تے تاج شاہانہ ٹھاندا اے تے مینوں ویکھ کے دنیا ہس دی
افسوس کراں تے کجھ نہیں بندا گھڑی کائی نہیں گذری چس دی
حسین ایڈے نقصان نہ ہوندے جے جند عشق دے جال نہ پھس دی

طارق

رونا پیش پیا گل میرے نی میں بیٹھی روساں رج کے
عشق تیرے دے طعنے سُن کے میں ہُن ٹراں مونہہ کج کے
عشق کماونا تے موہرا کھونا میں تڑی نوں چج کے
طارق دھوکھا معلوم ہوندا میں کدی نہ لیندی بھج کے

الہی بخش

سسے نی او کد سکھ پاون جہناں نال بلوچاں یاری
پل پل کوچ کریندے رہندے اوہ جھوکاں لان نہ کاری
تنگ چھکیندے تے جھل چریندے رہندے سفری عمراں ساری
الہی بخش وسار انہاں نوں پرت گھراں ہک واری

عظمت

ہالو ہال پکاریا تھل مارو سسی پیر پایا جدوں تھل دے وچ
سرڑی بلی ہوئی مینوں وی ساڑ چھڑیسی اگے سرڑمویاں کسے گل دے وچ
نہیں جھیلیا یار تاں ہوئی جھلی جھلی پکار دی جھل دے وچ
عظمت وانگ کنول تتی ریت تے سسی اجڑ گئی ہک پل دے وچ

تنویر

یارو حسن دی کل کائنات اندر سوہنے ڈھول دا نہیں کوئی ثانی
ہے مثل یوسف دی حسن اس دا ٹالے قیامت خیز جوانی
آہن اکھیاں سوہنے رب دی جیویں کنول دا پھل وچ پانی
تنویر نہیں لفظ پے ساتھ دیندے کراں کیہ تعریف زبانی

نا معلوم

ہک خاطر تیں دلبر دی زندگی دا تے لائی بیٹھاں
کیہ کھٹیا اساں پیار وچوں ہتھیں اپنی جھوک لٹائی بیٹھاں
اس دی ہر گل میں تسلیم کیتی نہیں مونہہ وچوں اج تائیں سی کیتی
اس دیہوں نوں رات جے آکھیا اے اس دی ہاں دے نال میں ہاں کیتی

گودڑی

ک کرو دعا سہیلیو نی کدی ماہی میرا آوے گھر میرے
نال گل لاوے چریں سکدی نوں زخم دیوے جدائی دے بھر میرے
کھلے وال بد حال کنگال ہویاں پلے ملن جوگی نہیں زر میرے
گٹھی گودڑی عشق ہتھ چھری پھڑا کے ہوئی نیم بمل کھڑکن پر میرے

عشق دا وجیا ڈھول مارو جان سندیاں سار ہوا ہو گئی
پچھے رہیا ک رنگ جلان جوگا جان عشق دی خاص عذاب ہو گئی
موئے ہوئے نوں مارنا مڑ مڑ پھر ظالم عشق دی ایہ ادا ہو گئی
مرنا گودڑی آپے ایہہ جاتا، جان عشق دے راہ وچ فدا ہو گئی

خادم علی شاہ

مدتاں ہوياں راہ سجن دا تک تک نیر وهاواں
ہو گئے نین بے چین بے وسے میں کس نوں کوک سناواں
ٹانگھ ماہی وچ شاہی گھولی میں کونج وانگوں کرلاواں
خادم علی شاہ میں کون سدیاواں جے راہوں مڑ جاواں

ہائے میں کیئیں کوں ٹانگا لایا دور سجن وسنیک اے
کس نوں دساں حال اندر دا ایہہ کوئی راز بریک اے
اُٹھ اُٹھ بھالاں راہ ماہی دا ساہ ساہ نال اڈیک اے
خادم علی شاہ پچھانہہ مڑاں تے پریت نوں لگدی لیک اے

رحمت

فقیر حقیر دلیگر اپنے دا حال سُنی بے دردا
ہجر فراق دے دُھندے دھوئیں ہاں رہندا ہر دم سڑدا
دل بے تاب نوں تاپ نہ آوے ملے شربت وصل مہر دا
رحمت ٹل زحمت ساری ویسی جداں مونہہ ڈٹھا دلبر دا

رگھیلا، لیلیٰ مجنوں

دے جواب جلدی سانوں دیر ہوئی اسی پچھدے تیتھوں سوال جیہڑا
کیہ دنیا دے وچ اعمال کیتے دس رکھیا سدا خیال کیہڑا
اوہ بھی عمل تیرے گل لھکے پونے کرائیوں حرام حلال جیہڑا
نیکی بدی دا کل حساب لکھی کے اوس لینا کون ساتھی تیرے نال کیہڑا

میاں اللہ دتہ

اللہ دتہ ارائیں میانی دا ہک مشہور شاعر ہویا اے۔ اس ہیر رانجھے تے
مرزا صاحبان دے قصے لکھے۔ ہیر رانجھا تے چھاپے وی چڑھی مرزا
صاحبان دا پتہ نہیں لگ سگیا پر پرانے گاؤن والیاں دیاں زبانناں اُتے
حالی تائیں سنن وچ آوندی اے۔ مینوں وی ایہہ دس میاں محمد ماچھی
سکنہ جھاوریاں پائی اے کسے زمانے وچ ایہہ وی مقابلے تے گاؤندا آہ
پرہن پچھلی عمرے حافظ ہون دی بناتے امامت کراؤن لگ پیا اے۔
کافی شعر بھل گئے اہن۔

ہیر رانجھے دا نمونہ

اجڑیا سُن آجڑ چکیندیا ذرا ہو ارے ارے
وڈے ویلے دا میں بھلی پے اوسوں عقل نہیں ڈھکدا نیڑے
بکیاں ہوندیاں مر گئے ماپے رب چا سجن نکھیڑے
ناں اللہ دے لاچا رستے جس پنڈ وسدے کھیڑے

جواب رانجھا

تخت ہزارہ وطن اساڈا رانجھا ناں ای میرا
منگنا پننا کم اساڈا ٹلے ساڈا ڈیرا
ہیرے نال محبت اساڈی اوہ لے گیا سیدا کھیڑا
رنگ پور چوں میں ڈھوڈھ لے آوساں کرکے وہیڑا وہیڑا

جواب آجڑی

رنگ پور حکم کھیڑیاں دا چلدا اتے سیدا مہر سدیندا
لنڈیاں نوں پھدھ قید کریندا اتے چوراں سولی دیندا
جیہڑا لیندا ناں ہیرے دا اوہ سریو مار ونجیندا
میں وی نمک کھیڑیاں دا کھانداں ہُن بھیجاں نہوں مل ویندا

جواب رانجھا

نہ کائی اتھے شہر نہ وستی کسے نہیں آن چھیڑاؤنا
مختی مار سٹیسیں مینوں ایہہ ویلا ہتھ نہیں آونا
جہناں کھادے منگ کے ٹکڑے انہاں کیہ عشق کماؤنا
جس اجڑ دا توں مان کرینا ایں اوہ اجڑ بگھیاڑاں کھاؤنا
اجڑ وچ بگھیاڑ وڑ گئے تے بھیداں مرن لگ پیاں آجڑی عرض کریندا

نہ کائی میری بھید تے بکری نہ میں اجڑے دا سائیں
مخت کر کے ٹکڑا کھانا میری روزی بھنگ نہ پائیں
اجڑے دے وچ وڑ گئی سختی ست بگھیاڑ بلائیں
میں واسطہ گھنٹیا ای رب سچے دا میرا سختیوں اجڑ بچائیں

جواب رانجھا

پنجاں پیراں دی مدد اسانوں جہاں گھلیا جھنگ مگھیانے
بالناتھ میرا مُرشد ہوندا پچھے زور تنکیانے
جتنی سستی میں پھراں کوارا جے توں قدر چچھانے
اجڑ وچوں نکل او بلیا۔ مت کائی بھید ونجانے

آجڑی

عقلوں چھوڑ بے ہوش ہو یوں من آن شیطان بھلایا
نہیں میں تیری خدمت کیتی نہیں ادبے نال بلایا
نہ تن دسیا راہ کھیڑیاں دا تین نہ میں سڑ کے لایا
ہُن ہر جوگی دے قدم چمبیاں جیہڑا وی ٹلیوں آیا

نمونہ مرزا صاحبان

کلمہ لکھن والیا کلمہ لکھیں ول
صاحبان مرزا پیگھدے وچ کڑ تے دی ٹھل
مینوں جھوٹے دیہن سہیلیاں ہکی دوجے دے ول
میری چڑھ گئی پیگھ ہلارے میرے رب نہیں بھانی گل

سو جا نال یقین دے ہوویوں کیوں دلگیر
میں جوہ پچھاتی اپنی ایہہ دان آباد جاگیر
میں چیللا نوشہ پیر دا میری کنڈیں دستگیر
جدوں دی گھوڑی پکڑی میں کتمبیا نہیں سریر
سو جا نال یقین دے ڈور قادر تے سٹ
میں شیر جھلاں وچ بوکدا مینوں کسے نہ پائی نتھ

راجن شاہ

چیترا چار دیہاڑے سنیاں کھیڈن گئیاں
بیٹھی ہتھ مروڑاں دل دیاں دل وچ رہیاں
ٹریا دے دا جانی کائی گل نہ کریاں
آکھ راجن نظر نہ آئیو ڈھوڈھاں بوٹے تے لئیاں

ہدایت

چڑھیا چیت نہیں گھر جانی رو رو ڈھائیں ماراں
پھلے باگ پکے سبھ میوے میں کتنے نظر گزاراں
جھک رہی ڈالی وچ نہیں مالی میں بلبل وانگ پکاراں
جیکر ہدایت یاد نہ آوے میں کتنے نظر گزاراں

اللہ بخش

تخت ہزارپوں رانجھا ٹریا آس اللہ دی کر کے
بھرجائیاں مین طعنے مارے اندروں اٹھیا سرٹ بل کے
پاٹ کلیجہ میرا ٹکڑے ہويا ماس آیا مونہہ جھڑ کے
عشقے جیہی بری زحمت کائی نہیں جس پایا سو مر کے

ادھی راتیں کپر کڑکن ٹھل پئی ہک جنی
ٹھاٹھاں لین کلاوڑے کوئی کوئی بوند کنی
جوتل قدم ٹکاوندی ڈھ ڈھ پون منی
کوئی خبر کرے مہینوال نوں تیری سوتی نال کے بنی

خلش


تیری ذات سوا ساڈا اسرا کوئی نہیں تینوں کیویں سرکار چھڑیوے
جیہڑا روکے تیرا ناں چائیاں اوہ کافر مار چھڈیوے
ترے خلش وفا دے پرچم تے کر ایہہ اقرار چھڑیوے
لکھ وار جان خدا دیوے تیری جتی توں وار چھڑیوے

محمود اسیر

پیو وی پیسہ، ماں وی پیسہ
پتر پیسہ بھرا وی پیسہ، پیسہ کردے لوکی
جنڈری دا تے لا جاندے نہیں
سدھے قبرے جا پیندے



ضلع سرگودھا وچ اردو ادب تے لوک گیت



ضلع سرگودھا وچ اردو ادب تے لوک گیت

اللہ دے فضل نال سرگودھے دی مٹی ادبی لحاظ نال بہوں زرخیز اے۔
اتھوں وڈے وڈے ادیب تے شاعر پیدا ہوئے۔ بھیرہ زمانہ قدیم توں ای علم دا
مرکز رہیا اے۔ اس اتنے ادیب تے شاعر پیدا کیتے جہاں دا شمار مشکل اے۔
اج وی لوک انہاں نوں عزت دی نگاہ نال ویدھے آہن۔

پاکستان بنے توں کچھ اردو پڑھن لکھن دا رواج بہوں ودھ گیا۔ اس
داہک چنگا نتیجہ ایہہ ہویا جے لاہور اردو زبان دا مرکز بن گیا۔ اس ویلے
پاکستان وچ جتنیاں کتاباں اخباراں تے رسالے لاہور توں نکلدے نیں کسے
ہور شہر توں نہیں۔ سرگودھے وچ اردو لکھن آ لے ادیباں تے شاعراں دا جائزہ
پیش کیتا ویندا اے۔

ڈاکٹر وزیر آغا

سرگودھے نوں اس گل اُتے ہمیشہ فخر راسی جے اس وچ ہک وڈا شاعر

ادیب تے نقاد وزیر آغا جیہا جمیا۔ انہاں دی ادبی شخصیت نوں ساری دنیا وچ منیا ویندا اے۔ انہاں دا شمار برصغیر دے نامور انشائیہ نگاراں۔ شاعراں تے نقاداں وچ ہوندا اے۔ انہاں نے صرف آپ ای ادب وچ نویاں راہواں تلاش کیتیاں بلکہ آون والی نسل نوں وی نئی راہواں دسیاں۔ اسے وجہ کر کے ادبی دنیا وچ انہاں دا ہک وڈا اُچا مقام اے۔

احمد ندیم قاسمی

قاسمی صاحب وی عالمی شہرت دے مالک آہن۔ انہاں پوری حیاتی معیاری ادب لکھیا تے ادب نال پیار کرن والیاں دی حوصلہ افزائی کیتی۔

پروفیسر غلام جیلانی اصغر

جیلانی صاحب گورنمنٹ کالج سرگودھا دے بزرگ اساتذہ وچوں آہن ایہہ شاعر تے ادیب آہن طنز و مزاح وچ انہاں دا جواب نہیں۔ سرگودھا دی ادبی مجلساں دی جان آہن۔

پروفیسر منور مرزا

اقبال شناسی دے حوالے نال مرزا صاحب اپنی مثال آپ آہن۔ انہاں نہ صرف اقبال دے شعری فلسفے نوں سمجھیا سگوں دوجیاں تائیں پہنچان دی کوشش وی کیتی۔ ایہناں وڈی محنت نال فکر اقبال دے حوالے نال کتاباں

تے مقالے لکھے۔ جہناں دی مثال اقبالیات دی دنیا وچ مشکل اے۔

انہاں بزرگاں توں وکھ ہور وی وڈے وڈے ناں آہن۔ جیہڑے اپنی ہمت تے حوصلے نال ادب دی خدمت کر رہے ہن۔ ایہناں وچوں کجھ ناں ایہہ نیں:- ڈاکٹر انور سدید، نصرت چودھری، رشک ترابی، پرویز بزمی، ظہیر الدین ظہیر، پروفیسر ریاض احمد شاد، پروفیسر شیخ محمد اقبال، شاکر نظامی، بشیر راجن ادیب، شوکت راز، آصف راز، محمود اسیر، اخلاق عاطف، کامران رشید، اصغر شامی، اختر، امان، ادارہ شعر و ادب نیشنل سنٹر سرگودھا، آرٹس کونسل وغیرہ۔ ادب دی خدمت کر رہیاں آہن۔ اس جائزے توں پتہ لگدا اے کہ سرگودھا وی ادبی میدان وچ کسے دوجے علاقے توں کچھ نہیں۔

ضلع سرگودھا دی صحافت تے ادب

صحافت دے میدان وچ ضلع سرگودھا دے شہر بھیرہ نوں ایہہ ہمیشہ فخر راسی جے اتھے سرگودھے تے راولپنڈی وچ صحافت دا بوٹا لون آلیاں دا تعلق بھیرہ نال آہ۔ ایہناں بزرگ ہستیاں وچوں ہک دا ناں قاضی سراج الدین بار ایٹ لا ایڈیٹر چودھویں صدی تے دوجے دا ناں میاں احمد دین وکیل آہ۔ اسے طرح شمیم بھیروی مدیر شیراز مجید افضل پراچہ، سید تصدق حسین منشی غلام حسین۔ انہاں سبھناں دا تعلق بھیرہ نال کسے نہ کسے طرح رہیا۔

اسے طرح بھیرہ توں چھپن آ لے اخبار ”دوست ہند“ 1927، اخبار بصیرت 1928، نور القمر 1928، شمس الاسلام 1929، ضیائے حرم 1971۔

پچی گل ایہہ ہے کہ بھیرہ نے ای سرگودھا دی صحافت دامنڈھ بدھاتے اس توں
 پچھے سرگودھا وچوں سماچار محمد علی نے کڈھیا انور گوٹندی صاحب یاد خدا 1940ء
 وچ کڈھیا وت کامران کڈھیا۔ ایسے طرح نظام نو، خلوص، شعلہ، نسیم بہار،
 پاسبان، سیاست تے فیض لدھیانوی صاحب دا شاباش وی اپنے وقت دے
 بہوں چنگے رسالے آہن۔ اج کل تاں سرگودھے نے ایس میدان وچ کافی
 ترقی کر لئی اے۔ ہُن تاں ایہتوں روز نامے وی نکلن لگ پئے آہن جہناں
 دے ناں کجھ انج آہن۔

روزنامہ اتحاد، بقا، منشور، الجلال، تجارت، ضرورت، وفاق، دعوت عمل،
 نوائے شر، نوائے جمہور تے نسیم بہار۔ اپنے اپنے رنگ وچ سرگودھا دی صحافت
 وچ اگے توں اگے ودھن دی کوشش وچ لگے ہوئے ہن۔ ہک ہور معیاری
 روزنامہ دنیا تے ایکسپریس نکل کے سب نوں مات کر رہیا اے۔ اتھے وڈے
 وڈے کہنہ مشق صحافی رہے۔ جہناں وچوں میر عبدالرشید اشک، انور گوٹندی،
 ارشد بھٹی، مولانا انگر سرحدی، یوسف گوٹندی، اپنے وقت دے وڈے پائے
 دے صحافی ہو گزرے نیں۔

صحافت دی خدمت واسطے سرگودھا پریس کلب۔ ایڈیٹرز کونسل یونین
 آف جرنلسٹ تے انجمن صحافیاں موجود آہن تے اپنے طور تے خدمت وچ
 پیش پیش آہن۔



ضلع سرگودھا دا پنجابی شعری ادب



ضلع سرگودھا دا پنجابی شعری ادب

پہلا دور:- مغلاں تے سکھاں دے دور دے شعراء

پیلو

پیلو وینس دا رہن آلا آہ۔ ایہہ کدوں جمیا کوئی خاص دس نہیں پائی
گئی۔ لیکن ایہہ پنجابی زبان دی شاعری دا باوا آدم منیا گیا اے۔ سب توں
پہلاں اسے ای مرزا صاحبان دا قصہ لکھیا اس دے متعلق ہک شعراے جس
توں اندازہ اے کہ اوہ اکبر بادشاہ دے زمانے وچ ہويا۔

اکبر جیہا بادشاہ تے پیلو جیہا جٹ

نہ کوئی ہويا پہلے تے نہ کوئی ہوسی وت

اس توں قیافہ لایا گیا کہ اوہ اکبر بادشاہ دے زمانے وچ ہويا سی۔
اس پورے علاقے دے لوکاں نوں اس شاعر دے شعر زبانی یاد آہن۔ اس
دے بہوں سارے شعر دنیا دی بے ثباتی دے بارے آہن۔ مثلاً:-

پیلو چڑھیا پنڈ تے ہو کھلا حیران
نہ اوہ مٹ شراب دے نہ اوہ نیل دوکان
پیلو پچھیا ٹھیکرے تیرا کت ول گیا جہان
جتھے کر کر گئے مجلساں تے لا لا گئے دیوان

پیلو تیں نالو چنگے جیہڑے جمدے ای مر گئے
انہاں چکڑ پیر نہ بوڑیا تے نہ آلودہ ہوئے
ایس وچ مزاح تے تنقید دی وی بہوس ابی آدھے نیں:-

کن جہاں دے پیلے اوہ بوجو وانگ تکلین
جہاں آپ منگ کے کھاہدا تن کتھو دین
ہک واری بھیرے گئے تے رات وڈی اوکھی گزاری تے آکھیا:-
نہ اسماں وت بھیرے آونا نہ آونے دی نیت
پٹھوں لڑن کیڑیاں اتوں چووے مسیت
اس دے بہوں سارے شعر بطور مثال دے استعمال ہوندے آہن:-
عشق لتاڑے آدمی ورف لتاڑے رُکھ
نیندر نہ آؤندی چورنوں تے عاشق نہ لگے بھکھ

پیلو دی شاعری دی بعد دے بہوں سارے مشہور شاعراں
تعریف کیتی اے۔ انہاں دے کجھ نمونے دے اشعار درج کیتے
ویندے آہن۔

حافظ برخوردار

یارو پیلو نال برابری شاعر بھل کرین
اس نوں پنجاں پیراں دی تھا پنا کنڈیں ہتھ دھیرین

مولوی احمد یار

پیلو نال نہ ریس کسے دی اس وچ سوز علیحدی
مست نگاہ ہوئی اس پاسے کسے فقیر ولی دی

میاں محمد بخش

جیہڑی جیہڑی گل آکھی جو اکھی سو چھچی
پیلو جیہڑے پہلے ہوئے بہوں زمین کھچی

ایہہ کجھ نمونے دے شعر لکھے آہن جنہاں توں ثابت ہوندا اے کہ اوہ
کتنا وڈا شاعر ہو گزریا اے۔ عجیب تے افسوس والی گل ایہہ وی اے کہ اس دا
اے تائیں سوائے جاوید گھنجیرا دے کسے وی اسدا ٹھکانہ نہیں لکھیا۔ ہنجنے تکے
پے مارے نیں۔ ہور تے ہور باوا بدھ سنگھ ہوریں جیہڑے شاہ پور وچ انجینئر
آہن تے ”پریم کہانی“ پنجابی شاعراں تے لکھی اوہ پیلو دے بارے لکھدے
نیں کہ:-

پیلو کون سی کتھے ہو یا کدوں ہو یا کوئی پتہ نہیں۔

حافظ برخوردار رانجھا

حافظ برخوردار رانجھا ساڈے سرگودھے دی شان نیں۔ ایہناں توں وڈا عالم فاضل صاحب طریقت شاعر حالی تائیں پنجاب وچ نہیں ہويا۔ ہور تے ہور حافظ صاحب دا پنجاب اتے ایہہ وڈا احسان اے جے ایہناں ساڈی زبان نوں پنجابی دا ناں دتا۔ حافظ صاحب حضرت مجدد الف ثانی دے سیالکوٹ وچ ہم درس آہن تے ایہناں دے نال سعد اللہ خان وزیر اعظم شاہجہان وی پڑھدے رہے۔ اس واسطے وی اس زمانے وچ ایہناں دی کافی قدر کیتی ویندی آہی۔ حافظ صاحب نے دین دی خدمت بارے بہوں ساریاں کتاباں لکھیاں آہن۔ جنہاں دی فہرست بہوں لمی اے۔ بقول ڈاکٹر قریشی احمد حسین قلعداری انہاں دی صرف ہک کتاب ”انواع حافظ برخوردار“۔

علم فقہ تے ہک مکمل انسائیکلو پیڈیا اے۔ علم و حکمت دا انمول خزانہ اے۔ حافظ صاحب اپنی ذات تے وطن بارے لکھدے آہن۔
عاصی دعویٰ فضل نہ کوئی آکھن جٹ انجان
ذات رانجھا وطن تخت ہزارہ روشن وچ جہان
ڈاکٹر فقیر محمد لکھدے نیں:-

دفتر واپے درد دے حافظ برخوردار
قصے کردا عاشقاں گل رہے سنسار

میاں محمد بخش صاحب فرماندے نیں

رانجھا برخوردار مصنف گورجہاں دی چٹ
ہر ہر بیت انہاں دا مٹھا جیویں مصری دی گٹی
حافظ صاحب نے پنجابی نوں سب توں پہلاں ناں دتا آہ پہلاں
آپ وی ہندی لکھدے آہن۔

ترجمہ قصیدہ بانٹ سعاد جیہڑا عربی زبان وچ ایہہ حافظ اس وچ
لکھدے آہن:-

رانجھے برخوردارے معنی ہندی لکھ وکھائے
کہے غلام محمد ہو وس بخت سوائے
بعد وچ ہندی دی بجائے پنجابی لفظ استعمال کرن والے پہلے
آدمی ہن:-

معنی گنج العرش دے پنجابی لکھ وکھائے

کہے غلام محمد ہو وس بخت سوائے

ڈاکٹر فقیر محمد فقیر حافظ صاحب دے متعلق لکھدے ہن:-

1081ھ توں 1276ھ دے تاریخی کھپے وچ پنجابی شعر تے ادب
دی مجلس وچ رونق نظر آوندی اے۔ ایہہ ساریاں رونقاں ہکے حافظ برخوردار
دے دم قدم نال اے۔ حافظ برخوردار پنجابی ادب تے فن وچ اپنی سوچ وچار
دے اجے گوڑھے گوڑھے رنگ بھرے نیں کہ ایہہ کھڑی ہوئی پھلواڑی اج تیکر
انجیں ہار پئی مہکدی اے۔

ایس طرح حافظ برخوردار نے پنجابی علم و ادب تے بے شمار کم کیتا اے۔ جس دی جتنی وی قدر کرے تھوڑی اے۔ دینی کتاباں توں علاوہ ایہناں دی معرکے دی تصنیف ”مرزا صاحبان“ اے جیہڑی پوری دنیا وچ مشہور اے تے پورے پنجاب وچ منی پرمنی سمجھی جاندی اے۔ سچی تے مکدی گل ایہو ای اے حافظ توں پہلاں وی تے پچھوں وی اوہدے ورگا ان تھک راہی ایس راہ وچ رُدا نظر نہیں آندا۔ ایہناں نے بوبل نماز لکھ کے پنجابی وچ نشر لکھن دا رواج دتا۔ جیہڑی ہُن تائیں پنجابی نثر دی پہلی کتاب منی ویندی اے۔

نجات

نجات چاؤ وال تحصیل بھلوال ضلع سرگودھا دے رہن آ لے آہن۔ ایہناں دی شہرت دا سبب انہاں دی لکھی ہوئی کتاب ”نادر شاہ دی وار“ اے۔ ایہہ تقریباً 1669 وچ جے تے 1779ء وچ سکھاں دے ہتھوں مسجد دے اندر شہید ہو گئے۔

ایہناں اس وار وچ نادر شاہ دے برصغیر اُتے حملے دے حالات تے واقعات بیان کیتے آہن۔ اس نوں پڑھن نال شاعر دے تاریخی شعور دا پتہ لگدا اے۔ اس دی منظر نگاری، تشبیہات تے استعاریاں دا استعمال ہور کسے دے حصے وچ نہیں آیا۔ نجات دی فنی بصیرت اپنی فکری عظمت دے سبب اس وار نوں پنجابی ادب دے آسمان اُتے یک روشن ستارہ بنا دتا اے۔ اسے واسطے نجات داناں ادبی دنیا وچ عزت تے احترام نال لیا ویندا اے۔ نمونہ کلام:-

اوہناں سُن دیاں لائی اڈی تازی گھوڑیاں
جاں آس جیوندى چھٹدی وڑیاں وچ میداناں
دھروہ میانوں کڈھی ہر ہک سورے
ماس کھاوے سن ہڈی لہو پیوندى
فوج تمامى وڈھی آہمو ساہمنے
چا عید منائی وڈی دے قربانیاں

واگ اٹھائی گھوڑیاں دھالشکر وڈے
سٹ کماناں پہلوان ہتھ گزراں پھڑدے
ہاتھی سنے مہاوتان وڈھ ٹوٹے کردے
مارن ہتھیں برچھیاں جاتے چڑھدے

لال میاں عرف دائم

ایہناں دا تعلق کوٹ مومن دے قریشی خاندان نال اے۔ 1782ء
وچ جسے تے بچہ کلاں وچ فوت ہوئے۔ ایہناں بوسالاں تے ہرلاں دی وار
لکھی جس وچ بوسالاں دے 150 بندے مارے گئے تے ہرلاں دے 60
بندے قتل ہوئے۔ نمونہ کلام:-

بوسالاں پرتیا دھاڑ نوں دے لوہے دی چھنڈ
پون بندوقاں گولیاں اوناٹھی دی پھنڈ

چنن ونگار بڑ وچ شہینہ پھاتا منڈ
کولوں گئے سواد دے پوترے کردے پہلی کند

لوک ناچ تے لوک گیت

ضلع سرگودھا وچ خاص لوک ناچ صرف دھریس مشہور اے۔ عام طور تے لوک جھومر تے لڑی نوں اس نال گڈ مڈ کر دیندے آہن۔ حالانکہ ایہہ تینوں مختلف آہن۔ دھریس ڈھول دی تھاپ تے لوک گیتاں نال مزہ کریندی اے۔ لوک گیتاں دے بول قدماں دی دھمک ڈھول دی گت۔ ہتھاں دیاں تاڑیاں تے زبان نال شی دے استعمال نال وڈی احتیاط ورتی ویندی اے۔ دھریس دے انگ تے لڑی دے انگ وچ وڈا فرق اے۔ پہلے زمانے وچ صرف دھریس ای مشہور آہی۔ کھارا، گھڑولی تے سہرے سا دے ویلے دھریس دے فن دا وڈا مظاہرہ کیتا ویندا تے وڈے جوش نال ڈھول دی تھاپ اُتے دھریس ماری ویندی اس واسطے صرف ڈھول ای کافی سمجھیا دیندا اے۔ کسے ہور ساز دی ضرورت نہیں ہوندی۔ لڑی، جھومر، بھنگڑا وچ چمٹ تے گھنگرو دی ڈھول دے نال استعمال کیتے ویندے آہن دھریس کان ساڈے علاقے دا مقبول ترین لوک گیت ایہہ اے۔

دھریس مارن آ لے وجد وچ آ کے اس نوں گاؤندے نیں تے ہک اوپرا اسمان بجھ ویندا اے۔

لوک گیت:-

مہینوال لے دے آئے نی
جٹی رو رو حال ونجائے نی
وے میں پانی بھرینیاں چھک دا
میرا ڈھول مسافر نت دا
کنیں جادو گھول پوائے نی

دوجا دور:- انگریز دے ویلے دے شعراء

پیر عارف ہاشمی

جنم 1860ء نواں کوٹ وفات 1973ء - ہاشمی صاحب دا کلام
جنگ نامہ امام حسین دی شکل وچ چھپ گیا اے۔
نمونہ کلام:-

ہو گئے نین بے چین بے وسے کیں نوں کوک سناواں
مدتاں ہویاں راہ سخن دا تک تک نیر دہاواں

پیر مردان علی شاہ مضطر

جنم 1865ء شاہ پور صدر وفات 1936ء - آپ پیشے دے لحاظ
نال وکیل آہن۔ اردو فارسی تے پنجابی وچ شاعری کریندے رہے آہن۔

مولانا حالی تے مولانا آزاد دے شاگرداں وچوں آہن۔ نمونہ کلام:-
 سن کے ساکھ رنجیٹھے دی جٹی نوڑا لایا بھج کے
 پچھے چاک دے بیلے رلیاں آ تن سسیاں تچ کے
 ساری عمر روندیاں گزری پا پلڑا مونہہ کج کے
 شالا ہسدے ملن مضطر جہناں روایا رج کے

☆☆

بن کے جوگی ہیرے رانجھا پھیرا پاسی کداں
 درد فراق رنجیٹھے دا تینوں مار مکلیسی جداں

دلپذیر

جنم 1866ء بھیرہ وفات 1945ء انہاں دا اصل ناں محمد امین آہ۔
 پنجابی زبان دے بہوں وڈے شاعر ہوئے نیں۔ ایہناں بے شمار کتاباں تے
 رسالے لکھے۔ مولوی محمد حسین احمد آبادی نوں اپنا استاد مندے آہن۔ ایہناں
 ہر صنف وچ شاعری کیتی اپنے علاقے وچ اسے وجہ توں بہوں مشہور ہوئے۔
 نمونہ کلام:-

غماں دی رات ظلمات اندر آہا کدیں چن چراغ بھیرہ
 گئے بجھ چراغ سراغ گئے اچن چیت ہويا داغ داغ بھیرہ
 جگہ بلبلاں دی ایہی باغ اندر زانغاں مل لیا ساڈا باغ بھیرہ
 دلپذیر خبرے کیہڑے روز مڑ کے ہوسی پھیرا ایہہ عالی دماغ بھیرہ

تحریک خلافت بارے لکھیا:-

کر دور مالا مکر دی جنجو کفر دا توڑ دے
ہو جا پجاری رب دا ایہہ رام رولا چھوڑ دے
بے نقطہ شعر:-

اول حمد الہ العالم واحد ہک اکارا
مالک ہر مالک دا مالک ڈر دا عالم سارا

دان محمد

جنم 1866 کونہ سیداں وفات 1967ء۔ 59 شمالی ایہہ ہک
وڈے شاعر آہن کئی کتاباں لکھیاں پر کوئی وی چھاپے نہ چڑھ سگی۔
نمونہ کلام:-

تخت ہزارے رانجھے وسدے کدھی چندل چنھاں
جان محمد لا پکھری کردا عدل نیاں



صورت دا کوئی انت نہ آوے پریاں دی شرمان
دان محمد سوہنیاں کولوں ہوندا جگ قربان

شاہ محمد رانجھا

جنم 1876ء وفات 1963ء کوٹ مومن ایہناں دی شاعری

ڈھولیاں دی شکل وچ اے۔ نمونہ کلام:-

آئے روح اولیاواں دے جیہڑے خادم فی خاص قرآن دے
شاہ محمد رات دیہوں بنائے کر سخن اس زبان دے

بی بی مخفی

1872ء بھیرہ۔ ایہ اپنے زمانے دی وڈی مشہور شاعرہ آہن۔ مخفی
اسرار عشق حقانی، تعلیم النساء کتاباں لکھیاں۔ ایہناں دا اصل ناں صالحہ بیگم آہ۔
نمونہ کلام:-

جد تک غنچہ پردے اندر ہووے وچ خوشحالی
جدوں نقاب اتارے اوس نوں توڑ لیجاون مالی
جس کھانے سر پوش نہ ہووے بلی کتا کھاوے
جیہڑی نعمت مخفی ناہیں ہر دا جی لے جاوے

مولوی ازہر

اصل ناں کرم دین جمن 1873ء بھیرہ وفات 1951ء ایہناں
بہوں ساریاں کتاباں لکھیاں۔ دلپذیر نال ایہناں دی قلمی جنگ رہی۔ 29
کتاباں دے ناں موجود نیں۔ نمونہ کلام:-

عشق دی منزلاں وچ پے کے اسیں مفت خوار کنگال ہو گئے
جہناں واسطے ایڈے سفر جالے اوہناں ہور دے خیال ہو گئے

مونہوں ہس کے کدی نہ گل کیتی عرض کردیاں نوں کئی سال ہو گئے
ازہر وچ فراق پیاراں دے میں غریب دے مندڑے حال ہو گئے

مولوی محمد حسین

1873ء احمد آباد وفات 1916ء۔ ایہو بہوں وڈے شاعر ہوئے
نیں۔ ایہناں دا رسالہ مناجات طلب دعا وڈا مشہور اے۔ نمونہ کلام:-
وڈیاں مہراں والیا سائیاں رب غریب نوازا
اپنے فضل رحم تھیں کھولیں رحمت دا دروازہ
☆
رحمت دا دریا الہی ہر دم وگدا تیرا
جے ہک قطرہ بخشیں مینوں کم ہو جاوے میرا

مرزا خان

جمن بچہ کلام 1886ء وفات 1936ء ایہناں مرزا تخلص ورتیا
اے۔ مرزا صاحبان دو پرندے تے کونل لکھی کلام وچ تصوف دا رنگ
نمایاں اے۔
نمونہ کلام:-

کونلے باغ بہاراں تے گلزاراں مڑ کیوں خاراں تینوں
ایسی سبزی چمن عجب رب دی رحمت کہنوں

ملک فلک شیراعوان

جمن 1887ء وفات 1990ء وڈی لمی عمر پائی کلام حالی تائیں نہیں
چھپ سکيا۔ نمونہ کلام:-

ہائے افسوس جو پچھلی عمراں میں ڈھے دُکھ ہزاراں
در در تے پئے دھکے لگدے کدے گئیاں عیش بہاراں

محمد عمر المعروف سائیں آزاد

جمن بھیرہ 1892ء وفات 1972ء ایہناں کئی زباناں وچ طبع
ازمائی کیتی۔ مجموعہ کلام سوز آزاد دے ناں تے چھپ گیا اے۔
نمونہ کلام:-

مشکل پئی درپیش میرے دیکھ سید حال نوں
کریندا آں دیہوں رات تیرے نام خش لُج پال نوں

میاں چنن دین گوندل

جمن 1895ء کوٹ مومن وفات 1985ء دو کتاباں چھاپے
چڑھیاں نیں جہناں دے ناں فریاد یتیمیاں، قصہ عمر فاروق دا۔
نمونہ کلام:-

چودھویں صدی اوکھی سب تھیں خبر قرآن لیاوے
اج کل صوفیاں مُلاں کولوں اللہ پاک بچاوے

الحاج حافظ فضل کریم گوندل

جنم 1898ء بھیرہ وفات 1980ء ایہناں اردو فارسی تے پنجابی
وچ شاعری کیتی اے ایہناں دیاں چھ کتاباں چھپیاں نیں۔ نمونہ کلام:-
تینوں سب توفیقاں حضرت جے کر کرم کماویں
حافظ نوں سنگ یاراں خوشیاں پل وچ کول بلاویں

فضل الہی

جنم 1901ء جھاڑیاں وفات 1994ء۔ ایہہ اپنے زمانے دے
کلاسیک گائیکی وچ ہک منہ ہوئے بندے آہن۔ ایہناں نوں ہر ماسٹر کمپنی نے
بمبئی لے ونج کے انہاں دے گائے ہوئے گیت ریکارڈ کیتے۔ ایہہ آپ ہک
چنگے پنجابی دے شاعر وی آہن۔ انہاں دا بیٹا وی ہک ودھیانگراے۔
نمونہ کلام:-

کالی ڈار پہاڑ دی وچ نیلیاں پیلیاں دھاراں
کچھ لُٹیا سن کچھ دیاں لوکاں کچھ لُٹیا دلداراں
مال متاع میرا چوراں لُٹیا میرا جو بن لُٹیا یاراں
الہی بخش سمجھ کنوں بے سمجھ تھیو سے ساکوں بے سمجھی دیاں ماراں

آغا سید محمد

جنم 1901ء وفات 1980ء سرگودھا۔ آغا صاحب وڈے اُچے

شاعر آہن۔ ایہناں دیاں ترے کتاباں چھاپے چڑھیاں آہن۔ جنگل دی حور،
عشق دیار، زہرا دا چن۔ نمونہ کلام:-

کیہ بن گیا سوہنی نال تیرا وقت گذردا جاندا اقرار دا اے
سوہنی آکھیا دوہاں دی موت آگئی ساڈے مُک گئے اس سنسار دے دن

سلیمان خان

جمن 1902 برما وفات 1972 بھلوال ایہہ فلمی گیت لکھدے
آہن۔ فلمی ناں طارق بھلوالی اے کافی گیت فلمائے گئے۔ آصف راز ایہناں
دے دوہترے آہن۔
نمونہ کلام:-

بجناں باجھوں اوکھیاں راتاں
کون سُنے میرے دل دیاں باتاں

مخدوم صالح محمد

جمن 1903ء وفات 1978ء لالو آلی۔ ایہناں دا کلام سی حرفیاں۔
بارہ ماہ۔ اٹھواریاں۔ دوہڑیاں دے روپ وچ اے۔
نمونہ کلام:-

اللہ نوں حمد و ثناء ساری جس نبی رسول اوپایا چا
ہویا شوق کمال خدا تائیں نبی پاک نوں عرش بلایا چا

نور محمد لڑکا

جنم 1910ء چک نمبر 23 جنوبی۔ نمونہ کلام:-

رب دے دے دتے شاکر رہے اوہ کیڈا راضی ہو یا نبی سوارے تے
دنیا نچے ایمان توں ڈول گئی اے نور محمد شاکر رہے رب دے دتے ہوئے گزارے تے

مخدوم غلام محمد

جنم 1915ء لنگر مخدوم وفات 1985ء لالو آلی۔ ایہناں دی ہک

کتاب سیرگشن چھپ گئی اے۔ دوہڑے وی لکھدے آہن۔ نمونہ کلام:-

ہاڑ مہینے دُھپ قہر دی دوجا عشق جلایا
تریجا اس وچھوڑے مینوں بال مواتا لایا
تارے گندیاں رات گزارن دن نوں سوز سوایا
وجہ جدائی یا نبی اللہ کدیں آرام نہ آیا

سید خادم علی شاہ

جنم 1907ء اوپی وفات 1991ء کافی مشہور شاعر آہن ایہناں دا

کافی کلام چھاپے چڑھ گیا ہے۔ نعتیہ کلام، ابیات بخاری، بارہ ماہ بخاری، رموز
عشق۔ نمونہ کلام:-

شام پئی بن شام مینوں تیرے درد پائی شام شام اندر
ہوئے جن انسان خاموش سارے قیدی ویکھ کے زلف دے لام اندر

غلام حسین چھینہ

جنم 1907ء چک 23 جنوبی۔

نمونہ کلام:-

توڑے نائی غمگین یقین مکمل تسکین پنل دے ناں وی
ہر دم غم وچ پریم اکھیاں سسی کونج وانگ کرلاندی
بے تقصیر امیر اسیر ہوندے جداں گھڑی زوالدی اوندی
غلام حسیناں گل تھلدی لکھیسی دل پھٹ ویسی دکھیاں دی

سارنگ خان

جنم 1912 بچہ کلاں وفات 1995ء۔ ایہناں دا کلام رموز محبت

دے ناں نال چھپ گیا اے۔

نمونہ کلام:-

گھت ویلے ہجر دے ویلیا سو نکل ہڈیاں دا گیا گھی اج تک
کے ہویا جے اوس نہیں جاتا اوہدا کردا رہیاں میں وی کیہ اج تک

حافظ محمد رمضان

جنم 1912 بھیرہ مولوی اظہر ہوراں دے گھر جمے۔ نمونہ کلام:-

ہک سجدہ کیتا نہ اس ملعون شیطان نے
دھک دتا دربار وچوں واحد پاک رحمان نے

سید محمد دین المعروف ہمی شاہ

وفات 1976 ہمی شاہ۔ پنجابی زبان دے ہک وڈے شاعر ہوئے
نیں۔ کئی کتاباں چھاپے چڑھ گئیاں آہن۔ نمونہ کلام:-

ظالم سی اگ عشق والی حملہ ہو گیا میری جان اُتے
شاہ عشق دا پا کے تاج چڑھیا کھیڈے آن شکار جہان اُتے
جھگا آن غریب دا لٹیا سو فتح پائی سوون میدان اُتے
ہمی شاہ جی عشق نے لٹ لیاں کیوں کرن اعتبار انسان اُتے

مخدوم دوست محمد

جنم سال 1917 وفات 1990 رہن والے ایہہ بہوں چنگے شاعر
آہن ہک قصہ سؤنی مہینوال چھاپے چاڑھیا۔ نمونہ کلام:-

سؤنی چودھویں رات دا چن آہی سیاں کول مثال جیویں تاریاں نی
چٹے دند سفید رویل کلیاں لبناں لال سرخی پاناں داریاں نی

اکھیں بلن مثالاں جیویں رات اندر وچ کملے دی لاٹاں ماریاں نی
سوہنا نک تلوار دے رخ والا ابرو وانگ کمان دے دھاریاں نی
زلفاں کالیاں خوب دراز آہیاں گھتن کالڑے نانگ شوکاریاں نی
دوست بدن لطیف ملک ہک جیا چالاں ویکھ مرغابیاں ہاریاں نی

سردار خان

جمن 1920ء نواں کوٹ وفات 1988ء پیشے دے لحاظ نال استاد
آہن تے تحت ہزارے راقم دے نال پڑھاندے رہے ریٹائر ہو کے شاعری
شروع کر دتی۔ سارا کلام چھان دی کا نگ وچ لڑھ گیا۔ نمونہ کلام:-
عاشق جیڈا لگے مشہور ہوندا اے
معشوق نہ اوہ تکے مجبور ہوندا اے
دلاں نال دل وی ضرور ملدے
اکھیں دا وی کجھ تے قصور ہوندا اے
عاشقاں دے سینے وچ بھائیں بلیساں
معشوقاں نوں وی پیار تے ضرور ہوندا اے
وچھڑ کے جیہڑے ملے بعد مدتاں
ایہہ وی کوئی اوپرا سرور ہوندا اے
سردار جس نوں سوہنا تکے ذرا رحم نال
بیڑا اوہدا پار پہلے پور ہوندا اے

میاں فخر الدین

جمن 1915ء جھاریاں وفات 1997ء میاں صاحب نے
اکھوتے پتر دے مرن اُتے شاعری شروع کیتی۔ اس دی یاد وچ دوہڑے بنا
کے آدھے رہے۔

نمونہ کلام:-

آوے ماہی گل لگ ملیے مینوں تانگھ چروکی رہندی
گھر ول پھیرا پائیں آ سجنّاں ہو دور بیماری جاندی
پیا ستاوے ہجر تیرا میرے پیڑ کلیجے رہندی
فخر دینا رب یار ملیندا تاں مرض اندر دی جاندی

رب بخش کلیار

جمن سال 1926ء ڈیرہ جاڑا وفات 1977ء ایہناں کافی لکھیا پر
اجے تائیں چھاپے نہیں چڑھیا۔ دیوان رب بخش دے نال قصہ سسی پنوں وی
لکھیا۔ نمونہ کلام:-

جیندی دل نوں سک اے اوہ شالا نہ آوے
جے آوے تے وت کاہلا کاہلا نہ آوے
اوہنوں آکھیں قاصد اوہ آوے اکلا
اوہدے نال کوئی سباہلا نہ آوے

نذیر چودھری

جمن 1923ء چک 23 جنوبی ، وفات 1989ء ایہناں دیاں نثر
دیاں چار کتاباں چھپ گیاں آہن۔ چائن دا کھڑکار، سوچاں دے انگارے،
سوز وفاتے حقائق۔

نمونہ کلام:-

بارشیں وچ لوکاں دے چھتاں دے کم ائی نذیر
جیہڑی رکھی ہوئی سی میں مٹی گو کے دوستو

سید محمد علی شاہ

جمن 1923 سرگودھا۔ بیکل بخاری دے قلمی ناں نال لکھدے نیں
پیشے دے لحاظ نال استاد نیں۔ نمونہ کلام:-

بیکل میں فنکار وطن دا
کھڑے راگ دی ٹھمری گاواں

محمد خلیل خان

جمن 1924 خلیل خان آزاد تخلص ورتدے نیں۔ تنقید انہاں دی
شاعری دا اصول اے۔ نمونہ کلام:-

شاہی ویچ کے خودی خرید ایٹھوں پختہ عزم تے پکا ایمان کریں
چلے راہ آزاد نجات والی کھوٹے کھرے دی ذرا پہچان کریں

محمد اسماعیل

جمن 1927ء لدھیانہ، سرگودھا وفات 1992ء ایہہ وارث
لدھیانوی دے قلمی ناں نال فلمی گیت لکھدے رہے۔ نمونہ کلام:-

پنڈ وچوں نکلی اے اک ٹیار
رنگی جوانی اتے روپ دا نکھار

منظور علی ہاشمی

جنم 1929ء نواں کوٹ۔ ایہناں دی شاعری وچ تصوف دا رنگ
نمایاں ایں۔ ایہناں دی کتاب پھلاں دا ہار چھپ گئی اے۔ نمونہ کلام:-
ایہہ جنت اے دنیا امیراں دے بھانے
غریباں دی تنگی دا اللہ ای جانے

حیات محمد حیات

1930ء شاہ پور شہر ایہناں بارہ ماہ لکھے آہن۔ نمونہ کلام:-
چڑھیا جیٹھ جدایاں والا رو رو ماراں ڈھانیں
نہ کوئی قاصد خبر لیاوے کھلی اڈیکاں راہیں

صالح محمد

جنم 1935ء رحیم پور۔ زیادہ تر دوہڑے لکھدے نیں تے گوئیے
گاندے نیں۔ نمونہ کلام:-
میں محبت عقیدت دے کجھ پھل چُنے تے اوہ نعت رسول خدا ہو گئی
کھا کے پتھر وی طائف دے لوکاں لئی جیندے مونہوں مبارک دعا ہو گئی

سلطان احمد علوی

جمن 1938ء کفری۔ انہاں دیاں ان چھپیاں کتاباں دے ناں ایہہ
نیں۔ سان دا پتھر، نیناں دیاں جھڑیاں، گنجے رُکھ۔ نمونہ کلام:-
دو قدم میرے نال ٹرتاں سہی
کیوں بھلا تیرا میرا جوڑ نہیں

نذر بھٹی

جمن 1941ء چک نمبر 103 جنوبی۔ ایہناں دا پنجابی مجموعہ ”سد
دراگ دے“ چھپ چکیا اے۔ نمونہ کلام:-
میرے اندر دو نہہ شیاں دی جنگ ہمیشہ جاری اے
اک ہے چائن دا چکارا اک جاگیر ہنیرے دی

سردار علی شاہین

جمن 1941ء انبالہ، نمونہ کلام:-
بے قدراں دی یاری کولوں چنگے رُکھ جنگل دے
اختر وچ حیاتی اوہ وی ویلے تے آ ملدے

عاشق صحرائی

جمن 1941ء چک 27 جنوری۔ اصل ناں عاشق حسین آہ۔ اخلاقی

شاعری کر دے نیں۔ نمونہ کلام:-

مطلب سیتی لوک پاندے ویلے مونہہ کھنڈ
نکلی غرض تے سچی دس کے کبھی مارن چنڈ

ڈاکٹر خورشید رضوی

جمن 1942ء امرہ بھارت۔ صرف اردو دیاں دو کتاباں چھپ گیاں
نیں۔ شاخ تنہا، سراہوں کے صدف، پنجابی حالی تائیں نہن چھپی۔ نمونہ کلام:-
لما پینڈا عمر دا کلم کلی جان
اچے نیویں سلسلے چنگے مندے حال

پروانہ شاہپوری

جمن 1942 شاہپور۔ ایہناں دیاں کجھ کتاباں چھپ گیاں آہن
”مٹھیاں پیڑاں“ تے ”سدھراں“ ناں نیں۔ نمونہ کلام:-
باگے وچ نہیں سدا بہار زنی ایہدے وچ رہنا سدا مالنا نہیں
ایس رُکھ سدا نہیں ہرا رہنا، رہنا شاخ اتے سدا آہلنا نہیں

ریاض احمد شاد

جمن 1944ء سرگودھا۔ شاعری توں وکھ ڈرامہ نگار وی نیں تے
سرگودھے دے پنجابی ادب وچ جان نیں۔

نمونہ کلام:-

توں ناں دوجی وار حیاتی دے سکیوں
اسیں تے لکھاں وار حیاتی تجدے رہے
ویلے دی کوہجھی ووہٹی نوں کج دے رہے
شاد اسیں نت گہنے بن بن سج دے رہے

غلام فرید ٹوانہ

جمن 1946 چک 92 شمالی۔ ایہناں نوں بیلیاں دھوکے نال نابینا کر
دتا۔ ایہناں دی شاعری سوز نال بھری ہوئی اے۔ نمونہ کلام:-
بے درد پیغام چوایا اے گل سُن کے قاصد ولایا
مغرور فرید نوں میں کیہ کرنا کدی کھوٹا پیسا وی چلایا

تریجا دور:- پاکستانی دور دے شعراء

ڈاکٹر عبد المنیب خالد

جمن 1948ء چک 26 جنوبی۔ ایہہ ہومیو پیتھک ڈاکٹر آہن تے
نال نال شاعری وی کریندے آہن۔ نمونہ کلام:-

لوکاں نوں کیہ دسناں کئے ماتم دم دے اندر نیں
جھوٹھیاں ہاسیاں دے نال اپنا آپ لُکائی پھرنا واں

غلام رسول

جمن 1949ء کوٹ مومن۔ ایہناں دیاں کئی کتاباں چھاپے چڑھ
چکیاں نیں۔ درد عشق، مقصود العاشقین، مرزا صاحبان۔
نمونہ کلام:-

شالا وچھڑن نہ بھیناں توں ویر سکے وچھڑ گئیاں دے درد ہزار سینے
بھائیاں باجھ نہ بھاندی چیز کوئی چُبن نت جدائیاں دے خار سینے

دوست محمد

جمن 1950 کوٹ مومن۔ ایہناں دی شاعری وچ سوز اے کجھ
کتاباں چھاپے چڑھ چکیاں نیں۔ باراں ماہ، پرانیاں یاداں، سی حرفی۔
نمونہ کلام:-

چڑھدے ساون سوہنے تائیں ایہو عرض سناواں
بھل نہ جاویں قبر میری نوں جے سکدا مر جاواں

اصغر شامی

1952ء بھلوال۔ کافی مشہور شاعر نیں ایہناں دی کتاب ڈونگھیاں
سوچاں چھپ گئی اے۔ نمونہ کلام:-

قسمت ماڑی ہووے تے مڑ سونا وی اے مٹی
چمکن لیکھ تے بن جاندا اے پتھر وی الماس

محمد اقبال ندیم

جنم 1952ء فروکہ۔ بزم فکر شعور دے ناظم اعلیٰ نیں۔ حرف آگہی
تے اکلا پالکھ چکے نیں۔ نمونہ کلام:-

تیریاں چٹھیاں تیریاں سانجھ سانجھ کے رکھنا واں
ایہو میرا ترکہ سارا یاد اے وسدے ویلے دی

محمد بخش میر

جنم 1954ء رحیم پور۔ ناپینا ہو گئے آہن چنگی شاعری کریندے
آہن۔ نمونہ کلام:-

پوے لوہر چٹھاں دیاں منیاں نوں وت حسرتاں نال دکھیندا اے
چنگا ہویا جے میر مگروں لتھا ایہہ مہناں روز سنیندا اے

محمد حیات بھٹی

جنم 1954ء کوٹ چوختہ۔ ایہناں دی شاعری حال دیاں سوچاں
دی عکاس اے۔ وڈے مشہور پنجابی شاعر آہن۔ جتھے وی مشاعرہ ہووے ایہہ
اس نوں لٹ لیندے آہن کافی شاگرد بنا لے آہن۔ اکثر دوہڑہ لکھدے
آہن۔ نمونہ کلام:-

وڈیاں بجتاں آلیا ساویا ککرا تیرے کدے گئے لٹکے چھاؤں دے
تیرے ٹھڈے سائے دی لوہ لے کے آ باندھے آہن ملکھ کداؤں دے

میں آدھا ہن کسے نہوں باہوناں رُخ پھر گئے جدوں خزاؤں دے
جدے وقت حیات نواؤ ہووے اج سجن ہن سجن اداؤں دے

ممتاز عارف

جمن 1954ء سرگودھا۔ ایہہ شاعری دے نال نال گلوکاری وی
کردے آہن ایہناں دی شاعری زیادہ تر حالات دی عکاس اے۔ نمونہ کلام:-
ڈھیری ڈھا کے بیٹھو نہ ایہہ نہیں ساڈی شان
اُٹھو! ظلم دے اگے بن جاؤ، اللہ دی تلوار

فراست علی فراست

جمن 1954ء فروکہ۔ فراست صاحب وڈے اُچے شاعر آہن
مٹھڑے بول لکھ چکے نیں۔ نمونہ کلام:-
جیہڑے رُکھ دی چھاں تے خلقت بہندی سی
ایسے رکھ نوں بھکھے رندے کھا گئے نیں
خان فراست دیس دیاں واسیاں نوں
نفرت آلی ڈور دے تندے کھا گئے نیں

غلام عباس چشتی

وفات 1989ء چشتی صاحب پیشے دے لحاظ نال استاد آہن۔ قصہ

سوہنی مہینوال شروع کیتا پر ادھورا ای چھوڑ کے اگلے جہان ٹر گئے۔ نمونہ کلام:-

چمکدار زلفاں خمدار زلفاں ابدار تے بے نظیر زلفاں
بہوں سچ کے دل نوں پیچ کراں کیہ غلام اسیر زلفاں
نین مست خمار آلود چمکن چڑھی کیف دی کانگ اچھل واہ واہ
کھلا مئے خانہ چلے پیمانہ رہیا دور سکون دا چل واہ واہ

غلام محمد درد

جمن کھوئی گورایہ۔ درد صاحب وڈے اُچے تے سچے شاعر آہن پنجابی
مشاعراں دی جان آہن۔ شعراں وچ کافی وزن ہوندا اے۔ لوک وڈے شوق
نال ایہناں نوں سندے آہن۔ نمونہ کلام:-

اج دے راکھے کمزوراں دے سرتوں لاہن دوپٹے
تنگیاں دے سر کجن والے مر گئے نیں سردار
انس کرن آلے لوکی رت اک دوجے دی پیون
سدھے درد دسیندے پے آہن قیامت دے آثار

دل صاف ہوون تے سنگ نہیں ترندے توڑے سجن کندھیا ہووے
کر ثابت بخت دے ہوندیاں وی کدی بھر کے پیتا ہووے
اللہ پاک نہ بخشے تیں چن دا گلہ درد جے کیتا ہووے
ایسے بندے نوں جگ بد نیتا دسدا جیہڑا خود بد نیتا ہووے

مہر نذیر احمد نظیر

جمن مڈھ رانجھا 1952ء مہر صاحب مڈھ رانجھے دیاں ادبی مجلساں
دی جان آہن۔ کاروان حیات ادب دے ناں نال ادبی تنظیم چلا رہے نیں۔
نمونہ کلام:-

کیڈی گل ایہی آونجے سن کے منتاں زاریاں
آسنجھالے نظیر اوہ آپ اپنی سرداریاں
آیا تے حسرتاں دے باغ سارے کھڑ گئے
رُ گیا تاں اس دے پچھوں ہور قصے چھڑ گئے

نور الہی کاوش

جمن 1954ء شاہپور شہر۔ کاوش صاحب پیشے دے لحاظ نال استاد
نیں ہائی سکول شاہپور وچ پڑھا رہے آہن۔ نمونہ کلام:-

سسئیے روہی تپدی وانگ تندوراں دے
ننگے پیریں اون توں پہلاں سوچیں آ
بن بدلاں دے ساون جھم جھم وس پوسن
اکھیں کجلا پاون توں پہلاں سوچیں آ

شفیق مخنی

جمن فروکہ 1954ء اصل ناں محمد اکرم اے۔ اپنے علاقے دے

مشہور شاعر آہن۔ نمونہ کلام:-

ماں دھرتی دا پیار تے خشبو گھٹ تے نہیں
لوکی کیوں اسمان تے اڈنا چاہندے نیں

سید احمد چنابی

جمن مُڈھ رانجھا، چنابی صاحب پنجابی وچ نظم گیت۔ ماہیا تے
دوہڑے لکھدے نیں۔ نمونہ کلام:-

تک رکھ نہیں کہیں دیاں بختاں دی ہوندى آس بیگانی کائی نہیں
کدی تلخ حالات وچ دکھیاں دی کسے سر تے گڈھڑی چائی نہیں

حسرت جعفری

جمن 1955 بھیرہ، اصل ناں محبوب حسین اے۔ غزل تے نظم چوکی
لکھی اے۔ نمونہ کلام:-

رائجھے وانگوں حسرت نے جد حال فقیری کیتا سی
جوگی دی عین جوانی اُتے الہڑ ٹیاراں رو پئیاں

تنویر ہاشمی

جمن 1956ء ہانسی بھارت، اصل ناں اجمل حسین اے انبالہ کالج
وچ پڑھاندے نیں۔

نمونہ کلام:-

چانواں تے سدھراں دی کلی آس دا دیوا بلدا
دے کے رت جگر دی یارو اس نوں پیا جگاواں

طفیل ثاقب

جمن 1956 لقمان، انبالہ مسلم کالج وچ لائبریرین نیں ادب نال
کافی پیاراے۔

محمد امیر

جمن 1955 سلانوالی،

نمونہ کلام:-

یاد تیری نیں گھلیا مینوں آیا آں قاصد بن کے
امیر رو کے پچھدا اے کدوں ولسو یار وطن تے

احمد نواز زخمی

جمن چک 73 جنوبی،

نمونہ کلام:-

کتھوں کتھوں جان چھپاواں
چارے چنڈاں ملیاں چوراں

غلام حسین جاوید

جمن 1956ء ترکھانا والا، نمونہ کلام:-

میں خوشیاں توں مونہہ موڑ گیاں تے رت دا سونا چھوڑ گیاں
جس نوں بجن سمجھ کے گل لایا او سے توں ہتھ کروائی بیٹھاں

ڈاکٹر محمود اسیر

جمن 1956ء سرگودھا، جناب محمود اسیر ہوراں ہک کتاب سخن وراں

سرگودھا دے ناں نال چھاپی اے۔

نمونہ کلام:-

اج دی رات تے لنگھ جاوے گی
کل دی رات دا چارہ کریئے

محمد افضل نصرت

جمن 1957ء مانکے والا،

نمونہ کلام:-

تیرے پیراں تے ہتھ رکھ بیٹھاں کجھ کر چا شرم حیا اے
میں کتنی واری ہتھ جوڑے نہ اتنا جوش دکھا اے
تیریاں طعنیاں توں تنگ آ کے مر وییاں موہرا کھا کے
تیری ہستی اے بہوں بھاری سائیں نصرت وزن دا پا اے

مولوی نذر محمد نذر

جمن 1957ء مانکے آلا۔ نمونہ کلام:-

گل اس نوں نذر معلوم ہوندى جس دی گل وچ لُج ہووے
ہوندى یار پیار دی قدر اُس نوں جس نوں ریت پریت دا چُج ہووے
اُس حاجی نوں حاجی میں سمجھاں جس دی یار نوں ملیاں جُج ہووے
سچے عاشق آدھے گج وچ کے جیہڑی کل ہونی او اج ہووے

ظفر اقبال ڈوگر

جمن 1957ء راولپنڈی۔ نمونہ کلام:-

باغ اجاڑیا سے نہیں
جس نوں رکھیا سی رکھوالی تے

محمد اسماعیل

جمن 1958ء مثیلہ ہرلاں۔

نمونہ کلام:-

ہک تھل دا راہ دوجی گرم ہوا سسی تن تنہا اتھے آ گئی
کرے کھوج پنن دے وچ صحرا تنہا گھبرا گئی
اُس ناز ادا دی پتلی نوں عشق دی بھا کر ساہ گئی
اسماعیل میاں سسی وقت قضا ہم لُج دے تاک بھنوا گئی

محمد مشتاق

جمن 1958ء سیکس بار۔

نمونہ کلام:-

خدا توں بعد جیہڑی ہستی جہاں تے مقدس اے
اوہ ہک ذات محمد اے زمیں تے اسمان اتے

صابر سودائی

جمن 1958ء فروکہ۔ ایہناں دی ہک کتاب تین سمندر دے ناں تے

چھپ گئی اے۔

نمونہ کلام:-

اپنا یا بیگانہ ہووے صابر کہیں تے وسناں نہیں
سو واری میں ڈنگیا ہویاں مٹھیاں مٹھیاں باتاں دا

بشیر احمد ندیم

جمن لکسیں، نمونہ کلام:-

اس دی اکھ ناہی لگدی میری سک ناہی لاہندی اساں اکھیں چوں رات ٹپا چھوڑی
ایہناں بھونیں تے لفظ اجازت لکھنا وت آپ ای اوہ مٹا چھوڑی
اوہدے مکھ تے زلف آ جھڑکرتا اساں پیار دے نال ہٹا چھوڑی
اسے وقت دا گھیرکا باہناں جنڈن دی ذات ندیم بھلا چھوڑی

فخر اللہ شاہ

جمن 1963 چک نمبر 23 شمالی۔

نمونہ کلام:-

توں کیہ جانے اڑیا محبت دی ریت نوں
جان دے نیں پیار والے گھنجڑی پریت نوں

محمد سعید

1963ء ناچک 52 شمالی۔

نمونہ کلام:-

اس سعید دی پوسی پوری رب دی ذات ختم کریسی دوری
میں کملی دا منٹھار وے ماہی مینوں ونگاں پوا

محمد اشرف بسل

جمن 1963ء کوٹ مومن۔

نمونہ کلام:-

تنہائی دے ڈونگھیاں سوچاں ہن یاداں دا تپدا تھل اے ہک
میرے سینے ساں لکیاں ہن اکھیاں دے جل وچ جھل اے ہک
گل راز دی کرساں راز دے وچ ہک گل وچ سو سودل اے ہک
خودی وانگ اقبال اجاگر کرساں میری پختہ بسل گل اے ہک

محمد اصغر سندھو

1965ء سلا نوالی، نمونہ کلام:-

کتے سوہنے لگدے اصغر
جد ہس دیاں بلھاں اُتے وں دیاں ہنجو

قاری محمد اشرف

جمن جان محمد والا 1964ء- نمونہ کلام:-

بندہ رب دا رب نے گھلیا
کوئی اگے کوئی کچھے

ڈاکٹر زاہد منیر عامر

1966ء سرگودھا۔ ڈاکٹر ہو ریں وڈے لکھیار آہن اج کل اور ٹنیل
کالج پنجاب یونیورسٹی وچ اردو پڑھا رہے نیں۔ بہوں ساریاں کتاباں دے
مصنف نیں۔ نمونہ کلام:-

اکلاپے دی اگ وچ پے کے آپے سڑدا رہنا واں
روز سویرے اُٹھ بہنا واں روز ای مردا رہنا واں

اختر علی چھینہ

جمن 1964 چک نمبر 34 شمالی۔

نمونہ کلام:-

ڈھلے بخت تے سجن وی کنڈ کر گئے ادھا سگویاں ہن تنہائیاں
حالات کیتا مجبور چاء چھینہ چائی ودھے آ سر تے آئیاں

جہانگیر منور

جمن 1969ء کوٹ مومن۔ نمونہ کلام:-

رُنیاں نیں اکھیاں اج ساری رات وے
کدی آ کے ویکھیں توں میرے حالات وے

محمد ظفر عاصم

جمن چک 23 جنوبی،

نمونہ کلام:-

چڑھی شام غضب دی بے کس تے دھمی اٹھدیاں نال لئی گئی
ویکھ کے اجڑی جھوک سجن دی سسی کملی ہو گئی
جھل جھل بھر وچھوڑے عاصم بکو جام صبر دا پی گئی
ناں خان دا جپدی رہ گئی سسی دنیا توں اٹھ گئی

محمد اعظم

جمن 1964ء کوٹ مومن۔

نمونہ کلام:-

بدکار آں پرلے درجے دا کیڈے رب سائیں بھرم بنائے نی
میری لکھاں دی کلی نوں رڑے تے رنگ وکھرے ملک توں لائے نی

محمد ممتاز آصف

جمن 1965ء۔ نمونہ کلام:-

ایہہ بخت تے ڈھل دی چھاں ہوندے سدا کوئی نہیں رہندے تھاہرے
کسے وقت وی ممتاز کم آویندے بچناں تے دتے ہوئے پہرے

نذر عباس گوندل

جمن 1965ء بن حبیب بھلوال۔ نمونہ کلام:-

اپنے اتھرو ڈک ڈک کے میرے ہسن لئی
کیویں زوریں ہس دکھایا میری امڑی

محمد یونس شاد

جمن جہان آباد، جٹکسی زبان استعمال کریندے آہن دوہڑا

لکھدے آہن۔ نمونہ کلام:-

لچال سداون سوکھا نہیں وکونڈیاں تن دیاں لیراں
سڑ ماس ویندا شوہدی ہڈیاں توں ہو ویندا حال فقیراں

نہیں سدھ بدھ راہندی دنیا دی آ ویندا وقت اسیراں
ہر حال اچ شکر دا کلمہ پڑھئے تاں ملدیاں شاد تو قیراں

محمد بشیر

جمن جھاوڑیاں، پیشے دے لحاظ نال ڈاکٹر آہن پنجابی زبان وچ
شاعری کریندے آہن۔ نمونہ کلام:-

اج یاد ایہناں دی نے آ کے کیتا دل نوں سخت بے چین ایں
کے کرے جد نیند نہ آوے محبوب دے سوہنے نین ایں

محمد صدیق تائب

تائب صاحب پیشے دے لحاظ نال استاد آہن۔ اوہ ہک چنگے منے ہوئے شاعر
آہن۔ شاعری دے نال نال ہک ڈرامہ نویس وی آہن۔ نمونہ کلام:-

ہر ساوی شے تہاڈے ٹرن دا سُن کے پئی اے نیر وہیندی
انہاں نیراں دیاں بن نہراں ولین وتیں غماں دے باغ رویندی
ہجر فراق دیاں منزلاں وچ ہک اچھی گھڑی اے آ ویندی
ہک ہنج اکھیں چوں نہیں آوندی چاہے کتنی رہوے اوہ روندی

خواجہ قمر الزماں دیپ

جمن شاہپور شہر۔ بزم گلستان ادب دی سیوا کر رہے آہن۔

نمونہ کلام:-

واہندے پانی وانگوں واپس نہیں آؤندے
کیوں بیٹھی ایں ملکہ راہواں نوں

ارشاد محمود مسائل

جمن شاہپور شہر۔ نمونہ کلام:-

غمزدہ ہک زندگی اے خوشحالاں دی بھیڑ وچ
ہاسے گم ہو گئے سسکیاں دی بھیڑ وچ

سیف اللہ صابر

جمن شاہپور شہر۔

نمونہ کلام:-

سلسلہ ساڈی محبت دا شروع ہویا جتھوں
ہے اے تائیں موجودہ اوہ درخت گواہی واسطے

سید محمد علی شاہ

فروکہ، قلمی ناں بسمل بخاری اے۔ نمونہ کلام:-

بد نظراں دیاں نظراں توں
بکل پیٹھ لوکائیاں ونگاں

لیاقت علی ساجد

جمن فروکہ۔ نمونہ کلام:-

تساں بختاں دے زور دل آئیاں سدا کریندے رہ او
ساڈے پھل جذبات تے نازک کلیاں پیراں پٹھ تڑیندے رہ او

محمد ریاض جانی

جمن ودھوالہ نزد فروکہ۔ نمونہ کلام:-

تسیں سجن پھل گلاب دے ہو وس خاراں دے پے گئے او
تھاڈا کم آ دلبر محلاں سچ رہنا ہن خاک تے رلدے پے او
بہوں چنگی اس بشر دی زندگی جیہندے کان زمین تے رہے او
سانوں جانی بالکل بھانڑا نہیں بہو اوپرا میوہ ڈھیے او

نذر محمد ناز

جمن ودھوالہ، قلمی ناں ناز اے۔ غزل نظم تے دوہڑہ لکھدے نیں تے
پولیس وچ ملازم نیں۔ نمونہ کلام:-

کہیں تے اج اعتبار نہ رہے
مخلص سنگی یار نہ رہے
ہر کوئی ناز غریب دا قاتل
دھرتی تے غم خوار نہ رہے

سرفراز نوید

جمن 1982ء پٹھان کوٹ نزد فاروقہ۔ زیادہ نظم لکھدے آہن۔ امید
اے کہ وقت دے نال کلام پختہ ہوندا ویسی۔ نمونہ کلام:-

نشے باز بھرا دا نہیں پیو دا نہیں ماں دا نہیں
پی پی اپنے ہوش گواندا اس نوں خوف خدا نہیں
اللہ دا گھر کیہڑے پاسے پتہ اس نوں راہ دا نہیں
کوڑ دے نال یارانہ جس دا اوہ انسان وساہ دا نہیں
چھانڑ نوید زمانہ ڈٹھا اج دا دور وفا دا نہیں
نفرت مول و نجاؤ لوکو پیار پریت ودھاؤ لوکو
ویراں نوں پے ویر مریندے سانگیاں دی لُج پاؤ لوکو
نکا وڈا گورا کالا اس دا فرق مٹاؤ لوکو
دولت دی پئی پوجا ہوندی رل کے ایہہ بُت ڈھاؤ لوکو
ہردی خیر نوید اے منگدا وسو کھٹو کھاؤ لوکو

سید ذوالفقار علی زلفی دا مزاحیہ کلام

جمن 1930ء علی پور سیداں نزد بھیرہ زلفی صاحب ریٹائرڈ فوجی
آہن۔ مجلس تنویر ادب دے سرپرست آہن ترے کتاباں چھپ گیاں آہن۔
”اکھ دے اولھے، وفا کی بارش، چٹی رت“۔ نمونہ کلام:-
ایہہ ویلا نہیں اونا وت مینوں ویکھ نہ چر خا کت

عزت پت دی کتھے خیر
کس دی کرسیں سرتے چھاں
رہے جے نہ آپے وچ
آؤن جس دے بھیڑے دن
قدرت مکو ٹھپدی اے
زلفی کوئی نہ اپنا فیر
جے کر ماری جاوے مت
ویہڑا جس دے کول نہ چھت
کچھ نہیں رہندا پلے و
راہ وچ بہندا پیڑی گھت
جے دی کوئی چکے ات
جے ہو جاوے چٹی رت

☆☆

چنگے ہوندے جیکر اوہ
روپ کسے تے رہوے کیہ
ساڑ کے ہر شے رکھ دیسی
عشق لئی نے کھو جے
بے شک ہووے رس بھریا
پھلاں ورگی صورت دی
رکھدے ہر شے دی کنسو
جتھے ہر شے نمبر دو
چلدی رہی جے انجے لو
ہاڑ مہینہ بھاویں پوہ
کچے پھل نوں کدی نہ کھو
ساری دنیا کردی رو

☆☆

جھوٹ جہناں نوں ونجے چچ
میں جاتا سی ہیرا جس نوں
لوکاں پیار دے گڈے چاڑھے
اوہناں وچ بندیا ئی کاہدی
قسمت ہووے چنگی جے کر
لہ لئی لوکاں منزل اپنی
سولاں پوڑ کے جیہڑے ہسدے
شالا کدی نہ جاون بچ
اوہ وی نکلیا اے کچ
میں ماری سی ایویں کھچ
جیہڑے بول نہ سگدے سچ
بھیڑی گل دی جاوے بچ
ہو کے مٹی دے گچ
زلفی ایہناں کولوں بچ

صدیق اختر

جمن بھاگٹا نوالہ، ایہہ مزاحیہ شاعری کریندے نیں تے سنجیدہ وی
کردے نیں۔ نمونہ کلام:-

اج کل نظراں ملاون دی ڈھل اے
چل ویندا میٹر تے من ویندا دل اے
کدی میتھو ریشم دے چھ سوٹ منگدی
کدی آدھی اج خمیرے تے دل اے
شامی اے اس شاپنگ تے آونا
میرے تاں بوجھے دا بیلنس وی مل اے
اوہ انج کر کے ویندی ڈیلی ڈیمانڈاں
جیویں اکبر دے اے دی نوٹاں دی مل اے

محمد اسلم بھٹی

جمن بھلوال۔ قلمی ناں اسلم بھلوالی، وڈی چنگی شاعری کر رہے نیں۔
نمونہ کلام:-

اوہ میتھوں پچھدا اے توں کتھے رہنا
ایہہ میری مرضی میں جتھے رہنا
تیرا میرا کوئی بنا سا جھا
توں اتھے رہنا میں اتھے رہنا

اوہ کول رہ کے وی دور دسدا
میں اولھے بہہ کے وی سوچیندا رہنا

اصغر شامی

جمن بھلووال، اصغر شامی ہوراں شاعری راہیں اپنے فن دا لوہا منوا

لیا اے۔

نمونہ کلام:-

گل من نی نخریلے اڑیے نی
آ عشق دی سولی چڑھے نی
کوئی نواں فسانہ گھڑیے نی
آ نال سماج دے لڑیے نی
میرے دل دا باگ اجاڑیا توں
مینوں رنگ پریم دا چاڑیا توں

توں آخر مکھ وٹاناں ایں
من رانجھے وانگ رلاناں ایں
شامی لکھ واری ازما بھاویں
مڑ گلیاں وچ رلا بھاویں

ممتاز حسین

جمن 1949ء سلکی، قلمی ناں ممتاز بلوچ، ناصر ادیب نال رل کے فلمی دنیا وچ کم کیتا چنگے شاعر آہن۔ نمونہ کلام:-

ویلے دے خونی ہتھاں نے سنگھی میری گھٹی اے
جے کہیں چھیتی خبر نہ لئی تاں سمجھو میری چھٹی اے
نیا اے چناں رات دا راجہ ایں نفرت نال نہ مینوں ویکھ
جیڈی رات وی لمی ہووے اوڑک نوں پوہ پھٹی اے
لنڈے دے سردار لبھے گہنے وی کجھ گھلو آ
پہلاں وانگ دھی کیرے دی اج وی کنوں بٹی اے
میرے دل دا پنوں خبرے کیہڑے سچ دا واسی اے
میری سوچ دی سسی اوہنوں لبھ لبھ تھکی ہٹی اے
شام نوں جد ممتاز بلوچا لہو دے بدل چڑھدے نیں
انج لگدا اے ظلمی سورج کہیں دی چادر لٹی اے

محمد نذیر نذر

جمن 1963ء گرنا پٹھانا، نمونہ کلام:-

ڈھولا رہ پو اج دی رات سویرے ٹر جاویں
کائی پیار دی کر گل بات سویرے ٹر جاویں
کیہڑی کالھ ای وُجن دی دس ڈھولا

مینوں کر نہیں انج بے وس ڈھولا
وت ملنا نال برات سویرے ٹر جاویں
کائی پیار دی کر گل بات سویرے ٹر جاویں

عنصر اقبال عاطف

جمن 1969ء چک 23 جنوبی۔ نمونہ کلام:-

کوئی حیا ملن دا کر ماہیا
میرا چوکی بھاگٹ گھر ماہیا
چوکی بھاگٹ دنیا جان دی اے
ایہہ زینت پاکستان دی اے
چوکی بھاگٹ نہیں کچھ دور اے
مینوں آویں ملن ضرور اے
نہیں تا ویسی عاطف مر ماہیا
میرا چوکی بھاگٹ گھر ماہیا

میاں سلطان سگو

نمونہ کلام:-

سبحان اللہ واہ صفت خدا وند دی کدے گئے رنگ بہاراں دے
بلبل بھور اداس پھرن کال سیر کرن گلزاراں دے

کھوتے آ میدان کھلوتے تازی تلے بھاراں دے
اڈ گئی بو حلالیاں دی ہبکار آون مرداراں دے

مظہر محمد آزاد

جمن 1966ء چک موسیٰ نزد جھاڈریاں۔ آزاد صاحب دی شاعری
کافی پختہ ہو گئی اے۔ دوہڑہ بہوں چنگا لکھدے آہن۔ نمونہ کلام:-
جداں دھوڑا ہی میتھے بختاں دی اوہ میرے سر تلے رکھدے باہیں آہن
شالا مظہر جے لگدے نت پے آون ایہو منگدے روز دعائیں آہن
جداں بخت ڈلانا تاں علم ہویا اوہ لگدے مطلب تائیں آہن
میرے وقت ایچ ساتھوں مل گئے آہن جیہڑے مال تے زردے سائیں آہن

سکندر حیات اسد

جمن 1968ء چک موسیٰ۔ اسد صاحب پیشے کے لحاظ سے استاد ہیں۔
دوہڑہ اچھا لکھدے نیں۔ نمونہ کلام:-

دے جھوٹھیاں یار تسلیاں سن پر دیس چا ڈیرے لائے نی
ہوندے بجن دلاں دیاں ٹیکاں چن سچ قول کسے فرمائے نی
لٹ چین امن ساڈی زندگی دا گلے لوکاں توں کردائے نی
پئی خلقت اسد توں چکھدی اے کیوں لگدے ملن نہ آئے نی
مینوں طعنے دے کے غربت دا کیتی بچناں عقل دانائی نہیں

ایہہ رنگ اہن قادر مطلق دے ہوندی قسمت نال لڑائی نہیں
میں من لیاں سنجی غربت دی اج عزت جہان تے کائی نہیں
جیندے اسد حلالی ہوں ویدھے ایچ جھک دی روشنائی نہیں

اقتیاز رضا شاد

جمن 1968ء جھاؤریاں۔ دوہڑا اچھا لکھدے آہن۔

نمونہ کلام:-

صداں بخت دے سائے نہیں سرتے رہندے آویندی اے دھپ شاہاں تائیں
ایہہ سنگ سنگتاں ہن عارضی ٹیکاں ہوندے مان فقط چند ساہاں تائیں
رج دیندے دھیراں توڑ دیاں گھٹ ٹردے توڑ دیاں راہاں تائیں
ودا کنڈ سبز پیندا لگدیاں دی ایہہ دنیا شاد فناہ تائیں

راجہ غلام مرتضیٰ

جمن 1973ء جھاؤریاں، راجہ صاحب وی دوہڑا لکھدے نیں۔

نمونہ کلام:-

آہی محض غربی تان وی خیر آہی وڈی چنگی بھدی پئی آہی ٹھاٹھ ایچ
لگے پھیر مقدران انج ہو کے مُڑ ہتھ مونہہ کر گئے گھاٹے ایچ
وڈی شوقاں نال تان رل گئے اوہ تسی وسدی سنگت دی ہاٹھ ایچ
مندے وقت ایچ راجہ چھوڑ ونجناں نہ ہوندی فطرت راٹھ ایچ

ڈاکٹر جاوید آغا

جمن 1975 جھاڑیاں۔ ڈاکٹر صاحب اصل وچ اردو دے شاعر
آہن ”پریشان کر گیا کوئی“ چھپ گئی تے ذائقہ بدلنے واسطے پنجابی شاعری کر
لیندے ہن۔ نمونہ کلام:-

پڑھ سگیا کوئی نہ اجڑیاں اکھیاں نوں
چُپ دی بکل سارے عیب چھپا گئی اے

عابد حسین جمن بن حبیب بھلوال

قلمی ناں عابد گوندل ورتدے نیں۔ صحافی تے نغمہ نگار نیں۔ فلمیں
”اک دھی پنجاب دی، برگر فیملی، لال پراندہ“ تصانیف، کبھی چاند پورا نہ ہوا۔
نمونہ کلام:-

منزل دی انجانی اپنی
راہ کراہ دس سانوں

جے اس راہ وچ توں دے دیویں
لکر دی چھاں تے سب منن توں رب سائیں

محمد رمضان عاقل

جمن نوشہرہ کھوکھراں۔ دوہڑے لکھدے آہن۔

نمونہ کلام:-

ساری ہوندی اے کھیڈ مقدر راں دی ساڈے ربو ای بخت ڈولا گئے
جیہڑے کل تائیں بانہہ تے سوندے آہن اج اوہ ای مونہہ پرتا گئے
آپو جان تاں غلطی کاٹی ناہی کیتی اوہ پتہ نہیں کیوں چت چا گئے
عاقل بس بن شغل گیا، سانوں ملکھ دے مہنے کھا گئے

صابر سودائی

جمن فروکہ۔ اصل ناں محمد وارث، غزل لکھدے نیں۔ نمونہ کلام:-

ادباں آ لے جھولی بھر بھر جانڈے نیں
بے ادبے تاں ہتھوں خالی ہوندے نیں
جیہڑے اتھے جینڈے صابر ہوراں لئی
جگ تے اوہ انسان مثالی ہوندے نیں

ڈاکٹر وزیر آغا

ڈاکٹر وزیر آغا ساڈے ضلع دی ہک وڈی قد آور ادبی شخصیت ای نہیں
بلکہ ہک نواں اسلوب وی آہن۔ انہاں دیاں نظماں دے ترجمے دنیا دی کئی
زبانوں وچ ہو چکے نیں۔ نظم غزل انشائیہ تے تنقید ایہناں دے علمی و ادبی
اظہار دے خصوصی اضافے آہن۔ آغا صاحب نے اردو توں وکھ پنجابی وچ وی
شاعری کیتی اے۔ غزل وچ نیچر نوں اہمیت دیندے نیں۔ نمونہ کلام:-

ادھی راتیں کھڑ کھڑ ہسے ٹھنڈی ٹھار ہوا
فجریں بکل مار کے رووے زارو زار ہوا
گوریاں بانہاں تیر نہ سکن چھلاں مارے کانگ
کچے گھڑے دے وانگوں ڈولے بے پتوار ہوا
چتر پھگن یاریاں گنڈن آ گے ساڈے یار
چٹھن کچھ جد ہاڑ دا لگا ہو گئے یار ہوا

طاہرہ ردا

سرگودھا یونیورسٹی توں ایم اے اکنامکس۔

کوئی رُس جاندا اے تے جان دیو
اینویں رولا پاندا اے تے پان دیو
اس کو جھے نوں اسی تے کو جھا آ کھاں گے
اوہ سوہنا اکھواندا تے اکھوان دیو
ہر دور وچ بچے باغی ہوئے نیں
ویلا پہرے لاند اے تے لان دیو
بایکاٹاں تے زور آزمائی کیوں
ایڈے لائق ایہو تے امتحان دیو
اج گوا کے کل وی سانوں بھوگے
نکیاں نکلیاں گلاں دل وچوں جان دیو

لاج دی بکل ماری رکھیں
اپنا آپ سنبھالی رکھیں
پکیاں پیڈیاں اس دیاں تنداں
پونیاں کت سنبھالی رکھیں
سجن میرا آکھ گیا وے
میری لاج سنبھالی رکھیں
ہن نہ سد کسے نوں ماریں
ہن نہ وال کھلاری رکھیں

احمد غوث شاہ غمناک

باوا استاد محترم محمود شاہ ہاشمی دے ماموں آہن۔

نمونہ کلام:-

لے سنبھڑا باد صبا ونج دیویں شہر مدینے
ہجر فراق مینوں خاک رلایا چاہ ہويا ونج سینے
دیدار دا ذرہ ادھار نہ ہووے بھٹ پئے سال ورینے
غمناک دی عرض منظور ہو سبیاں سنیاں یار نگینے

ہک دھاڑے گورستاں گیا ام ونج ڈٹھی گور سجن دی
نال پیار ہزار بلاواں چماں خاک کفن دی

اوہ صمم، بکمم، چپ ہو ستے لاه تاہنگھ وطن دی
غنناک خزاں دے باگ وچوں جیویں بلبل تاہنگھ چمن دی

غیر مسلم شعرا

تقسیم ملک توں پہلاں اتھے کافی ہندو تے سکھ پنجابی شاعر اہن پر
ایہناں بارے کافی محنت دی لوڑ اے۔ اس ویلے بھیرہ ای سرگودھے دا وڈا شہر
اہ تے اتھے ای شاعر وی آہن ایہناں دے وچوں کجھ ناں ایہہ نیں تے
ایہناں دا نمونہ کلام وی اے:-

اشیر داس بسمل

نابینا شاعر نیں۔

نمونہ کلام:-

دل اے ڈاڈھا دکھی ہویا ہجر تیرے دے اندر
تیری مورت نال سہاوے من میرے دا امندر

چونی لال وج آزاد

نمونہ کلام:-

جیہڑے لوکی جے جے سیتا رام نیں ہر دم گاندے
سچ آکھے آزاد ایہناں دے پاپ سبھے جھڑ جاندے

رام چیتن

نمونہ کلام:-

رام دیا لو دیا کریندا ہر پل ہر دے اُتے
ہر دی آس کرے اوہ پوری کیا آدم کیا کتے

بھیرہ شغل پنجاب دا حاکم نا معقول
کتے بیہن چبوترے بھیداں بھرن محصول

راج سنگھ

جنم 1839ء پیل م 1922ء چوکی بھاگٹ۔

اس دیاں کافی کتاباں چھاپے چڑھیاں آہن۔ نقارہ کوچ، سی حرنی

راس، بے رحم ناگ۔ نمونہ کلام:-

کیوں نہ دنیا وچ ابرو ہوسی

پکڑ لئی جس نے نیک چال میاں

راج سنگھ مزار کر تیار پہلے

پچھوں دلبراں نال پا پیار میاں

پریتی رام

جنم نامعلوم، مرگ 1940ء۔

نمونہ کلام:-

جے ہندو کہاواں تے مسلمان نہ رہاں
جے مسلمین کہاواں تے ہندو نہ رہاں
میں تے دوہاں دے وچالے رہاں
رام دی گل لئی ہر اک دے کول بہاں

شیر سنگھ

جمن 1855ء کالرہ مرن 1945ء۔ شیر سنگھ نوں راقم نے وی چنگا
بھلا ویکھیا اے۔ اوہ ہر گل ماہیے نال کریندا آہ۔ شیر سنگھ عمر حیات ٹوانہ دا بلی
آہ تے اس دے وظیفے تے ای گذر اوقات ای۔ اس نوں ماہیا آکھن تے عبور
آہ۔ موقع محل دے مطابق ماہیا بنالیندا آہ۔

مثلا ہک واری میں ویکھیا کہ اس لاری اُتے چڑھنا آہ تے پیسے تے
ایس کول ہوندے ای کوئی نہیں۔ اس ڈرائیور جس دا نام رام سنگھ آہ دے کول
ونج کے آکھیا۔

کولے وچ دہی ماہیا

پتہ نہیں رام سنگھ لاری تے چڑیسی کہ نہیں ماہیا
رام سنگھ نے سن کے آکھیا آونج۔
ہک واری چھوہراں نوں انج کر کے مت دتی:

ساوی رینڈی آ
ہٹ ونجو چھوہروں کھوتی لت مریدی آ

پانی پیتا نیں
ساڈا دل کھس کے پتہ نہیں کہس راضی کیتا نیں

کالے کاں ماہیا
جہناں گھر پیسے، اُچے ایہناں دے ناں ماہیا

پرسا رام

جنم 1923ء چک 23 جنوبی م 1946ء۔ نمونہ کلام:-

گلہ شکوہ اس دی ذات دا نہ کریئے
جیویں آوے انجیں چا گزارئیے جی
دُکھ ہووے یا نہ ہووے سکھ دی گھڑی
ہر ویلے نام اسی دا پکارئیے جی

لالہ سوہن لال انگر

ایہہ اردو دے شاعر سن۔ کافی بڑھے ہو چکے آہن سوڈا واٹر دی دوکان
تے کم کردے آہن۔

نمونہ کلام:-

ہندوستان کے حُسن کی عظمت اسی سے ہے
قربان کیوں نہ جائیے اس بت کے حال کے
آخر وہی نجات کا سامان بن گئے
قطرے جو تھے میرے عرق انفعال کے

بے نقطہ خط دلپذیر

اول حمد الہ العالم واحد اک اکارا
مالک ہر مالک دا مالک ڈردا عالم سارا
دوم درود محمد سرور دم دم ورد ہمارا
کامل مرسل کامل مرسل واہ سردار سوہارا
حمد درود الا کر گولاں واہ گوہر دلدارا
آکھ سلام دعا لکھ گھلدا حال ملال آوارہ
ہر دم حال کو حالہ کردا رلدا درداں مارا
محرم حال بکو اوہ اللہ اس دا وڈا سہارا
اللہ بک اساڈا راکھا کوڑا ہور دھارا
سدا کرم دا کھلا دسدا اس دا بک دوارا
واسطہ اس دا واسطہ اسدا او صالح کردارا
آ اک وار وکھا دلدار ماہ ولا لسکارا

مکمل روح اداس دما دم کردا کوک ککارا
 کر اک وار کرم دس آ کر سدا مکھ دلارا
 ڈگا رکھ اساڈا سکھ دا کھا کر درد ہولارا
 لگا ڈکھ اموڑا ولا کر دارو سردارا
 وگدا سل سو لاک المدا لگدا ڈاڈھا کھارا
 مرہم وصل لگا کر ساڈا گھر کرو ہموارا
 دل سکدا اس حرص و ہوس دا کرو سوال گوارا
 موڑ مہارے کو وار گدا دل واگ ولا اسوارا
 آ مکا اوہ آمد والا دور دورا ڈکارا
 آؤ گل لگاؤ ملو سئو کوڑا لارا
 دار مدار وسار دلارا و دلدا دلارا
 کرا کرام کرم سردارا اس و ملدا وارا
 داد مراد ودا دلدارا کر امداد مدارا
 وسدا رسدا ہسدا ہسدا آ مل اس گدارا
 اوڑک کر مسدود مراسلہ مرسل مددگارا
 دلدا لکھ مسودہ اس دا سودا عدم اودھارا

رام داس چھٹاکی

ایہہ جھاوڑیاں رہن آلاسی۔ کدی برما لگا ویندا کدی آ ویندا۔ اس دا

پتر جگدیش چندر راقم داجماعی آہ اس دے چند شعر کجھ انج ذہن وچ آہن۔

ہو حکومت اپنی ہندوستان سونے دی چڑیا
جو ہو حکومت غیر دی ہندوستان مٹی دی پڑیا

ہندو ہندی ہندوستان
ساری چیزاں دا بکو ای ناں

رام لبھایا طائر

ایہہ شاہپور شہر دے رہن الے آہن۔ آزادی تے کانگریس دے گیت
لکھدے آہن۔

چینا انج چھڑیندا یار
کیتا آزادی دا پرچار

اوہی حق ضلعے وچ اسی منگدے آں
جیہڑا حق حاصل گوریاں نوں اے ضلع دے اندر
اشفاق احمد بالی جمن 1977ء جہان آباد۔ پی۔ اے ایف کالج وچ انگریزی
دے اُستاد آہن

سرتے تاج تے گل وچ لیراں ڈٹھیاں نیں
اک بندے دیاں کئی تصویراں ڈٹھیاں نیں

گہنے ماں دے پگ پیودی لٹ کے تے
رات وچالے ٹر دیاں کئی ہیراں ڈٹھیاں نیں
ضیاء علوی جمن 1940ء بھیرہ اصل ناں تصدق حسین 2012ء وچ فوت
ہو گئے

مزل دی نفاست وچ مڈر دی قیادت وچ
دلیل کبریا بن کے ختم المرسلین آئے
☆☆☆



لکھاری:-	کتاب:-
ولی اللہ خان	گندھارا
جاوید گنجھیرا	پھل کڑا نہ بار دے
ابوشاہین فاروقی	تاریخ بھیرہ
محمد امین المعروف دلپزیر	انشائیے دلپزیر

ارشدمیر	شادی بیاہ دے گیت
سید ابوالہاشم ندوی	ترک تیموری
بلال زبیری	تاریخ جھنگ
ترجمہ مولوی احمد علی رام پوری	ترک جہانگیری
مظہر السلام	لوک پنجاب
تنویر بخاری	پنجاب کے لوک کھیل
محمود اسیر	سخنوراں سرگودھا
احمد غزالی	وادی سون سکسیر
احمد غزالی	ساندل بار
عزیز ملک	پوٹھوہار
چوہدری محمد حسین قسمت	پنجاب کے دیہات
تنویر بخاری	جمن مرن دیاں رسماں
گلاب سنگھ	ضلع شاہپور
مجید افضل پراچہ	عام واقفیت برائے ضلع شاہ پور
فیروز خان نون	چشم دید
مولانا غلام رسول مہر	سر عمر حیات ٹوانہ
امیر بخش خان ٹوانہ	تحفہ امیر
محمد اقبال	تحریک پاکستان اور سرگودھا کی یادیں
زاہد حسین انجم	پاکستان میں اول اول

تاریخ پنجاب	احمد ریاض الہدیٰ
قدیم تاریخ پاک و ہند	بشیر احمد و احمد ریاض الہدیٰ
خضر حیات ٹوانہ	این ٹالبوٹ
پاکستان کے دہ خدا	اے آر شہلی
آوان کاری	پروفیسر شاہین ملک
سرگودھا میرا شہر	مجلہ عشرہ ترقیات بلدیہ سرگودھا
ساوے پتر	موہن سنگھ
لہندی شعر ریت	پروفیسر شاہین ملک
پنجابی نامہ	ارشاد احمد پنجابی
پھلاں دا ہار	منظور علی ہاشمی
سیاست دانوں کی قلابازیاں	وکیل انجم
اردو زبان کی قدیم تاریخ	عین الحق فرید کوٹی
مذہب کا تقابلی مطالعہ	غلام رسول

The People Of Pakistan By Gankovesky.

Gazetteer of The Shahpur. District 1897 By J. Wilson.

زبانی معلومات

محمد بخش صاحب سیکسر وادی سون
کریم بخش صاحب چٹہ
افتدار الحق صاحب امب شریف
منظور علی ہاشمی، نواں کوٹ نزد مڈھ رانجھا
ملک محمد سرور صاحب، نوشہرہ
فرزند علی، نہنگ (پنج پیر)
قاری محمد ابراہیم، میانی گوند پور
باوا محمود ہاشمی صاحب، شاہپور صدر
عنایت اللہ صاحب، بکھر بار
ابوشاہین فاروقی، بھیرہ
محمد نصیر صاحب، احمد آباد
استاد ناصر احمد صاحب، بٹی بلوچاں
ڈاکٹر جاوید آغا صاحب، بھلوال
اشفاق احمد بالی صاحب، سرگودھا
خواجہ محمد سلیم صدیقی صاحب، جھاؤریاں
حاجی ظفر عباس صاحب، جھاؤریاں
پروفیسر پیرزادہ احمد حسن، گنجیال

مہر نذیر احمد نظیر، مڈھ رانجھا

حافظ محمد بخش صاحب، کفری

استاد فضل کریم صاحب، کالہ

حبیب شاہ صاحب، ماڑی

ڈاکٹر احمد حسن دانی صاحب، اسلام آباد

ڈاکٹر محمد سلیم صاحب، اسلام آباد

ڈاکٹر سیف الرحمن ڈار، لاہور

ڈاکٹر عبدالرحمن صاحب، پشاور

ڈاکٹر محمد اقبال بھٹہ صاحب، لاہور

میاں مقبول حسین صاحب، لاہور

مجیب خان صاحب، لاہور عجائب گھر

ڈاکٹر محمد صالح طاہر صاحب، جوہر آباد

ملک احمد نواز صاحب، کھوڑہ

حیاتاں بی بی، جھاڑیاں

صاحب خاتون، جھاڑیاں

استاد نور محمد صاحب، جوہر آباد

ظہیر پراچہ صاحب، لاہور

مشتاق باسط، جھاڑیاں

سائیں اللہ دین، جھاڑیاں